

吳曾祺編

清史綱要

下冊

商務印書館發行

吳曾祺編

清史綱要
下冊

商務印書館發行

清史綱要

卷九

嘉慶元年丙辰。正月戊申。舉行授受大典。帝侍太上皇帝詣奉先殿堂子行禮。

太上皇帝御太和殿。親授帝寶。帝跪受寶。太上皇帝受賀畢。還宮。帝卽位受賀。奉太上皇帝傳位詔書頒行天下。覃恩有差。是日。帝侍太上皇帝詣壽皇殿行禮。

辛亥。帝奉太上皇帝命。冊立嫡妃喜塔臘氏爲皇后。帝侍太上皇帝御寧壽宮皇極殿。舉行千叟宴。

壬申。湖北枝江宜都二縣白蓮教聶傑人張正謨等糾衆滋事。命惠齡勦之。白蓮教者。奸民假治病持齋爲名。造作經咒。惑衆斂財。而安徽劉松爲之首。旋被捕。遣戍甘肅。復分遣其黨劉之協。宋之清。授教傳徒。徧川陝湖北。日久黨益衆。遂謀不靖。倡言劫運將至。以同教鹿邑王氏子曰發生者。詭明裔朱姓。以煽動流俗。事覺。各伏辜。王發生以童幼免死。戍新疆。惟劉之協遠颺迹之河南扶溝。不獲。於是有旨大索。州縣吏奉行不善。逐戶搜緝。奸民乘機煽惑。而亂作矣。

己丑。帝御乾清門聽政。自是以爲常。

庚寅。命宥明亮舒亮安慶罪。效力湖南軍營。

三月。湖北當陽縣教匪聚衆戕官。命西安將軍恆瑞率滿洲兵二千往勦。

聶傑人就擒。襄陽人姚之富。與教首齊林之妻王氏復起。

四月辛巳。命直隸提督慶成率兵二千名。往河南南陽堵勦湖北教匪。

以勦來鳳縣小坳匪功。晉孫士毅三等男爵。

己亥。福康安奏攻克石岡山梁石城。苗匪吳隴登投誠。

庚子。賜趙文楷等一百一人進士及第出身有差。

五月壬戌。帝侍太上皇帝秋獮木蘭。戊辰。駐避暑山莊。

壬申。大學士閩浙總督貝子福康安卒於軍。晉贈郡王。予諡文襄。福康安奉命征苗。督七省官兵。與苗相持一年有餘。始既奏么麼不足數。及老師曠日。則頻以暴雨山潦漲阻爲辭。而餉道崎嶇。先後益兵數萬。降苗受官弁百餘人。月給鹽糧銀者數萬人。旋撫旋叛。軍士中暑毒死日衆。數省轉輸。費巨萬計。

七月。大學士署四川總督三等男孫士毅卒。贈公爵。予諡文靖。以福寧署四川總督。辦理勦捕事宜。辛酉。湖南逆首石三保擒獲。解京伏法。旋又斬石柳鄧父子。及吳八月之子吳廷義等。

八月壬寅。四川總督一等伯和琳卒於軍。贈一等宣勇公。和琳久攻平隴不克。既死。以額勒登保代其任。

九月乙巳。帝侍太上皇帝還京師。

癸丑。命明亮鄂輝總統湖南軍務。

十月辛巳。贈征苗陣亡貴州提督花連布太子少保。予世職。花連布與劉君輔。並以健鬪爲苗所憚。號爲花虎黑虎。以討貴州銅仁苗戰死。

十一月。命董誥爲東閣大學士。管理戶部事務。

以傅恆兆惠福康安和琳。配饗太廟。

教匪渡滾河。逮永保治罪。以惠齡代之。

以平湖南苗匪功。封明亮爲襄勇伯。額勒登保爲威勇侯。德楞泰子爵。鄂輝男爵。

嘉慶二年丁巳。正月。明亮等奏擒獲首逆吳廷玉吳廷英等。

二月戊寅。皇后崩。

三月。董誥丁母憂。命劉墉爲體仁閣大學士。

四月。以京師缺雨。命刑部清理庶獄。

五月。帝奉太上皇帝敕諭。將册立貴妃鈕祜祿氏爲皇后。先封爲皇貴妃。

乙丑。以遲誤軍情。屢催罔應。革四川總督陸有仁職。拏交刑部治罪。旋免罪發往四川軍營效力。戊辰。帝侍太上皇帝秋獮木蘭。六月甲戌。駐避暑山莊。

李全王廷詔姚之富三股。由白馬石搶船偷渡漢江。革惠齡總統之任。與恆瑞慶成各爲領隊。聽候宜繇調遣。

閏六月。以攻克西隆州亞稿苗寨功。加吉慶太子太保。彭承堯太子少保。均賞戴雙眼花翎。

大學士王杰因痲疾不能入直。賞吳熊光戴衢亨三品銜。隨同軍機大臣學習行走。熊光任軍機章京。不爲和珅所喜。一日。太上皇帝宣軍機大臣不得。命召章京。惟熊光已上直。入對稱旨。次及同直章京戴衢亨。少頃。和至。太上皇帝語以二人皆練事。可在軍機大臣上行走。和奏熊光官小。不符體制。太上皇帝命加三品銜。又曰。其家貧。大臣例乘肩輿。恐力不辦。太上皇帝命賞戶部飯銀千兩。又曰。戴衢亨出身狀頭。官學士。在軍機日久。與吳某同。用吳不如用戴。太上皇帝曰。此豈殿試耶。和語塞。熊光在政府只閱月。竟爲和所齷。出爲直隸布政使。

湖廣總督畢沅卒。沅督湖廣。值苗氛方惡。而沅一意主撫。苗劫掠四出。邊無寧日。議者比之陳奇瑜。熊文燦。蓋沅本文士。兵事非其所長也。

八月己未。大學士公阿桂卒。予諡文成。阿桂在政府二十餘年。晚與和珅共事。遇事持正。及沒。和乃益橫。

丙寅。帝侍太上皇帝還京師。

九月。晉封勒保三等侯。以其攻克洞灑當仗苗巢。生擒首逆王囊仙等也。旋又晉封一等威勤侯。

甲申。命蘇凌阿爲東閣大學士。

己丑。命景安愛星阿馳往湖北勦施南教匪。

乙未。諭軍機大臣等。姚之富齊王氏尤爲教首中緊要之犯。明亮德楞泰總當確探二首逆蹤迹。專心設法擒獲。此外四川匪首徐天德王三槐羅其清冉文儔。責成宜縣。巴東匪首林之華覃加耀。責成額勒登保等。老木園匪首責成觀成劉君輔。安康匪首李金責成恆瑞慶成。彼此各辦各匪。不拘何路擒獲匪首。卽屬該處帶兵大員之功。何處任匪首縱逸。卽係該處帶兵大員之罪。將此各諭令知之。

十月丙辰。乾清宮交泰殿災。

辛酉。命勒保總統四川軍務。

十一月戊子。以保寧協辦大學士。

嘉慶三年戊午。正月。額勒登保奏首逆覃加耀就擒。

二月甲辰。勒保奏舒亮穆克登阿勦辦白巖山匪。疎防貽誤。請旨革職治罪。得旨。舒亮穆克登阿所有官職。全行黜革。作爲兵丁。留於軍營。效力贖罪。

以匪首齊王氏竄走渡江。革明亮職。交刑部治罪。

五月甲戌。帝侍太上皇帝秋獮木蘭。庚辰。駐避暑山莊。

六月。教匪高均德又竄入川境。革德楞泰職。

官軍逼匪三岔河。大破之。齊王氏姚之富皆隕崖死。帝以明亮等勦匪久。且未生擒首逆。不爲大功。各賞賚有差。

七月。額勒登保德楞泰逐羅其清於方山坪。擒之。移兵襲冉文儔於通江。斬之。川北兩巨股皆平。

羅冉旣平。王三槐謀犯陝。不遂。復合通巴諸股犯達州。勒保觀成舒亮等擊林亮功於梁萬間。斃之。其餘衆二三千。遁回東鄉安樂坪。與三槐合。詔書勒保老師養寇。勒保乃令貢生劉星渠往說之。三槐故狡譎。持兩端。恃前此出入軍中無忌。乃留星渠爲質。而自詣大軍。勒保遂以生擒首逆奏。帝乃下詔晉封勒保一等威勤公。並晉軍機大臣大學士和珅公爵。福長安侯爵。將士賞賜有差。復釋勒保弟永保於刑部獄。而三槐黨冷天祿仍據安樂坪。盡有三槐之衆。負嵎抗拒如故。

八月乙卯。革惠齡德楞泰花翎。以箕山匪復逼陝境故也。

庚申。革明亮興肇花翎。以匪竄至石泉故也。

九月癸亥。帝侍太上皇帝還京師。

十月戊戌。重建乾清宮交泰殿成。

十二月戊申。申禁各督撫年節進幣。並減各鹽政關差進幣十分之二。

嘉慶四年己未。正月辛酉。太上皇帝不豫。壬戌辰刻崩於養心殿。

詔行三年喪。天下臣民仍照舊例行。羣臣請以日易月。不許。

晉封儀郡王永璇爲親王。

召安徽巡撫朱珪來京。珪以禮部侍郎充經筵講官。皇子輩悉從問業。至是召還。自是國家有大政事。悉以詢之。

諭我皇考臨御六十年。天威遠震。凡窮荒絕域。無不指日奏凱。至內地亂民。如王倫田五等。偶作不靖。旬日立殄。從未有勞師數年。糜餉數千萬。尙未蕝事者。自末年用兵以來。皇考宵旰焦勞。迨至彌留。親執朕手。頻望西南。似有遺憾。若教匪一日不平。朕卽一日負不孝之咎。內而軍機大臣。外而領兵諸將。同爲不忠之臣。邇年皇考春秋日高。事從寬厚。卽如貽誤軍事之永保。嚴交刑部治罪。旋卽赦出。其實各路縱賊。何止永保一人。奏報粉飾。掩敗爲功。其在京諳達侍衛章京。無不營求赴軍。其歸自軍中者。無不營置田產。頓成殷富。故將吏日以縱兵養寇爲事。其宣諭各路領兵大小諸臣。戮力同心。刻期滅賊。有仍欺隱者。朕惟以嚴刑從事。

命改封惠郡王永璘爲慶郡王。

諭羣臣奏事不得另有副封關會軍機處。

奪大學士和珅戶部尚書福長安職。下於獄。交刑部議罪。

命成親王永理前任大學士署刑部尚書董誥兵部尚書慶桂在軍機處行走。

命儀親王永璇總理吏部。成親王永理總理戶部。兼三庫。

諭勒保著仍授總統之任。自惠齡以下皆受節制。

命保寧爲武英殿大學士。仍留伊犁將軍任。以刑部尚書慶桂協辦大學士。

以和珅二十大罪。宣示天下。賜自盡。以福長安扶同徇隱。定爲斬監候。秋後處決。大學士蘇凌阿以原品

休致。追奪和琳公爵。撤出太廟。吳省蘭李璜李光雲。皆以和珅私黨降黜有差。

授勒保爲經略大臣。賜以印信。所有各路帶兵大臣。及總督宜縣景安巡撫倭什布秦承恩高杞等。悉受

節制。

丁亥。追贈已故御史曹錫寶副都御史銜。因其曾參奏和珅家人劉全也。

召原任內閣學士尹壯圖來京擢用。以其前奏各省倉庫多有虧缺。爲敢言也。旋賞給事中銜。回籍侍母。

令宜縣解任來京。秦承恩回籍守制。承恩旋革職。交刑部審訊。

己卯。上大行太上皇帝尊諡曰法天隆運至誠先覺體元立極敷文奮武孝慈神聖純皇帝。廟號高宗。二月己丑。帝始御西廡幄次。引見官員。

壬子。諭士子文藝詩策內。於朕名上一字偏旁寫缺一撇一點。書作顯字。下一字將右旁第二火字改寫又字。書作琰字。其單用禹字炎字。俱無庸缺筆。至以前所刊書籍。凡遇朕名字樣。不必更改。自嘉慶元年以後所刊書籍。照此缺筆改寫。

奪和珅子額駙豐紳殷德伯爵。因查出和珅尙有謀爲不軌之意也。

三月丙寅。尊高宗純皇帝陵曰裕陵。

命慶桂爲文淵閣大學士。書麟協辦大學士。

召景安來京。以倭什布爲湖廣總督。

合州知州龔景瀚上堅壁清野議。經略勒保是之。命行於川東川北。次行於陝甘湖北各省。先後三四年。堡寨告成。教黨得以次銷滅。

額勒登保擊斬蕭占國張長更。因突攻冷添祿於岳池。適楊遇春穆克登布以勁騎二千至。一戰殲之。並殪敵數千。敘功晉封一等男。

四月。欽天監奏。四月初一日日月合璧五星聯珠。帝命不必宣付史館。

禁京城開設戲館。

癸丑。賜姚文田等二百二十人進士及第出身有差。

五月。命停止和闐採玉。

董誥服闋。授文華殿大學士。仍兼刑部尚書。

六月。以故琉球國王尙穆孫溫襲爵。命修撰趙文楷內閣中書李鼎元往封。

庚寅。定步軍統領爲從一品。左右翼總兵俱正二品。

七月癸亥。總兵朱射斗追包正洪於茅坪。斬之。賞騎都尉世職。

壬申。以勒保任經略半載有餘。於勦辦事宜。毫無調度。惟安坐達州。致教匪聚於楚省。日益猖獗。命革職。拏問。以明亮代爲經略。遣魁倫前往審問。卽授魁倫四川總督。

革景安伯爵。發伊犁效力。

八月。德楞泰生擒首逆襲文玉。賞騎都尉世職。

賞參贊大臣額勒登保都統銜。爲經略大臣。以廣興奏明亮挾詐營私。不足以勝經略之任故也。

釋福長安於獄。令往裕陵供捧茶之職。

勒保奏生擒首逆卜三聘。並各逆家屬。

定各省刑具式。有私創及非法濫用者罪之。

命工部尚書那彥成以欽差大臣赴陝西。督同明亮。勦辦張漢潮一股教匪。將慶成永保二人傳旨革職。拏問。時三帥不和。師久無功。故有是命。

辛亥。革翰林院編修洪亮吉職。命軍機大臣會同刑部審訊。亮吉上書成親王。指斥乘輿。有羣小熒惑。視朝稍晏語。成親王以聞。部議照大不敬律擬斬決。奏上。免死發往伊犁。交與將軍保寧嚴加管束。將軍希旨。奏請俟亮吉至。斃以法。先發後聞。得旨嚴飭不行。明年。京師旱。朱珪以亮吉爲言。乃命釋還。

蔣兆奎請各直省有漕州縣。每石加徵米一斗。津貼旗丁。帝不許。

九月。河南偃師縣民人楊道純條陳事件。軍機大臣以聞。帝善之。命以從九品未入流。交與直隸總督胡季堂差遣委用。

額勒登保奏斃逆首汪正澹。

治前湖廣總督畢沅結交餽送。法營私各罪。奪輕車都尉世職。

十月丁酉。以湖北襄陽道胡齊崙管理湖北襄陽軍需局。虧帑甚多。命卽處絞。

德楞泰奏勦除高家營匪。生擒首逆高均德。詔封二等男。授參贊大臣。

魁倫審訊勒保。定擬斬決。帝以其前曾立功。命改爲斬監候。旋賞給藍翎侍衛。帶兵贖罪。

命侍郎傅森在軍機處行走。

十一月。額勒登保進勦王登廷。徐添德於王家山。乾清門侍衛安祿中槍死。安祿。海蘭察子也。

免葉爾羌挑河回民。次年額徵普爾錢十分之五。

丙子。命文職三品以下京堂官照圓明園例輪班奏事。

十二月丙申。額勒登保奏生擒首逆王登廷。

嘉慶五年庚申。正月庚申。命長麟馳往陝西會辦軍務。慶成效力陝西軍營。

命松筠赴湖北勦匪。釋明亮。賞給金頂領催。隨同松筠帶兵贖罪。

甲戌。復翰林編檢等官輪班引見例。

二月。以匪擾川西。命德楞泰帶兵由廣元昭化赴川西。會同魁倫勦辦。

命明亮赴四川勦匪。

福寧以在旗鼓寨殺降。命前赴額勒登保軍營。作爲兵丁。效力贖罪。

褫湖廣總督倭什布翎頂。留軍營效力。旋復授湖北巡撫。

魁倫既受事。駐達州十餘日。而敵已裹脅數千。由定遠奪渡嘉陵江。衆至萬餘。成都重慶同時震動。敵渡

江。卽掠蓬溪。魁倫遣朱射斗阿哈保百祥。以兵三千進擊。約自率後隊三千繼進。及朱射斗兵二千追敵。

文井場被圍數重。衆寡不敵。魁倫擁兵不援。反回屯城內。射斗力戰死。百祥以千兵斷後。亦幾殆。射斗驍勇敢戰。爲敵所憚。至是以無援敗死。官軍奪氣。賊由蓬溪分掠南部。鹽亭射洪。鹽梟。啞匪皆入之。值冉天元生日。羣匪大會南充。置酒作樂。皆酣醉。無官兵掩擊。魁倫自朱射斗敗後。復以防潼河爲名。退屯潼川。福寧以率裁鄉勇。發伊犁效力。

陝西巡撫台布奏。連殲安康一帶教匪。槍斃首逆王金桂。

原任大學士蔡新卒。予諡文恭。新、蔡世遠從子。

三月。德楞泰大敗敵於馬蹄岡。冉添元就擒。敵以大隊屯馬蹄岡。而伏萬人於火壩口。後我兵四路進攻。德楞泰督大隊直趨馬蹄岡。已過敵伏數重。始覺。敵伏起。八路來攻。人持束竹溼絮以禦矢銃。慶鬪三晝夜。我兵飢疲。數路皆敗。德楞泰率親兵數千。下馬據山巔。誓必死。冉添元督衆登山。直取參贊。德楞泰乘高大呼奮擊。一矢殪冉添元之馬。蹶而擒之。敵遂瓦解。山後鄉勇亦至。乘勝窮追。擒斬無算。冉添元雄點冠川寇。專用伏以陷官軍。曾敗經略兵於蒼溪。號令羣寇。橫行川東川北川西。蹂躪數十州縣。至是被獲。爲軍興以來戰功第一。詔晉封三等子。

魁倫奉命嚴守潼河。反撤兵留船。致敵前隊得宵渡。焚大和鎮。勢復大熾。成都戒嚴。帝以魁倫前旣不守嘉陵江。茲復縱敵渡河。使川西無完土。褫職治罪。以勒保署四川總督。旋逮魁倫至京。賜自盡。

四月。斬冉添元於成都。

革松筠將軍職。命往伊犁作爲領隊大臣。

德楞泰追及渡潼之敵於渡口。殲其後隊千人。次日及敵蓬溪。殲匪首雷士玉孫嗣鳳。獲器械牲畜無算。解散脅從數千人。敵知成都有備。乃留白號張子聰度向瑤掠川西。以綴官兵。而黃號徐萬富等復渡潼河。將趨嘉陵江上游。以會階岷之匪。勒保截其後隊於大和鎮。乃議以川西匪付德楞泰。而自追潼河以東之匪。

丙申。以京師缺雨。命刑部清理庶獄。

革成都將軍阿迪斯職。發往伊犁充當苦差。以其擁兵玩誤也。書麟奏。猥黑投順。夷境廓清。晉太子太保。

以陝西教匪竄徧河南。革額勒登保。那彥成長麟。台布花翎。旋召那彥成回京。降爲翰林院侍講。那彥成爲阿桂孫。帝以阿桂子阿迪斯已發遣。故寬那彥成之罪。

閏四月甲戌。申禁京城內外及各省民人越境酬神。

五月己丑。以殲淨陝西逆首劉允恭。劉開玉。擒獲頭目王洪儒。功。晉額勒登保三等子。

德楞泰追擊張子聰等於潼河西岸。擒斬殆盡。潼河以西肅清。其潼東之匪。亦爲勒保所殲。川西稍定。惟

川東尙有苟鮮二股。官軍追之。復走至川北。總兵施措戰沒。

六月乙亥。申嚴赴京越訴罪。

七月辛卯。命京營右翼總兵長齡爲領隊大臣。領吉林黑龍江兵。赴湖北軍營協勦。教首劉之協就擒於河南寶豐縣。訊明正法。

甲辰。德楞泰等奏督勦樊人傑等四股教匪。殺四千餘人。得旨獎賞。實授勒保四川總督。

八月。固原提督王文雄被敵圍困。力戰陣亡。賞三等子爵。

額勒登保奏殲斃石子溝匪首伍金柱。麻池溝匪首宋麻子。

命各王公大臣等於自行陳奏事件。須自行呈遞。卽各部旗衙門公遞事件。亦應專差值堂官一人。親身到宮門遞交奏事官接受。

諭。出差人員。除軍機大臣等。准其隨帶軍機章京外。其餘各省率行奏請者。卽將該大臣治罪。另行簡派。

九月丙戌。申諭各督撫毋奏留升任他省人員。

甲午。德楞泰奏殲斃匪首唐大信。

辛丑。賜朝鮮國王李祘諡恭宣。以其世子孫爲朝鮮國王。命署散秩大臣明俊內閣學士納清保往封。十月。德楞泰奏獲首逆張子聰。

十一月。以軍機處宜嚴密肅清。派科道一人進內稽查。

癸卯。卸家壩工合龍。

十二月丁巳。德楞泰奏殲首逆楊開第齊國謨。命晉爲三等子。德楞泰先以縱敵入陝。降爲一等男。慶嘉六年辛酉正月。禁鄉會試卷引用隱僻子書。及書寫卦篆字體。

勒保奏殲斃首逆張世隴等。

乙巳。勒保奏勦捕黃藍白三號教匪。殲斃首逆徐萬富等。

二月乙卯。勒保奏擊勦碑灣寺等處教匪。射死首逆王士虎。

乙亥。額勒登保奏生擒首逆王廷詔。

三月。申嚴匿名文書坐罪例。

壬辰。德楞泰奏生擒匪目趙志成等。

福長安以罪罰充裕陵當差。又以骯疾呈請回京醫治。命革職發往盛京披甲。

四月戊申。停圓明園軍機處值日之科道官。

庚戌。帝幸圓明園。

額勒登保奏生擒首逆高三馬五。及馬五之子。餘黨悉平。

辛酉。冊立皇貴妃鈕祜祿氏爲皇后。

協辦大學士吏部尙書書麟卒。賞一等男爵。子諡文勤。

德楞泰奏勦辦紅花塚等處教匪。斃首逆張允壽。

丙寅。以生擒高二馬五王廷詔各功。晉額勒登保二等子爵。提督楊遇春騎都尉世職。

戊辰。以吉慶協辦大學士。仍留兩廣總督任。

己巳。以勦匪不力。革勒保翎頂。暫留四川總督任。以觀後效。

賜顧臬等一百七十五人進士及第出身有差。

五月。以辦理糧餉貽誤。革湖北巡撫倭什布職。拏解來京。交軍機大臣會同刑部嚴審治罪。旋寬宥釋放。

辛卯。以奉天府府丞兼學政。定三年更換例。

六月。德楞泰等奏。追勦青號匪。淹斃首逆徐添德。

京師大雨。宮門水深數尺。

壬子。永定河溢。

以桑乾河決。停止今秋巡幸木蘭行圍。

革直隸總督姜晟職。押解來京。交軍機大臣會同刑部嚴審。以前在湖廣總督任內。辦理糧餉。種種貽誤。

兼以永定河決。匿不奏聞故也。部議發往軍臺。帝命赴永定河效力。起丁憂在籍。巡撫陳大受署直隸總督。

命刑部清理庶獄。

丁巳。額勒登保等奏督勦冉逆等股匪。並生擒首逆張添倫。又奏生擒首逆伍懷志。餘匪肅清。七月。吳熊光等奏殲斃白號匪首王鎮賢。

勒保奏督同阿哈保薛大烈。痛勦徐逆各股。生擒徐添壽王登高等。釋遣戍伊犁已革巡撫秦承恩。

八月甲子。勒保奏生擒首逆冉學勝等。賞還一品頂帶。封三等男爵。以三省大功將蒞。撤盛京兵歸伍。

九月己丑。命續修大清會典。

定管理戶部三庫事務大臣按年更換例。

十月。永定河漫工合龍。

癸丑。額勒登保奏生擒首逆辛斗。及其總兵蘇啓志。

德楞泰奏殲斃首逆龍紹周。全股掃蕩。

十一月丁丑。召長麟來京。以惠齡爲陝西總督。

雲貴總督伊桑阿以驕縱勒索及奏報不實處絞。

戊子。額勒登保奏督勦通江一帶殘匪。擒獲元帥冉添潢頭目龐恩宇等。

己亥。升四川達州爲綏定府。

額勒登保奏勦殲首逆高見奇周萬友等。

十二月。長麟奏慶成等在階州牛頭寺草川子等處殲擒苟文明股匪。賞還慶成巴圖魯名號。

壬申。額勒登保等奏勦辦通江匪苟文明。斬獲多名。斃頭目苟朝獻等。

嘉慶七年壬戌正月。額勒登保奏生擒首逆辛聰。殄除餘黨。

吳熊光等奏。生擒首逆張允壽之子得貴。並將青號餘匪全數撲滅。

己亥。以苟逆餘黨由西鄉七星壩偷渡漢江。革額勒登保伯爵。降爲一等男。

二月己酉。召長麟來京。命賽沖阿回陝西協勦教匪。

丙寅。雲南維西廳探匪首逆腊者布恆乍綑。句結獠獠夷匪滋事。命琅玕勦之。

額勒登保奏道員劉清生擒首逆李彬及辛聰之弟辛文。殲斃餘匪多名。

三月癸酉。勒保奏殲斃首逆張添倫魏學盛。及其元帥陳國珠等。

丁丑。德楞泰奏截勦線號教匪。斃首逆龔其堯。生擒老教師李世漢李國珍等。全股洗淨。

四月戊午。分直隸保定等九處駐防官兵爲左右翼。各設稽察大臣一。

辛酉。諭部院大臣簡放督撫者。除有兵差審案之事。不准奏請隨帶所屬官員。如有違例奏請者。卽當交部議處。

乙丑。賜吳廷燦等二百四十八人進士及第出身有差。

五月辛巳。琅玕奏擒獲首逆腊者布。

壬午。勒保奏生擒首逆度向瑤。並老教掌櫃徐添培張思從。頭目多名。

己丑。琅玕奏攻克康普寨。勦洗北路猓匪。

甲午。慶成奏勦捕張魏餘匪。生擒元帥康二麻子。總兵張昌元等。

六月癸卯。琅玕奏兜勦康普葉枝夷匪。西北兩路全境疏通。

己酉。德楞泰奏冒雨趕勦樊曾匪股。淹斃首逆樊人傑等。並其妻子弟姪。全行殲滅。晉封德楞泰三等侯。

勒保奏殲斃匪首楊步青。

甲寅。命劉權之德瑛軍機處行走。

七月。勒保奏殲除黃白青藍四號教匪。生擒首逆劉朝選。晉一等男。

甲申。允大學士王杰致仕。

戊子。帝秋獵木蘭。駐避暑山莊。

額勒登保奏在花石巖地方殲斃匪首苟文明。晉封額勒登保一等伯。

丙申。勒保奏迎勦楚省竄匪。斃首逆賴先鋒。撲滅全股。並兜截張長吉一股。

丁酉。刑部尚書張若淳卒。予諡勤恪。若淳。大學士張廷玉少子也。

以戶部尚書朱珪協辦大學士。

八月。兩廣總督吉慶奏。安南阮福映遣使進表貢。並縛獻莫扶觀等在粵正法。初。阮光平卒。其子阮光纘嗣位。招中國亡命。啗以官爵。資以船械。使入寇閩粵江浙。嘉慶初。各省奏擒海盜。屢有安南兵將及總兵封爵敕印。詔移咨安南。尚不謂國王預知之。安南素與暹羅結怨。會黎氏甥農耐王阮福映者。奔暹羅。暹羅以女弟妻之。助之兵。克復農耐。勢日強。號舊阮。屢與新阮戰。奪其富春舊都。並縛獻海賊莫扶觀等。皆中國奸民。受安南南海王及總兵等職。又上其攻克富春時所獲阮光纘封冊敕印。帝命兩廣總督吉慶赴鎮南關。勒兵備邊。俟阮福映攻復安南全境以聞。

諭。向例蒙古會盟齊集。原係特派大員。一同辦理。嗣皇考因派員恐有擾累。特旨停止。今蘊端多爾濟以近年事多叢脞。仍請遇有喀爾喀四部落會盟比丁之年。一切應辦事宜。會同烏里雅蘇臺將軍等辦理。

尙屬可行。著照所請。賽因諾顏扎薩克圖汗二部落事務。卽就近在烏里雅蘇臺會集。與定邊左副將軍一同辦理。土謝圖汗車臣汗二部落事務。卽就近在庫倫會集。與辦事大臣一同辦理。

諭。俄羅斯交界四十七處卡倫。向來未定巡查之例。今蘊端多爾濟奏稱。明年四月。親查恪克圖西十九處卡倫。後年再查恪克圖東二十八處卡倫。逾十年。與庫倫辦事大臣輪流一次往查。亦屬嚴肅邊界之意。著照所請行。

九月丙申。吳熊光奏興山縣寨勇殲斃黃號首逆唐明萬。

十月辛亥。禁番役子孫出仕應試。

勒保奏擒獲藍號匪首湯思蛟。德楞泰奏殲斃白號匪首戴四。

十一月戊辰。德楞泰奏殲擒首逆陳侍學等。

以博羅會匪作亂。吉慶辦理張皇草率。革去協辦大學士。仍留兩廣總督任。

命那彥成馳赴廣東。查辦添弟會滋事一案。

己卯。額勒登保奏截勦川界竄匪。生擒首逆葉二。

丙戌。額勒登保奏追勦黃藍線等號教匪。生擒首逆景英等。晉封三等侯。擢乾清門侍衛。穆克登布爲御前侍衛。賞騎都尉世職。

惠齡以捕匪不力。降爲二品頂帶。暫留陝甘總督任。

博羅會匪日久未平。革吉慶職。交與瑚圖禮那彥成審訊。旋命瑚圖禮署兩廣總督。

以吏部尙書琳寧協辦大學士。

革江西巡撫張誠基職。解京治罪。

十二月戊戌。安徽宿州匪徒滋事。費淳等討平之。

額勒登保德楞泰勒保惠齡吳熊光等奏報川陝楚勦捕餘匪一律肅清。自成親王儀親王以下論功行賞有差。額勒登保德楞泰俱由三等侯晉封一等侯。勒保明亮俱一等男爵。賽冲阿楊遇春俱輕車都尉世職。

兩廣總督吉慶畏罪自殺。

安南國王阮福映納貢請封。並請以南越二字錫封。帝以南越二字所包甚廣。不許。旋封阮福映越南國王。

嘉慶八年癸亥。正月。命伊犁廣開屯田。其無耕牛者官給之。

二月壬寅。那彥成等奏攻克廣東鐵籠嶂。生擒首逆黃亞程等。

額勒登保奏搜捕通江縣餘匪。殲首犯姚欣祖。生擒陳大海。

閏二月。有民人陳德潛匿禁門。俟帝入宮時。徑前犯蹕。捕得。並其子祿兒對兒伏誅。

庚寅。德楞泰奏搜捕竄匪。殲斃首逆曾之秀。

那彥成奏續獲會匪首逆溫亞利。永安全境肅清。

癸巳。德楞泰奏殲斃首逆劉渣鬍子。

三月內申。試翰林詹事等官。擢陳嵩慶等三員爲一等。餘升黜留任有差。

四月。勒保奏擒獲首逆宋國品。

辛卯。德楞泰奏生擒首逆張世虎。

五月戊子。德楞泰奏擒獲首逆趙聰觀。

六月丁卯。增設滿洲起居注二。

額勒登保奏生擒戕害提督穆克登布之首逆熊老八。

七月丙午。命安徽巡撫兼提督銜。改江南提督所轄壽春鎮及六安等十營。兩江總督所轄之安慶協遊

兵營及池州分防把總並歸統轄。仍聽兩江總督節制。

壬子。帝秋獵木蘭。戊午。駐避暑山莊。

八月癸亥。諭。前據縑布奏和孝公主府內已革長史奎福。呈控額駙豐紳殷德演習武藝。與父報仇。並欲

毒害公主。反將侍妾帶至墳園。於國服內生女各款。經王大臣等詳細鞫問。俱屬誣妄。惟生女一節。自認不諱。前已降旨革去公銜。及所管職任。仍著在家圈禁。令其閉門思過。奎福挾私誣告。應斬監候。秋後處決。

辛卯。帝還京師。

九月戊申。予告尙書彭元瑞卒。贈協辦大學士。予諡文勤。元瑞天才敏贍。所作應舉文字。婉麗清新。與紀昀同有才人之目。

庚戌。東河衛家樓河溢。命劉權之那彥寶往勘。

十月。開衡工捐例。

雲貴總督琅玕奏。生擒首逆恆乍。縑家屬。

十一月己酉。申禁上控案件。發原審官。

十二月。申嚴各省督撫將州縣員缺。紛紛互調之禁。

乙亥。以雲南夷匪戡定。於維西麗江四路。各設頭人二名。給把總外委頂帶。約束猺衆。

德楞泰奏。追匪至橫山大梁。雪夜襲勦。忽前敵鄉勇袖手不動。匪踞巖下壓。致副將張應貴等陣亡。旋據鄉勇來稟。接仗時看見多是同當過鄉勇之弟兄親友。說是受冤屈。是以不肯動手。現在從權辦理。頒給

諭帖令鄉勇持往招諭。帝命設法鈴束。並查明心懷挾制之人。軍法從事。

嘉慶九年甲子。二月癸亥。帝臨幸翰林院。

鑲黃旗都統。查出本旗漢軍秀女十九人。俱經纏足。請將參佐領等交部議處。從之。

癸酉。遣編置佐領及安置各處安南人回國。賚銀有差。

三月丙辰。衡家樓河工合龍。

五月。廣東提督孫全謀奏。上年十一月。在雷州洋面遇海盜鄭一烏石二等船二百隻。率兵船五十八號攻勦。官兵傷斃二十餘名。帝以兩廣總督倭什布並未詳晰陳奏。飭令嚴切查明。

丙午。以辦理餘匪坐失事機。革德楞泰內大臣。降爲二等侯。賽冲阿降爲騎都尉。額勒登保革去紫韁。釋回遣戍前陝甘總督宜繇。以四五品京堂候補。以其前奏鄉勇情形。切中時弊故也。

定身犯二罪均應斬決者加梟示例。

六月。閩浙總督玉德福建巡撫李殿圖奏。蔡牽匪船竄至鹿耳門滋擾。現在調遣官兵赴臺協勦。牽同安人。奸猾善裨闔。能使其衆。時安南王阮福映新受封。守朝廷約束。盡逐國內奸匪。由是艇匪無所巢穴。其在閩者。悉爲牽所併。勢大猖獗。凡商船出洋者。勒稅番銀四百圓。回船倍之。乃免劫。且結陸地會匪。陰濟船械硝磺米糧。而官修戰艦。笨窳不能放洋。轉雇商船爲勦捕之用。浙江巡撫阮元。率官商捐金十餘萬。

造大艦數十名曰霆船。鑄大礮四百餘配之。浙江提督李長庚追賊至閩洋。據其上風。賊不能遁。乃僞乞降於玉德。玉德遣檄浙師收港勿出。賊得揚帆去。至是以百餘艘犯臺灣。沉舟鹿耳門。以塞官兵。又結土匪萬餘攻府城。自號鎮海王。長庚令總兵許松年王得祿繞安平港入攻之。焚獲三十餘船。俘賊千餘。連五戰皆破之。賊乃遁去。

以戶部尚書祿康協辦大學士。

吏部書吏舞弊。將告病治中趙曰濂虛選運同。事覺。協辦大學士尚書琳寧侍郎范建豐錢樾俱革職。陝甘總督惠齡卒。贈二等男。予諡勤襄。以那彥成署陝甘總督。

七月丙午。帝秋獮木蘭。壬子。駐避暑山莊。

八月庚辰。命嗣後不准擅給軍功。初。福康安用兵臺灣。始給四五六品至七八品軍功。並不奏明請旨。至是乃禁止。

九月丁亥。重修隆恩殿成。

十二月庚辰。大學士劉墉卒。予諡文清。墉。大學士統勳子也。字石菴。以書法重於時。

嘉慶十年乙丑。正月。予告大學士王杰卒於京師。予諡文端。杰在政府。誠於奉職。與和珅共事十餘年。和雖厭之。卒莫能去也。

辛亥。命朱珪爲體仁閣大學士。管工部事。以禮部尙書紀昀協辦大學士。

二月。協辦大學士禮部尙書紀昀卒。予諡文達。昀爲四庫全書館總纂官。先後十餘年。每進一書。仿劉向曾鞏例。作提要。冠諸簡首。高宗輒覽而善之。又奉詔撰簡明目錄。存書存目。多至萬餘種。皆一手所訂。評隲精密。識力在王仲寶阮孝緒上。

辛未。調劉權之爲禮部尙書。協辦大學士。

四月。禁西洋人刻書傳教。旋將西洋人德天賜。派員解往熱河。在厄魯特營房圈禁。代爲遞送書信。人陳若望等。均發往伊犁。給厄魯特爲奴。

戊寅。賜彭浚等二百四十三人進士及第。出身有差。

五月。以首先倡議堅壁清野之策。平定教匪功。加勒保太子太保銜。明亮由一等男晉封一等子。嚴禁監生把持漕務。

六月丁丑。直隸永定河溢。命那彥寶馳往堵築。

協辦大學士劉權之。因保奏軍機章京。欲將中書袁煦列入。袁煦者。協辦大學士紀昀女婿。紀爲權之房師。爲侍郎英和所劾。降編修。退出軍機處。英和亦以太僕寺卿降補。

閏六月。命托津在軍機處行走。

以吏部尙書費淳協辦大學士。

永定河漫工合龍。

七月戊辰。帝詣盛京謁祖陵。

八月壬寅。進額勒登保爵三等公。

乙巳。御前大臣都統公額勒登保卒。予諡忠毅。額勒登保初隸海蘭察部下。每戰輒陷陣。海誨之曰。子將才宜略識古兵法。以其不識漢字。取翻譯三國演義授之。遂爲名將。寧陝新兵陳達順陳先倫等作亂。詔德楞泰以欽差大臣馳往辦理。

九月壬申。帝還京師。

十月。兩廣總督那彥成。先後招降洋盜五千餘人。悉賞銀幣。並予千總外委銜。爲巡撫孫玉庭所劾。降藍翎侍衛。又以私許洋盜黃正嵩四品服及守備劄。事覺。謫戍伊犁。調吳熊光爲兩廣總督。

十一月。湖北巡撫百齡。以在廣東巡撫任內。懲辦光棍。製用聯枷。並將署內物件搬運湖北。又在湖北截留批摺。革職拏問。旋部議發遣新疆。帝命免其發遣。在實錄館效力行走。

十二月庚辰。定廣東陸路鎮協各營屬廣州將軍節制。

嘉慶十一年丙寅。正月壬子。命賽沖阿爲欽差大臣。馳赴閩省。因海盜蔡牽在臺灣肆擾也。旋令賽沖阿

爲福州將軍。赴臺灣督勦。

定免死改遣罪犯。分別年限減釋例。

俄羅斯國商船駛至粵東。懇請越關卸貨。巡撫延豐不卽照例駁回。奉旨革職。在萬年吉地工程處效力行走。

三月甲子。嚴禁浙江江蘇等省販米出洋。

五月。廓爾喀國王喇特納巴都爾被戕。

以海盜蔡牽滋擾。革閩浙總督玉德職。以阿林保代之。玉德旋拏問。

阿拉善王瑪哈巴拉請獻吉蘭泰鹽池。得旨嘉獎。賞三眼花翎。在乾清門行走。

七月丁卯。帝秋獵木蘭。癸酉。駐避暑山莊。

阿林保劾奏李長庚勦盜不力。請革職治罪。帝疑其誣。時浙撫阮元以憂去。新撫爲清安泰。帝以長庚事詢之。清安泰力言長庚可用。帝乃切責阿林保。命將勦賊事宜。專責長庚一人。如阿林保忌功掣肘。玉德卽其前車之鑒。並飭造大同安梭船三十。其未成以前。先僱大商船備勦。

九月。直隸藩司書吏王麗南等私雕假印事發。經大學士費淳等究出官員串通各弊。分別治罪。總督顏檢等因失察。發往新疆效力贖罪有差。

壬申。署直隸總督。裘行簡卒。予諡恭勤。行簡曰修子也。自天津赴永定河督工。卒於途。癸亥。帝還京師。

十月丙子。永定河漫工合龍。

先是。陝西寧陝兵作亂。詔德楞泰馳往辦理。叛兵之起。頭目百四十人。各招黨羽。每人所招或百餘或數百。旬日至數萬。楊遇春與戰於方柴關。遇伏大潰。諸帥以敵勢甚盛。使提督楊芳入營。說其酋蒲大芳。使反正。大芳故隸楊芳麾下。服其爲人。乃誘縛其渠陳先倫。陳逢順來降。德楞泰遂以叛兵震懾。兵威窮蹙。乞命奏。其叛卒二百二十四人。盡釋歸伍。帝震怒。責德楞泰專擅廢法。罷其御前侍衛。領侍衛內大臣及一切差使。總督倭什布發烏魯木齊效力。戊降卒蒲大芳等二百人於新疆。後皆誅死。楊芳亦遣戍。尋赦還。

大學士保寧以疾辭職。允之。

十一月己未。命祿康爲東閣大學士。以刑部尙書長麟協辦大學士。

十二月戊寅。大學士朱珪卒。予諡文正。珪以好士聞。於其沒也。士論惜之。

嘉慶十二年丁卯。正月丙午。命費淳爲體仁閣大學士。以戶部尙書戴衢亨協辦大學士。

乙卯。四川總督勒保奏綏定府新兵滋事。官兵進勦。生擒首逆王得先。孔傳世。劉金定。殲除夥黨。

戊辰。西安將軍德楞泰奏。陝西西鄉瓦石坪汛新兵滋事。督兵截勦。殲擒首逆周士貴等。並夥黨多名。二月。申禁廷臣與諸王交接。

三月。戊申。江南王家營減壩大工合龍。

四月。甘肅大通縣番衆肆劫。命提督百祥勦之。

甲午。命刑部清理庶獄。

申禁地方官擅造非刑。

五月。丁未。定各直省奏咨案件遠限處分。

甘肅大通野番滋事。命興奎督兵進勦。

六月。癸未。禁直省各督撫幕友捐職奏留本省。

甘肅官兵勦卓色勒番族。克之。

乙未。命京察三等人員不得保送知府。

七月。乙巳。以故琉球國中山王尙溫孫灝襲爵。命翰林院齊鯤工科給事中費錫章往封。

戊午。帝秋獮木蘭。甲子。駐避暑山莊。

八月。興奎等奏官兵攻破沙卜浪番族。焚燬巢穴。又奏番目尖木贊來降。

九月丙辰。帝還京師。

乙丑。嚴禁八旗抱養民子爲嗣。紊亂旗籍。

十月乙未。罷武會試內場策論。改令默寫武經。

十一月甲辰。天壇齋宮災。

丙寅。定漢教習三年考試例。

嘉慶十三年戊辰。正月甲辰。閩浙總督阿林保奏。拏獲蔡牽義子蔡三來等。

浙江提督李長庚中礮沒於黑水洋。阿林保以聞。帝震悼。追封壯烈伯。予諡忠毅。長庚與福建提督張見陞等追牽入粵海。牽止餘三舟。長庚舉火攻牽船。將燔之。親卒躍入敵船。幾擒牽者再。牽奴林阿小。素識長庚。暗由艄尾發礮。中長庚喉。血湧不可止而仆。是時閩粵水師合勦。十倍於敵。少持之。立可殄滅。而張見陞本庸懦。見中軍船亂。遽引舟師退。牽得遁走安南。

二月。定新疆卡倫回京侍衛章京六年更派例。

丙子。予告大學士公保寧卒。予諡文端。

賞辰沅永靖道傅鼎按察使銜。嘉慶初。湖北四川教匪方棘。諸將移征苗之師而北。草草戡定。月給降苗鹽糧銀羈縻之。而苗氛更惡。時鳳凰廳治鎮。算當苗衝。同知傅鼎有文武材。知苗愈撫且愈驕。乃日招

流亡。棲之附郭。圍其丁壯。而礮其要害。十餘礮則堡之。年餘。犄角漸密。苗妨出沒。遂死力攻阻。甯以鄉勇東西援救。且戰且修。三年。苗大出焚掠。下五峒。大吏將中甯開邊釁罪。又兵備道田灝者。阿大吏意。吝出納。以旁掣之事。且敗。會四年。鎮筓黑苗吳陳受衆數千犯邊。於是苗疆何嘗底定之詔。責巡撫姜晟嚴獲首要。甯爲擒之。始奏加知府銜俸。是年。礮堡成。明年。邊牆百餘里亦竣。苗并不能乘晦霧潛出沒。六年。貴州變起。甯以鄉勇千五百馳赴銅仁。貴州巡撫伊桑阿至。叱其越境要功。甯還楚界。伊桑阿遂以招撫勘定奏。還貴陽。時首逆槍械皆未繳。各寨方沸然。邊民赴愬雲貴總督琅玕。琅玕至。急檄甯會勦。三日。盡破諸寨。琅玕奏楚兵功最。而伊桑阿冒功誤邊罪。爲新撫初彭齡所劾。伏法。甯遂奉旨總理邊務。未幾。永綏苗石宗四等作亂。甯生擒之。事聞。帝下其練兵法於各省。甯又創立屯田諸法。至是入覲。帝爲下詔曰。國家治民以官。任官以人。辰沅兵備道傅甯。專司苗疆。十有餘載。鋤莠安良。除弊興利。修置礮堡。十有餘所。屯田十二萬餘畝。收卹客民十餘萬戶。屯兵練勇八千人。追繳苗寨兵器四萬餘件。復勤墾化導。設書院六。義學百。楚苗駸駸向學。籲求考試。遂已革面革心。朕久聞其任勞任怨。不顧身家。悉心籌畫。臻斯完善。特因未識其人。尙未特沛恩施。今日召見。果安詳諳練。明白誠實。洵傑出之材。堪爲封疆保障。若天下吏咸若是。何患政治不日有起色。其卽加按察使銜。用風有位。

三月癸丑。命減直隸軍流以下罪。

以南河頻溢。命大學士長麟戴衢亨往勘。

四月辛卯。賜吳信中等二百六十一人進士及第。出身有差。

閏五月丙寅。命工部左侍郎英和軍機處行走。

以誕育皇孫。提督仙鶴林賀表內措詞失體。命革職鎖拏。並代擬奏摺之人。一併審訊。交刑部擬罪。旋擬仙鶴林與代筆之石先幾。俱發往烏魯木齊效力贖罪。帝命加恩。問擬滿徒。

七月庚辰。帝秋獵木蘭。丙戌。駐避暑山莊。

八月戊申。諭留京王大臣。每日交代合符。方准散值。

九月己卯。帝還京師。

十一月。革兩廣總督吳熊光職。以永保爲兩廣總督。七月間。英吉利兵船十三艘泊香山雞頭洋。其酋度路利以兵船三入黃埔。並有杉板船入省河。聲稱防禦法蘭西。意殊叵測。故事外夷兵船或寄內洋。俱調兵立時驅逐。熊光以三年督率鎮將。追捕海盜。轉戰重洋中。匪氛雖稍戢。而師殊老。故務爲鎮靜。惟飭令回帆歸國。傳諭大班停開船。以絕其望。而英船遷延至十月。始起碇。熊光坐奪職。命往南河效力。後以百齡督粵。有旨飭查英船來去之由。以熊光荏懦覆奏。遂遣戍伊犁。抵戍一載。召還。

十二月丁酉。嚴禁直省督撫奏留丁憂人員。

嘉慶十四年己巳正月。總管內務府大臣廣興。先以宮中例應支給綢緞。並不遵辦革職。又前往山東河南審案。任意威嚇。婪索贓銀。發覺。訊實處絞。其子蘊秀發吉林充當苦差。陝西總督長齡以曾在山東巡撫任內。廣興過境時。藩司邱庭澂稟明動帑辦差。置不究。坐褫職。發伊犁效力。

二月。命德麟自行捐貲修理南河要工。以廷臣多有奏其父福康安生前簞篋不飭故也。

三月。西安將軍三等公德楞泰卒。予諡壯果。德楞泰英勇敢戰。與額勒登保同心戮力。以底大功。

伊犁將軍松筠以濫殺遣犯馬友元王文龍等。交部嚴加申飭。即令來京候旨。旋賞給頭等侍衛。授爲喀什噶爾參贊大臣。

四月甲寅。賜洪瑩等二百四十一人進士及第出身有差。

五月。海盜朱潰爲總兵許松年轟斃。其弟朱渥率衆來降。

六月。山陽縣知縣王仲漢辦賑浮冒。恐爲委員李毓昌稟揭。因置毒斃之。以自縊聞。事發。王仲漢正法。知府王穀查有得賄實跡。處絞。並革兩江總督鐵保職。

七月丙子。帝秋獵木蘭。壬午。駐避暑山莊。

九月庚申。帝還京師。

浙江學政劉鳳誥。以代辦監臨。有將應試生員徐步鏊印用聯號情弊。革職。交刑部治罪。旋發往黑龍

江效力。

福建巡撫張師誠奏。殲除海洋積年首逆蔡牽。生擒助惡逆黨。初李長庚之死。帝命長庚裨將王得祿邱良功嗣其任。勉以同心敵愾。爲長庚雪仇憤。至是得祿良功二人合勦牽於定海之漁山。俱乘上風。賊懼。東南遁。轉戰至綠水深洋。偪賊船攻之。血戰一日。賊夥黨舟皆爲諸鎮所隔。不得援救。牽知不免。乃首尾舉礮自裂其船。沈於海。詔封王得祿二等子。邱良功二等男。又以兩廣總督百齡嚴斷接濟。致餘黨先後出降。賞騎都尉世職。

壬午。賞已革總督長齡藍翎侍衛。爲科布多參贊大臣。

十月癸巳。帝以五旬萬壽。御太和殿受賀。

山西布政使劉清奏才不勝任。懇請開缺。得旨以員外郎補用。清官蜀。得民心。嘉慶三年。四川賊首王三槐俘至京。廷訊。供言官偪民反。帝曰。四川一省官皆不善耶。對曰。惟有劉青天一人。由是劉青天之名聞天下。以累戰功。官至山西布政使。與大吏不合。又不樂簿書錢穀。故自請開缺。後官至登州鎮總兵。

十二月。大學士祿康以失察刑部書吏王書常僞造印文。降爲協辦大學士。辦辦大學士長齡以目疾開缺。協辦大學士費淳以失察工部僞印。降爲侍郎。

嘉慶十五年庚午。正月。以兵部尚書劉權之協辦大學士。

庚辰。命勒保爲武英殿大學士。來京供職。以常明爲四川總督。

二月。以河工敞壞。漕運滯。命試辦海運。

三月丙辰。命步軍統領等嚴查攜帶鴉片入城。

百齡等奏粵洋巨盜張保仔香山二等乞降。

四月。粵洋盜首張保率衆投誠。

五月戊午。大學士勒保以匿奏民間揭帖。降爲工部尙書。賞還祿康東閣大學士。明亮以兵部尙書協辦大學士。

癸酉。命戴衢亨爲體仁閣大學士。

六月。兩廣總督百齡奏生擒積年巨寇烏石二等。海洋一律肅清。

七年壬申。帝秋獵木蘭。戊寅。駐避暑山莊。

八月壬子。增設廣東水師提督。駐虎門。

九月己巳。帝還京師。

十月甲午。江南高堰山盱兩廳堤壩決。

嘉慶十六年辛未。三月丙寅。帝巡幸五臺山。

乙亥。工部尙書費淳卒。賞還大學士銜。予諡文恪。

閏三月癸卯。帝還京師。

四月。大學士戴衢亨卒。予諡文端。時衢亨扈從五臺。途次得疾先歸。馳至圓明園賜第。遂不起。召方維甸爲軍機大臣。維甸以母老辭。允之。

壬申。賜蔣立鏞等二百三十七人進士及第。出身有差。

協辦大學士刑部尙書長麟卒。予諡文敏。

戊辰。以京師及河南山東旱。命清理庶獄。

五月辛巳。命劉權之爲體仁閣大學士。以吏部尙書鄒炳泰協辦大學士。

六月。明亮以失察驍夫聚賭。革去協辦大學士。並一切差使。

祿康以失察驍夫聚賭。革去東閣大學士。並一切差使。

以松筠協辦大學士。仍留兩廣總督任。

丁巳。命勒保爲武英殿大學士。

乙丑。湖南按察使傅鼐卒。帝念其經理苗疆有功。賜祭葬如巡撫例。

七月。加光祿寺少卿盧蔭溥四品卿銜。命在軍機大臣上學習行走。

丙申。帝秋獮木蘭。壬寅。駐避暑山莊。

九月庚子。帝還京師。

嘉慶十七年壬申。二月己酉。試翰林詹事等官。擢徐迺等四員爲一等。餘升黜留館有差。

六月。諭凡軍流人犯。有在配所遣人來京呈遞封章者。無論是非虛實。均一體治罪。

壬戌。御史榮椿以訛言偷翦髮辮入奏。命降一級。以主事用。

七月戊子。帝秋獮木蘭。甲午。駐避暑山莊。

乙未。申諭直省督撫嚴查所屬私造非刑。

八月。以河工禮壩急難堵合。命將貽誤河工之河道總督陳鳳翔。在工次枷號。限滿後。發往烏魯木齊效力贖罪。

九月戊子。帝還京師。

命松筠仍在軍機處行走。

嘉慶十八年癸酉。正月。以松筠爲御前大臣。罷軍機處行走。命勒保軍機處行走。

六月甲辰。申禁宗室覺羅與漢人爲婚。

浙江巡撫代遞生員鮑廷博所刻知不足齋叢書第二十六集。命賞給舉人。

癸亥。准駐防子弟應各省文武鄉試。自丙子科始。

七月甲戌。申禁私販雅片煙。定官民服食者罪。

壬午。帝秋獵木蘭。戊子。駐避暑山莊。

八月壬子。定舉人每屆四科大挑一次。仍照例扣除近三科舉人。

九月。以溫承惠爲欽差大臣。偕古北口提督馬瑜。馳往長垣滑縣勦匪。先是。河南滑縣老岸地方。有黃毓宰黃興相兄弟並宋姓爲首。興天理教。天理教亦名八卦教。聚衆斂財。愚民苦胥吏者爭與焉。而河南滑縣李文成。直隸大興林清爲之首。方是時。溫承惠總督直隸。高杞巡撫河南。同興巡撫山東。文成諸人。益煽惑其衆。指星象。應在十八年秋九月十五日午時。文成黨數萬最盛。而清則密邇京邑。賄通內侍。外倚文成之衆爲援。將乘帝幸木蘭秋獵時。伏莽行在。謀定。而中外莫知也。滑縣知縣強克捷聞之。密封白高杞及衛輝府知府郎錦騏。請兵掩捕。皆不應。克捷乃捕文成下獄。刑斷其脛。其黨以事迫。不能俟期。遂於九月初七日。聚衆三千。破滑。出文成於獄。強克捷死之。於是直隸之長垣東明。山東之曹定陶金鄉。同時殺官圍城。而曹定陶皆破。事聞。帝命溫承惠會同高杞同興勦辦。又命陝西提督楊遇春來直隸協勦。以章煦署直隸總督。尋詔陝甘總督那彥成爲欽差大臣。溫承惠同興高杞俱受節制。

戊寅。帝駐蹕警山行宮。

教首林清使其黨二百餘人。由宣武門潛入內城。藏兵械。混酒肆中。日晡。分犯東華西華門。白帕其首爲號。太監劉金等引其東。高廣福等引其西。時東華門甫入數人。卽爲護軍關門格拒奔散。其入西華門者八十餘人。反關以拒官兵。教黨得內監嚮導。已知大內在西。而誤由尙衣監文穎館斬關入。侍衛急閉隆宗門。衆至。不得入。總管太監常永貴縛由東華門入之二人於蒼震門。皇子等在上書房。聞變。皇次子綿寧急命進撒袋烏銃腰刀。命諸太監登垣瞭望。俄有手白旗攀垣。將踰養心門入者。縣寧發烏銃殛之。再發再殛。貝勒縣志亦以銃殛敵。敵乃不敢越垣而進。將火隆宗門。而留守京師諸王大臣。率禁兵自神武門入衛。敗教黨於中正殿門外。薄暮。忽大雷電。教黨股栗竄匿。先後就擒。詔封縣寧爲智親王。貝勒縣志進郡王銜。諸大臣賞黜有差。綿志儀親王子也。

擒林清於黃村。

庚辰。帝以遇變。下詔罪己。

壬午。帝還京師。

大學士慶桂劉權之俱以原品休致。

命松筠爲東閣大學士。仍留伊犁將軍任。曹振鏞爲體仁閣大學士。托津百齡爲協辦大學士。子獲匪被劫遇害河南滑縣知縣強克捷祭葬世職。予諡忠烈。

丙戌。帝廷訊首逆林清之黨劉進亭。太監劉得財劉金。悉凌遲處死。並傳示林清首於直隸河南山東地方。

十月癸卯。山東鹽運使劉清大破教黨於扈家集。賞布政使銜。

革溫承惠職。賞給五品職銜。責令辦理那彥成一路軍營糧餉。補授那彥成直隸總督。

甲寅。命托津赴河南督辦軍務。戶部右侍郎桂芳。暫在軍機處學習行走。

辛酉。以直隸籍及漢軍各科道失察林清謀逆。俱命降調。

十一月。那彥成奏勦平道口鎮。進圍滑縣。李文成既據滑。以脛創甚。不能出四方爲流寇。遂出兵圍濬。而萃精銳於道口鎮。道口距滑十八里。臨運河。有積糧。恃以戰守。且爲長垣東明曹定陶金鄉諸股號召。溫承惠督兵大名。巡撫高杞軍濬。皆按兵不動。而山東巡撫同興。聞報。躡旬不發兵。鹽運使劉清力爭。始發。那彥成至衛輝。聞敵勢盛。請俟調山西甘肅吉林索倫兵五千而後進。詔切責之。始馳至軍。楊遇春以固原兵奮擊。頗有斬獲。敵望見髯將軍。輒披靡。大破之。遂奪道口。進兵圍滑。

那彥成奏官兵截勦輝縣竄衆。全數殄滅。斃逆首李文成。命將李文成首傳示河南直隸山東地方。官軍圍滑三面。惟北門隔葦塘。未合圍。桃源匪首劉國明潛入滑。護李文成出收外黨。西入太行。爲流寇計。文成脛創不能騎。乃輕車出北門。招黨四千人輝縣山。據司寨。那彥成遣總兵楊芳追之。伏騎白土岡。誘之。

出司寨。佯走。伏起。敗之。進奪司寨。李文成縱火自焚死。獲其屍。劉國明亦死。十二月壬寅。直隸獻縣捕獲馮克善。

乙巳。陝西岐山縣三才峽匪徒萬五等聚衆滋事。命長齡勦之。南山木商夫役。歲饑停工。掠食。盡捕之。遂反。衆至數千。詔長齡同楊遇春督兵進討。又命賽沖阿堵其入川之路。

丙午。那彥成奏攻克滑城。教黨宋元成。劉宗順。馮相林皆死。獲牛亮。臣徐安。欄。王道。濫等。滑縣平。加那彥成太子太保。封三等子。楊遇春二等男。將士楊芳。劉清以下賞賚有差。

山東教首朱成貴伏誅。

嘉慶十九年甲戌。正月。從侍郎吳璥奏。復開捐例。自十九年四月至明年五月乃止。謂之豫東例。

二月丁酉。長齡奏生擒首逆陳四。並尹朝貴。零匪全數殄滅。

以生擒逆首龔貴。殲盡餘匪。賞長齡騎都尉世職。晉封楊遇春一等男。

賽沖阿長齡奏報南山匪一律肅清。

閏二月辛未。學士蔡之定請行用楮鈔。不許。

丁亥。諭將乾隆年間增設名糧額數。酌量減汰。仍復還舊制之處。著大學士軍機大臣會同兵部詳悉妥議具奏。旋經部議。各省統計裁兵一萬四千二百四十名。馬一千三百五十六匹。

革豫親王裕豐王爵。以匿奏教匪逆謀。及容留逆犯祝現之族人祝海慶。被人告發故也。

四月丙戌。賜龍汝言等二百二十六人進士及第出身有差。

八月辛未。大學士勒保以疾乞致仕。允之。命托津爲東閣大學士。管理戶部。以明亮爲兵部尙書。協辦大學士。

十一月丁未。命英和暫在軍機處行走。

御史陶澍奏。河南南汝光一帶及安徽穎亳等處。向多紅鬍匪徒。近來日聚日多。橫行日甚。每一股謂之一捻子。小捻子數人數十人。大捻子一二百人不等。命方受疇胡克家各遴選妥員。將爲首之王妮子李東山馬大振三犯。按名捕獲。

十二月。兩廣總督蔣攸銛奏。英吉利護貨兵船違例闖入虎門。經派員詰責。該大班始遞稟謝罪。因請嚴禁民人私爲夷人服役。洋行不得搭蓋夷式房屋。鋪戶不得用夷字店號。並不准內地民人私往洋館。命照所請行。

百齡以決獄疏忽。革去宮銜及協辦大學士。暫留兩江總督之任。以吏部尙書章煦協辦大學士。嘉慶二十年乙亥。三月。兩廣總督蔣攸銛等奏。酌定查禁鴉片煙章程。請於洋貨船到澳門時。先行查驗。並明立賞罰。使地方知所懲勸。命照所請行。

四月壬午。頒御製官箴二十六章。宣示內外臣工。

六月甲戌。原任閩浙總督方維甸卒。予諡勤襄。維甸。觀承子也。

四川中瞻對番酋洛布七力作亂。四川總督常明討平之。

七月癸卯。帝秋獮木蘭。辛亥。駐避暑山莊。

八月庚辰。諭本年春夏間。據湖北江西安徽江蘇等省各督撫先後奏報。拾獲匿名揭帖。字體怪異。語句悖逆。上印九龍朱戳。共有十餘紙。茲據百齡於和州地方。緝獲逆犯嚴士隴。究出偽造逆詞首犯方榮升。卽於巢縣拏獲。並於窩藏方榮升之朱上信家。起獲九龍木戳。及偽造時憲書。違悖經卷字蹟四箱。百齡所辦甚好。著賞復太子少保銜。旋封三等男。賜其子扎拉芬五品廕生。

九月。命松筠馳往喀什噶爾。兼署參贊大臣事務。以成寧奏塔什密里克回匪攷牙墩作亂故也。

前任喀什噶爾參贊大臣成寧等奏。逆回攷牙墩就擒。回莊照常安業。

十月庚申。召大學士松筠回京。以長齡爲伊犁將軍。

十一月。御史果良額奏。拾獲匿名揭帖。訐告禮親王昭槤各款。經軍機大臣查問。實有妄自尊大及於府內濫用非刑等事。昭槤著革去王爵。交宗人府圈禁。

十二月丙寅。諭灤州石佛口王姓。其先世自前明以來。倡立白蓮教。自稱聞香教主。流傳至今。二百餘年。

已閱十輩。其子孫仍怙惡不悛。改教名爲清茶門。種種悖逆情形。應照大逆辦理。其江南湖北河南等省。傳教各犯。飭各督撫迅速查拏。

嘉慶二十一月丙子。正月丙戌。諭內廷行走諸王。遇有應奏事件。俱在乾清門外。交外奏事官員呈遞。不准徑交內奏事太監。因防闈寺人等與外廷諸王臣工交接故也。

四月乙亥。江蘇巡撫張師誠。因父病危篤。將巡撫印務交藩司代辦。卽日起程歸省。帝以其以私廢公。交部嚴議。尋革職。

六月。原任大學士慶桂卒。予諡文恪。

戊寅。那彥成以前任陝甘總督。與藩司陳祁。商挪賑銀。津貼腳價。並虛奏捐廉事。爲戶部尙書景安所劾。下獄論死。尋以繳完賠銀。改戍伊犁。留家終養。旋丁母憂。帝思其攻克滑縣功。免發遣。令閉門思過。

七月。以英吉利使臣不肯行三跪九叩首禮。革接伴尙書蘇楞額和世泰穆克登額等職。

乙丑。帝秋獮木蘭。辛未。駐避暑山莊。

八月壬辰。諭歲舉秋獮。係吾朝家法。必當永遠遵循。嗣後每遇進哨。大小臣工。概不准以雨水寒冷爲詞。妄生浮議。倘仍造作浮言。希圖阻止。必將其人按軍法治罪。立正典刑。不稍寬貸。

九月壬戌。帝還京師。

十月。命協辦大學士禮部尙書章煦軍機處行走。

十一月。兩江總督百齡卒。贈協辦大學士。予諡文敏。百齡初抵兩廣。總督任。洋盜張保挾衆數萬。勢張甚。百齡巡哨周嚴。遇盜輒擊之。沈海。羣魁奪氣。始有投誠意。然懼誅。未敢遽至。揚言必制府親臨。望見顏色。乃降。頓舟以待。百齡乘單舸出虎門。從者十數人。保率巨艦數百。轟礮如雷。煙燄蔽天。百齡危坐舟中。不爲動。麾左右呼保使近前。曉以利害。皆面縛。旬命。許貸其死。旬日間。解散二萬餘人。復令保以計誘烏石。二至雷州。斬之。全海肅清。

嘉慶二十二年丁丑。二月。閩浙總督汪志伊奏。提審改教知縣朱履中稟揭原管道府得受陋規一案。解任藩司李廣芸自縊。派熙昌王引之爲欽差大臣。前往審辦。旋革汪志伊並巡撫王紹蘭職。知府朱以勳以勒供凌偏。發黑龍江充當苦差。

始命大挑人員分發河工差委。

雲南臨安邊外夷人高羅衣作亂。雲貴總督伯麟討平之。

辛未。章煦因病解任。以吏部尙書戴均元協辦大學士。

四月庚寅。停伊犁仲夏貢馬。

戊戌。賜吳其濬等二百五十五人進士及第出身有差。

壬寅。命刑部清理庶獄。

五月。命新進士朝考。以論疏詩命題。裁去擬古詔不用。著爲令。

六月甲戌。松筠因諫阻明年至盛京謁陵。革去大學士。

七月庚申。帝秋獵木蘭。丙寅。駐避暑山莊。

九月。宗室海康慶遙俱以學習邪教絞死。

庚申。帝還京師。

嘉慶二十三年戊寅。二月庚午。命協辦大學士吏部尙書戴均元兵部尙書和寧軍機處行走。

乙亥。大學士董誥以疾乞致仕。允之。

辛巳。試翰林詹事等官。擢潘錫恩等五人爲一等。餘升黜留任有差。

四月乙亥。酉刻。京師風霾。室中然燭始能辨色。帝下詔修省。

六月丁亥。申禁州縣等官赴省干謁。

七月壬寅。予告大學士劉權之卒。予諡文恪。

甲子。帝詣盛京謁祖陵。

十月丙子。帝還京師。

丁丑。予告大學士董誥卒。予諡文恭。誥。邦達子也。父子俱以工繪事。久直南書房。至大用。

嘉慶二十四年己卯。正月甲午。帝以六旬萬壽。頒詔天下覃恩有差。

罷和寧軍機處行走。命刑部右侍郎文孚在軍機大臣上學習行走。

四月丙戌。賜陳沆等二百二十四人進士及第出身有差。

五月辛未。禁旗人抱養民人及戶下人爲嗣。

七月庚午。帝詣避暑山莊。

壬午。直隸永定河溢。命吳璥那彥寶馳往堵築。

八月辛卯。河南蘭陽儀封北岸河溢。命吳璥馳往。會同琦善堵築。

壬寅。予告大學士威勤伯勒保卒。晉贈一等侯。予諡文襄。

九月壬戌。帝還京師。

壬午。永定河漫口合龍。

嘉慶二十五年庚辰。二月癸卯。大學士章煦以疾乞致仕。允之。

命戴均元爲文淵閣大學士。管理刑部。調吳璥爲吏部尙書。協辦大學士。

三月丁丑。河南馬營壩漫工合龍。

四月庚戌。賜陳繼昌等二百四十六人進士及第出身有差。以兵部遺失行印。松筠和世泰俱交部嚴議。

七月壬申。帝秋獵木蘭。戊寅。駐避暑山莊。不豫。皇次子智親王緜寧皇四子瑞親王緜忻侍。己卯。大漸。召御前大臣賽沖阿索特那木多布齋。軍機大臣托津戴均元盧蔭溥文孚。內務府大臣禱恩和世泰。公啓。鑄匣。宣示嘉慶四年四月初十日立皇太子御書諭旨。戊刻。帝崩於避暑山莊行殿寢宮。遺詔命皇次子智親王緜寧卽皇帝位。

辛巳。尊皇后爲皇太后。

八月乙未。奉移梓宮至京。

庚戌。皇太子接皇帝位。以明年爲道光元年。己丑。帝改名旻寧。

九月。命大學士曹振鏞尙書黃鉞英和在軍機大臣上行走。

回人張格爾作亂。張格爾者。故回酋大和卓博羅尼都之裔也。博羅尼都當乾隆初。以叛被誅。其子薩木克自巴達克山逃匿敖罕。有三子。次卽張格爾。以誦經祈福。傳食部落。回人假餽和卓之名。斂財聚衆。時有譏言。會南路參贊斌靜。荒淫失回衆心。張格爾始糾布魯特數萬寇邊。有頭目蘇蘭奇入報。爲章京綏善叱逐。蘇蘭奇憤走出塞。領隊大臣色普徵額。率兵敗之。張格爾僅餘二三十人。舍騎步逃。次日。官兵追

及塞外。遭炊尙然。竟回軍喀城。與斌靜宴中秋節。所擒百餘人。斌靜悉殺之以滅口。帝以斌靜獲敵不訊。明緣由。蒙隱具奏。疑之。特命伊犁將軍慶祥往勘。具得其實。逮斌靜治罪。

十月甲辰。上。大行皇帝尊諡曰受天興運敷化綏猷崇文經武孝恭勤儉端敏英哲睿皇帝。廟號仁宗。裁稽查軍機處御史。

十一月癸酉。以松筠爲熱河都統。侍講學士顧藹奏。松筠宜置左右。帝怒。命交部嚴加議處。

十二月丁酉。河南儀封漫工合龍。

英和以言事忤旨。命出軍機處。

命山東運河事務。歸東河河道總督兼管。

清史綱要

卷十

道光元年辛巳。二月辛卯。雲南永北廳屬夷人滋事。命總督慶保勦之。

戊戌。協辦大學士吳璥以疾乞休。允之。

命孫玉庭協辦大學士。仍留兩江總督任。

三月辛酉。葬仁宗睿皇帝於昌陵。

四月庚寅。授呢瑪善爲欽差大臣。督辦雲南永北軍務。

大學士三等侯明亮以疾致仕。命在家食俸。

甲辰。慶保等奏勦洗大姚拉古夷巢。全境肅清。永北首逆瞎眼唐老大就擒。

五月。命伯麟爲體仁閣大學士。兼管兵部。以長齡協辦大學士。仍留陝甘總督任。

丙寅。命廣西按察使潘恭辰册封越南國王阮福皎。

六月甲申。安定門災。

八月丁亥。命吏部尙書松筠在軍機處行走。

九月乙亥。命停閩省歲進荔枝樹素心蘭二項。永遠不必進呈。

十月己卯。帝御乾清門聽政。自是以爲常。

十二月癸巳。吏部尙書劉鏞之卒。予諡文恭。鏞之。統勳孫也。

道光二年壬午正月。命凡旗人抱養民人之子爲嗣者。遇選八旗秀女時。其女俱不得入選。著爲令。

山西巡撫葉世倬奏。山西省州縣丁徭銀兩未歸入地糧攤徵者。尙有孟縣等二十一州縣。得旨。自道光

二年起。一律攤入。

二月。命廣東督撫暨海關監督。派委員弁。認真巡查出口洋船。不准偷漏銀兩。並飭海關監督有無收受

鴉片煙重稅。據實奏聞。

閏三月庚子。賜戴蘭芬等二百二十二進士及第出身有差。

五月。陝甘總督長齡奏。青海番人蘊依等作亂。官兵搜捕。已一律肅清。帝以戴功迅速。賞長齡雙眼花翎。

壬寅。停止巡漕御史。

六月。大學士伯麟以原品休致。

禱恩等參奏松筠刪改理藩院奏稿。大學士等議革職發往新疆。帝命降爲員外郎。

甲子。申禁直省各衙門額外增置書役。

戊辰。命長齡爲文華殿大學士兼管理藩院事。以戶部尙書英和協辦大學士。

七月。予告大學士三等襄勇侯明亮卒。予諡文襄。明亮少時尙履親王郡主。王母妃薨。奉移之東陵。道路積潦。輿夫皆憚行。明亮躬行泥淖。嚮導。舁夫不從令者。以杖撻之。在道數日。隊仗整肅如行軍。王喜。歎曰。吾塔將材也。

八月癸卯。河南新蔡教匪朱麻子滋事。命程祖洛捕治之。

長齡以奏報勦番不實。召來京。以那彥成署陝甘總督。

九月乙酉。四川果洛克番人作亂。提督桂涵討平之。涵以平教匪立功。與羅思舉齊名。時人號曰羅桂。

十月癸亥。申禁收漕州縣書役侵漁各弊。並禁漕總名目。

十一月丙戌。帝奉皇太后懿旨。立繼妃佟佳氏爲皇后。

十二月戊申。申諭海口各關津。嚴拏夾帶鴉片煙。

道光三年癸未。正月壬午。帝幸圓明園。奉皇太后居綺春園。

乙未。命大學士長齡在軍機大臣上行走。

四月甲子。賜林召棠等二百四十六人進士及第出身有差。

五月乙亥。諭嗣後直省徵收錢糧。將墊完民欠名目。永遠革除。

六月戊午。永定河溢。

壬戌。北運河決。

七月。杖太監曹進喜。以其私令吏部開道府名單送閱。有違定制故也。

河南漳河溢。

八月戊戌。定失察鴉片煙條例。

九月丁丑。永定河漫口合龍。

十二月。以陝西南山地方安靜。加陝西道嚴如煜按察使銜。如煜嘗言山內州縣距省遠。鞭長莫及。宜仿古梁州自爲一道。及明設鄖陽巡撫之例。專設大員鎮撫。而割三省邊郡州縣以附益之。庶勢專權一。可百年無患。以更張重大。議格不行。

道光四年甲申。四月壬寅。命程含章會同蔣攸銛籌辦直隸河工。

嚴禁幕友濫邀議敘。

七月。命毀蘇州府城西楞伽山五通祠。

辛巳。大學士戴均元以年老乞休。允之。

閏七月丁未。命孫玉庭爲體仁閣大學士。以蔣攸銛協辦大學士。均留總督任。

八月己巳。試翰林詹事等官。擢朱方增等五員爲一等。餘升黜留館有差。

丙戌。予告大學士伯麟卒。予諡文慎。

十月。予告大學士章煦卒。予諡文簡。

丙戌。命福建臺灣道兼管臺營水陸官兵。

十一月。命兵部尙書玉麟在軍機大臣上行走。

十二月。以黃河泛溢。革河督張文浩職。在工次枷號一個月。滿日發往伊犁效力贖罪。兩江總督大學士

孫玉庭革職留任。

道光五年乙酉。三月壬寅。諭各督撫飭禁獄卒陵虐監犯。

五月丁酉。諭戶部尙書黃鉞年逾七旬。著無庸在軍機處行走。王鼎著在軍機處行走。

六月。命蔣攸銛爲體仁閣大學士。仍留直隸總督任。以禮部尙書汪廷珍協辦大學士。

諭軍機大臣等。御史汪世緘奏請防糧船水手設教。斂錢流弊一摺。據稱各幫糧船舵手。設有三教。一曰

潘安。一曰老安。一曰新安。所祀之社。名曰羅祖。每教內各有主教。名曰老官。每幫有老官船一隻。供設羅

祖。人其教者。投拜老官爲師。各船水手。聯名資助。統計三教。不下四五萬人。沿途繕手。尙不在此數。水手雇直。向例不過一兩二錢。近年挾制旗丁。每名索二三十千不等。及銜尾前進。忽然停泊。老官傳出一紙名曰溜子。索添價值。旗丁不敢不從。水手滋事。必送老官處治。輕則責罰。重則立斃。沈入河中。沿途招雇繕手。必推曾經械鬪受傷者爲頭目。遇所爭鬪。以紅箸爲號。人卽立聚。新安一教。尤多匪徒。宜設法嚴辦等語。糧船水手。膽敢設立教名。斂錢聚衆。不法已極。著漕運總督。及有漕各省督撫。應如何示以懲創。俾運官旗丁。不受挾制。悉心籌議以聞。

九月庚戌。申定世職人員犯賊革職。子孫不准承襲例。

十月。以大學士長齡署伊犁將軍。初。嘉慶二十五年。回民張格爾作亂。命伊犁將軍慶祥往勘。具得南路參贊大臣斌靜激變狀。以永芹代之。芹亦未能撫馭。張格爾屢糾布魯特數百。騷掠近邊。官兵往捕輒遁。領隊大臣巴彥圖。以兵二百。出塞四百里掩之。不遇。卽縱殺游牧之布魯特妻子百餘而還。無復行列。其會沃列克恨甚。率所部二千。追覆官兵於山谷。勢遂猖獗。帝命慶祥俟長齡到任後。迅速前往喀什噶爾。會同永芹。相機妥辦。

十一月庚子。命大學士蔣攸銛在軍機大臣上行走。

癸卯。命慶祥總辦喀什噶爾軍務。

道光六年丙戌。二月庚午。禁各省佐雜教職干預公事。

三月初次試行海運。

四月丙子。賜朱昌頤等二百六十五人進士及第出身有差。

五月丁酉。雲貴總督趙慎畛卒。予諡文恪。慎畛方嚴嫉惡。病中疏劾貪墨吏數十人。閱日屬纊。代者發急遞。追回滇人皆痛惜之。

六月。臺灣粵民黃文潤作亂。福建水師提督許松年馳往查辦。

七月。授長齡揚威將軍。楊遇春武隆阿俱爲欽差大臣。參贊軍務。督勦逆回。以鄂山署陝甘總督。

乙巳。命盧坤馳往甘肅。同鄂山督辦糧運。

八月。閩浙總督孫爾準奏。抵臺查辦北路械鬪情形。及參辦理錯誤之提鎮副將等。奉旨革提督許松年職。留臺差遣效力贖罪。

十月。長清等奏喀什噶爾漢城於八月二十五日失守。慶祥死之。先是六月間。張格爾率安集延布魯特五百餘。由開齊山路。突至回城。拜其先和卓木之墓。回人有謂瑪雜也。距喀城八十餘里。慶祥令協辦大臣舒爾哈善領隊大臣烏凌阿。以兵千餘勦之。殺敵四百。敵退入大瑪雜內。官兵攻之。突圍出。各回部響應。旬日萬計。慶祥盡調各營卡兵還喀城。爲三營。令烏凌阿穆克登布分將之。迎戰渾河。先後沒於陳。官

兵隔敵不得入城。東走阿克蘇者七百人。喀城旋陷。慶祥自縊。英吉沙爾葉爾羌和闐三城繼之。十一月己丑。臺灣餘匪悉平。

十二月。御定宗室世次命名。用溥毓恆啓四字。

道光七年辛亥。二月。長齡等奏克復喀什噶爾。張格爾遁去。先是。回衆陷西四城。偪渾巴什河。距阿克蘇四十里。達凌阿自庫車。巴哈布自哈拉。先後來援。並分兵援烏什。攻其渡河之衆。擒斬三百。東四城始無恐。我兵於二月六日出師。十四日至巴爾楚軍臺。喀葉兩城分道處也。留兵三千。以防兩路繞襲之敵。分軍爲三隊。楊遇春將中軍。武隆阿左。楊芳右。敵遇戰輒敗走。進至洋達瑪河。距喀城八十里。次日。整隊至渾河北岸。會大霧晦。長齡欲須霽而進。楊遇春不可。乃遣索敦千騎。繞趨下游。牽敵勢。而自率親兵。驟渡上游。據上風。前鋒先扛礮轟敵。礮勢與風沙勢相并。若百十萬兵摧壓驟至。敵陣亂比曉。我兵盡渡。風止霧霽。乘勢衝入敵陣。敵士崩。我軍乘勝抵喀什噶爾。時三月朔也。三城旋以次皆復。帝以張格爾遁去。長齡奪紫纁。楊遇春武隆阿奪太子太保少保銜。仍勒限追捕。命留官兵八千防喀城。其餘兵九千。卽隨楊遇春入關。以楊芳代爲參贊。長齡武隆阿均奏請以西四城封和卓木子孫。帝怒。二人俱革職留任。未幾。復命直隸總督那彥成。以欽差大臣赴回疆。代長齡籌善後。五月丁亥。命穆彰阿在軍機大臣上學習行走。

七月。協辦大學士禮部尙書汪廷珍卒。予諡文端。廷珍直上書房久。帝在潛邸。曾從講學。於其沒也。恩禮甚厚。

丁巳。以吏部尙書盧蔭溥協辦大學士。

英和以事革職。賞二品頂戴。補授熱河都統。以富俊爲理藩院尙書。協辦大學士。

八月己丑。以張格爾日久未獲。革長齡楊遇春楊芳武隆阿職。

十月。諭惇親王。繇愷退出內廷行走。并革去宗人府宗令。以潛匿脫逃太監故也。

道光八年戊子。正月。長齡等奏生擒張格爾。張格爾敗後。傳食諸部落。諸部落漸不能供。生計日蹙。時中國購求張格爾者。爵親王。金十萬。長齡等密遣黑回出卡縱反間。言官兵全撤。喀城空虛。諸回翹首以望和卓。其白回從張格爾出卡者。家室皆令出卡。以離其心。張格爾果復率步騎五百。欲乘官兵除歲不備。入卡煽衆。潛襲喀城。長齡楊芳嚴兵以待。敵由開齊山舊路。潛入阿木古回城。白回奔竄。黑回要拒。敵知有變。卽奔出卡。楊芳率兵三路星夜追至喀爾鐵蓋山。擊斬殆盡。張格爾僅餘三十人。棄騎登山。副將胡超都司段永福等擒之。捷聞。詔封長齡二等威勇公。楊芳三等果勇侯。均賞戴雙眼花翎。阿克蘇貝子伊薩克晉封郡王。其將士胡超以下。賞賚有差。

九月。以寶華峪地宮滲水。大學士英和革職。發黑龍江充當苦差。致仕大學士戴均元入京候訊。旋免其

發遣驅逐回籍。

道光九年己丑正月。禁用光中通寶景盛通寶景興通寶景興巨寶景興大寶嘉隆通寶各種錢文。

二月。命回子當阿渾者。止准念習經典。不准干預公事。其阿渾子弟有當差及充當伯克者。不准再兼阿渾。以示限制。

四月戊子。賜李振鈞等二百二十一人進士及第出身有差。

七月辛丑。武隆阿以奏對喀什噶爾軍務情形。語多掩飾。降爲頭等侍衛。

八月庚辰。帝奉皇太后詣盛京謁祖陵。

十月乙酉。帝還京師。

十一月己酉。定一子兩祧服制。

道光十年庚寅閏四月。禁各省實缺人員赴省逗留。

五月。御史王瑋慶奏請裁革州縣白役。得旨。地方差役。至繁地方。不得過八十名。其餘以次遞減。所有白役。概行禁革。

六月癸卯。定查禁內地行銷鴉片章程。

九月。回疆復亂。以楊遇春爲欽差大臣。命都統哈朗阿赴回疆協勦。張格爾旣就擒。回人復奉其兄玉素

普爲和卓糾衆數千入寇。回郡王伊薩克及客民先後密報參贊大臣扎薩阿。皆不信。旣聞警始令幫辦大臣塔新哈禦之。又令副將賴永貴以兵千六百夾勦。皆敗沒。敵遂猖獗。時璧昌爲葉爾羌辦事大臣。盡徙城外商民於城內。傳集各回伯克。諭以禍福利害。選派回兵分防各要隘。每路各守以兵勇二百。回兵一二千。部署甫定。而敵圍喀英二城後。卽分隊由草湖來寇葉城。璧昌選回兵千餘。屯回漢二城。中路官兵四百。陣東門外。擒斬三百餘。又擒撲入回城者三百餘。敵退走三百里外。僅陣亡我兵一人。回兵五人。詔賞璧昌副都統銜。餘將士分別獎勵有差。

丁卯。命大學士公長齡爲欽差大臣。馳往新疆督辦軍務。

命盧蔭溥爲體仁閣大學士。以李鴻賓協辦大學士。仍留兩江總督任。

兩江總督大學士蔣攸銛。以辦理私梟黃玉林。苟且了事。革職。以侍郎降補。

十月。仍授長齡爲揚威將軍。命哈嘜阿楊芳參贊軍務。

兩淮鹽務。改歸總督管理。命將鹽政一缺。卽行裁撤。

道光十一年辛卯正月。逮伊犁參贊大臣容安治罪。以哈豐阿代之。容安奉命解喀葉二城之圍。擁重兵八九千。反繞道烏什。趨和闐。致喀葉圍久而不解。各回城子女玉帛。搜括殆盡。命押解刑部監禁。旋免死。發往吉林充當苦差。提督哈豐阿奉命管領烏嚕木齊官兵。駐紮阿克蘇。以喀城危急。帶兵三千五百至。

破敵步騎二千於哈拉布扎什。遂進至英吉爾河。敵竄去。喀圍亦解。既而哈朗阿楊芳亦至。二月。命長齡查訪逆回起釁根由。奏稱那彥成驅逐安集延。查鈔家財。斷離眷口。禁止大黃所致。命革那彥成職。

三月己未。廣東黎匪滋事。命李鴻賓等勦之。

四月庚戌。李鴻賓奏黎匪韋色容等伏法。地方肅清。

五月。陶澍奏淮北商力積疲。請暫籌借項。官督商運。詔從之。

六月。禁沿邊夷民私種罌粟。

七月。喀什噶爾參贊大臣扎隆阿。以誣奏回子郡王銜阿奇木伯克伊薩克謀逆。解京廷訊。命在阿克蘇枷號兩個月。交刑部監禁。秋後處決。

癸丑。高郵湖河溢。

己卯。命穆彰阿朱士彥往江南查辦賑災。

九月。新疆始行屯田法。從長齡請也。

十一月丙辰。大學士托津以病免。

十二月乙酉。命富俊爲東閣大學士。管理兵部。以吏部尚書文孚協辦大學士。

行票鹽法。從兩江總督陶澍請也。

道光十二年壬辰。正月癸丑。停向來盛京五部侍郎。及各省將軍都統副都統城守尉總管等年班輪替進京之例。

以喀什噶爾善後大局已定。撤滿漢官兵歸伍。

丁丑。定白陽白蓮八卦紅陽等教首犯遇赦不赦。從犯亦不准援減例。

二月。盧坤及海凌阿奏。湖南江華縣錦田鄉。獠人趙金龍作亂。時楚粵奸民結天地會。屢強劫。獠寨牛穀。黨連官役。獠無所愬。金龍妖煽其峒。倡言復仇。使趙福才糾廣東散獠三百餘。合湖南九冲。獠共六七百人。焚掠兩河口。殺會匪二十餘。官兵討之。毀其巢。斃三百餘人。獠竄藍山之五水。獠山所至虜脅。衆二千。圖據九嶷山巢穴。參將成喜以百兵扼要路。衆寡不敵。獠人遂旁掠寧遠。

乙未。閩浙總督孫爾準卒。予諡文靖。

二月。湖南提督海凌阿陣亡。予一等輕車都尉世職。藍山告急。海凌阿率副將馬韜。以兵五百餘進勦。冒雨深入。又不爲備。伏兵四起。乘高下突。皆戰死。命盧坤及湖北提總羅思舉。貴州提督余步雲會師進勦。庚午。命戶部尙書禧恩。盛京將軍瑚松額。馳赴湖南。勦辦獠人。四月。長齡等奏。卡外諸夷進卡貿易。懇恩一體免稅。允之。

盧坤率師至永州。獠已裹脅萬人。分爲三路。每路二三千。犄角出沒。詔以獠皆山氓。趨捷負險。恐蔓延兩粵。或盤踞山峒。致稽搜捕。敕諸將誘至山外平野之地。聚而殲之。羅思舉建議。大兵由新田後路潛躡。遏其南竄。與桂陽北路兵夾攻。並扼其西通道。州零陵桂陽小路。於是三路獠爲官兵驅逼。出兵皆東竄。常寧之洋泉鎮。思舉以獠偪歸一路。且失其翻山長技。乃密檄北路兵齊赴。又漸移各守隘。兵進逼台圍。連日殲獠六千。趙金龍突圍中槍死。擒其子弟妻女。及死黨數十。奏聞。詔以盧坤羅思舉蕩平迅速。各予一等輕車都尉世職。禧恩瑚松額已抵衡州。未至軍。先三日奏捷。禧恩詰趙金龍死狀虛實。思舉旋獲其尸。及所佩劍印木偶。乃止。

給事中隆助以奏請拏辦會匪王老子卽王法中習教一案。超擢太常寺卿。辛丑。賜吳鍾駿等二百六人進士及第。出身有差。

五月乙丑。諭各督撫遇有題調缺出。先儘正途。不得以佐雜應升人員超越。淮北試行票鹽。從兩江總督陶澍請也。

七月乙丑。廣西賀縣獠匪盤均華等滋事。祁墳遣兵勦平之。

八月。廣東八排獠作亂。官兵勦之。失利。都司以下死者數十人。兩廣總督大學士李鴻賓以硝藥失火焚傷入奏。詔革職交部治罪。旋發往新疆。以禧恩暫署兩廣總督。

命阮元協辦大學士。仍留雲貴總督任。

九月。桃南廳屬于家灣河堤爲湖民盜決。命穆彰阿往江南。會同陶澍查辦。奪河督張井職。

戊午。禧恩奏各排沖縛獻首匪。率衆投誠。獠山全境肅清。詔進禧恩不入八分輔國公。瑚松額余步雲均世襲一等輕車都尉。李鴻賓旣得罪。詔盧坤補授兩廣總督。禧恩聞其將至。急欲以平獠爲功。而獠洞天險不易攻。乃使按察使楊振麟設法招降。賂以洋銀鹽布。獠貪利踵至。旬日得數百人。會獲黃瓜寨附近獠人。諸將得以草草歲事。迨盧坤至。遂以善後事委之。交印卽行。帝嘉其辦理迅速。而其受降始末。竟不上聞云。

閏九月丁酉。飭河南湖北等省會拏搶匪。

戊戌。飭江西巡撫嚴拏會匪。

十月。廣東曲江乳源兩縣土盜。句結獠匪滋事。盧坤派兵勦平之。

戊辰。福建臺灣嘉義縣陳辦等滋事。命程祖洛馳往勦辦。

十一月戊寅。命署福州將軍瑚松額爲欽差大臣。都統哈嘜阿爲參贊大臣。馳往臺灣勦辦。

道光十三年癸巳。正月。陳辦就擒。提督馬濟勝封二等男世職。

辛丑。桃南廳于家灣河工合龍。

二月己未。四川越巂廳等處夷人滋事。命那彥寶桂涵等勦辦。

己革直隸總督那彥成卒。贈尚書銜。予諡文毅。釋其子容安回旗。

三月。允大學士盧蔭溥致仕。

乙酉。四川提督桂涵卒於軍。予諡壯勇。

四月己酉。命潘世恩爲體仁閣大學士。

己巳。皇后崩。

五月辛未。賜汪鳴相等二百二十人進士及第。出身有差。

己丑。四川峨邊廳夷人桑樹格等就擒。餘衆皆降。

六月乙巳。申禁各省將弁違例坐轎。

七月甲申。試翰林詹事官。擢田嵩年等三員爲一等。餘升黜留任有差。

四川越巂夷一律肅清。

乙未。禁外省道府州縣餽送京官別敬。

九月。以四川勦平夷人功。晉封楊芳一等果勇侯。

十一月。禁各省督撫。概不准以本省屬員入募襄理。

道光十四年甲午。正月丁亥。命大學士潘世恩在軍機大臣上行走。

二月庚申。申禁坊肆售賃淫書小說。

乙丑。大學士富俊卒。子諡文誠。

三月丙寅。以實缺人員告假捏飾規避。申嚴出結官處分。

七月甲戌。四川峨邊廳十三支赤夷內雅扎等支夷滋事。命瑚松額楊芳等查辦。

戊子。東河朱家灣漫口。命鍾祥堵治之。

庚寅。申禁各州縣佐雜承倅擅受詞訟。

八月。瑚松額奏辦理夷案完竣。

以英吉利兵船闖入內河。兩廣總督盧坤革職留任。戴罪督辦。水師提督李增階革職。

九月丁丑。永定河溢。命琦善督辦。

十月。諭盧坤等驅逐洋面躉船。並申禁內地匪徒勾結販運鴉片。

己酉。册立皇貴妃鈕祜祿氏爲皇后。

十一月。命文孚爲東閣大學士。管吏部事。穆彰阿爲吏部尙書。協辦大學士。

十二月。以四川峨邊夷人出巢焚搶。提督楊芳交部嚴加議處。卽來京聽候部議。旋降爲二等侯。革退御

前侍衛。以總兵前往甘肅候補。

道光十五年乙未。正月壬戌。以皇太后六旬萬壽。詔開恩科。

甲子。大學士曹振鏞卒。予諡文正。

禁學政閱文幕友。不得專用本籍之人。

大學士長齡以擅受霍罕夷使呈遞稟詞。交部議處。尋降四級留任。

二月己亥。命阮元爲體仁閣大學士。管理刑部。以戶部尙書王鼎協辦大學士。

三月。山西趙城縣教匪曹順作亂。知縣楊延亮全家遇害。

四月。鄂山奏官兵進勦峨邊廳屬雅扎等十三支夷人。合境肅清。

甲寅。賜劉繹等二百七十二人進士及第出身有差。

趙城縣教匪曹順於觀城縣境內偵獲。並其黨八十二人。先後凌遲斬決戮屍。傳首梟示。

五月。陝甘總督楊遇春以病懇請開缺回籍。命加封一等侯爵。在家支食全俸。

辛巳。休致工部侍郎前任大學士松筠卒。予諡文清。松筠以筆帖式起家。累官至大學士。中間屢起屢蹶。性坦率無城府。厭苛禮之官。常不挈眷屬。卽至亦處之別院。扃其門。每旦入院禮佛。坐堂中。與夫人啜茗。閑話而已。自伊犁將軍入長吏部。單騎雜喇嘛中。抵圓明園。家人出迎於近郊。不知其已至也。

六月癸卯。諭滿洲蒙古文職二品以下及五六品京堂各員。著自本月十九日起。各按單開。輪日在圓明園宮門。伺候考試。俱不准託故不考。

乙卯。申禁各省濫委佐武佐雜署理州縣積弊。

七月甲辰。大學士文孚以兩耳重聽。面請解職。命以大學士管理吏部。無庸在軍機大臣上行走。

八月癸酉。山東巡撫鍾祥奏。英吉利船隻駛入東省劉公島洋面。派委員弁巡堵。不准進口。命直隸奉天江南山東福建浙江各督撫府尹等。嚴飭沿海文武員弁。巡防堵截。並嚴禁內地奸民交易接濟。兩廣總督盧坤卒。予諡敏肅。

十月癸未。予告大學士託津卒。予諡文定。

道光十六年丙申。二月。湖南武岡州。獠人藍正樽作亂。命訥爾經額勦辦。

四月。訥爾經額奏勦捕武岡州滋事獠人。已就肅清。

丁丑。賜林鴻年等一百七十二人進士及第出身有差。

七月甲午。禁外省州縣設立班館。

丙申。大學士文孚以年衰乞免。允之。

庚子。命穆彰阿爲武英殿大學士。管理戶部。以琦善協辦大學士。仍留直隸總督任。

九月戊申。圓明園三殿災。

己酉。降尙書耆英爲侍郎。以其不行拒絕太監請求故也。

十月。兩江總督陶澍以私刊奏疏。降四級留任。

道光十七年丁酉三月。予告陝甘總督一等侯楊遇春卒。予諡忠武。遇春結髮從戎。大小數百戰。皆陷陳。冒矢石。或冠翎皆碎。袍袴皆穿。未嘗受毫髮傷。帝嘗詢及。歎爲福將。

六月戊午。命左都御史奎照戶部侍郎文慶在軍機大臣上學習行走。

四川馬邊廳夷人滋事。命鄂山勦辦。

癸酉。訥爾經額奏。拏獲從逆各犯。究出首逆藍正樽被鄉勇毆斃情形。帝以所奏不實。命來京聽候部議。旋以三等侍衛充駐藏大臣。

七月。命山東鹽務改歸巡撫管理。

十月辛未。停吉林採珠例貢。

十一月。四川涼山夷人滋事。成都將軍凱音布總督鄂山討平之。

道光十八年戊戌正月乙亥。大學士一等公長齡卒。予諡文襄。

二月癸卯。命琦善爲文淵閣大學士。仍署直隸總督。以雲貴總督伊里布協辦大學士。仍留任。

四月丙寅。賜鈕福保等一百九十四人進士及第出身有差。

閏四月辛巳。鴻臚寺卿黃爵奏請嚴禁鴉片。詔各直省將軍督撫妥議具奏。

乙丑。禱恩以管理奉宸苑事廢弛。革兵部尙書職。

五月癸丑。大學士阮元以年老乞休。允之。

命王鼎爲東閣大學士。仍管刑部。調湯金釗爲戶部尙書。協辦大學士。

戊辰。惇親王繇愷。以違例囚禁多人。復將優匿府內。降爲郡王。

九月丙午。莊親王奕劻輔國公溥喜。因赴尼僧廟內吸食鴉片煙。奕劻革去王爵。溥喜革去公爵。

太常寺卿許乃濟請弛煙禁。降爲六品頂帶。卽行休致。

十月。命河南衛輝府所奉無生老母塑像。由該撫派員全行拆毀。

十一月壬寅。嚴禁雲南種植罌粟。

癸丑。授湖廣總督林則徐欽差大臣。馳驛前往廣東。查辦海口事件。所有該省水師兼歸節制。先是。詔各省將軍督撫會議禁煙章程。則徐所奏尤剴切。言煙不禁絕。國日貧。民日弱。十餘年後。豈惟無可籌之餉。抑且無可用之兵。帝謂爲深慮遠識之言。故有是命。申禁旗人婦女效漢人纏足者。將其家長治罪。

貴州匪徒謝法真作亂。雲貴總督伊里布討平之。

道光十九年己亥。正月。以奎照氣體不充。罷軍機大臣。

二月壬午。試翰林詹事等官。擢李國杞四員爲一等。餘升黜留館有差。

三月。林則徐以是年正月馳抵廣東。傳集十三洋行。發交諭帖。令轉諭各洋公司人等。並稟校其煙土存儲之實數。飭令即時稟覆。英官義律先知其事。託以回澳門住。久不至。各洋商觀望推諉。遷延不覆。趣之急。義律始乘舟來省。仍置不理。則徐乃停其貿易。又撤其沙文而羈禁之。沙文者。漢人之受雇於洋館。充其買辦者也。義律不得已。乃將洋面躉船上所存之煙土。據實呈繳。計二萬二千八十三箱。則徐會同總督鄧廷楨。親駐虎門驗收。每箱約賞茶葉三斤。其煙土請解京師。詔卽在海口銷燬。則徐下令盡逐外洋之躉船。凡進口之船。均應具結。有夾帶鴉片者。船貨沒官。人卽正法。他國皆遵具結。惟義律不肯。則徐與鄧廷楨嚴令不許逗留。義律乃率其眷屬及在澳英人五十七家。同寄居尖河嘴貨船。詔以林則徐查辦妥協。交部從優議敘。

五月。予告大學士盧蔭溥卒。予諡文肅。

六月丁亥。前任兩江總督陶澍卒。予諡文毅。

辛卯。調周天爵爲湖廣總督。

十二月癸亥。調林則徐爲兩廣總督。

己卯。調伊里布爲兩江總督。

癸未。命刑部尙書隆文在軍機大臣上行走。

甲申。調鄧廷楨爲閩浙總督。桂良爲雲貴總督。

命戶部侍郎文慶毋庸在軍機處行走。

道光二十年庚子。正月壬寅。皇后崩。

二月丁卯。戶部尙書何凌漢卒。予諡文安。

丁丑。河東河道總督栗毓美卒。予諡恭勤。毓美治河有功。始倡以輓代石之法。後世師之。

三月辛亥。湖北提督羅思舉卒。予諡壯勇。思舉嘉慶中以鄉勇從軍四川。起家至節鎮。威名亞二楊。軍中嘗號爲羅必勝。言晦夜劫營必勝。崖溝間道必勝。冒旗誘敵必勝也。

四月乙酉。賜李承霖等一百八十人進士及第出身有差。

五月己亥。諭各省藩臬運司道府出缺。不得以隔品及試用人員濫行署理。

六月己巳。已革協辦大學士英和卒。賞三品卿銜。

大理寺卿曾望顏奏請封閉海禁。盡停各國貿易。帝欲從之。林則徐力言不可。且言各國不犯禁之人。無

故被禁。必且協而謀我。乃止。

林則徐既奉命總督兩廣。與水師提督關天培。協力守海口。屢挫敵兵。至是。英將伯麥率兵船十餘。加以印度駐防船艦二三十艘。至粵。林則徐奏聞。尙有以逸待勞。以主待客。彼何能爲之論。則徐親赴獅子洋。校閱水師。號令嚴明。聲勢壯甚。洋船至粵月餘。無隙可乘。遂乘風赴各省。駛入福建廈門。不利。謀犯浙江。攻定海。陷之。浙江巡撫烏爾恭額奏聞。命兩江總督伊里布爲欽差大臣。赴浙江寧波視師。以裕謙署兩江總督。又命福建提督余步雲。赴浙江會辦洋務。

七月。革烏爾恭額職。旋定絞監候。以劉韻珂代之。

自定海失守後。漸有蜚語上聞。有謂上年廣東繳煙。先許價買而後負約。以致激變者。帝意始疑。敕沿海督撫。遇洋船投書。卽收受馳奏。適伯麥及義律。以五艘駛赴天津投書。多所要素。直隸總督琦善以聞。詔以琦善爲欽差大臣。赴粵查辦。革林則徐鄧廷楨職。留粵聽勘。並敕沿海各省。不得開礮。

十二月癸酉。命賽尙阿在軍機大臣上行走。

乙巳。以裕謙爲欽差大臣。命伊里布回兩江總督任。會同提督陳化成。防堵江蘇海口。

江南鄉試正考官文慶。以私帶舉人熊少牧入闈。革職。

命刑部尙書祁墳馳往廣東。督理糧臺。

道光二十一年辛丑。正月己丑。琦善奏英人入犯。沙角大角礮臺同時失守。琦善之至廣東。一切反林則徐所爲。謂可得外人歡心。而敵人則日夜增造小船。招集販煙之蜈蚣艇蟹艇數百。此外火箭噴筒竹梯。攻具。增造不可勝計。水師提督關天培密請增兵。琦善惟恐其妨和義。固拒不許。義律乘其無備。突攻沙角大角礮臺。副將陳連升戰死。提督關天培及總兵李廷鈺游擊馬辰等。尙分守鎮遠威遠靖遠各礮臺。兵各僅數百。相向而泣。天培遣人至省城求增兵。闔城文武皆力求。琦善置不問。惟日夜作書。遣漢奸鮑鵬持送義律。於償還煙價外。復以香港許之。並歸浙江俘人。以易定海。琦善與立契約。帝不許。琦善言粵省情形。稱地利無要可扼。軍械無利可恃。兵力不固。民情不堅。帝以琦善危言要挾。孤恩誤國。實屬喪盡天良。著卽革職鎖拏來京。所有家產。卽行查鈔入官。以祁墳代之。

甲午。命御前大臣領侍衛內大臣奕山爲靖逆將軍。戶部尙書隆文。湖南提督楊芳爲參贊大臣。馳赴廣東軍營。

二月。革大學士伊里布職。仍留兩江總督任。伊里布之抵浙江。帝誠以乘隙進勦。不得因琦善有不宜輕進之語。意存觀望。伊里布見英人勢盛。乃密奏不宜進兵。帝不悅。至是。乃奏英人全數起碇。定海業經收復。帝以其庸懦無能。故有是譴。旋入京。以裕謙代之。命寶興爲文淵閣大學士。仍留四川總督任。以吏部尙書奕經協辦大學士。

英人攻破虎門礮臺。提督關天培死之。

戊寅。命齊慎爲參贊大臣。赴粵會勦。

三月丙戌。釋周天爵赴廣東軍營。

乙未。致仕大學士文孚卒。予諡文敬。

賞林則徐四品卿銜。馳赴浙江軍營。

閏三月。協辦大學士吏部尙書湯金釗以事降四級調用。調卓秉恬爲吏部尙書。協辦大學士。

召伊里布來京。以裕謙爲兩江總督。

英人攻四方礮臺。陷之。遂直攻廣州省城。礮聲如雷。晝夜不息。將軍以下。皆避入巡撫署。議使廣州知府余保純出城講款。義律立索軍餉銀六百萬圓。煙價在外。香港再議。將軍等一切允之。城上改樹白旗。先令洋商出二百萬圓。餘於運庫藩庫海關庫發給。洋兵下山回船。義律卽促將軍參贊離城。奕山隆文退兵屯金山。離省河數十里。先撤回湖南兵。惟楊芳等仍留廣州彈壓。隆文於講和時。卽憤恚成疾。及抵金山。不數日卒。奕山飾詞入告。猶以義律窮蹙乞撫。求准照舊通商。帝亦微聞之。不之詰也。

四月己酉。賜龍啓瑞等二百二人進士及第出身有差。

五月癸亥。革林則徐四品卿銜。發往伊犁效力贖罪。

六月庚寅。革伊里布職。發軍臺效力贖罪。

刑部奏琦善應照守備不設失守城寨律。擬斬監候。得旨。著照所請。秋後處決。

癸卯。河南下南廳祥符汛河溢。革河督文冲職。枷號河干。旋發往伊犁。以朱襄代之。

七月乙卯。命林則徐折回東河。效力贖罪。

命大學士王鼎等赴東河督辦大工。

戊辰。賞前任寧夏將軍特依順都統銜。作爲參贊大臣。赴廣東辦理洋務。

庚辰。英兵船闖進福建青嶼口門。廈門失守。先是。洋艘之攻廈門也。鄧廷楨督同兵備道劉耀春。止守舊

礮臺。壘沙垣。據形勢。故不能破。及顏伯燾繼之。又於口外之嵎嶼。青嶼大小檔。增建三礮臺。備多力分。新

鑄大礮。又多未就。及洋兵至。專攻一臺。一臺破。再攻一臺。將士死傷相繼。遂注攻大礮臺。飛礮從空墜岸

上。顏伯燾退至同安。洋人得廈門。亦不守。不數日。全隊駛往浙江。顏伯燾遂以收復廈門奏。詔降顏伯燾

三品頂戴。仍留總督任。命怡良馳赴福建查辦。

八月。方英人之議和於粵也。繳還定海。帝命江浙各省撤兵裁餉。裕謙以兩江總督充欽差大臣。專辦浙

事。甫行至鎮海。已聞廈門失守之信。於是飛檄定海總兵葛雲飛。會同處州鎮總兵鄭國鴻。壽春鎮總兵

王錫朋。統各鎮兵五千。前赴定海。扼其內犯之路。英將濮鼎查郭士利等。果由廈門再犯定海。三總兵皆

戰死。帝謂其以四千殘師當二萬巨寇。惋惜久之。均飭部從優議卹。

鎮海陷。欽差大臣裕謙死之。定海既失。鎮海僅餘兵四千。裕謙守城內。遣余步雲守城外。招寶山。余步雲有異志。不許士卒開礮。及洋兵由山麓攀援登岸。余步雲即率兵西走。洋兵據招寶山。俯攻鎮海。裕謙知事不可爲。令副將豐伸齋欽差大臣關防。送浙江巡撫。自沈泮池死之。旋寧波失守。慈谿餘姚二城皆逃散一空。

九月乙卯。命協辦大學士奕經爲揚威將軍。副都統特依順侍郎文蔚爲參贊大臣。馳赴浙江辦理軍務。釋奕紀往廣東軍營。效力贖罪。

己未。實授牛鑑兩江總督。

命戶部尙書祁寯藻在軍機大臣上行走。

十月。臺灣鎮達洪阿等奏。英船入犯臺灣。堵禦獲勝。英人乘廈門之捷。以兵駛進雞籠口。臺灣鎮達洪阿與兵備道姚瑩。協力抵禦。英兵改犯大安港。達洪阿姚瑩以計誘之入口。爲暗礁所擊。擱淺中流。官兵鄉勇乘危邀擊。遂俘其衆。捷聞。賞達洪阿太子少保銜。姚瑩加二品頂戴。

道光二十二年壬寅正月。湖北崇陽縣匪徒鍾人杰等作亂。官兵討平之。

二月丙戌。命林則徐仍發往伊犁效力贖罪。

祥符大工合龍。

賞伊里布七品頂帶。赴浙江軍營。奕經進攻寧波。大敗。劉韻珂遂奏請伊里布來浙主款。帝復命宗室尙書者英爲欽差大臣。署理杭州將軍。與參贊齊慎同赴浙。降旨不許進兵。並不許擒斬洋人。有兵勇殺一洋兵。卽行正法。皆劉韻珂所奏請也。

四月。奕經奏收復寧波郡城。英人旣得志於浙。遂北窺長江。於三月二十七日。棄城登舟。鎮海洋船亦棄城而北。犯乍浦。陷之。伊里布至乍浦。洋船議款。英人要挾甚侈。不能成議。

五月己酉。命伊里布以四品頂帶署乍浦副都統。

大學士王鼎自殺。予諡文恪。鼎自河防歸。爲遺疏數千言。極言穆彰阿等欺君誤國之罪。並薦林則徐可大用。遂服藥自盡。穆彰阿使人以危言怖其子。竟不得上。

命兵部右侍郎何汝霖在軍機大臣上學習行走。

英人攻陷寶山。江南提督陳化成死之。寶山城在吳淞口外。洋面寥闊。知縣周恭壽請伏兵口內。毋守海口礮臺。牛鑑不從。總兵王志元守小沙背之。徐州兵五百。卽在浙從余步雲棄招寶山之潰兵也。牛鑑不懲創之。反令守要害。終日騷掠。居民洶洶。周恭壽力請撤換他兵。亦不聽。英人來攻。陳化成礮沈其二艘。敵以小舟攻小沙背。徐州兵果望風西走。化成中礮死。牛鑑走嘉定。寶山遂陷。上海城逃走一空。而松江

以提督尤渤統壽春兵二千固守。得不陷。化成子諡忠愍。

命賽尙阿爲欽差大臣。馳往天津。會同訥爾經額辦理防務。

六月己卯。命齊慎赴江蘇。扼要應援。

命伊里布回乍浦副都統任。暫留著英會同牛鑑。辦理江蘇防勦事宜。

英人由海入江。至鎮江。參贊大臣齊慎湖北提督劉允孝。督兵禦於城外。見兵力不支。退守距郡四十五里之新豐地方。外援旣斷。英師距壇攻城。城中惟駐防一軍差完。副都統海齡率以死守。攻之二日。不克。敵乃以火箭射入城中。延燒近城房屋。遂乘間架雲梯入城。海齡率家人自焚死。是時洋船八十餘艘。礮聲震江岸。自瓜洲至儀徵之鹽艘估舶。焚燒一空。火光百餘里。揚州鹽商賂以銀五十萬緡。不及於禍。英兵直逼金陵。東南大震。

七月。英兵抵江寧城下。時伊里布初到。著英方自浙起行。牛鑑飛書照會。以欽差已奉諭旨永定和好。不日即可到省。伊里布復遣張喜至英舟。傳大府意羈縻之。英將亦以要求各款。照會到省。一議索煙價。商欠戰費銀二千一百萬。一議准寄居貿易於廣山福州廈門寧波上海五港口。一議英人之有職者。與中國官員用平行禮。其餘則割抵關稅。釋放漢奸等款。末請鈐用國寶。以昭誠信。要三帥刻日畫諾。著英至。逐一照覆。由八百里馳驛奏聞。帝覽而憤甚。以其奏示軍機諸臣。時穆彰阿當國。力言兵興三載。糜餉勞

師無尺寸之探。勦之與撫。功費正等。而勞逸已殊。靖難息民。於計爲便。帝許之。七月初九日。耆英伊里布牛鑑親赴英將璞鼎查之舟。越二日。璞鼎查馬禮遜亦入城。會於正覺寺。連日分提江寧蘇州藩庫揚州運庫銀數百萬。如數餽之。洋兵始出江而去。

庚午。江南桃北廳河盜。

九月。牛鑑革職。交刑部治罪。以耆英爲兩江總督。

召奕山來京。以伊里布爲欽差大臣。廣州將軍。辦理善後事宜。

癸亥。召奕經文蔚來京。命齊慎回四川提督任。

十月己卯。程楙采奏江豫捻匪竄入皖境。拒捕傷人。命江蘇安徽河南各督撫。分飭所屬文武員弁。四路兜擒。盡法懲治。

命奕山奕經文蔚俱交部治罪。特依順齊慎均交部嚴加議處。後奕山奕經依部議均定爲斬監候。秋後處絞。文蔚特依順加恩。改爲革職留任。

乙未。命戶部尙書敬徵協辦大學士。

十一月。以英人控訴臺灣鎮總兵安殺遭風被難洋人。冒功捏奏。命怡良渡臺查辦。

已革兩江總督牛鑑定爲斬監候。秋後處決。

十二月提督余步雲伏法。

賞琦善四等侍衛。爲葉爾羌幫辦大臣。

道光二十三年癸卯正月丙辰改浙江定海縣爲定海廳直隸同知。

二月乙未廣州將軍伊里布卒。

三月庚戌以耆英爲欽差大臣赴廣東辦理通商事宜。

丁巳試翰林詹事等官擢萬青藜等五員爲一等餘升黜留館有差。

乙丑賞琦善三品頂帶爲熱河都統。

丙寅賞文蔚藍翎侍衛爲古城領隊大臣奕經四等侍衛爲葉爾羌幫辦大臣。

戶部銀庫虧空事發命王大臣查辦。

怡良奏請將達洪阿姚瑩解交刑部治罪。帝不許。舊制臺灣歸閩省管轄。以遠在海外。許專摺奏事。及雞籠之捷。飛章入告。閩督弗善也。會洋人縱謠言。謂臺中兩次俘獲。均係遭風難人。而鎮道乘危徼功。心所不服。愬之浙江閩粵四省大吏。會令上聞。怡良奉命渡臺。正欲傳旨逮問。而臺中士民遠近奔赴。合詞申理。怡良懼激變。許爲直之。而私奏其一意鋪張。致爲藉口指摘。咎有應得。並逼取供詞。二人俱逮入都。幸帝卒鑒其枉。僅從革職。旋即起用。迨咸豐初年。頒示謄黃。特爲二人滿雪。其論遂定。

四月丁丑。御史陳慶鏞奏稱琦善等三人起用。爲刑賞失措。無以服民。帝嘉其亢直敢言。命琦善奕經文蔚均著革職。卽令閉門思過。以昭賞罰之平。

六月。雲南南甸土匪作亂。官兵討平之。

河南中牟河決。革河督慧成職。枷號河干。以鍾祥代之。旋命麟魁廖鴻荃往督辦。

七月丁未。釋鄧廷楨回籍。旋賞三品頂帶。署甘肅布政使。

八月丁未。裁稽查崇文門稅務滿漢御史。

釋奕山回家。

十月戊申。賞奕經二等侍衛。爲葉爾羌參贊大臣。奕山二等侍衛。爲和闐辦事大臣。

庚戌。賞琦善二等侍衛。爲駐藏大臣。

甲子。予已革臺灣鎮總兵達洪阿三等侍衛。爲哈密辦事大臣。

道光二十四年甲辰。正月戊辰。以來歲皇太后七旬萬壽。詔開恩科。

二月庚戌。以中牟堵口復決。尙書麟魁廖鴻荃均革職。

釋牛鑑於獄。發往河南。交鄂順安差委。

三月壬申。諭。著英見已調任兩廣總督。各省通商善後事宜。均交該督辦理。著仍頒給欽差大臣關防。遇

有辦理各省海口通商文移事件。均准鈐用。

臺灣匪徒洪協等作亂。旋就執伏誅。

四月乙巳。諭軍機大臣。開礦一事。前朝屢行。雲南一省。除見在開採外。尙多可採之處。著寶興。桂良。賀長齡。周之琦。體察地方情形。相度山場。民間情願開採者。准照見開各廠。一律辦理。斷不可假手吏胥。致有侵蝕滋擾。阻撓諸弊。

辛酉。賜孫毓澐等二百九人進士及第。出身有差。

五月辛巳。開採廣西北流鐵礦。

六月丁酉。直隸永定河溢。

七月。湖南耒陽縣匪陽大鵬作亂。捕送京師。伏誅。

九月乙酉。永定河隄工合龍。

申嚴武弁乘轎禁例。

道光二十五年乙巳。正月。中牟河工合龍。

二月。命兩廣總督耆英協辦大學士。

四月乙卯。賜蕭錦忠等二百十七人進士及第。出身有差。

西寧番人作亂。總兵慶和被戕。命惠吉前赴甘肅。相機妥辦。

六月己未。江蘇中河廳桃源汛河溢。

九月。命林則徐回京。以四五品京堂候補。

十一月。以布彥泰爲陝甘總督。未到任前。命林則徐以三品頂帶先行署理。

道光二十六年丙午。三月。鄧廷楨卒。以林則徐爲陝西巡撫。

五月。前任湖南提督楊芳卒。予諡勤勇。芳與楊遇春齊名。天下稱二楊。及海疆事起。威名稍挫云。

閏五月。雲南永昌回人作亂。

戊戌。命端華襲鄭親王爵。並在御前行走。

八月。以雲南回匪日久未平。命李星沅爲雲貴總督。

十二月丙子。調鄭祖琛爲廣西巡撫。

賞琦善二品頂帶。授四川總督。

道光二十七年丁未。正月。緬人擾邊。

三月。李星沅奏。官兵圍勦回匪。擒獲首要各犯。餘匪漸就肅清。

四月。調李星沅爲兩江總督。以林則徐爲雲貴總督。

著英奏英人帶領兵船突入省河。嗣經委員馳往佛山。將當日在場鬧鬧之匪徒關亞言等拏獲懲辦。英船始退去。

癸酉。賜張之萬等二百三十一人進士及第出身有差。

五月丙戌。試翰林詹事等官。擢王慶雲等四人爲一等。餘升黜留館有差。

命文慶陳孚恩在軍機大臣上行走。

八月。喀什噶爾回人滋事。授布彥泰爲定西將軍。軍務一切。悉聽節制。奕山爲參贊大臣。襄辦軍務。

九月甲申。諭直隸山東河南官吏。會拏捻匪。

丁酉。仍著兩江總督兼轄河務。

十月。湖南新寧縣黃坡峒地方。獠人雷再浩糾黨滋事。官兵討平之。

奕山奏勦匪獲勝。喀英二城解圍。

十二月戊午。湖南乾州廳苗人滋事。命裕泰等勦辦。

甲戌。召耆英來京。以徐廣縉署兩廣總督。葉名琛護理廣東巡撫。

道光二十八年戊申。正月甲申。湖南乾州廳苗人被勦悔罪自首。命裕泰分別懲辦。仍搜獲餘匪。

二月。命文慶無庸在軍機大臣上行走。

四月乙卯。諭兩廣湖南江西各督撫飭拏會匪。

八月甲辰。申定道府以下官員祖孫父子及外姻親族同省同府回避例。督撫與河督鹽政有關糾察者。亦令回避。

十月甲寅。大學士寶興卒。予謚文莊。

丁巳。諭劉韻珂等。飭拏浙江沿海盜匪。

申諭海疆各督撫提鎮。督飭水師。堵拏洋盜。

十一月己卯。命耆英爲文淵閣大學士。以琦善協辦大學士。仍留四川總督任。

乙酉。諭四川雲貴兩廣江西各督撫。於所屬境內確切查勘礦產。

道光二十九年己酉。二月。四川中瞻對野番工布朗出巢滋事。命琦善迅速勦滅。

四月。李星沅以病免。以陸建瀛爲兩江總督。

乙巳。以山東洋盜搶掠。申諭徐澤醇。飭屬搜拏沿海村塢盜藪。

癸丑。賞徐廣縉子爵。葉名琛男爵。初。鴉片之戰終局。政府許英人以五口通商。得派領事於五處。專理商賈事宜。福州廈門寧波上海已設領事。惟廣州紳民自三元里決戰後。積嫌已深。合詞請大府毋許英人入城。耆英知爲違約。又不能禁遏。及徐廣縉代爲總督。英人以兵艦入粵河。申前約。仍爲鄉練所阻。不得

要領。至是廣緝與香港總督更定廣東通商專約。遂以嚴禁入城之語載入約中。朝旨大悅。故有是賞。閏四月辛巳。琦善奏親督漢土官兵進勦中瞻對野番。大獲勝仗。

五月庚戌。琦善奏中瞻對野番悔罪投誠。並附近中瞻對之卓巴塞爾塔野番。傾心效順。

六月。江蘇浙江安徽湖北水災。命及時籌辦賑撫。

七月戊戌。協辦大學士吏部尙書陳官俊卒。予諡文愨。

己亥。命戶部尙書祁寯藻協辦大學士。

林則徐以病免。以程喬采爲雲貴總督。張日歧爲湖南巡撫。

九月甲辰。布彥泰以病免。以琦善署陝甘總督。裕誠署四川總督。

戊申。命署吏部右侍郎季芝昌在軍機大臣上行走。

戊午。命服闋尙書何汝霖。以一品銜署禮部左侍郎。仍在軍機大臣上行走。

十月庚午。以故朝鮮國王李兔子昇襲爵。命瑞常和色本往封。

十一月丙申。予告大學士阮元卒。予諡文達。

湖南新寧縣匪徒李沅發滋事。官兵討平之。

壬戌。正陽門箭樓災。

十二月甲戌。皇太后崩。

湖南巡撫馮德馨奏。五排人李沅寶。係李沅發之弟。聞李沅發已被焚殺。定期分股前往新寧復仇。命湖廣總督裕泰由湖北省選派得力將弁數員。並挑帶精兵數百名。會同搜捕。

道光三十年庚戌。正月丙午。帝不豫。丁未。大漸。召宗人府宗令載銓。御前大臣載垣。端華。僧格林沁。軍機大臣穆彰阿。賽尚阿。何汝霖。陳孚恩。季芝昌。內務府大臣文慶。公啓鏞。匣。宣示御書。皇四子奕訢立爲皇太子。是日午刻。帝崩於圓明園。苦次。

庚戌。封皇子奕訢爲恭親王。奕譞爲醇郡王。奕詝爲鍾郡王。奕誨爲孚郡王。

己未。皇太子卽皇帝位。

二月辛未。下詔求言。

四月甲戌。上大行皇帝尊諡曰。效天符運立中體正至文聖武智勇仁慈儉勤孝敏成皇帝。廟號宣宗。丁亥。賜陸增祥等二百十二人進士及第出身有差。

五月丁酉。裕泰等奏殲除湖南匪黨。地方一律肅清。

六月癸亥。大學士潘世恩因病乞休。允之。以祁寯藻爲大學士。杜受田以刑部尙書協辦大學士。

廣西洪秀全起兵於桂平縣之金田村。初。粵西歲饑多盜。適湖南雷再浩李沅發兩次之亂。均竄至粵境。

粵匪遂蠶起應之。秀全者。原籍廣東花縣。先是有朱九濤。倡上帝會。亦名三點會。秀全與同邑馮雲山師事之。旋以秀全爲教主。道光十六年。秀全及雲山至廣西。在桂平武宣二縣接壤之鵬化山中傳其教。秀全妹塔蕭朝貴。桂平人。楊秀清。韋昌輝。貴縣人。石達開。先後入教。凡人教者。拜上帝。稱爲天父。天父名耶和華。以耶穌爲長子。秀全爲次子。故稱耶穌爲天兄。凡人教皆平等。男稱兄弟。女稱姊妹。並有真言寶誥等書。密爲傳布。蓄髮藏山箚間。遣人分途至各處勸誘。附從者日衆。時廣西巡撫鄭祖琛出省勦匪。駐平樂府。秀全等遂起兵於金田村。

九月。調向榮爲廣西提督。

辛丑。授林則徐欽差大臣。迅赴廣西。則徐旋行至廣東普寧縣病卒。詔贈太子太傅。予諡文忠。

十月丙戌。頒硃諭罪穆彰阿者英。革穆彰阿職。永不敘用。著英降爲五品頂戴。以六部員外郎候補。

命戶部尙書賽尙阿協辦大學士。

十一月庚子。命前任兩江總督李星沅爲欽差大臣。馳赴廣西。以周天爵署廣西巡撫。

清史綱要

卷十一

咸豐元年辛亥。正月戊子。命賽尙阿爲大學士。

三月丙申。命賽尙阿爲欽差大臣。馳往湖南。辦理防堵事宜。時洪秀全自金田北走象州。李星沅與周天爵以事相齟齬。奏請專派總統。故有是命。旋星沅因病。命回湖南會辦防堵。命賽尙阿馳赴廣西接辦。又以周天爵年老。命回京。授鄒鳴鶴爲廣西巡撫。星沅旋病卒。

命內閣侍讀穆蔭。以五品京堂候補。在軍機大臣上學習行走。

四月己未。命戶部侍郎舒輿阿在軍機大臣上行走。

庚申。帝御乾清門聽政。自是以爲常。

甲子。以已革廣西巡撫鄭祖琛。廣西提督閔正鳳。養癰貽患。均發往新疆效力贖罪。

五月甲辰。陝甘總督琦善以勦辦黑城撒拉回子及黃喀窪番人。妄加誅戮。命革職交刑部審訊。旋發往

吉林。充當苦差。

乙巳。命戶部尙書裕誠協辦大學士。

調裕泰爲陝甘總督。以季芝昌爲閩浙總督。

壬子。命工部侍郎彭蘊章在軍機大臣上行走。

閏八月。洪秀全入永安州。建國號爲太平天國。秀全自爲天王。封楊秀清爲東王。蕭朝貴爲西王。馮雲山爲南王。韋昌輝爲西王。石達開爲翼王。洪大全爲天德王。秦曰綱羅亞旺范連德胡以咷等。各稱丞相軍帥等職。

南河豐北廳河隄潰決。

十月癸卯。陝甘總督裕泰卒。予諡莊毅。授舒興阿陝甘總督。

十一月。賽尙阿督向榮烏蘭泰等攻永安不克。遂圍之。時向榮統北路。烏蘭泰統南路。互有違言。知縣江忠源率勇從烏蘭泰軍。頗調停其間。不能得。因引疾去。

咸豐二年壬子。正月壬子。賞給緜悌之繼子奕劻貝子。命兼奉慶良郡王。縣懋祭祀。

丁丑。閩浙總督季芝昌奏。臺灣匪徒洪紀作亂。由鎮道督兵討平。

辛酉。命裕誠爲大學士。以直隸總督訥爾經額協辦大學士。

二月。洪秀全自永安潰圍東走。總兵長瑞長壽董先甲邵鶴齡陣亡。副都統烏蘭泰受傷。旋卒。秀全遂逼桂林省城。烏蘭泰於上年二月。由廣州副都統調至廣西。屢戰皆捷。及圍永安。又生擒洪大全送京師。至是。以追敵涉險受傷而逝。

四月乙巳。賜章鋈等二百三十九人進士及第出身有差。

太平軍陷全州。秀全攻桂林。向榮與巡撫鄒鳴鶴等擊卻之。遂解圍去。出興安。陷全州。乘勝入湖南境。江忠源敗之於蓑衣渡。焚其舟幾盡。並礮斃馮雲山。太平軍遂棄輜重登陸。

五月。陷道州。提督余萬清棄城遁。遂分陷江華永明各縣。

七月丙寅。協辦大學士杜受田卒。子諡文正。受田爲帝師傅。故飾終之典尤渥。

太平軍陷桂陽州郴州。趨長沙。

九月己酉。以調度乖方。革大學士賽尙阿職。逮問。湖廣總督程裔采革職留營效力。授徐廣縉爲欽差大臣。署理湖廣總督。

辛亥。命訥爾經額爲大學士。仍留直隸總督任。戶部尙書禧恩。吏部尙書賈楨。俱協辦大學士。

十月壬辰。季芝昌以病免。調吳文鎔爲閩浙總督。以羅繞典爲雲貴總督。

甲午。冊立貴妃鈕祜祿氏爲皇后。

太平軍攻長沙。官軍擊卻之。遂陷岳州。蕭朝貴調長沙無備。率衆由醴陵上犯。總兵和春與江忠源馳至。與敵相持。向榮亦自桂林至。會朝貴中礮死。秀全等自郴州悉衆來攻。日久不克。遂解圍渡湘而西。陷益陽。渡洞庭。時湖北提督傅勒恭武守岳州。先三日遁。遂陷之。盡得吳三桂時所遺軍械礮位。

十一月甲子。協辦大學士禧恩卒。予諡文莊。

浙江布政使椿壽自盡。諭巡撫黃宗漢詳細訪察。是否另有別情。尋奏稱因庫款不敷。漕運棘手。並無別情。

太平軍陷漢陽。十二月。陷武昌。巡撫常大淳等死之。時太平軍蔽江而東。所過城鎮。望風而靡。總督程蔣采在衡州。旋革職遣戍。命張亮基署理湖廣總督。

己亥。授葉名琛兩廣總督。

乙亥。命丁憂侍郎曾國藩。在湖南原籍。幫同辦理本省團練鄉民。搜查土匪諸事務。

辛丑。徐廣縉逮問。授向榮爲欽差大臣。

命兩江總督陸建瀛爲欽差大臣。進防江皖。

命琦善爲欽差大臣。由河南進勦。琦善先已釋還。令署河南巡撫。至是。以防太平軍北竄。故有是命。

咸豐三年癸丑。正月。太平軍東下。至廣濟之武穴。陸建瀛兵潰退。九江安慶俱失守。安徽巡撫蔣文慶等

死之。向榮收復武昌。建瀛逮問。命怡良爲兩江總督。

二月。豐北河工合龍。

江寧失守。將軍祥厚等死之。已革總督陸建瀛被戕。向榮率兵追至江寧。遂結營城外孝陵衛。

太平天國丞相林鳳祥等陷鎮江揚州。並由揚州分兵踞臨淮關。入鳳陽府。又至浦口。攻六合。秀全與楊秀清謀。欲分兵守江南。而自率衆由淮安北趨。有一老舟子言。北路無水乏糧。遇困莫解。不如踞南京爲都。秀清信之。乃遣林鳳祥羅大綱李開芳等北行。

壬寅。行用官票。命於京師先行。

三月丁卯。定各省捐貲備餉。准廣文武鄉試中額及文武試學額例。

四月。琦善率師圍揚州。初。琦善由信陽州。與提督陳金綬學士勝保。敗敵浦口。遂進攻揚州。旋總督慧成。查文經。福濟等。均率師來會攻。侍郎雷以誠亦募勇防揚州東路。

己亥。賜孫如僅等二百二十二人進士及第出身有差。

太平軍由鳳陽擾河南。陷歸德府。攻開封。爲官軍所敗。遂圍懷慶。立爲柵城。與官軍相持。

五月戊申。始製銀鈔。

福建會匪滋事。同安廈門失守。

福建漳州府及延平府土匪滋事。永安沙縣失守。鎮道被戕。旋即收復。

鑄當十大錢。

太平軍攻南昌。分陷各府。湖北臬司江忠源擊卻之。時楊秀清遣胡以晄攻安徽桐城。破集賢關。遂再陷安慶。又遣賴漢英石祥貞攻九江湖口。進圍南昌。巡撫張芾拒守。適湖北臬司江忠源來援。屢戰皆捷。

六月。命各直省行堅壁清野法。

侍郎雷以誠始行抽收釐金於揚州。初。以誠以巡視黃河隘口。請捐貲募勇。自成一軍。因江都之仙女鎮各會館。舊有抽收釐金章程。遂仿行以濟軍需。坐賈則按月收捐。爲板釐。行商則設卡抽捐。爲活釐。按獲利之厚薄。約取百中之二三。其後各省皆仿行之。軍餉賴以得濟。

庚辰。命訥爾經額爲欽差大臣。尙書恩華將軍托明阿幫辦軍務。赴河北進勦。

豐北河工復決。

七月。河北軍破敵木柵。遂解懷慶圍。

河南軍馳援江西。初。丁憂侍郎曾國藩。在湖南湘鄉原籍。團練鄉兵。仿明戚繼光編束隊伍法。創爲湘勇營。其制每營五百人。擇官紳誠樸者率之。日事訓練。先討土匪。皆平之。湘勇遂以勁旅稱。至是。敵圍南昌。並入江西腹地。江忠源飛書湖南請援。國藩與巡撫駱秉章。派湘勇馳援。時吉安土匪圍城。一戰解之。

八月己卯。調吳文鎔爲湖廣總督。以慧成爲閩浙總督。裕瑞爲四川總督。

太平軍由懷慶破山西平陽府。遂入直隸境。訥爾經額旣解懷慶之圍。凱旋還直隸。方次臨洛關。先一日。有冒官軍旗幟責州縣供張者。蓋敵已由潞城黎城間小徑入關矣。官軍遇敵。倉皇失措。遂大潰。訥爾經額以數十人走入廣平府。旋與山西巡撫哈芬均逮問。以勝保爲欽差大臣。桂良爲直隸總督。

前署兩江總督楊文定以奏報軍務失實。逮問。旋遣戍。

九月辛亥。授惠親王繇愉爲奉命大將軍。科爾沁郡王僧格林沁爲參贊大臣。保衛畿疆。京師戒嚴。

太平軍解南昌圍。趨九江。遂入湖北境。官軍失利於田家鎮。黃州滿陽二府復陷。

十月。太平軍陷深州。攻天津。踞靜海縣。分屯獨流楊柳青等處。

命曾國藩酌帶練勇。馳赴湖北協勦。

戊寅。命恭親王奕訢在軍機大臣上行走。

以麟魁爲總管內務府大臣。勿庸在軍機處行走。命侍郎瑞麟穆蔭在軍機大臣上行走。

上海土匪劉麗川踞城。命巡撫許乃釗勦之。

太平軍由安慶踞集賢關。入桐城舒城。侍郎呂基賢死之。遂圍廬州。

十一月。安徽穎毫捻匪滋事。踞雉河集。給事中袁甲三擊敗之。捻者。捏也。不逞之徒。聚捏成隊。肆劫掠。俗

謂之捻子。江南之淮徐海。安徽之穎毫壽。河南之南汝光。山東之兗沂曹濟。湖北之襄棗鍾隨。其民類多標悍。其股無慮千百。此次初稱亂於淮河。袁甲三駐臨淮關勦之。殄戮甚衆。各捻麤定。甲辰。以和春爲江南提督。

閩浙總督王懿德奏克復廈門。

丁巳。定私鑄大錢罪名。時行用當百當十大錢。及鉛錢鐵錢。私鑄者衆。雖用嚴刑。勿能止也。

乙丑。行官票寶鈔。凡民間完納地丁錢糧。及一切交官解部協撥等款。均准以官票寶鈔五成爲率。官票銀一兩。抵制錢二千。寶鈔二千。抵銀一兩。與大錢制錢相輔而行。

勝保攻天津敗退。副都統佟鑑天津縣知縣謝子澄死之。

太平軍自揚州潰圍竄瓜州。革琦善等職。留營效力。

廬州失守。巡撫江忠源死之。以援救不力。革舒興阿職。以福濟爲安徽巡撫。與提督和春。規畫廬州。田家鎮既敗。忠源突圍至廣濟。旋授安徽巡撫。以廬州事急。遂由六安州進。時胡以晄率衆十餘萬。圍攻廬州。忠源入城拒守月餘。城陷。死之。事聞。照總督例賜卹。予諡忠烈。

咸豐四年甲寅。正月壬寅。授易棠陝甘總督。

僧格林沁勝保等攻破獨流。太平軍分竄東城陳官桃園九等村莊。

湖北官軍敗於黃州。總督吳文鎔死之。先是，太平軍犯省城。巡撫崇綸欲逃。文鎔力止之。及敵退，崇綸大憾。凡所籌畫，百計齟齬。又奏文鎔閉門自守，有詔詰責。文鎔不得已，出駐黃州。至是，師潰，死之。崇綸旋亦逮問，畏罪自殺。

二月辛巳，以台湧爲湖廣總督。時湖北德安諸郡縣均陷。台湧駐隨州。巡撫青麐守武昌。乙未，晉封貴人那拉氏爲懿嬪。

太平軍遣孫寅三等陷安徽太平府。結壘三十餘，直達江干，爲金陵聲援。

楊秀清遣石祥貞會漢黃各軍，溯江陷岳州。分擾靖江，並入湘陰城。

三月，太平軍自皖北入山東，逼臨清州。河北之太平軍自獨流破後，勢已窮蹙。天王密令安徽之兵，由豐工渡河，破金鄉縣，臨清州旋爲官軍克復。餘衆走保冠縣、鄆城、曹縣，旋亦爲官軍悉數殄除。壬子，革山東巡撫張亮基職，遣戍。因勝保參其欺飾冒功也。

會國藩統水陸師敗太平軍於湘潭，遂與塔齊布克復湘潭縣。此爲湘軍初興第一次奇捷。四月己丑，予告大學士潘世恩卒。予諡文恭。

五月，高唐州失守。太平軍自獨流破後，走保阜城。又踞連鎮。至是，又分股南破高唐。湖南常德府失守。太平軍由湘潭竄陷常德。

六月。武昌失守。布政使岳興阿等死之。巡撫青麀棄城遁長沙。旋命正法。革台湧職。以楊霈代之。楚軍復岳州。

七月。江南軍克復太平府。

閏七月。琦善卒於軍。命前江寧將軍托明阿督辦揚州軍務。

八月。曾國藩督水陸各軍敗太平軍於武昌。遂復武昌漢陽二城。並復黃州。

十月。揚州軍敗太平軍於浦口。

十一月甲申。革四川總督裕瑞職。以其收受陋規辦案錯誤也。以黃宗漢爲四川總督。

雲貴總督羅繞典卒。以恆春代之。

庚寅。祁寯藻致仕。命賈楨爲大學士。

咸豐五年乙卯。正月。江蘇巡撫吉爾杭阿克復上海縣城。斬劉麗川。

楊霈敗於廣濟。時官軍圍九江急。太平軍乃分軍擾上游。楊霈不設備。倉皇突圍走蘄水。太平軍遂陷漢口。入襄河。湖北大擾。

僧格林沁等攻破連鎮。擒林鳳祥。河北肅清。僧格林沁由郡王進封親王。

二月。僧格林沁等復高唐州。太平軍餘衆踞馮官屯。

三月武昌復陷。巡撫陶恩培等死之。命胡林翼署湖北巡撫。林翼以翰林改官貴州知府。四年。率黔勇勦匪。由湖北通城援武昌。累升湖北布政使。屢戰於小河口。鸚鵡洲。至是署巡撫。聚軍上游。力圖進取。四月。僧格林沁破馮官屯。擒李開芳等。北軍告蕩。賞僧格林沁親王世襲罔替。西凌阿三等男爵。撤大將軍參贊大臣。京師解嚴。

西安將軍扎拉芬於隨州陣亡。德安失守。

己未。革楊霽職。以官文爲湖廣總督。官文爲荊州將軍。屢破敵於岳家口。仙桃鎮。及復宜昌。沔陽。天門等處。至是。命爲湖廣總督。赴襄陽督師。

五月壬戌。命察哈爾都統西凌阿爲欽差大臣。馳往湖北。督辦軍務。並命荊州將軍綿洵爲幫辦。

六月。下北廳。蘭陽。汛銅瓦廂。三堡。河隄漫溢。

七月壬戌。尊康慈皇貴太妃爲康慈皇太后。

庚午。皇太后崩。

壬午。諭恭親王奕訢。於一切禮儀。多有疏略之處。著勿庸在軍機大臣上行走。並開去宗人府宗令正黃旗。滿洲都統缺。

命戶部尙書文慶在軍機大臣上行走。

湖南提督塔齊布卒於軍。塔齊布由侍衛揀發都司。在湖南疊著戰功。超升提督。素以智勇著名。所向無堅敵。至是將攻九江。以力盡心忤而卒。予諡忠武。

楚軍克蔡店。拔漢口鎮。

八月。福濟奏擒匪張洛刑等。復踞雒河集。

九月癸亥。大學士卓秉恬卒。予諡文端。

庚午。命戶部尚書文慶兩廣總督葉名琛俱協辦大學士。名琛仍留兩廣總督任。

乙酉。以官文爲欽差大臣。督辦湖北軍務。時西凌阿綿洵以久攻德安未克。命革職。並逮問提督孔廣順。

命官文赴德安督勦。德安旋即克復。

十月。和春福濟克復廬州府城。

十二月乙巳。命文慶葉名琛爲大學士。桂良彭蘊章協辦大學士。葉名琛桂良仍留兩廣直隸總督任。

雲南回民杜文秀起蒙化。襲踞大理府城。提督褚允昌死之。

咸豐六年丙辰。三月。瓜州鎮江太平軍合攻揚州。陷之。旋爲官軍收復。革托明阿等職。以德興阿爲欽差

大臣。翁同書幫辦軍務。

寧紹台道羅澤南力攻武昌。死之。澤南。湘鄉諸生。講學宗程朱。體用兼備。兵興後。卽倡率生徒爲團練。至

性感動鄉里。遂率其鄉人。轉戰三楚。江西。大小二百餘戰。悉身先士卒。至是。力攻武昌。駐軍賓陽門外之洪山。乘勝追勦。左額中槍子。遂卒。事聞。命照巡撫例優卹。旋予諡忠節。

安徽寧國府失守。太平軍由太平涇縣犯寧國。陷之。

辛巳。以皇長子載淳生。晉封懿嬪那拉氏爲懿妃。

四月辛亥。賜翁同龢等二百十六人進士及第出身有差。

江蘇巡撫吉爾杭阿由上海進攻鎮江。於高資力戰陣亡。命照總督例賜卹。予諡勇烈。

五月。江南大營失陷。向榮退保丹陽。江南大營因援勦寧國溧水。屢經抽撥。兵力過單。至是。江寧太平軍約鎮江之兵。來攻大營。兵勇潰散。張國樑力戰突圍。保向榮由高淳退保丹陽。旋命國樑幫辦軍務。

七月。向榮卒於軍。向榮自道光三十年調廣西提督。卽與太平軍相持。追擊東下。直抵江寧。大小千百戰。終以積勞殞於軍。奉旨優卹。予諡忠武。

癸酉。命怡良暫署欽差大臣。督辦江南軍務。

八月戊子。命黃宗漢來京。以吳振械爲四川總督。

甲午。命江南提督和春爲欽差大臣。督辦江南軍務。

太平天國北王韋昌輝。以天王洪秀全命。殺東王楊秀清。天王復殺昌輝。翼王石達開奔安慶。初。向榮卒。

太平諸王相慶。秀清素以秀全爲贅疣。陰有自立意。令其下呼萬歲。秀全密召韋昌輝石達開。令圖之。昌輝先至。秀清招之飲。昌輝於飲次刺殺之。盡殺其黨。達開至。責昌輝太酷。昌輝怒。將殺達開。達開絕城夜遁。昌輝盡殺其母妻子女。秀全懼。密諭秀清黨攻殺昌輝。

九月。捻匪西竄。逼陳州。先是。命河南巡撫英桂督辦三省勦匪事宜。至是。以匪蹤四竄。日久無功。交部議處。

易棠以病免。以樂斌爲陝甘總督。

十一月乙卯。賈楨丁憂。命彭蘊章爲大學士。翁心存以吏部尙書協辦大學士。

辛未。大學士文慶卒。予諡文端。文慶在政府。嘗密請破除滿漢藩籬。不拘資地用人。曾國藩以鄉兵破敵。政府中頗有舐排之者。文慶獨時時左右之。

葉名琛奏英國領事巴夏禮駛入省河肆擾。攻擊城垣。名琛旣代徐廣縉督粵。遇交涉事。馭外人尤嚴。每接文書。輒略書數字答之。或竟不答。顧術僅於此。時英政府以巴夏禮任廣州領事。亦負氣好爭。適有華船入英籍者。官兵疑爲奸民。毀其旗。繫十三人去。英人責名琛謝罪。不得。遂以兵艦攻黃埔礮臺。名琛詰疊由。巴夏禮請入城面議。不許。至是。遂攻省城。陷之。以兵少。不久仍退還歸軍艦。粵民遂爭起暴動。凡各國洋樓。一切燒燬。

楚軍克復武昌漢陽二城。自是胡林翼經營武漢。爲東征之後援。武漢屹然爲上游重鎮。

十二月己酉。命桂良爲大學士。以譚廷襄署直隸總督。以柏葑協辦大學士。

楚軍合圍九江。先是江西自饒廣失守。敵踞湖口。楚軍水師分爲外江內湖。隔閡不通。曾國藩在南昌。修整舟師。徐圖大舉。自武漢既定。袁州克復。湖北援軍大至。時李續賓率陸師。楊岳斌率水師。九江之圍復合。

咸豐七年丁巳。正月乙卯。晉封懿妃那拉氏爲懿貴妃。

二月。曾國藩丁憂。命楊載福彭玉麟分領其軍。

四月癸巳。怡良以病免。命何桂清署兩江總督。

五月。太平軍復犯湖北。時陳玉成由桐城。以擾湖北之黃梅廣濟蘄州等邊界。楚軍連戰卻之。

六月乙亥。恆春自殺。調吳振斌爲雲貴總督。以王慶雲爲四川總督。時雲南回民肆擾。逼近省城。恆春以堵截計窮。事處危急。與其妻在署自縊。

七月。袁甲三奏攻破鄧王姚三圩。生擒擒首李寅等。

楚軍克復瑞州府。

九月。參贊大臣法福禮奏。收復英吉沙爾喀什噶爾二城。先是。回匪由卡外竄入。英喀回城失陷。漢城被

圍官兵甫到。卽聞風潛遁。

楚軍克復湖口縣。又克彭澤縣。

十月丁丑。以雲南各屬漢回仇殺。革散貼告示。倡議殺回之侍郎黃琮御史寶墀職。從總督吳振棫請也。

十一月。德興阿等克復瓜州。張國樑等克復鎮江。

十二月初。英使額爾金至粵。貽葉名琛書。約期會議償款。重立約章。名琛置不答。法美領事亦以燬屋失財。移文責償。亦不聽。英法同盟軍遂貽名琛最後書。迫令於四十八時內引去。至期不得復。遂於十二日遣六千人登陸。十三日。據海珠礮臺。十四日。陷廣州。名琛匿左都統署。同盟軍遂劫將軍巡撫都統等。大索名琛。得之。挾以登舟。事聞。褫名琛職。以黃宗漢代之。先令巡撫柏貴署理。自是廣州爲同盟軍占領者三年。名琛被虜。至印度加爾各答死焉。

楚軍克復臨江府。

咸豐八年戊午。二月。江南軍攻克秣陵關。

三月。江西太平軍入浙江。陷江山常山開化諸邑。

勝保袁甲三解固始城圍。先是。太平軍糾豫捻犯商固。擬由光州六安。以窺湖北隨棗。勝保等擊破之。遂解固始之圍。

四月。楚軍克復九江府城。九江自咸豐三年爲太平將林啓榮等占踞。已閱六年。至是、李續宜、楊載福、彭玉麟等。水陸夾攻。乃克之。擒斬林啓榮等殆盡。

江南軍攻克雨花臺。

黑龍江將軍奕山。與俄使木喇福岳福訂約於瓊瑋城。割黑龍江北岸地與俄。初、俄人通商。惟恰克圖一處。自五口通商後。俄人乘隙。大改康熙時尼布楚條約。咸豐三年。行文中國。謂自黑龍江格爾必齊河上流。以達於海。未設立界標。卽屬未定之地。請派員商議。蓋自道光末年以來。俄人乘中國多事。已於黑龍江北岸。設兵屯守。殖民其地。非一日矣。四年。復以艦隊順黑龍江而下。通過瓊瑋。中國官吏止之。不得。五年。奕山與木喇福等會議界務。俄欲以黑龍江及烏蘇里江爲界。不諧而罷。次年。又遣海軍將普查欽爲全權大臣。乘艦至天津。再申前議。政府拒絕之。至是。又移住其人民於烏蘇里江口。奕山乃承政府命。與訂約於瓊瑋。於是康熙舊界自格爾必齊河。循大興安以至於海者。爲之一大變。而雍正五年約定烏特河爲兩國中立地者。更無論已。

英法聯軍陷大沽礮臺。命僧格林沁爲欽差大臣。督兵馳赴天津。京師戒嚴。聯軍既陷廣州。貽書中國首相。欲改訂約章。增開口岸。至上海待命。旣而各國軍艦向天津。集白河口。投書直隸總督譚廷襄。仍請轉達首相。朝命侍郎宗倫等往會廷襄議款。英人以其官小。不足當全權之任。辭不見。遂攻陷大沽礮臺。時

俄美二國居間排解。乃命大學士桂良吏部尚書花沙納。赴天津議款。又賞已革大學士耆英侍郎銜。飭令赴津。耆英往拜英使。不見。懼而還京。帝震怒。賜自盡。

五月庚寅。吳振械奏。回民就撫。省城解嚴。

戊子。大學士裕誠卒。予諡文端。

太平軍自江西入閩。陷邵武等郡縣。

乙未。起復兵部侍郎曾國藩。馳赴浙江。辦理軍務。時浙江處州失守。恐前派督辦浙江防勦事宜總兵周天受資望較淺。未能統率各軍。故有是命。旋處州克復。浙江全境肅清。改命國藩援閩。

戊戌。命侍郎匡源內閣學士文祥。在軍機大臣上學習行走。

桂良等奏議款事定。英法兵艦退出天津。桂良等既至天津。英人持所定新例五十六條。要以畫押允行。其中最要者。一。增開牛莊登州臺灣潮州瓊州等處。又於長江一帶許選擇三口。一。洋人帶眷屬在京師長行居住。一。議償商虧軍費各二百萬兩。清款後交出粵城。法人所定四十二條。與英略同。軍費賠款則減英人之半。桂良據以入告。雖一時廷臣多憤激主戰。帝以戰守均無把握。不能從也。

六月己酉。命桂良花沙納與侍郎基溥武備院卿明善。馳往江蘇。會議通商稅則事宜。庚申。以天津失事。革譚廷襄職。遣戍新疆。以慶祺爲直隸總督。

七月。太平軍復陷廬州。時福濟以師久無功。命來京。以李孟羣署安徽巡撫。

丙申。命勝保爲欽差大臣。督辦安徽軍務。安徽巡撫翁同書幫辦軍務。袁甲三督辦三省勦匪事宜。

八月。楚軍克復吉安府。

福建軍克復邵武府。閩境肅清。

九月。揚州軍失利。府城復陷。時太平天國英王陳玉成攻浦口。德興阿營破之。遂陷揚州。德興阿退守邵伯。旋張國樑率江南軍渡江。克復揚州及儀徵。詔撤德興阿欽差大臣。以和春兼轄江北軍。

楚軍克復安徽桐城舒城二縣。進逼安慶。

壬午。命柏蔭翁心存爲大學士。以官文協辦大學士。

六合縣失守。道員溫紹原死之。六合居江寧北。以浦口爲咽喉。紹原力守六年。至是。太平軍以全力克之。十月。楚軍失利於三河。布政使李續賓死之。先是。官文胡林翼會籌東征之策。陸師渡江。先皖而後及江南。水師先安慶而後及江寧。以圖皖之事。屬之李續賓。請加巡撫銜。專摺奏事。時太平天國英王陳玉成主皖事。旣陷廬州。於距廬州五十里之三河。屯糧械。築大城。環以九壘。防守甚嚴。續賓旣下桐舒。遂進攻三河。大戰破敵。九壘皆下。而所部傷亡亦衆。玉成暨侍王李世賢糾合捻首張洛刑。自廬州至。抄官軍後路。四面圍裹。愈集愈厚。七營先陷。續賓知事不可爲。乘夜躍馬入敵陣死之。曾國華及諸員弁死者六千。

人。湘軍精銳殲焉。續賓少從羅澤南學。爲人含容淵默。其選士以知恥近勇樸誠敢戰爲上。遇敵則人當其脆。而已當其堅。糧仗則予人以善者。而已取其窳者。所屯軍地。百姓耕種不輟。萬幕無譁。大小六百餘戰。克四十餘城。口不言功。及沒。遠近痛哭。事聞。帝震悼。命照總督例賜卹。旋予諡忠武。

勝保奏擒首李兆受。獻滁州投誠。命更名世忠。以參將補用。兆受固始人。咸豐三年。降何桂珍。旋復叛。戕桂珍。至是降於勝保。

十一月己亥。吳振械因病解任。以張亮基爲雲貴總督。徐之銘爲雲南巡撫。時振械受制回人。亮基入城。亦爲回人看守。出入均難自主。

戊辰。大學士柏葑以科場事革職。

十二月丁卯。命瑞麟爲大學士。

咸豐九年己未。正月。以太僕寺卿袁甲三督辦三省勦匪事宜。日久遷延。訖無成效。命回京供職。以總兵傅振邦代之。從勝保奏請也。

二月甲寅。殺已革大學士柏葑等。自嘉道以來。公卿子弟。遇科場競通關節。視巍科爲故物。以通榜爲常事。戊午科場後。御史孟傳金奏中式舉人平齡硃墨不符。物議沸騰。奉旨將正考官柏葑革職。副考官朱鳳標。程庭桂解任。聽候查辦。時端華肅順方用事。以柏葑資望較深。性頗鯁直。畏而惡之。肅順爲刑部尚

書。遂據刑律。坐柏俊以因家人求請撤換試卷。與同考官編修浦安程庭桂之子程炳采等。均處斬。程庭桂等遣戍。內外簾官及新中舉人。軍流降革至數十人。慶祺卒。壬戌。以恆福爲直隸總督。

廬州官軍失利。前署安徽巡撫李孟羣死之。

太平天國翼王石達開犯湖南。達開自出金陵。與天王隔絕。連犯安徽江西福建。不得逞。至是由江西南安取道崇義。入湖南。陷桂陽州。時湘軍分援各省。兵力自弱。故達開乘虛而入。巡撫駱秉章檄召劉長佑等募勇禦之。

四月壬寅。調王慶雲爲兩廣總督。黃宗漢爲四川總督。

己未。調勞崇光爲廣東巡撫。兼署兩廣總督。

壬戌。王懿德以病免。以慶端爲閩浙總督。

乙丑。賜孫家鼐等一百八十八人進士及第。出車有差。

五月辛卯。大學士翁心存因病乞休。允之。甲午。命賈楨爲大學士。

英兵艦攻大沽礮臺。官軍擊卻之。桂良等至上海。會同何桂清。與四國使臣定約。畫押而還。至是。各國艦隊駛赴天津。遵例換約。大吏遣人告以大沽現在設防。不便行走。須改由北塘口進。英艦先至。抗不遵行。

遽駛入大沽。開礮轟擊。官軍還擊。沈其數艦。且殺登岸兵數百。遂退去。美艦後至。遵約改道行走。六月。石達開圍寶慶府。楚軍擊敗之。達開既入湘。圍衡州。不克。乃攻寶慶。衆稱數十萬。李續宜督諸軍大破之。城圍遂解。又破之。永明道州。

陳玉成合捻黨陷安徽定遠。道員郭沛霖等死之。並陷天長盱眙。

九月。石達開犯桂林。達開自寶慶永明道州屢敗後。由新寧城步等處山僻小路。直犯桂林。巡撫曹澍鍾固守。攻之不克。遂解圍去。陷慶遠府。

戊寅。王慶雲以病免。以勞崇光爲兩廣總督。自廣州爲英占踞後。和議雖成。總督將軍皆駐佛山。不敢入城。至是。崇光始入城。

己丑。大考翰林詹事官。擢顏宗儀等二員一等。餘升黜留館有差。

十月。庚子。以曾望顏署四川總督。命黃宗漢留京。以侍郎候補。

辛丑。勝保丁憂。命漕運總督袁甲三署理欽差大臣。督辦皖省軍務。

命侍郎匡源文祥在軍機大臣上行走。

江南軍敗於六合。又敗於浦口。提督周天培死之。

十一月。太平天國守池州將韋志俊內應獻城。其部下古隆賢等復攻陷之。

袁甲三克復臨淮關。

咸豐十年庚申正月己巳。命勝保督辦河南勦匪事宜。帝以勝保督辦河南勦匪事宜。日久無功。撤去欽差大臣。命馳往河南督辦該省勦匪事宜。派關保爲幫辦。袁甲三仍署理欽差大臣。督辦安徽軍務。翁同書仍爲幫辦。並添派穆騰阿幫辦。傅振邦督辦徐宿一帶勦匪事宜。田在田幫辦。德楞額督辦山東勦匪事宜。哈勒洪阿幫辦。

袁甲三克復鳳陽府縣二城。生擒捻首張元龍等。

二月癸丑。加江寧布政使薛煥巡撫銜。幫辦五口通商事宜。

捻匪竄陷清江浦。太平軍將取蘇杭。豫結捻首張洛刑龔瞎子等。使擾清淮。以分江皖兵力。清江爲河漕聚匯處。居室器用。踵事華富。各捻首垂涎已久。至是。率衆由吳家墩驟至。河督庚長退保淮安。旋各路援軍至。遂收復清江。

杭州失守。巡撫羅遵殿等死之。先是。太平軍陷涇縣廣德州。遂闖入浙江之安吉。距杭州一百數十里。巡撫告急。帝命和春兼辦浙江軍務。以提督張玉良總統援浙諸軍。至是。太平軍由武康直撲杭州。援軍未至。守陣兵寥寥。遂陷。巡撫以下死之。將軍瑞昌堅守滿城六晝夜。不陷。及張玉良至。遂克復杭州城。三月。援浙軍克復長興縣。

閏三月。江浙軍克復廣德州建平縣。

江南大營失陷。張國樑陣亡。和春受傷卒。江南軍自上年添募壯勇。增築長圍。意謂克復金陵。在指顧間。兵將志驕。各方有急乞援。輒分兵應之。孤軍轉鬪。往往累月不能歸。存營兵力漸薄。又以軍饟不繼。擬每四十五日發一月之糧。軍心攜貳。至是。太平軍糾合各路精銳。猛撲大營。張國樑苦戰八晝夜。勢不能支。至夜。各營火起。遂退守丹陽。敵踵至。國樑力戰創甚。躍入河中。死之。和春突圍走常州。受傷嘔血死。國樑初名嘉祥。廣東嘉應州人。始爲盜。後率所部於南寧鎮投誠。時頗有疑之者。巡撫周天爵知其忠勇。保護甚至。繼隨向榮轉戰數省。所向無敵。及幫辦江南軍務。東南半壁。倚如長城。至此遂力竭捐軀。事聞。奉旨優卹。予諡忠武。同時陣亡者。有湖北提督王浚。壽春鎮總兵熊天喜等。

四月。常州失守。總督何桂清遁。桂清以籌餉駐常州。及敵至。倉皇遁走。蘇州巡撫徐有壬不納。退往常熟。復避至上海。旋奉旨逮問。

蘇州失守。巡撫徐有壬死之。蘇省爲東南財賦區。自常州不守。藩籬盡撤。守兵脆弱不習戰。遂失守。有壬等死之。太平軍遂陷松江等郡縣。并浙江之嘉興府。

庚辰。命荊州將軍都興阿督辦江蘇江北軍務。

癸未。命曾國藩署兩江總督。

命薛煥署欽差大臣。辦理五口通商事宜。

甲申。命兵部郎中左宗棠以四品京堂候補。襄辦曾國藩軍務。

壬辰。賜鍾駿聲等一百八十三人進士及第出身有差。

五月甲午。以薛煥爲江蘇巡撫。暫署兩江總督。

六月壬申。命彭蘊章毋庸在軍機大臣上行。走。初。蘊章力保何桂清。至是。桂清敗。故有是命。

丙戌。實授曾國藩兩江總督。並命爲欽差大臣。督辦江南軍務。國藩奉命後。以破敵必據上游。應以江楚爲根本。遂節進兵。遂徵集兵勇。部署峻整。是月。進駐祁門。以固吳會人心。兼壯徽寧聲勢。

七月。英法兵陷天津。英兵自上年敗退後。謀大舉入犯。初。僧格林沁經營防務。頗以北塘爲地勢扼要。至是。朝命撤北塘之備。退就大沽。英法兵遂由北塘進內港。抵新河。以七百人登陸。僧格林沁以勁騎蹙之。爲精利火器所殲。三千騎得脫者。七人而已。於是英法兵輪進攻大沽。時僧格林沁爲朝野所倚重。帝恐其寄身命於礮臺。特旨令退守。又命大學士瑞麟等統京旗兵九千防通州。是月初五日。大沽遂陷。提督樂善死之。僧格林沁退次通州張家灣。初七日。英法兵據天津。

丁未。以崇實署四川總督。

八月己巳。帝秋獮木蘭。自圓明園啓鑾。丁丑。至熱河。駐避暑山莊。英法兵既據天津。命侍郎文俊前粵海

關監督恆祺。往津議約。英法人拒不納。改命桂良。得英人照覆。要以增軍費。開天津爲商埠。並各國酌帶數十人入京換約。皆巴夏禮主之。桂良奏聞。嚴旨拒絕。英法兵遂擾河西務。畿輔大震。是月初一日。英法兵薄張家灣。勝保禦之。傷頰墜馬。師奔。僧瑞二軍亦退至京城外。帝知禁兵不足恃。遂北狩熱河。鄭親王端華尙書肅順軍機大臣穆蔭匡源杜翰等皆扈從。恭親王奕訢留守。仍督僧瑞二軍。駐師海淀。方英法軍之逼通州也。帝命怡親王載垣赴通議約。桂良穆蔭皆在。英參贊巴夏禮帶十餘人入城。載垣等與之宴。巴夏禮言。今日之約。須面見皇帝。載垣答以須請旨定奪。巴遂佯睡不復語。載垣不得已暫退。會有馳告英將額羅金將襲我者。載垣無措。密告僧格林沁。設法擒巴夏禮解京。及帝出狩。奕訢桂良駐城外。惟大學士周祖培尙書陳孚恩等。會議城守。城門盡閉。英人聲言攻城。且索巴夏禮甚急。勝保請殺之。諸王大臣皆不敢決。十一日。有詔飛召南軍入援。奕訢既奉全權大臣之命。英人給照會。限三日內交還巴夏禮。二十二日。英兵攻海淀。禁兵不戰而潰。爰釋巴夏禮。巴既出。遂縱火燔圓明園以洩忿。

徽州失守。太平軍由廣德州犯徽州。皖南道李元度甫抵府城。卽被圍。至是遂陷。

九月。英法和議成。巴夏禮要奕訢至軍面訂和約。速開安定門。周祖培等允開城延入。巴夏禮帶百餘人入城。法使亦入。居間排解。先索郵款五十萬兩。如數予之。初九日。宴英使於禮部。和議成。凡條約於八年原定外。續增九條。法使亦擬續增十條。更關天津爲商埠。許派遣公使領事駐中國。償英國銀一千二百

萬兩。法國銀六百萬兩。十一日換約。皆奕訢主之。旋據以奏聞。奉旨均著允准。並諭止勤王之師。寧國失守。提督周天受等死之。太平軍由徽州分兵攻寧國。天受與皖南道福咸死守七十餘日。至是城陷。皆死之。並陷浙江嚴州。

捻黨竄入山東境。命僧格林沁往勦。

十月壬戌。張亮基以病免。以劉源灝爲雲貴總督。

丁丑。命順天府丞毛昶熙督辦河南勦撫事宜。旋以河南巡撫嚴樹森代之。仍命昶熙幫辦。

辛巳。命荊州將軍都興阿督辦江北軍務。李若珠幫辦。

戊子。命太常寺少卿焦祐瀛在軍機大臣上學習行走。

十一月戊申。命倉場侍郎成琦往吉林。會同將軍景淳。查勘俄國分界事宜。方英法聯軍之入京也。俄使頗調和其間。和議旣成。乃索厚報。與奕訢再訂北京條約。續增十五條。其第一二兩條。關係國界。故遣成琦往。會同俄官。設立界牌。

太平軍攻湖州。道員趙景賢擊卻之。

多隆阿李續宜大破陳玉成於掛車河。時官軍圍安慶急。陳玉成糾集定遠六安各股精銳。由舒城廬江上進。至桐城縣西南之掛車河等處。築壘四十餘座。圖解安慶之圍。副都統多隆阿。安徽按察使李續宜。

會擊大破之。盡毀各壘。追勦直至桐城。

十二月己巳。設立總理各國通商事務衙門。命奕訢桂良文祥管理。並於內閣部院軍機處各司員章京內。滿漢各挑取八員。作爲司員定額。

命崇厚爲辦理三口通商大臣。駐紮天津。管理牛莊天津登州三口通商事務。

命貴州提督田興恕爲欽差大臣。督辦全省軍務。先是石達開由廣西分兵入貴州。陷廣順永寧。時貴州巡撫何冠英卒。命興恕兼署。

丁丑。裁撤長蘆鹽政。歸直隸總督管理。

丙戌。命官文周祖培爲大學士。官文仍留湖廣總督任。以戶部尙書肅順協辦大學士。時瑞麟先以兵敗革職。彭蘊章亦因病乞休也。

咸豐十一年辛亥。正月丙午。恆福以病免。以文煜署直隸總督。

二月。陳玉成陷黃州蘄州德安諸郡縣。武昌戒嚴。時曾國荃圍安慶。玉成既敗於掛車河。念湖北爲楚軍根本。衝其腹心。必撤圍自救。乃從英霍問道入犯湖北。思解安慶之圍。

三月辛丑。命欽差大臣勝保馳赴直隸山東。督辦防勦事宜。旋又命督辦安徽河南勦匪事宜。

四月乙亥。命左宗棠幫辦曾國藩軍務。宗棠於江皖之交。親督各軍。大敗黃文金李侍賢各股。故有是命。

練總苗沛霖攻壽州。沛霖以生員爲團練長。始叛。爲勝保招降。以功授川北道。猶持兩端。使其下呼爲苗先生。至是。與壽州豪族仇殺。遂攻壽州。巡撫翁同書時在壽州。旋失守。同書爲所劫。詔命同書來京。以李續宜代之。

七月辛丑。帝不豫。壬寅。大漸。召宗人府宗令載垣、右宗正端華、御前大臣景壽、肅順、軍機大臣穆蔭、匡源、杜翰、焦祐瀛承寫硃諭。立皇長子載淳爲皇太子。癸卯寅刻。帝崩於避暑山莊行殿寢宮。

甲辰。尊皇后及皇太子生母皇貴妃那拉氏均爲皇太后。旋上皇太后徽號曰慈安皇太后。生母皇太后徽號曰慈禧皇太后。

丙午。授駱秉章四川總督。督辦軍務。秉章先已奉命入川。辦理軍務。至是。乃實授總督。又以劉蓉署四川布政使。崇實授成都將軍。並接辦川陝交界防堵事宜。

召劉源灝來京。以福濟爲雲貴總督。時雲南回匪滋擾。源灝、福濟皆未抵任。張亮基告病未行。時升任陝撫布政使鄧爾恆。行次曲靖被殺。或謂巡撫徐之銘所主使。朝廷不能治也。

八月。安慶克復。安慶陷敵已九年。楚軍自克九江後。卽漸次進兵。水陸合圍。曾國荃統領圍師。陳玉成屢謀解圍。爲多隆阿、李續宜、鮑超所敗。不能逞。楊載福以水師截其糧道。城外各壘。俱爲國荃掃蕩。城中糧盡。援絕。至是城破。守將葉芸來以下均死。玉成遁出。集賢關。於是池州、桐城、宿松各郡縣均收復。

太平將李侍賢陷嚴州餘杭。又分陷紹興處州各郡縣。

湖北巡撫胡林翼卒。林翼聰強敏給。事至應機立斷。其署湖北巡撫也。當武昌三次淪陷。公私埽地。無可措手。林翼乃整飭吏治。籌備餉需。農不病而課充。法不苛而吏肅。與總督官文極意交歡。籌議東征。所向克捷。以積勞咯血。至是卒。詔贈總督。予諡文忠。

因東省捻匪爲僧格林沁痛勦。奉旨優獎。

十月己酉。帝奉兩宮皇太后還京師。

丙辰。授恭親王奕訢爲議政王。在軍機處行走。命大學士桂良、尙書沈兆霖、侍郎文祥、寶鋆。在軍機大臣上行走。鴻臚寺少卿曹毓瑛。在軍機大臣上學習行走。

辛酉。殺怡親王載垣。鄭親王端華。協辦大學士戶部尙書肅順。革景壽穆蔭。匡源杜翰焦祐瀛職。載垣端華。俱以咸豐初襲爵。任宗人府宗令及領侍衛內大臣等職。端華同母弟肅順。以郎中供奉內廷。尤善迎合。洊升至協辦大學士。三人盤結。同干大政。軍機大臣拱手聽命而已。旣以科場事殺柏蔭等。又借鑄錢局事興大獄。戶部司員皆褫職逮問。京師自縉紳以至商店。多被株連破家。怨肅順尤刺骨。英法聯軍之役。載垣等勸文宗幸熱河。迨和議成。留京王大臣疏請還京。文宗將從之。爲載垣等所尼。屢下詔改行期。及文宗崩。稱有遺詔。與景壽等共八人。爲贊襄政務王大臣。不許恭親王等奔喪。時御史董元醇疏言。皇

上冲齡。未能親政。暫請皇太后垂簾聽決。並派近支親王一二人輔政。疏入。皇太后召見贊襄王大臣。命照所奏行。載垣等抗論以爲不可。退。復以本朝無太后垂簾故事。令軍機處駁還。時奕訢已至熱河。見載垣等。卑遜特甚。肅順尤蔑視之。太后欲召見奕訢。杜翰昌言於衆。謂叔嫂當避嫌疑。且太后居喪。尤不宜召見親王。肅順稱善。然奕訢終設計得獨見太后。遂密謀誅載垣等。並召曹毓瑛密擬擊問各旨。以備到京。即發議定。奕訢即還京。太后亦即下還京之旨。載垣等力阻不聽。乃議命肅順護送梓宮。載垣等扈從。太后等先從間道還京。於是大學士賈楨等合疏請太后垂簾。欽差大臣勝保亦奏請簡近支親王輔政。太后既至京師。乃下詔暴載垣等罪狀。並降旨擊問。命奕訢捧詔宣示。載垣端華二人厲聲曰。吾輩未入。詔從何來。奕訢命侍衛擄出。擁至宗人府。幽之。時肅順方次密雲。逮者至。毀門而入。遂械至京。旋廷議上。載垣端華賜自盡。肅順斬立決。景壽穆蔭匡源杜翰焦祐瀛俱革職。穆蔭發往軍臺。旋尙書陳孚恩侍郎黃宗漢等均以載垣等黨革職。遣戍有差。於是垂簾之局定矣。

乙卯。命議皇太后垂簾之儀。

甲子。帝行卽位禮於太和殿。以明年爲同治元年。載垣等初擬建元爲祺祥。載垣等既得罪。遂改爲同治。諭見在一切政務。均蒙兩宮皇太后躬親裁決。惟繕擬諭旨。仍應作爲朕意。嗣後議政。王軍機大臣繕擬諭旨。著仍書朕字。

戊辰。命馮子材督辦鎮江軍務。

癸酉。命曾國藩統轄江蘇安徽江西三省。並浙江全省軍務。所有四省巡撫提督以下各官。悉歸節制。時浙江全省糜爛。省垣危急。故有是命。

十一月。乙酉朔。帝奉兩宮皇太后御養心殿。垂簾聽政。

杭州失守。將軍瑞昌巡撫王有齡等死之。時楚軍規取金陵。秀全乃令忠王李秀成侍王李侍賢。分途擾浙。以分兵力。張玉良與戰於鳳山門外。中礮陣亡。二十七日。遂失守。越四日。滿城亦陷。

十二月庚申。上大行皇帝尊諡曰。協天翊運執中垂謨懋德振武聖孝淵恭端仁寬敏顯皇帝。廟號文宗。定文宗山陵名曰定陵。

庚午。以沈葆楨爲江西巡撫。

丁丑。以左棠宗爲浙江巡撫。

清史綱要

卷十二

同治元年壬戌。正月甲申。命兵部尙書麟魁兩江總督曾國藩均協辦大學士。

己亥。麟魁卒。時麟魁奉命至蘭州。查辦陝甘總督樂斌辦理撤回縱匪殃民一案。查訊得實。解樂斌職。命暫署陝督。及卒。予諡文端。以沈兆霖署陝甘總督。

丙午。革前安徽巡撫翁同書職。逮問。同書於咸豐九年六月失守定遠。逃往壽州。倚苗沛霖爲聲援。及沛霖圍壽州。又殺徐立壯等以媚之。壽州旣破。又力保沛霖之非叛。前後奏疏。自相矛盾。至是。爲曾國藩參奏。遂命逮問。旋定擬斬監候。

李世忠攻克天長江浦浦口。

太平軍犯上海。英法各國兵擊退之。初。上海官紳立會防局。議結外國兵助勦。遣人航海入京。請於政府許之。至是。太平軍犯吳淞口。又踞浦東之高橋。均爲美國人華爾英提督何伯法提督卜羅德擊敗。華爾

與白齊文教練中國兵勇習洋槍。稱洋槍隊。爲常勝軍。旋華爾陣亡。白齊文以索餉不遂。投入太平軍。以戈登代領常勝軍。

二月。曾國藩遣道員李鴻章赴援上海。初。國藩議遣李鴻章別領一軍。由鎮江進規蘇常。至是。上海會防局雇備輪船。遣員至安慶迎援師。遂改令鴻章率楚軍及新募淮軍。乘輪東下。營上海城南。詔以鴻章署江蘇巡撫。而別授薛煥通商大臣。專辦交涉事件。

三月。鮑超攻克青陽石埭太平涇四縣。太平將古隆賢屯青陽城外。鮑超擊破之。遂進克各縣。己酉。命左副都御史晏端書赴廣東。駐紮韶關。督辦通省釐金。接濟浙江等省餉需。

江西南昌民人拆毀天主教堂。命巡撫沈葆楨嚴密查拏究辦。

雲南巡撫徐之銘奏省城解圍。回人就撫。上年十一月。回民馬起等率衆進逼雲南省城。有武生馬如龍。情願解散招撫。親赴各壘勸導。立解省圍。並退出所踞各城。奉旨嘉獎如龍。命以總兵用。

四月。彭玉麟會國荃攻克太平府蕪湖縣。並金柱關東梁山各要隘。

戊辰。命辦理山東畝捐。從僧格林沁奏請也。

多隆阿等攻克廬州府城。陳玉成奔壽州。初。苗沛霖曾受太平平北王封號。至是。玉成往乞援。沛霖遣黨迎謁。誘入城。伏兵擒之。并其部將諸王二十餘人。解送穎州勝保軍前。勝保檻送京師。未至。詔於河南衛

輝府之延津將玉成凌遲處死。玉成渾名四眼狗。勇悍亞楊秀清。謀略過李秀成。既死。楚皖之間。太平軍遂不振。

太平軍擾陝西。先是。太平扶王陳德才等。約同捻黨。由河南入陝西武關。復由孝義廳出山口。直逼西安。爲官軍擊退。遂東陷渭南。入河南南陽一帶。川匪藍大順二順等。由雲南昭通倡亂。蹂躪全川。時亦竄入陝西。踞洋縣商州山陽等處。與陳德才等互爲應援。進攻潼關。爲官軍所敗。又圍鳳翔府城。

上海軍攻克南橋鎮。法提督卜羅德陣亡。

丁丑。上兩宮皇太后徽號。

五月。臺灣匪徒戴萬生等踞彰化作亂。命福建巡撫徐宗幹勦辦。

丙戌。賜徐郟等一百九十三人進士及第出身有差。

廣西巡撫劉長佑奏克復太平府城。先是。太平府城被匪徒吳凌雲等攻陷。至是。爲官軍克復。進擣隴羅老巢。

丁酉。命荊州將軍多隆阿督辦陝西軍務。

甲辰。添設長江水師提督。駐紮蕪湖。

浙江湖州失守。道員趙景賢被執。景賢。湖州人。在籍辦團。每戰必捷。洊升福建糧儲道。時湖州被圍數月。

糧援俱絕。遂陷。景賢被執。不屈。至二年三月。被戕於蘇州。事聞。照巡撫例賜卹。予諡忠節。曾國荃等攻克秣陵關等要隘。圍逼江寧。駐軍雨花臺。

六月。鮑超攻克寧國府。先是。太平輔王楊輔清率衆十餘萬。踞寧國府。分股屯寒亭等處。爲鮑超所破。至是。又連破之城外。遂復府縣城。輔清遁去。保王洪容海降。并收復廣德州。

癸酉。大學士桂良卒。予諡文端。

陝西回民作亂。圍攻省城。並擾同州蒲城等處。

七月己丑。袁甲三以病免。以安徽巡撫李續宜爲欽差大臣。督辦軍務。以吳棠署漕運總督。續宜旋丁母憂。請假還籍。屢乞病假。於二年冬病卒。予諡勇毅。

壬辰。以工部尙書倭仁協辦大學士。

署陝甘總督沈兆霖。於平番縣三道溝地方。猝遇山水漲發。沖沒殞命。事聞。奉旨優卹。

庚子。命欽差大臣勝保赴陝西督辦軍務。勝保先奉命督勦皖捻。因袒護苗沛霖。與袁甲三李續宜齟齬。旋命馳赴河洛。至是。因陝省回民猖獗。多隆阿在隨州棗陽一路布置。太平軍陳得才等又攻圍南陽。爲所牽掣。不能赴陝。故又命勝保赴陝督辦。以熙麟爲陝甘總督。未到任以前。由布政使恩麟署理。

甲辰。以慶端爲杭州將軍。耆齡爲閩浙總督。

丙午。命欽差大臣親王僧格林沁統轄山東河南全省軍務。並調度直隸山西兩省防兵。四省督撫提鎮以下各官。及副都統遮克敦布。河南團練大臣毛昶熙。漕運總督吳棠。均歸節制。初。僧格林沁督師山東。初戰不利。後漸削平諸教黨及土匪。至是。始命以全力勦捻。

丁未。命貴州提督田興恕赴四川。交駱秉章差遣。興恕先以意氣驕盈。行爲乖謬。被參。命繳還欽差大臣關防。毋庸署理。巡撫仍以提督勦辦貴州苗教各匪。至是。又以殺害外國傳教士。及奏報不實。縱寇殃民。被參。奉旨先行交部議處。仍候查辦。旋議遣戍。

八月。多隆阿攻克荆紫關。多隆阿入陝。已抵商南。時陳得才等糾合豫捻。襲踞荆紫關。遂還師攻破之。又勦滅亳穎捻黨入陝巨股。

閏八月癸巳。命左都御史李棠階在軍機大臣上行走。

丙申。命倭仁爲大學士。

甲辰。以劉長佑爲兩廣總督。時勞崇光被參離任。旋又命崇光往貴州查辦事件。長佑未到任以前。以晏端書署理。

陳得才糾合捻黨犯湖北。陷隨州等處。圍安陸府。爲官軍所敗。復還河南。

九月丁丑。詔畿輔行堅壁清野法。時畿輔教士捻各匪蠢起故也。

十月戊子。命吏部尚書瑞常協辦大學士。

己丑。命大理寺卿曹毓瑛在軍機大臣上行走。

曾國荃擊退援金陵之太平軍。國荃駐軍雨花臺後。守城兵出戰。輒敗創。天王乃促侍王李世賢忠王李秀成還援。時左宗棠力攻衢州。世賢不克離浙。秀成先遣其國宗回援。戰不利。及八月。江南大疫。徽寧尤甚。鮑超等病不能軍。金陵圍師亦死者山積。閏八月。秀成自蘇常率衆六十萬來援。圍官軍營數重。日夜猛攻。國荃裹創苦守。九月。李世賢自浙至。開隧道以攻。官軍亦掘內濠以阻之。相持四十六日。重圍始解。官軍傷亡五千人。國荃之弟貞幹亦以病後過勞卒。

十一月丙辰。大學士銜管理工部事務翁心存卒。予諡文端。時心存之子同書在獄。命暫行釋放。俟百日後再行監禁。後竟免死。在甘肅軍營效力。及卒。又開復原官。予諡文勤。

己未。予告大學士彭蘊章卒。予諡文敬。蘊章在政府。以力薦何桂清被斥。及再起。條議時事。謂楚軍徧天下。曾國藩權太重。恐有尾大不掉之患。爲政府所哂。由是不獲再用。

壬戌。勝保以督辦陝西軍務。驕恣欺罔。逮問。旋賜自盡。

授多隆阿爲欽差大臣。督辦陝西軍務。

十二月癸卯。命薛煥來京。以李鴻章暫署辦理通商事務。欽差大臣。

甲辰。直隸總督文煜。以辦理張錫珠股匪。預齎粉飾。革職發往軍臺。副都統遮克登布。發往新疆。調劉長佑爲直隸總督。

同治二年癸亥。正月。浙軍克復金華府城。先是。太平侍王李世賢踞金華。圍衢州。左宗棠自開化。遂安往援。破之。及世賢往援金陵。浙軍蔣益澧。劉典等圍攻湯溪。至是克之。并克龍游。蘭溪。遂復金華府城。旋進克浦江。諸暨。並克紹興府。桐廬縣。浙東肅清。

陝軍攻克興安府城。陳德才等由湖北房竹二縣入陝境。陷興安。爲官軍克復。

二月。僧格林沁勦捻大勝。生擒捻首張洛型等。捻黨各自爲股。股各有首。以蒙亳之張洛型爲巨擘。受太平封號。跳梁楚豫江皖間。幾十年。僧格林沁總統東三盟及馬步各隊。專勦捻黨。大小數百戰。逐漸剷除。時在蒙亳一帶勦辦。適張洛型等聚集尹家溝。遂派隊往攻。侍郎國瑞等又進攻其雉河集老巢。二處皆破。洛型遁至宿州。爲知州英翰擒獲。正法。其從子張總愚領其餘衆。

甘肅回民滋事。固原失守。時甘回蠢動。寧夏河洲狄道平羅靈州等處。亦時撫時叛。旋又圍攻平涼府城。貴州回教各匪連陷安南興義。分擾郎岱等廳州。

設立同文語於京師。

上海軍解常熟昭文圍。先是守常熟太平將駱國忠降於李鴻章。太平軍圍之。官軍進攻昆山太倉。爲慕王譚紹洸擊退。至是鴻章令劉銘傳乘輪船濟師。洋將戈登率常勝軍助之。遂解常熟之圍。浦口江浦復陷。李世忠突圍出。詔撤去幫辦軍務。

江南軍敗李侍賢於蕪湖金柱關。克復要隘。

雲貴總督潘鐸爲回衆所戕。先是雲南叛回。全省分裂。省城回民亦與叛回通。魚肉良民。脅制官府。巡撫徐之銘貪淫昏懦。旣爲回民箝制。因又挾回自重。雖已罷斥。而新授巡撫賈洪詔等皆不能入滇。之銘爲諸回擁護。託言不能交篆。踞位奏事如故。潘鐸旣受命署雲貴總督。毅然入滇。視事後。欲力振威權。安輯回漢。而寇盜逼處。殊難措手。回人掌教馬復初名德新。以字行。爲回教中行輩最先。推爲大會羣回。皆隱聽號令。之銘與謀。遣人至大理招撫杜文秀。許割大理永昌麗江三府封之。德新復親至姚州議和。文秀出示。謂馬復初已允分給迤西之地矣。總兵馬如龍亦回民渠魁。慄悍好鬪。然德新如龍雖首鼠兩端。尙未顯露逆跡。潘鐸頗欲羈縻之。德新示意欲封平南王。鐸嚴拒之。馬如龍亦欲兼并迤東諸郡。而臨安士豪梁士美不服。以忠義激官紳。糾衆據險以抗。如龍請勦之。鐸不許。如龍徑率所部往攻。鐸檄士美固守。又檄他郡練衆之與如龍爲讐者。使與士美合圖如龍。其謀爲之銘洩之。德新怨懼交并。密召回酋馬榮。率黨二千餘人。冒鐸所調練衆旗幟入城。居五華書院。日出騷掠。鐸親往彈壓。諭令出城。馬榮

喉衆使前。鐸大罵。遂被戕。藩司岑毓英。以兵練數百。扼守藩署。臬司以下皆避入焉。之銘迎馬德新入居總督署。號令一切。德新初意召馬榮。使與官爲難。而已調停之。以市德於總督。并解如龍之厄。及搆成大釁。又欲討馬榮。以示已無叛意。乃密召如龍赴省。岑毓英亦致書如龍。獎其忠誠。如龍遂還省。與毓英攻馬榮。其黨死傷過半。榮逃回武定。旋爲官軍擒斬。之銘仍署總督。馬如龍署提督。事聞。詔潘鐸照總督陣亡例優卹。予諡忠毅。之銘革職來京。旋以勞崇光爲雲貴總督。

三月甲子。以耆齡爲福州將軍。左宗棠爲閩浙總督。

上海軍克復太倉崑山。李鴻章令程學啓與戈登。以炸礮攻克太倉。進克崑山。又令劉銘傳等由常熟進江陰無錫。黃翼升以淮揚水師輔之。李朝斌以水師由泖澱湖達太湖。分路進規蘇州。

四月辛丑。賜翁曾源等二百人進士及第出身有差。

四川官軍生擒石達開於老鴉漩。初。達開自咸豐九年七月撤寶慶之圍。入廣西。攻桂林。不克。再走湖南。犯廣東邊。爲粵軍所敗。遣黨分擾黔滇。皆不得志。其部將中旂賴裕新出寧遠。亦爲官軍所殲。達開本蓄意入川。圖竊據。乃自率大隊。渡金沙江。擬由邊地土司小徑入川。爲避實蹈瑕之計。時川督駱秉章。已懸重賞示諸土司。使抄其後。及達開至紫打地方。將渡大渡河。而河水適暴漲。川軍唐又耕等亦至。列營河對岸。其地左阻松林河。右阻老鴉漩河。而土司復自後偃古木塞路。達開糧罄路窮。奔老鴉漩。官軍追至。

遂降。送成都斬之。并所部數千人無脫免者。達開爲秀全初起時五王之一。素蓄大志。以仁義籠絡其下。人心附之。自出金陵。獨樹一幟。滋擾六七省。蹂躪百數城。至是擒滅。太平之勢益孤矣。

五月丙寅。命晏端書來京。以毛鴻賓爲兩廣總督。

己巳。諭減蘇松太三屬賦額。從曾國藩李鴻章請也。江蘇蘇松太三屬賦額。因沿襲前代官田及籍沒諸田租額。比他省有多至一二十倍者。諭令設局分別查明。折衷議減。著爲定額。旋又命將浙江杭嘉湖三府賦額酌減。又經戶部議定三十分中減去八分。嗣李鴻章左宗棠等奏定江浙兩省減賦之額。奉旨允行。

甘肅西寧花寺回民句結撒匪滋事。攻撲丹噶爾廳城。

貴州苗教各匪攻圍思南府。爲官軍擊退。

苗沛霖攻陷壽州。沛霖前畏楚軍之逼。讓出壽州。旋因擒獻陳玉成。詔免其治罪。至是。又句結捻黨。戕官復叛。攻陷壽州。復圍攻蒙城。踞懷遠。以抗官軍。

八月乙未。以劉長佑等勦辦宋景詩股匪。日久無功。交部議處。宋景詩初以降捻隸勝保部下。勝保逮治。復叛竄直隸。長佑奉督辦三省勦匪事宜。命數月未成功。爲僧格林沁參奏。與總兵德保按察使丁寶楨均降級留任。

甘肅平涼府城失守。平涼被圍數月。至是。回民用地雷轟陷。回民復攻涇州。

陝西漢中府城固縣失守。太平軍糾合捻黨。由興安竄陷漢中等府縣。

九月。太平將古隆賢以石埭太平旌德三縣來降。三縣復陷後。由奉王古隆賢踞守。自堵王黃文金攻青陽。爲官軍所敗。隆賢窮蹙。遂降。

多隆阿等解鳳翔圍。鳳翔被圍十四月。至是。多隆阿遣陶茂林等轉戰而前。城圍立解。

十月。李鴻章等克復蘇州。上海軍迭克吳江江陰各縣。並攻克沿太河各卡。乃逼蘇州城而軍。李秀成力謀解蘇州之圍。既屢戰不利。濬賢關又爲官軍所奪。遂入城與譚紹洸堅守。官軍以炸礮轟城外。石壘皆破。秀成以金陵待援急。留紹洸主城守事。乘夜遁去。程學啓等攻城。晝夜不息。納王郅雲官等。因副將鄭國魁。通款於學啓。丁卯。遂刺殺紹洸。開齊門降。鴻章入城撫視。學啓初與雲官等約爲兄弟。至是。恐降衆復叛。力請於鴻章。盡殺雲官等八王。及其黨數百人。

十一月。僧格林沁破苗沛霖於蒙城。斬之。沛霖既據壽州懷遠。欲北趨中原。號召羣捻。以蒙城扼其衝。悉衆圍之。僧格林沁督陳國瑞等往救。破其數壘。其部下之向爲陳玉成親兵者。乃殺沛霖。其黨皆降。甘肅寧夏靈州均失守。

徐宗幹奏克復彰化縣城。旋又奏生擒戴萬生。勦滅巨股會匪。南北兩路肅清。

同治三年甲子正月。陝西軍克復漢中府城。陳得才等既踞漢中。因金陵危急。思率衆還援。陝西巡撫劉蓉派兵邀擊。敗之。遂克復漢中府城。旋又追敗之上元觀。連克城固洋縣二城。得才等遂糾合各捻。竄入湖北境。

江寧圍師攻克鍾山天保城。遂合城圍。曾國荃駐軍雨花臺。奪取附城諸要隘。東西南三面。均爲官軍所有。惟東北鍾山各壘未克。至是。攻克鍾山之巔大石壘名天保城者。自此城北之圍始合。

二月丁亥。停山東畝捐。從巡撫閻敬銘請也。

蘇州軍攻克嘉興府城。程學啓進攻嘉興。揮衆肉薄登城。受槍子傷腦。昇歸。其部下遂奮攻克之。學啓安徽懷寧人。曾國荃圍安慶時。率衆來降。國藩派令隨李鴻章至上海。所向有功。至是。創重。遂卒。子諡忠烈。浙江軍克復杭州省城。初。蔣益澧攻富陽。久不下。得法國總兵德克碑洋槍隊之助。始克之。遂進薄杭州。康國器等攻餘杭。太平康王汪海洋自杭州出援。敗歸。旋左宗棠自嚴州至杭州督戰。太平海寧守將蔡元隆以城降。官軍又復桐鄉。與江蘇軍合。至是。遂大舉攻城。守將聽王陳炳文知不能守。乘夜出走。遂克杭州。汪海洋亦棄餘姚走德清。旋與炳文由徽州竄江西。多隆阿攻克熬屋。受傷。旋卒。初。滇匪藍大順陷熬屋。踞之。多隆阿提師入陝。驅勦回匪。如風掃箒。陝回幾盡。將移勦甘回矣。惟熬屋未破。移師圍之。熬屋城小而固。大順百計守禦。久不能拔。朝廷以多隆阿用兵

神速。訝其師久無功。嚴旨詰問。多隆阿亦自恥困於小寇。親督諸將力攻。頭眼受傷。忍創回營。傳令諸將。此城速克。傷重亦可痊。如不克。傷輕亦不欲復活。諸將四面環攻。遂克復縣城。不順逃至漢陰。爲團練所截殺。多隆阿以黑龍江馬隊。從征楚皖。身經數百戰。生平愛士卒如骨肉。而威令嚴明。智勇兼備。屢摧巨敵。至是以創重卒。事聞。予諡忠勇。

四月。蘇州軍攻克常州府城。太平護王陳坤書守常州。李鴻章督劉銘傳郭松林及戈登之常勝軍攻克之。生擒坤書。時鎮江揚州官軍亦克丹陽。

甲申。命戶部侍郎卓保副都統文謙往封朝鮮國王李熙。

丙戌。以侍郎薛煥通政使王拯互相糾參。攻訐陰私。俱令降級調用。

庚寅。命西安將軍都興阿督辦甘省軍務。提督雷正綰幫辦軍務。

五月乙巳。熙麟以病免。以楊岳斌爲陝甘總督。岳斌初名載福。以水師立功起家。甘肅軍克復平涼府城。平涼被回民佔踞。提督雷正綰陶茂林會攻克之。

滇匪藍三順犯陝西省城。多隆阿既卒。副都統穆圖善接統楚軍。奉命旋楚防勦。二順初踞山陽。復游弋豫楚邊界。至是。疾撲西安省城。穆圖善會同劉蓉德興阿堵擊屢勝。旋將全股撲滅。穆圖善奉調赴甘肅。辦理西口軍務。

新疆南路回民金相印作亂。陷喀什噶爾。時浩罕爲俄所滅。其酋帕夏曰阿古柏。收餘衆保安集延。安集延者。浩罕八城之一也。金相印迎帕夏出山。圍喀什噶爾。破之。遂次第攻奪南八城。

六月。曾國荃等攻克金陵。金陵圍師自攻克鍾山石壘後。城中糧援俱絕。李秀成勸天王棄城同走。不聽。乃令李世賢先就食江西。而自留金陵主城守。金陵城周百里。於內築月城以禦敵。國荃百計圍攻。思築隧道轟之。阻月城勿能進。五月三十日。攻克龍脖子山陰堅壘。所謂地保城者。遂築礮臺其上。日夜轟擊。而潛穴其下。六月十六日。地道火發。城傾二十餘丈。李臣典蕭泗孚等。蟻附爭登。城遂破。天府火起。國荃閉城搜殺三日。夜。太平酋目三千兵十餘萬皆死。生擒李秀成。及天王之兄洪仁達等。天王已於五月二十七日服毒自殺。其子洪福瑱年十五六爲其下挾之突圍出走。事聞。朝廷動色相慶。詔封曾國藩一等侯。國荃一等伯。李臣典一等子。蕭泗孚一等男。旣又賞僧格林沁一貝勒。官文李鴻章均一等伯。爵。楊岳斌彭玉麟駱秉章鮑超均一等輕車都尉。餘各獎敘有差。李秀成等磔於市。蘇州軍攻克湖州府城。洪福瑱之出走也。堵王黃文金迎至湖州。至是。蘇州軍力攻克之。浙軍亦下安吉。文金挾福瑱走寧國。蘇州軍並收復廣德州城。

七月。僧格林沁勦平太平軍及捻黨各股於豫楚邊界。初。扶王陳德才與捻黨蔓延豫邊界。官文出省與僧格林沁會勦。護軍統領舒保陣亡。至是。聞金陵已破。德才服毒自殺。端王藍成春等均降。

八月。江西軍生擒洪福瑱。太平天國亡。福瑱走廣德後。鮑超大破太平軍於許灣。黃文金挾福瑱走浙江之淳安。爲浙軍黃少春所破。文金死。福瑱輾轉走廣信。江西軍席寶田率輕兵緊躡之。及之石城。俘斬過半。卒獲之於荒谷中。磔於南昌市。天王之兄卹王洪仁政。弟于王洪仁玕。及黃文金之弟昭王黃文英等。亦已先爲席寶田所擒。於是太平餘衆。僅存李世賢汪海洋入閩一股。事聞。詔賞江西巡撫沈葆楨一等輕車都尉。並賞鮑超一等子爵。席寶田雲騎尉。

回民阿渾安得璘參將索煥章。踞烏魯木齊反。都統平瑞等死之初。陝回阿渾安得璘。假星命游蕩金積河湟間。及陝亂起。出關至烏魯木齊。主索煥章家。煥章前甘肅提督索文子。素蓄異志。師事安得璘。時都統藉防餉。勒州縣畝捐。回民無賴。倚勢苛斂。漢回因此互鬩。適提督聶布冲標兵赴南路討匪。潰歸。遂據漢城反。推安得璘爲主。索煥章手刃提督。進圍滿城。陷之。平瑞闔門死。事聞。予世職。諡忠壯。旋哈密吐魯番呼圖壁庫爾喀喇烏蘇先後陷。安得璘自稱清真王。

十月辛未。以新疆回民煽亂。革伊犁將軍常清職。以明緒代之。乙亥。以保恆署烏魯木齊都統。命穆圖善率師出關。

戊寅。封左宗棠一等伯爵。賞蔣益澧騎都尉。太平餘衆李世賢汪海洋竄福建。陷龍巖漳州。按察使張運蘭兵敗死之。

十一月。署福建提督林文察進攻漳州。兵敗。死之。

新疆庫爾喀喇烏蘇失守。伊犁被圍。旋將軍明緒奏稱已將回民擊退。立解城圍。

同治四年乙丑。二月丙子。毛鴻賓緣事降調。以吳棠署兩廣總督。未到任前。由將軍瑞麟暫署。

雷正綰奏攻克固原州。

三月壬寅。命恭親王奕訢毋庸在軍機處議政。並撤一切差使。旋惇親王等先後陳奏。奕訢雖經獲咎。尚
可錄用。命交王公大臣詳議具奏。經禮親王世鐸等覆奏。均以奕訢咎由自取。惟係懿親重臣。應否任用。
予以自新。候旨定奪。給事中廣誠等更謂。廟堂之上。先啓猜嫌。根本之間。未能和協。駭中外之觀聽。增宵
旰之憂勞。於是奉太后懿旨宣示。謂奕訢信任親戚。不能破除情面。平時於內廷召對。多有不檢之處。朝
廷杜微防漸。正小懲大戒。曲爲保全之意。奕訢著卽加恩。仍在內廷行走。並仍管理總理各國事務衙門。
四月戊寅。命恭親王奕訢仍在軍機大臣上行走。毋庸復議政名目。以示裁抑。

鮑超所部霆軍。於湖北金口地方潰散。先是。新疆危急。命鮑超募勇出關勦辦。其舊部十八營。由宋國永
等率之。自江西行至金口。因勇丁不願西行。全軍潰散。由江西入閩廣。與太平餘衆李世賢汪海洋等合。
己丑。賜崇綺等二百六十五人進士及第出身有差。

僧格林沁追擒匪至山東曹州西。遇伏陣亡。先是。僧格林沁旣殲苗沛霖。淮潁以北。揭竿烏合之徒。掃刮

無道。威震中原。既而勦擒匪於楚豫之間。因其地多山谷沮洳。騎不得逞。累中敵伏。喪良將恆齡舒通額蘇克金等。至是大股擒匪張總愚賴文洸等。悉入山東曹州境。僧格林沁率師疾追。日夜遠二三百里。自率親兵數千。先大軍行。時官軍與擒匪皆重趼羸餓。寒暑不能休息。勢且俱蹙。己丑。追及曹西。擒匪勾結鄆北伏莽數萬。四路廝集。僧格林沁進擊。大敗。避入空堡。敵圍之數重。及夜。突圍出。降卒叛。反衝官軍。敵乘之。遂全軍敗沒。僧格林沁及總治何建鰲內閣學士全順皆戰死。陳國瑞僅以身免。事聞。詔以親王飾終典禮從優議卹。予諡曰忠。並命配饗太廟。繪像紫光閣。子伯彥訥謨祜襲親王爵。並賞博多勒噶台王號。

癸巳。命欽差大臣曾國藩赴山東督師。以李鴻章暫署兩江總督。旋又命國藩督辦直隸山東河南三省軍務。

五月乙未。命醇郡王奕譞籌辦京城防範事宜。

甘肅肅州回民占踞嘉峪關。并陷肅州州城。

汪海洋自福建竄入廣東。先是浙軍會同蘇軍攻克漳州。李世賢遁。又追破之永安。閩境肅清。海洋入粵。敗粵軍於鎮平。復合霆營潰卒。勢復振。世賢尋爲海洋所殺。

六月甲午。增設安徽安廬滁和道。改鳳廬潁道爲鳳潁六泗道。增設渦陽縣。治雉河集。移鳳臺縣於下蔡。

鎮。

塔爾巴哈台回民叛亂。參贊大臣錫霖等死之。

淮軍劉銘傳周盛波等破任柱張總愚股匪於雒河。先是、捻竄海沭。命劉銘傳等軍馳往淮徐援勦。既至清江浦。捻不得下竄。遂由沭陽西走鄆城。至是、張總愚等糾合各股。攻撲雒河。國藩乃調劉銘傳周盛波進援雒河。大破之。渦河西岸。雒河之圍遂解。時國藩以捻匪漸成流寇。若匪流而兵亦與之俱流。則匪之資糧無限。而我之兵力有窮。乃定議以四省十三府州地。設四鎮重兵。安徽以臨淮爲老營。山東以濟寧爲老營。河南以周家口爲老營。江蘇以徐州爲老營。各駐大營。爲四省之重鎮。一省有急。三省往援。以劉銘傳駐防周家口。張樹聲駐防徐州。潘鼎新駐防濟寧。劉松山駐防臨淮。以李昭慶馬隊一支。爲游擊之師。自此辦捻之局。始漸有綱紀。

九月。提督雷正綰所部譁潰。初、正綰由鄂入陝。在甘肅攻勦回民。屢摧堅敵。及進攻金積堡。失利。朝旨革去幫辦。部將胡大貴等。因師挫糧缺。遂譁潰。在固原殺掠。圍逼涇州。與回民赫明堂等之衆合併。正綰涕泣開導。百計撫循。至平涼始紮定。時金積堡回民馬化隆亦率黨將犯陝西。詔陝撫劉蓉嚴防。

十月。解陝西巡撫劉蓉職。蓉以諸生隨駱秉章入蜀。授四川布政使。蜀亂平。督軍援陝。授陝西巡撫。至是以編修蔡壽祺言事。譏蓉夤緣。詔蓉自陳。覆奏伉直。又爲御史所糾。部議降級。旋又命復任。時西捻入陝。

官軍挫於華陰。又敗於壩橋。遂奪職終於家。

十一月壬申。禮部尚書李棠階卒。贈太子太保。予諡文清。棠階以碩望名儒。同治初以太常事卿。一歲遷至尚書。爲軍機大臣。朝廷有大賞罰。多所獻替。

命內閣學士李鴻藻在軍機大臣上學習行走。

十二月丙寅。以奉天馬賊猖獗。革將軍恩合職。以都興阿代之。命寧夏將軍穆圖善督辦甘肅軍務。官軍蕩平太平餘衆於廣東嘉應州。汪海洋踞鎮平。霆營潰卒與海洋所部爭糧。多降於粵軍方曜。旋康國器克鎮平。海洋走平遠。席寶田破之。贛南矛傷其背。遂復走廣東。突陷嘉應州。官軍攻之。不克。海洋中礮死。其黨推嘉王譚體元主城守事。尋自南面出走。至黃沙嶂。路絕險。官軍四面蹙之。降者萬餘人。體元及諸將皆死。至是太平餘衆始盡。

寧夏回民投誠。收復府城。寧夏回民將城池圩卡撤空。各堡回民俱移往納家牯。都興阿入城時。復將回目誅戮。並縱兵搶殺。爲穆圖善所奏。都興阿亦自認錯誤。奉旨交部議處。

同治五年丙寅正月。派知縣斌椿率同官生前赴外國游歷。從總理各國事務衙門奏請也。伊犁失守。安集延既踞南八城。纏頭以其同類。歸附之。至是攻伊犁九城。陷之。

塔爾巴哈台失守。參贊大臣武隆阿死之。

三月。甘肅蘭州督標兵變。戕官踞城。時總督楊岳斌統軍在外。族還省討平之。

戊子。命左副都御史胡家玉在軍機大臣上學習行走。時軍機大臣兵部尚書曹毓瑛已病卒也。

四月戊戌。以馬如龍署雲南提督。時徐之銘已死。賈洪詔林鴻年皆以逗遛川境不敢入滇奪職。以劉嶽昭補巡撫。岑毓英署布政使。嶽昭尙在貴州。毓英統師在外。勞崇光始駐貴州。至是。道路稍通。遂入省城。如龍率回弁囊鞭迎入。人心大定。

文祥等奏。奉天馬賊匪首伏誅。餘黨遣散。撤兵還京。先是。因馬賊由口外竄入畿輔。震驚陵寢。命文祥等率神機營督勦。至是。因殲除幾盡。撤還京師。

癸丑。大考翰詹等官。擢孫毓汶等四員一等。餘升黜留任有差。

貴州回民襲踞興義府城。

五月甲戌。以德興阿爲塔爾巴哈台參贊大臣。未到任以前。命李雲麟署理。以榮全署伊犁將軍。

命西安將軍庫克吉泰督辦新疆北路軍務。以德興阿幫辦。

六月。左宗棠奏請於福建擇地設廠。試造火輪船。從之。旋命丁憂巡撫沈葆楨總司船政事務。准其專摺奏事。

八月癸卯。楊岳斌以病免。調左宗棠爲陝甘總督。吳棠爲閩浙總督。實授瑞麟兩廣總督。旋以楊岳斌病

急求歸。以穆圖善署理陝甘總督。

九月庚午。予告大學士祁寯藻卒。贈太保。予謚文端。咸豐時。曾國藩以丁憂侍郎。起鄉兵。肅清湖北。捷書方至。文宗喜形於色。謂軍機大臣曰。不意曾國藩一書生。乃能建此奇功。寯藻對曰。國藩以在籍侍郎。猶匹夫耳。匹夫居閭里。一呼蹶起。從之者萬餘人。恐非國家福也。文宗默然變色者久之。及同治初。兩江總督何桂清以失律擬斬。寯藻獨上疏力救之。

十月辛丑。命左都御史汪元方在軍機大臣上行走。時李鴻藻丁憂。屢詔奪情。在弘德殿行走。仍堅請終制。

十一月丙辰。命曾國藩回兩江總督任。授李鴻章欽差大臣。專辦勦匪事宜。國藩以勦捻無功。精力太衰。不能當此大任。屢請罷斥。故有是命。

湖廣總督官文撤任。聽候查辦。命譚廷襄暫行署理。初。曾國荃奏參官文貪庸驕蹇。命綿森譚廷襄馳抵湖北查辦。至是。以訊有端倪。命先行任撤。侍郎胡家玉以收受官文餽遺。革職留任。並毋庸在軍機大臣上學習行走。官文旋革去總督。仍留大學士伯爵。改爲革職留任。命來京供職。

同治六年丁卯。正月丙寅。以李鴻章爲湖廣總督。仍在營督辦勦匪事宜。調李瀚章爲江蘇巡撫。命署理湖廣總督。

辛未。命左宗棠爲欽差大臣。督辦陝甘軍務。以劉典爲幫辦。丙子。以太僕寺卿徐繼畲總管同文館事務。

鮑超大敗捻匪於尹隆河。先是。捻匪任柱賴文光牛洪李允等。由河南趨湖北。盤旋德安安陸之間。郭松林被圍於沙岡集。張樹珊戰死於楊家河。捻勢張甚。屯尹隆河。以窺安陸。至是。鮑超率霆軍由襄樊。劉銘傳率銘軍由隨棗。分路進剿。會於安陸。霆軍駐白口。銘軍駐下洋港。期以庚午日辰刻。進軍夾擊。銘傳翼獨得首功。先一刻進攻。大敗。所部唐殿魁等死之。及霆軍踐期來。乃大破捻衆。殺敵萬餘。生擒八千有奇。救銘傳於重圍之中。又追敗之直河豐樂河及襄河邊。事後。銘傳內慚。反以失期咎霆軍。李鴻章據以入告。廷旨嚴責鮑超。超憤鬱成疾。引發舊傷。遂乞病歸。

二月癸丑。勞崇光卒。予諡文毅。以張凱嵩爲雲貴總督。

四月己丑。大學士周祖培卒。予諡文勤。

劉松山大敗。捻回各匪於陝西同州。張總愚一股。自入陝後。勢張甚。省城岌岌。湘軍劉松山疾走入關。轉戰涇渭之間。大敗之同州東北。

五月辛酉。命曾國藩爲大學士。駱秉章爲協辦大學士。均仍留總督任。

候選直隸州知州楊廷熙奏請撤銷同文館。先是。京師設同文館。招生學習外國語言文字。本年又增習

天文算學。御史張盛藻大學士倭仁。先後請罷前議。詔不許。而命倭仁在總理各國事務衙門行走。並管理同文館事。倭仁屢辭不獲。遂託病請假。至是因旱。詔求直言。楊廷熙請都察院代奏。撤銷同文館。以弭天變。並列詆各部院大臣。奉旨當此求言之際。姑不深責。惟疑出倭仁授意。命速銷假到任。倭仁乘騎到館。偶墜馬傷足。竟不視事。

捻匪東竄。至濟寧之戴廟。山東官軍失利。遂衝過運河。初。曾國藩等議於山東之運河東岸。河南之賈魯河沙河西岸。沿堤興築長牆。河南長牆已於上年爲捻竄破。惟運堤屢次被攻未陷。山東賴以完固。其分汛濟寧以北東軍守之。台莊以南湘淮各軍守之。會天旱水涸。運河成乾溝。人馬可行。捻會任柱賴文光等。以鄆城梁山寨有土匪勾引。率衆直犯戴廟。東軍不守。遂衝過運河東岸長牆。

七月。捻匪由海神廟渡濰河。膠萊防潰。任賴各捻過運河後。將趨登萊。李鴻章探諸將議。倒守運河。進扼膠萊。將蹙之海隅。調東豫各軍會同淮軍協守運河南堤。冒暑興築堤牆。至是。捻股疾馳回竄。屢攻防守運河各軍不得逞。乃由海神廟以北海灘。撲渡濰河。於是膠萊之防又潰。

九月壬子。申諭各省嚴拏哥老會匪。

雲南定遠大姚兩城失陷。時劉嶽昭勦辦黔西股匪。張凱嵩方擬募勇暫駐東昭。俱未入滇。岑毓英亦在曲靖勦匪。宋延春以按察使護督篆。馬如龍攻大理失利。回省城養病。迤西回匪又陷定遠大姚兩城。

十月甲午。命侍郎沈桂芬在軍機大臣上學習行走。時軍機大臣左都御史汪元方病故也。

乙巳。派美國使臣蒲安臣往有約各國。充辦理各國中外交涉事務大臣。旋又派志剛孫家穀往。皆從總理各國事務衙門奏請也。

劉銘傳敗捻於贛榆。降人潘貴升殺任柱。初。銘傳破捻於濰縣之松樹山。又破之牟山。捻勢漸解。殘衆向諸城南趨。追至日照地方。槍傷魯王任柱。柱逕奔江蘇臨榆縣境。銘傳追破之。有潘貴升者。密信乞降。請殺任柱爲進身階。至是。乘其不備。以槍洞其腰脅。縱馬來降。捻衆遂大潰。任柱。亳州人。爲捻匪各股總頭目。飄忽善戰。旣死。餘股推賴文光爲首。

十一月。捻匪窺黃河。詔抽防軍協直東之師守黃河。時捻出沒昌濰壽光之間。屢爲官軍所敗。不得志於運防。將窺青濟黃河之濱。朝旨恐黃河防軍有失。命抽軍防之師協防。

癸丑。以直隸梟匪蔓延。北趨涿州永清霸州等處。革劉長佑職。命官文署理直隸總督。長佑旋以親赴前敵。將梟匪殄除殆盡。賞給三品頂戴。命督帶所部楚勇回籍安置。

甲子。新設布倫托海辦事大臣幫辦大臣各一缺。以李雲麟明瑤爲之。

捻匪張總愚由陝西壺口搶渡黃河。犯山西吉州。山西巡撫趙長齡及防河按察使陳湜。均革職遣戍。十二月。捻匪竄至揚州。官軍擊敗之。生擒遵王賴文光。東捻蕩平。初。捻匪分股極多。至五年秋。始分爲二。

西捻小閻王張總愚竄陝西東陝魯王任柱與賴文光等出入豫鄂山東江蘇東捻自濰縣壽光間屢爲官軍所敗。俘斬幾三萬人。精銳略盡。至此各股全滅。斬文光於揚州。事聞。自李鴻章以下。賞加世職等有差。

丁酉。協辦大學士四川總督駱秉章卒。贈太子太傅。予諡文忠。秉章外樸內明。於賢不肖之尤著者。口雖不言。而辨之甚精。既能推轂賢才。賢才亦樂爲之用。左宗棠以在籍舉人。就湖南巡撫張亮基之幕。秉章接任。復賓禮之。專任以軍謀。集餉練兵。選用良將。屢卻勁敵。其後督師入蜀。值蜀中藍朝鼎李短搭搭等羣寇蠶起。蹂躪四十餘州縣。未及一年。而全蜀肅清。蜀人感之如父母。旣卒。成都爲之罷市。居民多野哭巷祭。

調吳棠爲四川總督。未到任以前。以成都將軍崇實兼署。以馬新貽爲閩浙總督。未到任以前。以福州將軍英桂兼署。

庚子。以郭柏蔭署湖廣總督。

同治七年戊辰。正月庚戌。命吏部尙書朱鳳標協辦大學士。

捻匪張總愚由河南竄畿南。初。總愚旣由陝渡河。犯山西吉州。復由絳州曲沃垣曲山僻小路。竄近豫疆。至是。遂由磁州廣平直犯順德雞澤平鄉鉅鹿等處。畿南震擾。詔切責李鴻章等。均奪職。惟丁寶楨率軍

先至河間。詔嘉獎。

甲子。以擒匪竄擾畿輔。京師戒嚴。命恭親王奕訢會同神機營王大臣辦理巡防事宜。旋命各路統兵大臣暨各督撫均歸節制。

癸酉。大學士賈楨因病致仕。

乙亥。命左宗棠總統直隸各路官軍。時宗棠由陝追擒入直隸境。

三月壬子。雲貴總督張凱嵩以規避革職。以劉嶽昭代之。命岑毓英爲雲南巡撫。

乙亥。命朱鳳標爲大學士。

癸卯。賜洪鈞等二百七十人進士及第出身有差。

閏四月辛未。命盛京將軍都興阿管理神機營事務。授爲欽差大臣。赴天津等處。會同左宗棠李鴻章勦辦捻匪。初。捻匪旣游奕畿南。李鴻章復議驅之太行黃河間。旣而擒至濬滑。西犯新鄉。循河至延津。屢敗陝西軍淮軍。又自內黃趣東昌。往平德州吳橋東光。遂至天津。恭親王奏飭諸帥限一月平捻。至是限滿。左宗棠李鴻章均交部嚴議。而命都興阿爲欽差大臣。列名在左李上。以侍郎崇厚副之。

岑毓英遣將收復元謀。並攻克呈貢武定祿勸徵江等城。時雲南省垣久爲迺西回匪所困。楚雄徵江各府州縣二十餘處。俱陷於匪。劉嶽昭甫自黔西進至曲靖。岑毓英先勦豬拱箐海馬姑之苗。平之。乃遣楊

玉科等繞由川境。收復元謀。進擣環洲。將武定祿勸兩城克復。省防官軍亦屢破敵城外。旋毓英自曲靖親自赴援。沿途屢破敵兵。提督馬如龍來會。毓英推誠慰勉。約共竭力報國。如龍感奮。由是雲南大局始有轉機。

六月。官軍蹙捻於茌平。張總愚赴水死。西捻平。初。李鴻章建防守黃運蹙捻海東之議。郭松林等屢破捻。吳橋等處。河運之防始固。鴻章以爲前東捻在黃河之南。故扼之河北。運西以蹙之於海。今西捻在河北。非扼張秋。不能合圍。張秋至臨清運河二百四十餘里。爲黃水倒灌。積漸淤成平陸。非引黃入運。則運河無水。因令官軍挑濬淤沙。引黃入運。及捻竄運東。遂力主防運之議。旋捻南下過滄州。滄州南有捷地壩者。在運河東岸。當減河口。以時啓閉蓄洩濟運者也。減河自捷地壩至海濱牧豬港。計百餘里。橫亙東西。水漲足阻敵騎竄津之路。是時運水適盛漲。卽督軍士開壩導運入減。並就河北築牆。以爲滄青靜海屏蔽。自此敵騎所至。遂有限制。而郭松林潘鼎新周盛波等。又屢敗之海豐楊丁莊沙河等處。是月。又逼之於老海窪。及玉林鎮隆福寺。水師又敗之於高家渡。二十八日。諸軍追捻至茌平境之廣平鎮。圍之於徒駭黃運之間。河汊紛歧。水溜泥陷。捻奔走無路。遂將大股殲除。總愚攜八騎走至徒駭河濱。下馬投水死。西捻蕩平。事聞。鴻章等開復處。分加賞有差。

七月乙酉。賞勦平捻匪功。命李鴻章以湖廣總督協辦大學士。

黃河南岸滎澤汛十堡漫口。

乙未。調曾國藩爲直隸總督。馬新貽爲兩江總督。以英桂爲閩浙總督。

丁酉。命開缺兵部侍郎彭玉麟赴江皖會籌長江水師事宜。

八月乙巳。御史德泰奏請修理園庭。並以內務府庫守貴祥所擬章程。請於京外各地方按戶按畝按村。鱗次收捐爲可取。奉旨。貴德泰喪心病狂。卽革職。貴祥發往黑龍江給披甲人爲奴。

十月戊午。李鴻藻服闋。命仍在弘德殿及軍機大臣上行走。

十二月。劉松山收撫鎮靖堡。自西捻平後。左宗棠入覲。自期以五年平陝甘之亂。十月。還西安。檄劉松山由茅津北渡入山西。乘冰橋赴陝。時土匪董福祥犯綏德。窺榆林。金順迎擊破之。松山之綏德。詞匪巢散。布大小理川間。分兵攻之。破其巢以百數。遂度榆林。至靖邊。屯安定。又屢敗之。敗匪併竄鎮靖堡。堡爲董福祥老巢。其眷屬則踞靖邊縣城。松山抵鎮靖。福祥之父乞降。旋福祥亦降。收其衆十萬餘人。榆延北境。正當河套迤南。古用兵之地。自陝甘回民倡亂。人民相與團結。以與回抗。喪敗之餘。流爲盜賊。浸假失業。無賴之徒及飢軍潰卒附之。又句結甘回。遂致戕官踞城。成爲土匪。自鎮靖受撫。官軍遂得專勦回匪矣。烏魯木齊提督成祿奏收復肅州。自新疆陷後。屢催成祿出關。至是始報收復肅州。

同治八年己巳正月。滎工合龍。

董志原回匪棄巢。徙金積堡。官軍追敗之。董志原地居秦隴要膺。今因糧絕棄去。涇州慶陽所屬肅清。提督高連陞劉松山所部先後變亂。連陞被戕。高連陞所部果軍勦陝回有功。駐楊店。因所部哥老會謀變。捕之急。遂變。連陞及部將多被戕。嗣經他軍邀截。五日而事定。松山所部十營駐綏德。亦因哥老會煽亂。叛踞州城。松山馳往鎮撫。旬日而定。

二月。席寶田等敗苗教各匪。克復貴州鎮遠府衛二城。

三月。雲南澂江回復叛。襲踞府城。

五月。劉嶽昭收復尋甸。嶽昭上年冬攻尋甸失利。至是始收復。

八月。山東巡撫丁寶楨奏。太監安德海矯旨出都。舟過德州。僭擬無度。招搖煽惑。得旨著嚴密擒捕。捕得卽就地正法。旋奏於泰安拏獲正法。

收復布倫托海。初。李雲麟招集額魯特人衆。將進規伊犁。旋復遣散。遂致變叛。布倫托海被陷。雲麟亦褫職去。至是。經呼圖克圖棍噶扎勒參帶兵收復。

劉松山破回於靈州。自陝西肅清。左宗棠進兵甘肅。駐涇州。受總督印。調劉松山趨定邊花馬池。是時穆圖善狃撫議。羣回旋服。旋叛。及松山抵靈州。金積回酋馬朝清卽化降。反側難信。屢代陝回乞降。而暗嗾其黨決秦渠水以阻官軍。陝西回酋白彥虎等。亦由黑城入金積。屢犯官軍。松山奮擊。大破之。旋克復靈

州。化隆又哀詞乞降。陝回不自安。皆西竄。雷正綰黃鼎又破之。固原州。

岑毓英破圍攻省城各壘。省圍解嚴。自是附省各壘。剗削無遺。所遣將亦先後克復。富明嵩。明易。門安寧。昆陽。祿豐。楚雄。南安。廣通。大姚。定遠等城。悍酋據匪二十餘萬。擒斬殆盡。

九月。署寧夏將軍金順提督張曜。破叛回於寧夏城外。先是。董志原餘衆竄寧夏。北擾蒙古。由鄂爾多斯。入烏拉特。趨阿拉善牙帳。圍定遠營。張曜要擊於察漢綽爾。大破之。又破之紅柳樹。旋與金順會師。沙金托海。鼓行而西。時寧夏回復叛。邀擊於城外。大破之。

十月。席寶田破貴州苗。克復勝秉城。

十一月丁丑。裁撤布倫托海辦事大臣等。

十二月甲辰。命李鴻章馳赴貴州。督辦軍務。以李瀚章署湖廣總督。

同治九年庚午。正月。廣東陸路提督劉松山攻馬五寨。陣亡。松山圍攻金積堡。破其附近各寨。馬化隆屢代陝回乞撫。松山令繳馬械。則以朽槍羸馬應。而晝夜修壘浚濠。如不及。又決秦渠灌官軍營。松山進攻馬五寨。飛礮中左乳。遂卒。事聞。贈太子少保。予諡忠壯。左宗棠檄其兄子錦棠代統其衆。

二月壬子。命李鴻章先赴陝西。督辦陝省援勦事宜。時馬化隆遣其黨出惠安堡。分由寧州。正寧。入陝西之三水。於是陝西告警。朝廷恐左宗棠所留兵不敷分勦。故有是命。旋劉典奏官軍勦辦獲勝。陝西肅清。

四月岑毓英遣楊玉科攻克姚州。

五月天津人民毆死法國領事。焚毀教堂。初天津有匪徒迷拐人口。人民疑外國教堂所爲。并傳言有挖眼剖心等事。遂聚衆焚毀各國教堂。並毆死法國領事豐大業。時曾國藩因病請假。朝命赴天津查辦。法使羅淑亞請以府縣官抵償。國藩不許。旋因國藩病增劇。法國有兵船到津。命李鴻章馳赴近畿一帶駐紮。又命毛昶熙馳赴天津。會同曾國藩查辦事件。嗣仍由國藩與法使議結。定正法滋事人民十五人。軍流二十一人。天津府知府張光藻。天津縣知縣劉傑。皆遣戍。

乙未。命侍郎崇厚爲出使法國大臣。

七月兩江總督馬新貽被刺客。新貽赴署右箭道校閱。被張文祥刺傷脅肋。遂卒。事聞。予諡端敏。文祥訊無主使。極刑處死。

八月丁酉。調曾國藩爲兩江總督。李鴻章爲直隸總督。以李瀚章爲湖廣總督。

十月乙未。命劉銘傳督辦陝西軍務。

壬子。裁撤三口通商大臣。歸直隸總督經營。頒給欽差大臣關防。兼轄山東之東海關。奉天之牛莊關。嗣後直隸總督於春融開凍後。移駐天津。封河再還保定省城。歲以爲常。並增設津海關道。甘肅甘涼肅三處回匪。自額哲呢河土爾扈特竄入三音諾顏部。攻陷烏里雅蘇臺。留四日。仍回肅州。

安集延酋帕夏踞烏魯木齊。初，安得璘既踞烏垣，北路漢民結團自保，立壯士爲之長。於是徐學功起迪化，趙興體起綏來，劉鄉約等起河西古城奇台，而學功勇略冠一時，尤爲回人所畏。安酋帕夏聞其名，使使約和。九年，安得璘遣兵與安集延戰於庫車，敗績。安酋潛勾馬仲，自吐魯番共攻安得璘。安得璘乞降，帕夏仍令爲清真王，以馬仲爲阿奇木，總回務。其後馬仲爲學功所斬，其子馬人得襲職，與安得璘積不相能。復糾安酋攻之。閏八月，安酋拔吐魯番，與學功進攻烏垣。安得璘出禦，大敗，走死綏來。帕夏遂踞烏垣，令漢回薙髮易服，效其國俗，仍以馬人得爲阿奇木，而令學功還南山。學功大悲，與之爭戰數月，以糧罄還南山。

席寶田攻都台拱，台拱苗柴以百數，革夷最大。寶田先攻旁三柴克之，進破革夷薄台拱廳城，苗棄城遁，遂克之。

十一月，官軍攻破金積堡。自劉松山戰死，馬化隆勢復熾，遣黨四擾，冀牽動圍師。屢卻官軍，並陷峽口，又結河狄回窺渭源，窺鞏昌，劉錦棠等邀擊屢勝。乃傍壘築隄，北抵黃渠，南接金積里許，高丈餘，闊三丈，回計大窘。化隆乃率其子馬耀邦乞撫，錦棠勒繳馬械，嗣又屢敗其出犯之衆，斷其糧道。東、南、北三面回寨皆平，外援已絕。至是，化隆親詣錦棠營請罪，錦棠派弁守之，令繳馬械，毀堡垣，餘衆皆降。分別安插。化隆父子旋俱凌遲處死。化隆之父曰馬二，與穆三之祖穆大阿渾友善，穆大阿渾傳習新教，臨死，以所服白

帽紅衣授化隆。囑徒衆歸其管束。穆三與其弟穆四穆五均爲新教阿渾。自京師天津及黑龍江吉林之寬城子山西之包頭湖北之漢口均有新教徒。化隆自託神靈回羣尊信之。比就俘其黨見之。猶長跪。旣死。回黨遂瓦解。

貴州官軍攻克都勻府城。都勻爲苗人金幹二等占踞。前爲官軍得而復失。至是又攻破之。

同治十年辛未正月。因越南匪徒滋擾諒山等處。命提督馮子材馳赴太平府。派兵應援。

壬寅。大學士官文卒。予諡文恭。

二月戊子。命瑞常爲大學士。文祥協辦大學士。

岑毓英攻克澂江府城。澂江被陷十餘年。圍攻一年。至是克之。生擒匪首馬和等。並拔江那等處。旋楊玉科又攻克賓居。收復雲龍州城。

四月辛巳。大學士倭仁卒。予諡文端。倭仁講求義理之學。一時稱爲理學名臣。

甲申。賜梁耀樞等三百二十三人進士及第出身有差。

金順張曜攻克納家牯。寧夏肅清。

五月辛亥。日本使臣伊達宗城柳原前光來議訂約。命李鴻章爲全權大臣。與議於天津。旋於九月定修好規條十八條。通商章程三十三款。

俄羅斯據伊犁。初俄國乘中國有事。漸蠶食邊界。卡倫外甌脫地。及哈薩克布魯特諸部。伊犁塔爾巴哈臺。遂與逼處。至是以兵六百人據伊犁。電其駐京使臣。告吾總理衙門。并言欲往收復烏魯木齊。詔伊犁將軍榮全赴伊犁。收回城池。並命劉銘傳由肅州出關。規復新疆各城。銘傳旋乞假歸。

六月丙子。命瑞麟爲大學士。仍留兩廣總督任。

七月。陝回分掠西寧。白彥虎陷小南川漢堡。踞之。肅州降回。亦潰叛東下。甘涼戒嚴。詔左宗棠分兵勦辦。九月甲午。命英桂留京。以張之萬爲閩浙總督。之萬旋開缺養親。

十一月丁亥。以李鶴年爲閩浙總督。

同治十一年壬申。二月丁巳。奉皇太后懿旨。立阿魯特氏爲皇后。詠吉於本年九月。舉行大婚禮。

大學士兩江總督曾國藩卒。予諡文正。國藩初講義理學。亦宗尙考據。治古文辭。公誠之心。形於文墨。生平公牘私函。無一欺飾語。治軍行政。務求蹈實。或籌議稍迂。成功轉奇。發端至難。取效甚遠。凡規畫天下事。鮮不效者。文章奏議尤美。有集百餘卷行世。子紀澤襲爵。

二月丙寅。以何璟署兩江總督。

庚午。詔起彭玉麟巡閱長江水師。

甘肅河州回目馬占鰲投誠。官軍進攻河州太子寺。失利。提督傅先宗徐文秀陣亡。至是。占鰲就撫。時西

寧回目馬永福亦降。

三月辛丑。大學士瑞常卒。予諡文端。

官軍攻克烏鴉坡苗砦。苗民投械乞撫者六萬餘人。貴州苗匪平。

甘肅循化撒納就撫。循化廳洮州廳岷州三屬。舊爲番族所居。史所稱枹罕羌人者也。番衆僧俗。各隸於

土司。自回亂以來。番衆據險自守。與回人頻年戰鬪。傷亡頗多。至是因土司楊元。就撫於官軍。

五月乙酉。御史李宏謨奏請勤召對。奉旨。本年入春以來。慈禱皇太后時有不適。三月以後。始月餘未經

視朝。李宏謨以逐日召見爲請。旨。昧已極。傳旨嚴行申飭。

庚子。命李鴻章爲大學士。仍留直隸總督任。

六月甲子。命文祥爲大學士。全慶協辦大學士。

丁卯。以單懋謙協辦大學士。

官軍克復貴州興義府城。興義久被回匪盤踞。至是爲滇軍克復。

七月。御史邊寶泉以直隸總督李鴻章奏進瑞麥。奏稱恐滋流弊。又以永定河又復潰決。請撤銷前次保

案。奉旨嘉納。

八月庚申。命單懋謙爲大學士。時朱鳳標已因病乞休也。

九月丙申。帝行大婚禮。冊立阿魯特氏爲皇后。

辛丑。奉皇太后懿旨。於明年正月。舉行皇帝親政典禮。

十月己未。以大婚禮成。上皇太后徽號。

十一月。日本遣副島種臣來議改約。許之。旋於十二年四月。約成互換。

劉錦棠等解西寧圍。先是。回目馬桂源自爲署西寧知府。出城與陝回謀亂。漢民閉城拒之。桂源遂與禹得彥。崔三白。彥虎等圍西寧。劉錦棠督軍擊敗之。桂源等遁。巴燕戎格。西寧解嚴。大通諸回堡亦乞撫。

十二月。岑毓英督總兵楊玉科等克大理。杜文秀自殺。文秀踞大理。歷十八載。攻陷五十三城。西及四川。東及貴州。造禁城。擬王制。官軍進攻。皆因東南黨援牽掣。屢次失利。自曲靖。澂江。臨安。以次收復。遂得專力進西。至是。楊玉科等已盡破趙州。蒙化等處。大理藩籬盡失。遂穴地道。破其外城。文秀窮蹙。以子女分寄其大司衡。楊榮。大經。略。蔡廷棟家。而與妻妾飲毒自盡。其黨趁其未絕。昇之出城。詐降。時岑毓英亦至大理。令三日內繳軍械。而密令玉科帶兵入城受降。定期與城外兵夾擊。坑敵數萬。盡破三城。獲文秀子女及楊榮。蔡廷棟等。斬之。大理肅清。旋毓英遣兵攻順寧。雲州。騰越。皆下之。全滇底定。

同治十二年癸酉。正月丙戌。以李宗羲爲兩江總督。並充辦理通商事務大臣。貴州官軍克新城。上游回匪肅清。全黔底定。

卒丑。革烏魯木齊提督成祿職。拏問。成祿屢奉出關之命。藉會攻肅州。久留不進。又訴軍糧乏。難赴哈密。左宗棠參其糜餉遷延。舉動乖張。至是。又因在高臺苛派捐輸。誣士民赴營申訴者爲叛逆。掩殺二百餘人。爲宗棠揭參。遂命逮問。以金順接統其軍。

丙午。帝親政。

二月戊午。加上皇太后徽號。

六月壬子。各國駐京使臣始於紫光閣前瞻覲。並呈遞國書。

閏六月丙戌。予告大學士朱鳳標卒。予諡文端。

九月。甘肅官軍收復肅州。關內肅清。自十一年四月。提督徐占彪等進攻肅州。屢破城外各堡。左宗棠調宋慶軍由神木赴甘助勦。西寧旣降。陶生林等亦來會。金順馬隊亦至。三月。白彥虎竄塔爾灣。肅州回出城應之。占彪等合擊敗之。白彥虎遁關外。四月。長圍始合。閏六月。破其外城。八月。宗棠自至肅州督戰。劉錦棠亦自西寧至。因猛攻多損精銳。議增修濠壘圍之。至是。回目馬四出。城就撫。諸將縱兵屠之。並斬馬四等。

十月庚子。以平肅州功。命左宗棠以總督協辦大學士。並由騎都尉改爲一等輕車都尉。金順穆圖善宋慶張曜等恩賞有差。

十一月壬申。御史吳可讀以言事降調。先是提督成祿逮問至京。刑部定擬斬立決。聲明應否改爲斬監候。恭候欽定。可讀奏請將成祿立在典刑。王大臣等以其刺聽朝政。請旨究詰。帝命降調。毋庸究詰。而成祿則定爲斬監候。

同治十三年甲戌。正月丙辰。諭禁廣東闖姓賭博。

三月。全慶緣事降調。命吏部尙書寶鋆協辦大學士。

辛未。命李鴻章爲全權大臣。與祕魯國使臣會商事務。

四月丁丑。大學士單懋謙因病乞休。允之。

戊子。授沈葆楨爲欽差。辦理臺灣等處海防。兼理各國事務大臣。時有日本船避風泊臺灣。爲生番所殺。日本遂派西鄉從道率兵登岸。進攻番社。嗣葆楨抵臺。布置防務。與日本議定撫卹。七月。日本遣大久保利通到京。受償款五十萬。撤兵歸國。

丁酉。賜陸潤庠等三百三十七人進士及第。出身有差。

七月壬子。命左宗棠爲大學士。仍留陝甘總督任。

授烏魯木齊都統景廉爲欽差大臣。督辦新疆軍務。都統金順爲幫辦。

己巳。命停止圓明園工程。酌量修理三海。

庚午。奕訢革去親王世襲罔替。降爲郡王。其子載澂革去郡王銜貝勒。時帝與載澂戲。因微故失歡。故有是命。越日。卽奉太后懿旨賞還。

九月丁未。大學士兩廣總督瑞麟卒。予謚文莊。以英翰爲兩廣總督。

乙丑。予告大學士賈楨卒。予謚文端。

十月己亥。帝不豫。命軍機大臣李鴻藻代批答章奏。時帝好微行游宴。遂以致疾。

十一月己酉。諭。朕於本月遇有天花之喜。所有內外各衙門陳奏事件。呈請皇太后披覽裁定。

命寶鋆爲大學士。

十二月甲戌。李宗羲以病免。以劉坤一署兩江總督。

帝疾大漸。西刻。崩於養心殿東暖閣。兩宮皇太后御養心殿西暖閣。召親王奕訢、奕訢、奕譞、郡王奕諲、奕詳、貝勒載治、載澂、公奕謨、御前大臣伯彥訥謨祜、奕劻、景壽、軍機大臣寶鋆、沈桂芬、李鴻藻、內務府大臣英桂、崇綸、魁齡、榮祿、明善、貴寶、文錫、弘德殿行走徐桐、翁同龢、王慶祺、南書房行走黃鈺、潘祖蔭、孫貽經、徐郁、張家驥、入奉懿旨立奕譞之子載湉承繼文宗顯皇帝爲子。入承大統。爲嗣皇帝。並奉懿旨。俟嗣皇帝生有皇子。卽承繼大行皇帝爲嗣。時載湉年甫四齡。卽由醇王府移居禁中。卽皇帝位。以明年爲光緒元年。

丁丑。兩宮皇太后俞王大臣奏請。垂簾聽政。

癸未。准醇親王奕譞奏請。開除所管各項差使。並命以親王世襲罔替。

侍講王慶祺以素行有虧。爲御史陳彝所參。奉旨革職永不敘用。

丙戌。大學士九卿會同議。上大行皇帝尊諡曰。繼天開運受中居正保大定功聖智誠孝信敏恭寬毅皇帝。廟號穆宗。

戊子。封皇后爲嘉順皇后。

乙未。以聲名平常。被御史奏參。革內務府大臣貴寶文錫職。又斥革太監張得喜等。

清史綱要

卷十三

光緒元年乙亥。正月辛丑。以英桂沈桂芬協辦大學士。

內閣侍讀學士廣安奏請飭廷臣會議。將嗣皇帝生有皇子卽承繼大行皇帝爲嗣。頒立鐵券。奉旨申飭。戊午。帝行卽位禮於太和殿。

二月。盛京將軍都興阿卒。予諡清愨。

戊子。嘉順皇后崩。后爲尙書崇綺女。端莊謹默。動必以禮。正位中宮後。不得寵於慈禧皇太后。穆宗崩。慈禧皇太后訓責備至。后本已慟極。誓以身殉。遂不復食。至是崩。距穆宗之崩未百日也。諡曰孝哲毅皇后。乙丑。命左宗棠爲欽差大臣。督辦新疆軍務。調景廉爲正白旗都統。命來京供職。調金順爲烏魯木齊都統。仍幫辦軍務。

四月壬辰。以沈葆楨爲兩江總督。兼辦理通商事務大臣。

五月壬子。命李瀚章往雲南查辦事件。以翁同爵兼署湖廣總督。

六月己巳。嚴禁廣東闖姓賭局。

以勦匪不力。革吉林將軍奕榕職。發往軍臺。

壬申。盛京將軍崇實奏。官軍平燬大東溝沙河子巨匪宋三好等巢穴。擒斬首要。奉旨獎勵。

八月丁卯。英翰緣事革職。以劉坤一爲兩廣總督。

己巳。派郭嵩燾許鈴身充出使英國大臣。旋改派許鈴身充出使日本國大臣。而以劉錫鴻爲駐英副使。又以何如璋代許鈴身使日本。

九月。越南匪徒黃崇英等滋事。廣西官軍出境會勦。生擒崇英。

十一月。劉嶽昭緣事革職。以劉長佑爲雲貴總督。

以陳蘭彬容閩爲出使美國兼日國祕國大臣。

十二月壬申。太后命翁同龢夏同善授帝讀。並命醇親王奕譞妥爲照料。

丁丑。吳棠卒。予諡勤惠。調李瀚章爲四川總督。

丁亥。命盛京將軍一缺。管理兵刑兩部。兼管奉天府府尹。照各省總督體例加銜。

乙酉。添設臺北府知府等缺。從沈葆楨奏請也。

光緒二年丙子。正月己亥。因出關餉需緊迫。准左宗棠借洋款一千萬兩。

三月丁未。命景廉在軍機大臣上學習行走。

四月丙戌。賜曹鴻勛等三百二十四人進士及第出身有差。

五月乙未。大學士文祥卒。予諡文忠。

六月丁酉。命李鴻章爲全權大臣。卽赴煙臺。與英國使臣威妥瑪會商一切事務。初。英翻譯官馬嘉理。領總理各國事務衙門護照。往緬甸迎印度派來副將柏印等。旣遇。折還雲南。元年正月。行至騰越廳屬蠻允地方被戕。英人指爲由署雲貴總督岑毓英指使。要挾多端。五月。派李瀚章入滇查辦。又派薛煥幫同辦理。旋瀚章等覆奏。謂馬嘉理由緬還滇。中隔野人司土地界。該處向多匪徒。與野人勾結。劫掠行旅。當馬嘉理由滇赴緬時。由地方官妥爲護送。嗣由緬還滇。未經知會地方官。致匪徒伺隙。乘機劫殺。地方官並無調兵阻止。及指使戕害情事。英使威妥瑪與總理衙門王大臣會議。仍堅求將全案人證。提京覆訊。王大臣等不允。遂於四月出京。詔李鴻章俟其到津時。與之互商。旣而威妥瑪至煙臺。未卽南下。詔鴻章赴煙臺與議。

七月辛酉。加上皇太后徽號。

雲南騰越練軍武弁蘇開先踞城叛。提督楊玉科等討平之。

甲申。李鴻章與威妥瑪定約於煙臺。鴻章至煙臺。至威妥瑪處會商。仍堅執事由岑毓英主使。要求將全案人證提京。適俄德美法等國使臣均在煙臺。公論亦以無確實憑據。請提京爲非。威妥瑪始允另議辦法。旋訂定會議條款三端。專款一條。第一端。昭雪滇案。第二端。駐京大臣及各口領事與中國官員往來之禮。及審辦案件交涉事宜。第三端。通商事務。又擬明年派員赴西藏探路。請給護照。列爲專款。卽所稱爲煙臺條約也。旋奉旨允准。滇案遂結。

官軍收復烏魯木齊。新疆北路略定。初。左宗棠奉督辦新疆軍務之命。請以前署陝撫劉典爲幫辦。是年二月。劉典至蘭州。宗棠以甘肅善後事畀之。遂啓行。三月。駐軍肅州。四月。劉錦棠出嘉峪關。閏五月。次巴里坤。進駐古城。時馬人得踞烏魯木齊。白彥虎踞紅廟子。土回馬明踞古牧地。安集延遣纏回助之。六月。錦棠圍古牧。帕夏遣夷目阿托愛率騎來援。錦棠令余虎恩擊敗之。復以開花礮攻城。克之。守兵六千殲焉。師次烏垣。城東安夷土回纏頭皆宵遁。遂收復烏魯木齊。迪化州及王城。王城者。安得璘所築也。錦棠遣諸將分遣至鹽池。阻戈壁而返。於是昌吉呼圖壁瑪納斯北城守兵皆棄城遁。帕夏所遣援兵至達板。亦不敢進。新疆北路略定。惟瑪納斯南城未克。至是。捷聞。劉錦棠等賞世職有差。

八月。定嚴禁栽種鴉粟例。

總理各國事務衙門奏定出使經費。奉旨允行。時因滇案已結。郭嵩燾等將出洋赴任故也。

江蘇等省有邪教紙人剪辦。諭飭地方官查拏懲辦。

九月戊辰。調李瀚章爲湖廣總督。以丁寶楨爲四川總督。

收還英國商人所築上海達吳淞鐵路。初。英人擅築鐵路。沈葆楨等照會領事阻止。不允。由總理各國事務衙門商之威妥瑪。亦不允。詔李鴻章與威妥瑪妥商。乃以二十八萬五千兩買斷。行止聽中國自便。尋以不適用毀之。

金順等攻克瑪納斯南城。

十月癸丑。命李鴻藻景廉在總理各國事務衙門行走。

乙卯。召榮全來京。以金順爲伊犁將軍。英翰署烏魯木齊都統。

十二月戊子。李鴻章沈葆楨奏。請於閩廠前後學堂。選派學生三十名。分赴英法兩國。學習製造駕駛。派遣員李鳳苞洋員日意格爲監督。奉旨允行。

光緒三年丁丑。正月癸亥。命載齡以吏部尚書協辦大學士。

二月壬寅。以訊辦餘杭民人葛品蓮身死一案。始終迴護。革浙江巡撫楊昌濬學政侍郎胡瑞瀾職。

三月癸酉。改派劉錫鴻充出使德國大臣。

官軍克吐魯番。自克瑪納斯南城後。大雪封山。諸軍不能踰嶺而南。帕夏與白彥虎乘暇移達板新城。兩

山間。以大通哈守之。大通哈猶言大總管也。帕夏次子海古拉。日役萬夫。造王府於吐魯番。自守托克遜。令白彥虎馬人得守吐魯番。帕夏居喀喇沙爾。爲中權以策應。至是冰解。劉錦棠自烏垣攻達板。破之。擒其酋愛伊德爾呼里。大小頭目無一脫者。張曜自哈密西進。趨吐魯番。下奇克騰木。攻闢展。劉錦棠遣將會之。進攻吐魯番。敗敵城外。馬人得及纏回萬餘降。遂克吐魯番。滿漢兩城。錦棠至托克遜。海古拉亦遁。三城皆下。

四月。帕夏自殺。自吐魯番既克。南八城門戶洞開。帕夏在庫爾勒。憂懼不知所爲。遂飲藥死。其子海古拉。昇之西行。將達庫車。伯克胡里使使截之半途。殺海古拉。帕夏名阿古柏。自稱畢調勒特汗。有子六人。長。哎哥。卽伯克胡里。次卽海古拉。伯克胡里失寵於其父。旣殺海古拉。保南境而王。夷回推白彥虎守庫爾勒。彥虎自踞開都河西岸。覬入俄羅斯。

五月。賜王仁堪等三百二十九人進士及第出身有差。

六月。山西河南大旱。諭籌辦賑卹。

九月。官軍復新疆南路東四城。劉錦棠等自托克遜進兵。白彥虎先期走庫車。遂復喀喇沙爾。庫爾勒。追至庫車。拔難回十萬人。進薄阿克蘇。守城回日出降。白彥虎走烏什。官軍追敗之。遂復烏什。一月中南疆東四城皆下。

十月。沈桂芬與日斯巴尼亞國使臣伊巴里議訂古巴華工條款十六條成。

光緒四年戊寅。二月乙酉。命王文韶在軍機大臣上學習行走。時李鴻藻丁母憂開缺也。

官軍克復南路西四城。新疆平。東四城既復。伯克胡里踞喀什噶爾。而和闐伯克呢牙斯圖反正。乘隙圍葉爾羌。遙應官軍。伯克胡里引兵擊敗之。遂踞和闐。而喀什噶爾滿漢兵弁守漢城者。使使迓官軍。安酋阿里達什保回城以攻漢城。伯克胡里棄和闐。走英吉沙爾。及三年冬。劉錦棠遣余虎恩等逼喀什噶爾。伯克胡里白彥虎分路遁入俄羅斯。遂克喀什噶爾。錦棠亦收復葉爾羌英吉沙爾。董福祥收復和闐。於是南疆西四城皆下。俘帕夏妻女及其幼子。並金和印父子。誅之。新疆平。至是捷聞。詔晉左宗棠二等侯爵。劉錦棠二等男爵。其餘諸將給獎有差。

四月戊寅。大學士英桂致仕。

五月庚戌。以載齡爲大學士。全慶以刑部尙書協辦大學士。

七月辛未。命王文韶周家楣在總理各國事務衙門行走。

乙亥。命曾紀澤充出使英國法國大臣。李鳳苞充出使德國大臣。

直隸永定河北六工漫口。

十月。安集延酋阿里達什自俄境入寇。糾纏回出奈曼。謀襲喀什噶爾。劉錦棠擊破之於玉都巴什。奈曼

回目庫彌什設伏殺阿曾以獻。

十一月庚申。永定河漫口合龍。

光緒五年己卯。正月乙丑。停止捐輸。先將京損局裁撤。各省限於五月悉數截止。

安集延布魯特寇邊。劉錦棠破之於烏帕爾。

三月庚午。葬穆宗毅皇帝孝哲毅皇后於惠陵。

閏三月。主事吳可讀在薊州馬神橋三義廟內仰藥自殺。遺有密疏。請明降懿旨。預定將來大統之歸。略謂同治十三年十二月初五日懿旨。嗣後皇帝生有皇子。即承繼大行皇帝爲嗣。將來大統之歸。未奉有明文。必歸之承繼之子。故請皇太后再行明白降一諭旨。將來大統仍歸承繼大行皇帝嗣子。疏人。皇太后命王大臣等議奏。旋諸臣覆奏。均以繼統似涉建儲。不敢參議。皇太后諭。皇帝將來誕生皇子。自能慎選元良。續承統緒。其繼大統者爲穆宗毅皇帝嗣子。皇帝必能善體此意。所有吳可讀原奏及王大臣等會議摺并諭旨。均另錄一分。存毓慶宮。

日本滅琉球。夷爲沖繩縣。

乙未。命前任福建巡撫丁日昌。以總督銜專駐南洋。會同沈葆楨等籌辦海防。節制沿海水師。旋又命充兼理各國事務大臣。

四月。從丁寶楨奏請。四川鹽務改辦官運商銷。初。寶楨任川督。以川省鹽務積弊甚深。改爲官運商銷。富廠竈戶。以爲不便。捏詞呈控。時尙書恩承侍郎董華查事在川。遂據以入告。諭令寶楨確查具奏。寶楨奏稱。自上年開辦官運局後。本年奏銷核計邊計各額引。已全數銷清。復帶銷積引一萬餘張。所收稅羨截釐及各雜款至一百餘萬兩。商人從前一切無名使費。悉予刪除。民皆食賤。私梟潛蹤。實屬商民皆便。旋恩承等又以弊少利多爭奏。乃命戶部酌核具奏。至是。戶部覆奏。請飭寶楨妥籌辦理。因諭寶楨將官運商銷各事。悉心區畫。慎始圖終。不可動於浮言。亦不可操之過蹙。蓋中旨頗利寶楨變法之溢收。又不欲顯斥阻撓者。故爲調停之詞。

己巳。山東署嶧縣知縣朱永康以誘殺委員高文保。定爲斬監候。先是。朱永康強借商民銀兩。迨控經委員高文保查提管轄門丁永康聽從伊姪朱寶森之言。誘殺文保。並給銀令寶森等逃逸。由尙書廣壽侍郎錢寶廉往訊勘明。至是定罪。

五月癸巳。以崇綺爲熱河都統。時御史孔憲毅奏稱。碩輔不宜遠離。請收回成命。不許。

乙未。命侍郎崇厚充出使俄國大臣。旋又命爲全權大臣。便宜行事。與俄政府議收還伊犁事。

六月。刑部奏議結四川東鄉縣濫殺案。初。四川署東鄉縣孫定揚。議派捐輸。每正銀一兩。加多五百文。人民反抗鬧糧。定揚遽誣爲叛逆。請兵勦洗。提督李有恆等遂妄殺寨民數百。經御史參劾。屢派大員查辦。

至是、經恩承童華往勘訊明。由刑部議定。定揚有恆均斬監候。護理總督文格有痛加勦洗之札。與擬罪輕縱之丁寶楨等。均下部嚴議。

己未。翰林院侍講王先謙奏言。路宜防流弊。奉旨嘉納。並諭近來頗有撓越陳奏。逞其私見。率意上陳。必至是非淆亂。漸開攻訐之端。甚至此唱彼和。議論紛騰。亦恐啓黨援之漸。於風俗人心。大有關係。嗣後不得以雷同附和之詞。相率瀆陳。蓋自光緒元年以來。言路如寶廷、張之洞、張佩綸等。遇事敢言。朝廷亦頗嘉納之。至是漸爲政府所厭。故因王先謙之奏。而有是諭。旋御史李端棻、參王先謙爲莠言亂良。朝旨斥其措詞過當。

七月丙子。許朝鮮與各國通商修約。命李鴻章作書告之。

八月壬子。致仕大學士單懋謙卒。予諡文恪。

九月癸巳。命麟書崇禮在總理各國事務衙門行走。

十月。廣西巡撫張樹聲奏擒獲李揚才。初。總兵李揚才。前勦越南土匪有功。旋以未奏留廣西。觖望。上年秋間。在廣東原籍。糾衆萬餘。出關踞越南者巖等處。詔命馮子材統師出關。至是。奏稱於龍登山搜獲揚才。

己巳。致仕大學士英桂卒。予諡文勤。

十一月癸未。兩江總督沈葆楨卒。葆楨初守江西廣信府。與其妻林氏乞援卻敵。以此名聞天下。超擢巡撫。肅吏治。繩悍將。以籌餉用人。與曾國藩不合。乞假回籍。及督兩江。爲治嚴肅。江南風氣爲之一變。至是以積勞卒。予諡文肅。

甲申。調劉坤一爲兩江總督。以張樹聲爲兩廣總督。

十二月乙卯。前都察院左都御史崇厚革職。擊問。交刑部治罪。崇厚奉使至俄。議收還伊犁事。俄人議以伊犁歸我。而償兵費二百八十萬。割伊犁西界數百里予俄。又割南界數百里。跨天山以隔南八城。并開口岸多處。其他損失權利處尤多。崇厚悉許之。與立約十八條。蓋印畫押。事聞。朝野駭然。廷臣交章論劾。詔撤崇厚歸國。以邵友濂暫署。至是。褫崇厚職。逮問。而令廷臣疆臣會議萬全之策。崇厚旋究爲斬監候。尋因曾紀澤奏請。卽行開釋。

光緒六年庚辰。正月辛未。命曾紀澤充出使俄國大臣。將崇厚所議收還伊犁條約。再行商改。丙子。李鴻藻起復。命仍在軍機大臣上。及總理各國事務衙門行走。

庚寅。命劉錦棠幫辦新疆軍務。

二月己未。沈桂芬景廉與德使巴蘭德續訂條約六款。善後章程九款成。

五月丁丑。賜黃思永等三百十三人進士及第出身有差。

六月甲辰。命李鴻章爲巴西議約全權大臣。

七月壬申。召左宗棠來京。陛見。以劉錦棠署理欽差大臣。張曜署幫辦。楊昌濬護理陝甘總督。

命曾國荃督辦山海關防務事宜。時因俄國議約不易轉圜。且聞有派兵來華封閉遼海。以爲挾制之信。故有是命。並命鮑超募勇駐紮天津山海關兩處適中之地。

庚辰。因軍機大臣辦事遲延。交該衙門議處。

八月。允李鴻章奏請。於陸路設立電線。

九月丙戌。大學士載齡因病乞休。允之。

十月庚戌。大學士寶鋆尙書李鴻藻與美使安吉立等。續修條約四款。又續補修約四款。成。

辛亥。命毛昶熙仍在總理各國事務衙門行走。

甲子。命醇親王奕譞寶鋆管理神機營事務。

十一月。劉銘傳奏請試辦鐵路。先由清江至京一帶興辦。詔李鴻章劉坤一議奏。旋張家驤劉錫鴻等奏阻。遂罷其議。

己巳。以全慶爲大學士。吏部尙書靈桂協辦大學士。

辛未。侍郎長敘護理山西巡撫布政使葆亨。以聖祖忌辰爲兒女嫁娶。交部嚴議。旋均革職。

光緒七年辛巳正月乙丑協辦大學士沈桂芬卒。予諡文定。

己丑。曾紀澤與俄人定約於森彼得堡。紀澤抵俄京。議改崇厚之約。俄人以崇厚爲頭等全權大臣。而紀澤係二等公使。拒不與議。又欲遣其海部尙書到北京議約。駐京俄使亦以去留相要挾。並以兵船游奕中國海面。又增防邊戍卒。嗣經紀澤反覆辨論。往返磋商。始行定議。計改前約者七端。一、歸還伊犁南境。二、喀什噶爾界務。不據崇厚所定之界。三、塔爾巴臺哈界務。照崇厚明誼所定兩界之間。酌中勘定。四、嘉峪關通商。仿照天津辦理。西安漢中兩路及漢口字樣均刪去。五、松花江行船至伯都訥專條廢去。六、添設領事。僅於吐魯番添設一員。餘俟商務興旺時。再議添設。七、天山南北路貿易納稅事。改均不納稅。爲暫不納稅。此外添償盧布四百萬圓。奏入。奉旨允准。收還伊犁事遂結。旋紀澤奏稱。此次俄人輕棄已得之權利。全由俄土戰後。財殫力竭。其君臣雅不欲再啓釁端。故得從容商改。和平了結。若議者以爲俄強大之國。尙不難遣一介之使。取已成之約而更改之。執此以例其餘。則中外交涉。更無難了之事。斯言一介。將來必有承其弊者。

壬辰。命大學士左宗棠在軍機大臣上行走。並在總理各國事務衙門行走。

二月癸巳。以曾國荃爲陝甘總督。

甲午。諭總理各國事務衙門。再向日本使臣妥商球案。先是光緒五年。日本夷琉球爲沖繩縣。吾國與爭。

不理。美前總統格蘭德從中排解。有割島分隸之說。日人又以前與吾國所訂約章。無一體均霑之條。與各西國獨異。欲援照加入。而以琉球南島歸吾。時中外大臣以俄事未結。南島枯瘠。議暫緩與議。今俄事已結。詔以劃分兩島於存球祀一層。未臻妥善。命與日使議結。旋日使突戶璣悻悻而去。命沿海各省嚴行戒備。

三月壬申。慈安皇太后崩。太后咸豐初年正位中宮。文宗好游宴。嘗婉言規諫。及垂簾聽政。召見大臣。呐呐如無語。悉以權讓慈禧太后。晚年尤謙讓未遑。事無鉅細。必待慈禧裁決。或委樞府主持。蓋益務韜晦云。年四十有五。諡曰孝貞顯皇后。

命黎庶昌充出使日本國大臣。又命駐德使臣李鳳苞兼義奧荷三國使事。

四月。恆訓丁寶楨奏勦辦雷波夷務肅清。四川雷波拋阿忽庚札等支夷匪。於上年九月出巢滋擾。經成都將軍恆訓四川總督丁寶楨派總兵李培榮等迭破堅巢。殄除悍黨。至是奏報肅清。已未。命奕訢奕譞會同左宗棠李鴻章等興修畿輔水利。

六月己未。命工部尚書李鴻藻協辦大學士。

七月己丑。以彭玉麟署兩江總督。玉麟疏辭。允之。

命鄭藻如充出使美國大臣。

八月庚午。李鴻章與巴西使臣喀拉多訂立條約十七款成。癸未。實授劉錦棠爲欽差大臣。督辦新疆軍務。張曜幫辦軍務。

曾國荃因病乞休。允之。以譚鍾麟爲陝甘總督。

大學士全慶致仕。

九月乙未。命劉坤一開缺。以左宗棠爲兩江總督。

添設吉林瑋春副都統。

十月癸酉。以靈桂爲大學士。文煜協辦大學士。

癸酉。以寶廷爲禮部右侍郎。寶廷以宗室翰林。遇事敢言。屢有陳奏。多見採擇施行。至是。擢任侍郎。疏辭。

不許。

十一月壬寅。以張之洞爲山西巡撫。之洞在翰林。屢上封奏。遇事敢言。至是。以內閣學士簡任巡撫。

癸卯。安徽巡撫裕祿奏。已革提督李世忠怙惡不悛。兇暴恣肆。命卽正法。

光緒八年壬午。三月戊子。李鴻章賞假往湖北省視母病。以張樹聲署直隸總督。

命陳蘭彬在總理各國事務衙門行走。

李鴻章丁母憂。命改爲署任。穿孝百日後。卽行回任。旋鴻章迭請終制。詔開缺駐紮天津。並署通商大臣。

李瀚章丁母憂。以涂宗瀛爲湖廣總督。

四月己巳。以曾國荃署兩廣總督。

朝鮮與美國立約。命道員馬建忠提督丁汝昌往蒞盟。旋英法二國先後與朝鮮立約。皆由建忠介之。

甲戌。致仕大學士全慶卒。予諡文恪。

五月壬辰。召劉長佑入覲。以岑毓英署雲貴總督。

七月。張樹聲奏誘獲朝鮮大院君李昞。送保定安置。初。朝鮮王李熙。以支派入承正統。其本生父大院君李昞。應攬國權。及王年長。總攬朝綱。王妃閔氏用事。閔族執政。昞應失權怏怏。至是。兵士因缺餉譁變。奉以爲主。借清君側之名。殺大臣及辦外交者數人。並攻日本使館。殺日本人數人。以翦王羽翼。殺王妃。并囚國王。署直隸總督張樹聲聞報。遣提督丁汝昌道員馬建忠往。又遣提督吳長慶率陸軍至漢城。誘昞應至營。送歸天津。捕其黨百餘人置之法。日本亦遣兵至。旋以償金開埠定約而還。昞應至天津。朝命免其治罪。安置保定。旋因國王懇請。於十一年八月釋放歸國。長慶遂率所部留駐朝鮮。

十月庚辰。巴里坤領隊大臣沙克都林札布與俄國分界大臣。在喀城會議。定喀什噶爾東北界約四條。成。

十一月丁亥。王文韶開缺養親。命翁同龢在軍機大臣上行走。先是。太常寺卿周瑞清包攬雲南報銷。有

賄託關說情事。爲御史陳啓泰等揭參。先後派王大臣查辦。有戶部需索賄銀。景廉王文韶均有賂遺鉅萬之風說。文韶在軍機。尤爲言路所指。屢疏乞退。不許。至是以養親去職。雲南報銷案。旋於九年五月結案。周瑞清及御史李郁華戶部主事孫家穆等均發往軍臺。景廉王文韶等以失察交部議處。

戊子。命潘祖蔭在軍機大臣上行走。祖蔭旋於九年正月丁父憂開缺。

十一月癸巳。命張佩綸署理都察院左副都御史。佩綸以敢言稱。至是旋議。不許。

十二月。侍郎寶廷典試福建。途中買妾。自行奏請從重懲責。奉旨交部嚴議。旋議革職。

光緒九年正月甲午。派曾紀澤辦理洋藥稅釐併徵事務。洋藥稅釐併徵。載在煙臺條約。因英使威妥瑪藉詞延宕。懸閣數年。至是英使還國。故命紀澤與英外部商辦。

己亥。命吳廷芬在總理各國事務衙門行走。

四月壬申。劉長佑因病開缺。以岑毓英爲雲貴總督。

賜陳冕等三百八人進士及第。出身有差。

五月壬寅。涂宗瀛因病開缺。以卞寶第署湖廣總督。

六月戊午。命李鴻章署直隸總督。張樹聲還兩廣總督任。曾國荃來京陛見。鴻章疏辭。不許。

山東歷城等處黃河漫溢。

癸亥。諭禁在理教。京城直隸等處有在理教。以戒人吸煙飲酒爲名。御史李璣奏請密拏。故命查禁。七月。越南與法蘭西立新約十三條。初。嘉慶間。越南舊阮王起自南圻。與新阮爭國。假法蘭西兵。以滅新阮。許給酬金。後止付其半。咸豐間。又因殺害教民。與法國構兵。同治元年。始立約講和。割南圻之嘉定邊和定祥。名爲外三省。以畀法人。十二年。又開兵衅。再訂和約。又割永隆安江河仙名爲內三省。以畀法。自是南圻全爲法踞。改嘉定爲西貢。成爲大埠。上年。法人欲實行紅河通商。紅河卽富良江。又名珥江。發源於雲南元江。爲北圻最大之江。有劉永福者。咸豐間聚衆於粵西。號黑旗。爲官軍所逼。走入越。越王招撫。授以三宣副提督。轄宣光興化山西三省。遂於保勝設卡抽稅。越王不能制。聽其自行收稅養兵。法人以爲有礙通商。必須驅除。并因和約內有代出贖匪之條。遂以兵船駛入東京。命河內總督讓故宮與之屯兵。總督不從。法人卽拘留之。是年三月。攻陷河內。九年二月。又攻陷南定。其夏。再陷河陽。其附近之廣安寧平二省。均爲所佔。時劉永福駐山西。屢與法人戰。獲勝。而法人別以兵船攻東京順化河岸礮臺。陷之。適國王阮福時先於六月中病故。養子三人。立其長者。臣民廢之。推立故王之弟福昇。法人逼脅立約。權利盡失。旋福昇仰藥自殺。國人又立福時次養子福膺。年纔十二。受脅未能自振。八月己巳。命彭玉麟往廣東。會同督撫辦理海防。時朝廷以越南久列藩封。暗助劉永福軍餉械。並命雲南巡撫唐炯駐紮山西。廣西巡撫徐延旭駐紮北寧。相機援助。法人因之屢有責言。初命李鴻章往廣東。

督辦越南事宜。節制廣東廣西雲南三省防務。嗣又命在上海。與法使脫利古商辦。脫利古聲言將乘兵船入京。命鴻章還直督任。至是。脫利古又揚言至廣東。故命玉麟赴粵。而命南北洋妥籌防務。

九月庚辰。伊犁參贊大臣升泰等與俄國分界大臣佛里德。在塔城會議。定塔爾巴哈臺界七條成。自會紀澤在俄改約後。兩國各派分界大臣。科布多幫辦大臣額福與俄國大臣撒裴索富。在阿拉克別克河口會議。科布多新界約。亦於八月間竣事。

十一月辛巳。命張佩綸在總理各國事務衙門行走。

致仕大學士載齡卒。予謚文恪。

光緒十年甲申。正月丁亥。左宗棠因病請開總督缺。允之。

乙未。以曾國荃署兩江總督。

三月戊子。命奕訢寶鋆李鴻藻景廉翁同龢均退出軍機處。奕訢開去一切差使。並撤去恩加親王雙俸。寶鋆原品休致。李鴻藻景廉開去一切差使。降二級調用。翁同龢革職留任。奕訢等久居政府。頗委蛇保榮。屢爲言路所攻。至是因法越事急。朝廷將力圖振作。故將軍機大臣全數斥退。而命禮親王世鐸戶部尙書額勒和布。閩敬銘。刑部尙書張之萬。在軍機大臣上行走。工部左侍郎孫毓汶在軍機大臣上學習行走。

己丑。皇太后命軍機處遇有緊要事件。著會同醇親王奕譞商辦。

壬辰。廣西巡撫徐延旭雲南巡撫唐炯均革職逮問。先是延旭奉命出關。自駐諒山。而令提督黃桂蘭道員趙沃守越南之北寧。及法兵來攻。全軍潰退。北寧失守。詔徐延旭黃桂蘭趙沃均拏問。以潘鼎新代爲廣西巡撫。王德榜署廣西提督。桂蘭自殺。唐炯奉命出關。未奉諭旨。率行回省。致官兵退紮。山西失守。至是亦逮問。命岑毓英出關督師。

命奕劻管理總理各國事務衙門事務。周德潤在總理各國事務衙門行走。

己亥。命閻敬銘許庚身在總理各國事務衙門行走。

四月戊子。命許景澄充出使法德等國大臣。

戊午。命通政使吳大澂會辦北洋事宜。內閣學士陳寶琛會辦南洋事宜。翰林院侍講學士張佩綸會辦福建海疆事宜。

辛酉。李鴻章與法國水師總兵福祿諾議訂簡明條款五款於天津。法越一事。自七年以來。曾紀澤與法外部沙美拉古費理等。總理衙門及李鴻章與法使寶海脫利古等。往復辨論。均無成議。自山西北寧失守。法勢益張。越南臣民望風降順。事勢益亟。本年三月。稅務司德璫璘力任調停。詔李鴻章通盤籌劃。酌定辦法。旋授爲全權大臣。至是與福祿諾議訂五款。大略爲不侵犯中國南界。撤還北圻各防營。不索賠

費。不傷礙中國威望體面。其餘詳細節目。俟該國別遣大臣前來會商。

壬申。張樹聲因病請開缺。專治軍事。尤之以張之洞署兩廣總督。

五月甲申。巴里坤領隊大臣沙馬都林札布。與俄國分界大臣。在新瑪爾噶拉會議。喀什噶爾西北界約六條成。

丁亥。以文煜爲大學士。

戊子。以額勒和布。閣敬銘。俱協辦大學士。

己丑。命張蔭桓在總理各國事務衙門學習行走。

辛卯。命中外大臣保薦人才。

丁酉。命中外大臣將職分應辦之事。盡心講求。切實辦理。

己亥。命左宗棠仍在軍機大臣上行走。時宗棠病痊來京。故有是命。並命毋庸常川入直。遇有緊要事件。預備傳問。並命管理神機營事務。

閏五月。命尙書福錕。崑岡。左都御史錫珍。侍郎徐用儀。內閣學士廖壽恆。並在總理各國事務衙門行走。

丁未。賞劉銘傳巡撫銜。督辦臺灣事務。

庚午。授曾國荃爲全權大臣。與法使巴德諾在上海會議詳細條約。並派陳寶琛會辦。初。福祿諾臨行。與

李鴻章言。擬派隊巡查越境。鴻章不以上聞。奉旨申飭。時岑毓英駐保勝。潘鼎新駐諒山。朝命將駐紮北圻各軍調還關內。而法軍旋以巡邊爲名。攻犯諒山。潘鼎新等屢有捷奏。法提督孤拔率兵船來福州馬尾。有占踞地方爲質索賠兵費之說。法使巴德諾逗遛上海。詔國荃前往與議。旋國荃議許給撫卹銀五十萬兩。奉旨申飭。又以巴德諾照會無理已甚。諭一意主戰。

六月。法兵攻陷臺北基隆礮臺。又攻滬尾礮臺。劉銘傳擊卻之。

七月癸卯。法國使臣謝滿祿下旗出京。

乙巳。實授張之洞兩廣總督。

法國海軍攻燬福州馬尾各礮臺。並擊沈兵船多艘。藏燬船廠。初。法提督孤拔率兵船駛入馬尾。及和議決裂。遂開礮轟擊。吾兵船礮臺應戰均敗。法船旋即駛出口外。

己酉。下詔與法國宣戰。

丁巳。命周家楣、吳廷芬、崑岡、周德潤、張蔭桓、陳蘭彬。均無庸在總理各國事務衙門行走。時因法事決裂。言路頗各辦理交涉諸人。故有是命。

辛酉。實授曾國荃兩江總督。

授左宗棠欽差大臣。督辦福建軍務。穆圖善、楊昌濬幫辦軍務。

庚午。命何璟來京。旋革職。以楊昌濬爲閩浙總督。

八月癸酉。命許庚身在軍機大臣上行走。鄧承修在總理各國事務衙門行走。

丙子。實授李鴻章直隸總督。

九月壬子。以劉銘傳爲福建巡撫。仍駐紮臺灣。督辦防務。

甲子。以額勒和布爲大學士。以恩承協辦大學士。

十月壬申。以皇太后五旬萬壽。加恩近支王公。在京大臣。及封疆大臣等有差。

授劉錦棠爲甘肅新疆巡撫。仍以欽差大臣督辦新疆事宜。先是。錦棠與陝甘總督譚鍾麟。奏設新疆郡縣。謂左宗棠初議設新疆總督一員。駐烏魯木齊。新疆巡撫一員。駐阿克蘇。將新疆另爲一省。臣頗不以爲然。新疆與甘肅形同唇齒。若劃爲兩省。以二十餘州縣孤懸絕域。勢難自存。擬仿江蘇建置大略。添設甘肅巡撫一員。以烏魯木齊爲省治。設布政使一員。以鎮迪道加按察使銜。其伊犁將軍。無庸總統全疆。移烏魯木齊提督駐喀什噶爾。舊有之參贊辦事領隊各大臣。酌量裁撤。疏入。下吏部議行。至是。乃設甘肅新疆巡撫暨布政使等缺。以錦棠等爲之。裁撤烏魯木齊都統等缺。

丁酉。致仕大學士文煜卒。予諡文達。

朝鮮金玉均洪英植等作亂。殺其大臣閔台鎬趙寧夏等。召日本兵入宮。吾駐防提督吳兆有等助勤王。

兵殺英植等。護朝鮮王入營。玉均等出奔日本。日本公使竹添進一郎焚使館。走仁川之濟物浦。朝命吳大澂續昌往查辦。旋日本遣井上馨至朝鮮。與其全權大臣議給賠款行成。

十一月乙丑。內閣學士徐致祥奏請罷開鐵路急修河工。詔以其信口詆訐。交部議處。旋部議降三級調用。左中允樊恭煦鴻臚寺卿鄧承修。相繼以因言獲咎。恐中外臣工致生猜測。爲言均交部議處。降級留任。有差。

己巳。允彭玉麟等電奏。弛禁粵省闖姓濟餉。

十二月癸未。定唐炯徐延旭均斬監候。並議處保薦各大臣有差。炯延旭旋於十二年冬赦免。

戊辰。張佩綸何如璋均發往軍臺。馬江敗後。翰林院編修潘炳年等由都察院代奏張佩綸等債事情形。給事中萬培因又奏佩綸等諱敗捏奏濫保徇私各節。詔左宗棠楊昌濬查辦。覆奏請交部議處。朝旨謂情重罰輕。佩綸先以濫保徐延旭等革職。至是。與何如璋均發往軍臺效力贖罪。

總兵吳安康率南洋兵船五艘援臺灣。於浙江海面遇法國兵船。自沈二船。餘退入鎮海口。法船遂攻鎮海口。守礮臺兵擊卻之。

光緒十一年乙酉。正月。諒山失守。法兵進攻鎮南關。自和議破裂。潘鼎新屢有捷奏。至是。法兵猛攻諒山。官兵敗走。提督楊玉科等陣亡。惟滇粵各軍。尙力攻宣光未退。并敗法兵於臨洮。

乙丑。派李鴻章爲全權大臣。與日使商議事務。日本因上年吾駐朝鮮兵援王宮。迎朝王入營。以爲不便。特遣伊藤博文西鄉從道來議朝鮮事。旋立約三條。略謂兩國屯朝鮮兵。各盡撤歸。將來兩國如有派兵至朝鮮事。須互先行文知照。自是吾駐朝鮮兵遂罷歸。

二月戊寅。革潘鼎新王德榜職。以提督蘇元春督辦廣西軍務。李秉衡署廣西巡撫。

馮子材等攻克文淵州。克復諒山。時鎮南關外各軍馮子材蘇元春王孝祺等屢敗法兵。克復諒山。法兵陷澎湖。

壬辰。與法人議和。命越南臺灣等處定期停戰。

乙未。命卞寶第回湖南巡撫任。以裕祿署湖廣總督。

三月丙午。派李鴻章爲全權大臣。與法使辦理詳細條約事務。並派錫珍鄧承修會同商辦。

四月乙未。李鴻章等與法使巴特納在天津會訂越南新約十款成。初由總稅務司英人赫德力請仍照津約。與法人重議詳細條約。於天津簡明條約外。別無要求。至是約成。法兵退出基隆澎湖。不索兵費。法兵永不得過北圻與中國邊界。中國亦不派兵前赴北圻。蓋是時中國兵於諒山獲勝。法人亦多主和。故和議得成。

五月丁未。命李鴻章等籌議大治水師。增拓船廠。

甲戌。曾紀澤與英外部贖訂煙臺條約專條十款成。

癸未。命孫毓汶沈秉成續昌在總理各國事務衙門行走。

召曾紀澤回京。以劉瑞芬充出使英國俄國大臣。

甲申。以張蔭桓充出使美國兼日國比國大臣。

庚寅。准彭玉麟回籍。先是玉麟授兵部尚書。屢辭不許。至是以廣東防務解嚴。乞病回籍。許之。

辛卯。以和局既定。通諭中外。

壬辰。訓飭封疆大吏。如有仍蹈舊習。瞻顧因循者。一經查出。輕則立予罷斥。重則分別治罪。

御史吳岫編修梁鼎芬均交部嚴議。上年吳岫劾閣敬銘目爲漢奸。鼎芬劾李鴻章指爲可殺。至是以其誣謗大臣。加以懲儆。並諭諸臣務當精白乃心。竭誠獻替。

七月辛丑。准左宗棠交卸差使。回籍調理。

丁巳。命周德潤往雲南。鄧承修往廣西。會同督撫。辦理中越勘界事宜。

八月丁丑。命李鴻章爲滇越邊界通商議約全權大臣。

乙酉。大學士左宗棠卒。贈太傅。予謚文襄。宗棠督辦福建軍務。時年七十有三。積勞過久。本已多病。聞命慷慨戒行。冒暑兼程抵閩。晝夜孜孜。以謀援臺。旋聞澎湖被陷。推胸頓足。至廢寢食。痰疾因之而起。至是。

遂卒於閩。

九月庚子。改福建巡撫爲福建臺灣巡撫。駐紮臺灣。福建巡撫事由閩浙總督兼管。

辛丑。命醇親王奕譞總理海軍事務。沿海水師悉歸節制調遣。並命奕劻李鴻章會同辦理。善慶曾紀澤幫同辦理。自和局既定。籌議海防善後事宜。至是定議先從北洋精練水師一支。以爲之倡。此外分年次第興辦。命李鴻章專司其事。而設海軍衙門於京師。

壬寅。大學士靈桂卒。予諡文恭。

十月癸未。命穆圖善爲欽差大臣。會同東三省將軍。辦理練兵事宜。

英滅緬甸。英國由印度派兵進據緬甸。中國以緬甸爲朝貢之邦。命駐英大臣曾紀澤與英外部會商。初議立君存祀。俾守十年一貢之例。不可得。乃議定由英駐緬大員。按期遣使。賫獻儀物。另行派員。先定分界。再籌通商。

十一月癸亥。以恩承閣敬銘爲大學士。福錕張之萬協辦大學士。

丙子。添設福建臺灣布政使。

辛巳。侍郎黃體芳奏請開去李鴻章會辦海軍差使。朝旨謂其迹近亂政。交部議處。旋降二級調用。

光緒十二年丙戌。三月癸丑。賞醇親王奕譞與其福晉坐杏黃轎。

乙卯。李鴻章與法使戈可當等在天津會議越南邊界通商章程十九款成。

五月癸巳。以張曜爲山東巡撫。張曜先以提督改授廣西巡撫。未至任。命挑濟京師護城河。又命查勘山東黃河。至是調山東巡撫。

己亥。四川總督丁寶楨卒。予謚文誠。寶楨任川督。凡有興革。不避嫌怨。復都江堰故隄。還民田數十萬畝。裁減夫馬。民困大蘇。川鹽久敝。叛滇邊黔邊官運法。國家溢收百餘萬。

以劉秉璋爲四川總督。

壬寅。賜趙以炯等三百人進士及第出身有差。

六月。依克唐阿吳大澂與俄員巴拉諾伏等勘定圖們江界牌。

壬申。皇太后諭。自本年冬至大祀圓丘爲始。皇帝親詣行禮。並於明年正月內。舉行親政典禮。醇親王奕譞禮親王世鐸等。累疏請皇帝親政。後太后再行訓政數年。許之。

乙酉。奕劻孫毓汶與英使歐格納會議緬甸條約五款成。

八月丙寅。命續修大清會典。

乙酉。御史朱一新奏遇災修省。預防宦寺流弊。先是四月間。醇親王奕譞巡閱北洋海口。皇太后派總管太監李連英隨往。至是一新因順直水災。奏請修省。並以李連英隨奕譞巡閱。恐蹈唐代監軍覆轍爲言。

奏入。太后怒。以奏中深宮或別有不得已之苦衷一語。命明白回奏。旋命以主事降補。庚子。前湖南提督鮑超卒。予諡武襄。

丙子。命馮子材辦理瓊州客黎各匪。

乙卯。閻敬銘因病請於軍機處。戶部兩項差使開去其一。允開去軍機大臣差使。

十月丙寅。賞還奕訢親王雙俸。寶鋆以大學士致仕。賞食半俸。

戊寅。添設福建臺灣臺北道缺。

十一月丁未。命曾紀澤在總理各國事務衙門行走。

十二月丙戌。命李鴻章派員勘辦黑龍江漠河山地方金鑛。

光緒十三年丁亥。正月癸丑。實授裕祿湖廣總督。

二月丁丑。命各省認真辦理保甲。

庚辰。總理海軍事務衙門奏請興造大沽至天津鐵路。允之。

辛巳。賞唐炯巡撫銜。命督辦雲南礦務。

五月己未。以洪鈞充出使俄德奧和國大臣。劉瑞芬充出使英法義比國大臣。李興銳充出使日本國大臣。興銳因病未行。以黎庶昌代之。

壬戌。奕劻孫毓汶與法使續議界務專約五款。商務專約十款成。

六月。前雲貴總督劉長佑卒。予諡武愼。長佑在官。以廉率下。所得祿賜。以卹戰士。接僚屬雖雜職微弁。必假詞色。統兵三十年。未嘗誅將佐。然諸將亦憚之。無敢犯約。

八月。黃河南岸鄭州下汛十堡河水漫溢。

九月。戊寅。命薛允升李鴻藻往鄭州工次。尋命鴻藻督辦工程。

壬午。允戶部奏請開鄭工捐例。

癸未。命李鶴年署理河東河道總督。已革前河督成孚留工效力。

十月。庚子。奕劻孫毓汶與葡萄牙使議中葡條約五十四款及專款三條成。

十一月。乙卯。命黑龍江將軍定安爲欽差大臣。會同東三省將軍辦理練兵事宜。時穆圖善已病故也。

戊午。帝奉皇太后至醇親王邸第視疾。嗣於壬申及十二月甲申甲辰屢往視疾。

光緒十四年。戊子。正月辛未。添置甘肅新疆伊塔道缺。

癸酉。撤還駐藏大臣文碩。以長庚代之。並命幫辦大臣升泰迅速赴任。初。哲孟雄布魯克巴兩部。均爲西藏藩屬。乾隆間。哲孟雄爲廓爾喀所逼。過藏曲大河。達賴喇嘛將日納宗地方給與管理。及英人由印度窺藏。先收哲布兩部爲保護。藏人懼英之逼。并恨哲部之私結英人。遂欲攘奪哲布兩部之地。於哲部隆

吐地方設立卡房。於是英人麻葛藹有帶兵入藏之說。總理各國事務衙門聞之。與駐京英使定約。停止入藏。而飭令藏人速撤隆吐卡房。文碩徇藏人意。謂地爲藏地。撤無可撤。奉旨斥其迂謬。先行撤還。旋隆吐爲英兵所攻。藏兵自行退還。

二月癸未。以重修清漪園改爲頤和園工程告竣。諭擇於四月初十日奉皇太后臨幸駐蹕。

庚子。帝奉皇太后至醇親王邸視疾。

丁未。譚鍾麟因病乞休。允之。調楊昌濬爲陝甘總督。以卞寶第爲浙閩總督。

四月癸未。先是命江西布政使李嘉樂署陝西布政使。李用清來京另候簡用。因二人經督撫年終密考。均謂其性情褊急故也。至是。大學士閻敬銘奏爭。謂二人爲近時藩司之最。巡撫德馨葉伯英劾去之。行圖自便。奏入。命將原摺擲還。並諭閻敬銘一偏之見。一似經其保薦。不進不止。他人遂不得更置一詞者。蓋二人均以清操先爲敬銘所保也。

六月己亥。皇太后諭明年二月歸政。

七月甲辰。准彭玉麟開兵部尙書缺。仍留巡閱長江水師差使。

丙辰。帝奉皇太后至醇親王邸視疾。

庚申。以吳大澂署河東河道總督。李鶴年成孚均發往軍臺。李鴻藻及河南巡撫倪文蔚均革職留任。鄭

工自上年八月漫口後。口門寬至五百五十餘丈。先後由部撥工需銀九百萬兩。自歲杪開工。至本年夏間。奏報僅餘六占。不日可望合龍。乃六月下旬。西壩捆鑲船失事。阻礙不能進占。以致口門淘刷日深。秋汛已臨。不克堵合。時御史劉綸襄燕起烈多參倪文蔚等糜帑誤工。故有是譴。

甲子。永定河堤工漫口。旋於九月奏報合龍。

丙寅。准大學士閻敬銘開缺。敬銘累疏乞病。不許。至是。乃准其開缺在京調理。

八月。西藏番兵與駐紮捻都納印兵啓釁。藏兵敗退。西藏自隆吐卡房被英兵攻燬後。屢思復仇。印度兵將哲孟雄全部收取。藏兵畏逼。遂相攻擊。藏兵萬餘。全行潰敗。哨利亞東朗熱等隘。同時失去。旋由駐藏大臣升泰派員赴邊。阻止英兵。並自至邊境。與英員保爾會商界務。

十月癸未。皇太后諭。副都統桂祥之女葉赫那拉氏立爲皇后。侍郎長敘之十五歲女他他拉氏封爲瑾嬪。十三歲女他他拉氏封爲珍嬪。

十一月壬戌。以丁汝昌爲北洋海軍提督。林泰曾爲左翼總兵。劉步蟾爲右翼總兵。時北洋海軍已成軍也。

十二月壬辰。太和門災。

丙申。鄭州河工合龍。

丁酉。因太和門災。命停止頤和園工程。

戊戌。命林維源幫辦全臺開墾撫番事宜。

光緒十五年己丑。正月辛丑。以張之萬爲大學士。徐桐協辦大學士。

辛酉。命各省將軍督撫議興辦鐵路事。先是。總理海軍衙門奏請接修天津至通州鐵路。御史余聯沅等奏阻。命海軍衙門會同軍機大臣妥議覆奏。仍執前說。故又命各省將軍督撫各抒所見。迅速覆奏。

丁卯。御史屠仁守奏請皇太后歸政後。外省密摺廷臣封奏。仍書皇太后聖鑒字樣。奏入。斥爲所見乖謬。命開去御史。交部議處。尋革職永不敘用。

癸未。帝行大婚禮。册立葉赫那拉氏爲皇后。

二月己卯。帝親政。

宣示醇親王奕譞豫杜妄論原奏。先是。光緒元年正月初八日。奕譞奏稱。歷代繼統之君。推崇本生父母者。以宋孝宗不改子稱秀王之封爲至當。慮皇帝親政後。僉王倖進。援引治平嘉靖之說。肆其奸邪。豫具封章。請俟親政時宣示天下。俾千秋萬載。勿再更張等語。至是。河東河道總督吳大澂奏請飭下廷臣會議醇親王稱號禮節。奉皇太后懿旨。茲當歸政伊始。吳大澂果有此奏。若不將醇親王原奏及時宣示。則後此邪說競進。妄希議禮梯榮。其患何堪設想。用特明白曉諭。將醇親王原奏發鈔。俾中外臣民知之。

壬辰。以大婚禮成。上皇太后徽號。

以薛福成充出使英法義比四國大臣。

三月丙午。以崔國因充出使美日祕國大臣。

庚申。以歸政禮成。上皇太后徽號。

戊辰。帝奉皇太后幸頤和園。閱視神機營水陸操。

四月庚子。賜張建勳等三百三人進士及第出身有差。

六月丙子。雲南總督岑毓英卒。予諡襄勤。毓英在滇廿餘年。恩信感人深。父老兒童。皆稱我老宮保云。

丁丑。以王文韶爲雲貴總督。

七月甲寅。以裕祿爲盛京將軍。

丙辰。調張之洞爲湖廣總督。以李瀚章爲兩廣總督。

八月甲戌。定興辦蘆溝橋至漢口鐵路。先是各省將軍軍督撫覆奏鐵路事。多偏執成見。及不達時勢之言。惟劉銘傳欲由津沽開至京師。黃彭年欲先辦邊防漕路。而張之洞創議。自蘆溝橋起。徑行河南。達於湖北之漢口鎮。尤爲詳盡。太后命海軍衙門詳細覆議。至是議定。先從兩頭試辦。南由漢口至信陽州。北由蘆溝橋至正定府。派李鴻章張之洞會同海軍衙門妥籌開辦。

癸未。安徽巡撫陳彝奏陳因利局章程。請通飭各省仿行。不許。
十月丁亥。因江浙兩省水災。命辦賑撫。

詹事府左庶子崇文。因參劾大學士張之萬。查無實據。革職。

壬辰。命各省藩臬陳奏事件。

丙辰。命禁革差徭諸弊。

丁巳。命各省將支應善後採辦轉運等局。刪減歸併。勒限三個月。開單奏報。

乙丑。命各省將軍督撫嚴緝盜賊。訪拏訟棍。

光緒十六年庚寅。正月戊辰。帝二旬萬壽。加恩獎敘懿親及中外大臣有差。

二月己丑。駐藏大臣升泰與英國總理印度大臣蘭士丹在孟加臘城會議。藏印條約八款成。升泰至藏邊後。勒令藏兵解散。總理各國事務衙門亦派稅務司赫政往幫同商議。尋英員約升泰至獨脊嶺會議。詔授升泰全權大臣。至印度畫押。至是約成。承認哲孟雄全歸英國管理。并定藏哲分界。以自布坦交界之支莫摯山起。至廓爾喀邊界止。分哲屬梯斯塔及近山南流諸小河。藏屬莫竹及近山北流諸小河。分水流之一帶山頂爲界。其通商游牧事。則再行派員議訂。

閏二月己酉。命張蔭桓在總理各國事務衙門行走。

三月辛未。裁福建船政大臣。以總督兼管。

命劉銘傳幫辦海軍事務。時曾紀澤已病故也。

乙未。或都將軍岐元等奏。瞻對番日與巴宗喇嘛句結野番滋事。派兵破寨擒渠。邊境敕定。

四月壬寅。前兵部尙書彭玉麟卒。予諡剛直。玉麟剛介絕俗。遇部下若布衣昆弟。而紀律極嚴。其巡閱長江水師也。劾罷營哨官百八十二人。江湖肅然。將佐畏之如神。地方有司。亦望風震懾。民間諸不軌之徒。作奸犯科。愆不畏法者。輒和驚曰。彭宮保來。其威望有如此。

賜吳魯等三百二十六人進士及第出身有差。

五月乙亥。以長庚爲伊犁將軍。升泰爲駐藏大臣。

六月。直隸水災。

壬子。永定河堤漫口。

七月壬辰。以許景澄充出使俄國兼德國奧國和國大臣。李經方充出使日本國大臣。

八月乙丑。前陝甘總督楊岳斌卒。予諡勇愨。法越之釁。岳斌奉詔率師入閩。幫辦軍務。由泉州附漁艇渡臺灣。與巡撫劉銘傳籌戰守。和議成還籍。是是卒於家。

九月壬午。御史吳兆泰奏請停止頤和園工程。命交部嚴加議處。

癸未。永定河漫口合龍。

十月丁未。兩江總督曾國荃卒。予諡忠襄。

以劉坤一爲兩江總督。

十一月乙酉。帝幸醇親王邸視疾。

丁酉。醇親王奕譞薨。帝詣邸成服行禮。奉皇太后懿旨。定稱號曰皇帝本生考。諡曰賢。子載灃卽日承襲王爵。載洵晉封不入八分鎮國公。載濤晉封不入八分輔國公。尋定皇帝持服期年。御縞素十一日。輟朝十一日。期年內御便殿時用素服。

光緒十七年辛卯。二月。王文韶奏四川會理州匪徒黃子榮等攻陷雲南富民祿勸二縣城。經官兵收復勦平。

四月辛酉。帝奉皇太后幸頤和園。

安徽蕪湖江蘇丹陽湖北武穴鎮等處教堂。相繼被匪徒焚燬。命各督撫查拏首要各犯。訊明正法。并命出示曉諭居民。勿輕信浮言。妄生事端。

六月戊戌。命查拏哥老會。

七月甲申。山東巡撫張曜卒。予諡勤果。所部嵩武軍。命歸李鴻章節制調遣。

八月癸巳。命奕劻總理海軍事務。定安劉坤一幫辦海軍事務。

己亥。命刊發勸善要言。

致仕大學士寶鋆卒。予謚文靖。

十月。直隸邊外熱河等處金丹道教首楊悅春等作亂。竄擾蒙古。並陷朝陽等州縣。經奉直兩省官軍勦平。

乙亥。命崇禮洪鈞均在總理各國事務衙門行走。

十一月。俄羅斯侵帕米爾。英吉利入哪格爾及坎巨提。帕米爾者在甘肅新疆邊外。距疏勒州約一千四百里。屬布魯特回族。分爲大帕米爾小帕米爾蘇滿等十數區。咸同以來。俄人蠶食哈薩克浩罕各部。以設圖爾給斯坦斜米七河費爾干等省。浸及帕米爾。以通道印度。英人基之。十六年。駐京英使以剖分帕地請。吾政府恐啓俄人之爭。拒不許。至是。俄兵遂侵入帕境。坎巨提在葱嶺東南。一名乾竺。與哪格爾隔水相望。本納貢於吾。又與英人立約。且交通於俄。其地西北通帕米爾。及俄兵侵帕。英人亦入哪格爾及坎巨提。以固印度北境。新疆巡撫陶模與英俄邊吏力爭。並請政府爭之。兩國外外部及駐京公使。旋議以帕地爲三國甌脫。英允而俄不從。久之不得要領。惟坎曾弑父虐民。並侵掠英人。由新撫奏請廢黜。而令其弟率餘民歸部。會英人立之。使仍守職貢。

十二月。貴州巡撫崧蕃奏下江廳苗人滋事。經官軍勦平。

匪首李國珍等在敖罕滋事。分掠東翁牛特各旗。踞烏丹城北大寺。爲直隸官軍勦平。

光緒十八年壬辰。正月庚辰。王文韶奏雲南鎮邊地方新附猺夷滋事。經官軍勦平。

三月。前大學士閻敬銘卒。予諡文介。敬銘在戶部。綜核名實。吏胥畏憚。既授大學士。忽失太后眷。屢忤旨。遭詰責。遂引疾去。

四月。賜劉福姚等三百七十七人進士及第。出身有差。

五月乙酉。卞寶第因病開缺。以譚鍾麟爲閩浙總督。

六月丁酉。以汪鳳藻充出使日本國大臣。

壬寅。派薛福成商辦緬緬界線商務。

閏六月。永定河堤工漫口。旋於九月奏報合龍。

庚辰。大學士恩承卒。予諡文愼。

七月。山東惠民等處堤埝漫溢。旋於九月奏報合龍。

壬子。革山西巡撫阿克達春職。先是。徐致祥參新授山西巡撫阿克達春貪黷。帝責其既有所聞。應卽隨時具奏。御史余聯沅又參阿克達春在安徽藩司任內。劣迹昭著。及不通文理。命劉坤一查辦。尋阿克達

春召見於詢問事件。奏對未明晰。命開缺。至是、劉坤一覆奏。所參皆實。遂革職。戊申。定竊毀電報桿線罪。

八月甲申。以福錕爲大學士。麟書協辦大學士。

十月己巳。諭禁各省州縣濫用非刑。

十二月丙辰。以甲午年爲皇太后六旬萬壽。命禮親王世鐸等爲總辦萬壽慶典王大臣。會同各部辦理。丙子。以楊儒充出使美國兼日國祕國大臣。

光緒十九年癸巳。五月。貴州巡撫崧蕃奏。普安直隸廳妖匪劉燕飛滋事。爲官軍勦平。

六月。永定河堤工漫口。旋於九月奏報合龍。

八月壬子。從出使大臣薛福成奏請。豁免海禁。

七月丙子。四川越嶲營參將何長榮稅務司赫政。與英國政務司保爾。在大吉嶺議定藏印通商交涉游牧條約九款。又續款三條成。

十一月戊子。以龔照瑗充出使英國兼法義比國大臣。

十二月庚戌。許庚身卒。予諡恭慎。

辛亥。命徐用儀在軍機大臣上行走。

光緒二十年甲午。正月辛巳。以皇太后六旬萬壽。晉封妃嬪及宗室外藩王公。並加恩中外文武大臣有差。

乙未。先是。命各省將軍督撫副都統提鎮藩臬內。每省各酌派二三員來京慶祝皇太后萬壽。至是。派出盛京禮部侍郎文興等三十一人。命於十月初一日以前到京。恭候屆期隨同祝嘏。

丁酉。命許振禕會同李鴻章籌辦永定河口。振禕任河東河道總督數年。上年冬。召令來京。命會勘永定河工。至是。奏稱擬疏下游保近險。疏中洪。建減壩。治上游。各條。命分別籌辦。又命覆勘上游情形。尋以商議就緒。命還河督本任。

王文韶奏越南游匪竄擾邊境。攻撲都章等處。經官軍勦退。

駐英大臣薛福成與英外部大臣勞德伯力。續議滇緬條約二十款成。先是。英初滅緬。曾紀澤與英外部議滇緬分界事。英人願以潞江以東地自雲南南界。抵暹羅北界。西濱潞江。東抵瀾滄江下游。屬中國。其間北有南掌國。南有湄人各種。聽中國處置。及紀澤解職。懸閣日久。英人漸不肯踐前言。至是。福成與英外部定約。僅得邊外龍川江中之大洲及蠻秀土司全地。與野人山之昔馬一地。又收還孟連江洪兩土司上邦之權而已。

二月戊午。駐美使臣楊儒與美外部續定華工條約六款成。

己巳諭各部院堂官逐日進署辦事。不准藉口兼差。稍涉因循。

三月己卯。湖南巡撫吳大澂奏設南洲直隸廳。下部議攻之。

庚寅。江西巡撫德馨奏湖南鄱縣會匪鄧世恩等竄入江西。圍攻永寧縣城。爲官軍勦平。

四月甲寅。予大考翰詹一等之編修文廷式等升降有差。

辛未。賜張謇等二百八十一人進士及第出身有差。

王文韶奏雲南永北廳屬匪首丁洪潰等滋擾川滇邊境。爲官軍勦敗。生擒洪潰等。餘匪竄逸。

癸酉。李鴻章校閱海軍畢。覆奏。命交部議敘。本年爲海軍會校之期。命李鴻章定安校閱。並周歷旅順等

處。校閱沿海陸軍及各處臺塢等工事。至是覆奏。盛稱技藝純熟。行陣整齊。及臺塢等工一律堅固。

五月戊寅。朝鮮東學黨作亂。命直隸提督葉志超等馳赴朝鮮之忠清道助勦。東學黨者。創始於崔福成。

刺取儒佛老諸說。起於慶尙道之慈仁縣。蔓延忠清全羅諸道。朝鮮賦重刑苛。民不聊生。黨人乘之。三月。

創亂於全羅道之古阜縣。官兵討之。大敗。遂陷全州。將直搗王京。朝鮮政府大震。因中國駐朝委員袁世

凱。乞援於李鴻章。鴻章奏派志超及總兵聶士成等率兵三營東援。屯牙山。因光緒十一年中日之約有

嗣後中國發兵前往朝鮮必先咨照日本之語。使駐日公使汪鳳藻告日本。日本覆書。不認朝鮮爲中國

藩屬。且亦發重兵入朝京。是時東學黨聞中國兵至。已棄全州遁。中國以朝亂已平。約日本同撤兵。而日

本要改朝鮮內政。中國以內政應歸其自主卻之。

六月。日本兵入朝鮮王宮。幽朝王。使大院君主國事。流閔泳駿等。日本兵既入朝京。使臣大鳥圭介首責朝鮮獨立自主。勿認爲中國藩屬。復以改革內政五事要之。二十一日。圭介遂率兵入宮。殺衛兵。政令無鉅細。皆入日本人筭。時吾駐朝委員袁世凱歸國。始爲戰備。

日本海軍擊沈吾運兵船。高陸於豐島海面。并擄操江運船。駐牙山陸軍亦敗於成歡。時駐牙山兵因孤露無援。移屯公州及成歡。鴻章以和議不成。租英商高陞船載兵兩營。援牙山。爲日人偵知。邀擊於海面。以水雷沈之。日本陸軍亦來犯成歡。駐兵吾兵迎擊。敗退。趨公州。

七月乙亥。與日本宣戰。布告中外。

己亥。命葉志超總統駐紮平壤諸軍。時馬玉崑統毅軍。左寶貴統奉軍。衛汝貴統淮軍之盛軍。豐仲阿統奉天之盛軍。皆由陸路渡鴨綠江。至平壤。葉志超公州之兵。亦繞王京北走達平壤。志超方以成歡之戰。鋪張戰結。遂拜總統之命。

壬寅。命敬信汪鳴鑾在總理各國事務衙門行走。

前甘肅新疆巡撫劉錦棠卒。予諡襄勤。

八月癸丑。從戶部奏請。命各省息借商款。以充軍需。

己未。上皇太后徽號。

日本陸軍攻平壤。吾駐朝各軍敗績。高州鎮總兵左寶貴等死之。平壤爲朝鮮舊京。城垣壯闊。繇延十餘里。吾軍共萬四千餘人。盡屯平壤。諸將日置酒高會。而軍士殘掠。役丁壯。漁婦女。朝民大失望。葉志超庸懦無布置。惟於城內外築壘爲自守計。及日兵來逼。諸將分畫守界。城之北面。左寶貴豐仲阿江自康守之。城之西面。葉志超守之。城之南面。迤西南隅。衛汝貴守之。城之東面。大同江東岸。馬玉崑守之。復以左寶貴部分統聶桂林策應。東南兩面。蓋以東南當敵衝。尤我兵力所注也。其時志超居城中調度。寶貴駐城北山頂。守玄武門。十三日。敵前鋒已抵大同江東岸。十四。十五。二日小戰。時前時卻。十六日。敵分枝猛進。馬玉崑力戰卻之。而玄武門已失守。蓋日兵分四大枝以包平壤。一枝由王京西北而抵平壤東南。此由大道來之敵。馬玉崑禦之於大同江東岸者也。一枝亦由王京西北至黃州。遂渡大同江。分道至江西甌山。以襲平壤西南面。一枝由王京東北。至江東縣渡大同江。以襲平壤北面。一枝由其本國來。自元山登岸。以截平壤西北大道我軍歸路者也。四枝皆期十六日會平壤。而吾軍方墨守城垣。附郭而屯。惟知大同江東岸大道之敵。不虞其分路以議吾後也。十五日。敵踞城北山頂。左寶貴爭之。不能勝。諸將始慮後路將絕。志超欲冒圍北歸。寶貴不從。而自扼玄武門山頂。十六日。敵分道來撲。外重三壘及內重之西一壘先陷。內重牡丹一壘。據全城形勝。吾軍以全力持之。而爲敵礮所專注。寶貴中礮殞。我軍奪氣。敵軍

遂奮玄武門入城。志超乃徧於城上豎白旗。乞緩兵。是夜。志超率諸將棄平壤北走。敵兵要於山隘。槍礮排轟。吾潰兵回旋不得出。死亡甚衆。平壤軍儲糧餉盡委之敵。過安州定州皆棄不守。朝命褫志超職。以宋慶總統諸軍。志超與衛汝貴旋均逮問。

丁汝昌率海軍與日本海軍戰於大東溝口外海面。收結。先是。六月杪。北洋海軍濟遠等艦護高陞運兵船赴牙山。於豐島西北遇日本兵艦。開戰。廣乙受重傷。自焚。閣海岸淺灘。濟遠遁歸威海。時丁汝昌率全軍在威海衛。堵塞口門。爲自守計。朝廷屢令巡弋洋面。汝昌屢報出巡未遇敵艦。而日艦亦時來窺威海。八月十三日。汝昌率全軍抵旅順。朝命以銘軍十二營濟師平壤。自鴨綠江登岸。凡商輪五艘爲運船。海軍全隊十二艘翼之。十七日。抵大東溝。陸軍既登岸。十七日。海軍將歸旅順。已刻。與日本海軍全隊遇。吾戰艦十艘。分五隊。鎮遠定遠兩鐵甲艦爲第一隊。致遠靖遠爲第二隊。經遠來遠爲第三隊。濟遠廣甲爲第四隊。超勇揚威爲第五隊。汝昌居定遠督戰。平遠廣丙開戰後始來會。日本兵船十二艘。海軍中將伊東祐亨爲司令官。既交綏。揚威超勇先中彈火起。超勇卽沈沒。陣漸亂。致遠彈盡。管帶鄧世昌。粵人。素忠勇。以爲敵艦惟吉野速率最大。苟沈之。足以奪敵氣。遂開機向吉野衝突。吉野駛避。而致遠中其魚雷。遂炸沈。世昌死之。濟遠遁。撞傷揚威舵葉。沈之。廣甲亦逃。閣淺沈沒。靖遠經遠來遠不能支。亦駛出陳。敵船來追。經遠亦沈。時敵船萃於鎮定兩艦。定遠受重傷。日暮。敵船懼吾魚雷襲擊。解而南去。我軍亦歸旅順。

二十四日。以臨陣先逃。斬濟遠管帶方伯謙。是役吾軍失船五。存者惟鎮遠。定遠。來遠。靖遠。濟遠。及平遠。廣甲七艘。皆受創甚。已不能軍。

壬戌。以李鴻章未能迅赴戎機。日久無功。命拔去三眼花翎。褫去黃馬褂。日本交涉初起。鴻章力主和議。謀撤牙山兵。未果。袁世凱葉志超請濟師。又不報。至是。海陸軍皆失利。廷議皆咎鴻章。故有是譴。

丙寅。命四川提督宋慶幫辦北洋軍務。

丁卯。命御前侍衛公桂祥統帶馬步各營。至山海關一帶駐紮。

庚午。皇太后命六旬慶辰典禮。仍在宮中舉行。其頤和園受賀事宜。卽行停辦。先是。議定十月初十日。太后萬壽。援康熙乾隆間成例。踵事增華。帝率中外臣工詣萬壽山行慶賀禮。自大內至頤和園。沿途所經。臣民報效點綴景物。建設經壇。今因海陸軍屢敗。故命停辦。

九月甲戌。命恭親王奕訢管理總理各國事務衙門。並添派總理海軍事務。會同辦理軍務。

己亥。九連城及安東縣失守。先是。朝命宋慶率毅軍自旅順。劉盛休率銘軍自大連灣。依克唐阿率鎮邊等軍自黑龍江。皆赴東邊九連城。時平壤諸軍敗歸。渡鴨綠江始止。鴨綠江爲中國與朝鮮界。江以北吾之九連城。與江以南朝之義州。隔水相望。時吾軍駐鴨綠江以北者。宋慶依克唐阿劉盛休合平壤敗歸各軍。約七十餘營。除依克唐阿一軍外。皆乘宋慶節度。九連城南倚鴨綠。東枕鬩河。河東有虎山。爲險塞。

再東至安平河口。踰河爲蘇甸。爲長甸。其九連城以西爲安東縣。再西則大東溝。爲鴨綠江口。宋慶駐九連城。聶士成守虎山。劉盛林守江岸。依克唐阿守安平河口。長甸各隘。豐仲阿、聶桂林守安東諸城邑。二十二日。日本第一軍集義州。二十六日。其枝隊出東路鴨綠上游。從安平河口對岸徒涉而渡。依軍遽潰。奔寬甸。二十七日。其大隊從義州稍東與虎山相值對岸。架浮橋渡江。銘軍先潰。諸軍繼之。宋慶遣軍來爭。敵兵已畢渡。乃退保鳳凰城。二十八日。日人入踞九連城。別遣枝隊陷安東。豐仲阿、聶桂林奔岫巖州。庚子。日本兵由奉天金州花園港登岸。進逼旅順。日本第二軍由海道襲踞金州西之花園港。進抵皮子窩。其他距金州大連灣百餘里。距旅順二百餘里。詔宋慶回援旅順。

壬寅。以榮祿爲步軍統領。時榮祿爲西安將軍。以祝嘏入覲。特命福錕開步軍統領缺。以榮祿代之。十月甲辰。日本兵陷鳳凰城。宋慶旣退保鳳凰城。以爲不可守。以退扼摩天嶺。守遼陽東道。入告。初一日。棄城走。初二日。日本兵遂入踞鳳凰城。初六日。依克唐阿亦棄寬甸北走。

戊申。以畿輔大兵雲集。命恭親王奕訢督辦軍務。奕劻幫辦軍務。翁同龢、李鴻章、榮祿、長麟會同商辦。召劉坤一入覲。調張之洞署兩江總督。譚繼洵署湖廣總督。

己酉。命翁同龢、李鴻藻、剛毅爲軍機大臣。
癸丑。皇太后萬壽。帝率王公百官行慶賀禮。

日本兵陷金州。

甲寅。日本兵陷大連灣。

戊午。命王之春如俄。唁俄皇亞力山德之喪。並賀新皇尼可來第二卽位。

壬戌。命額勒和布張之萬均毋庸在軍機大臣上行走。

甲子。日本兵陷岫巖州。豐伸阿等奔析木城。

乙丑。命劉秉璋開缺。調譚鍾麟爲四川總督。以邊寶泉爲閩浙總督。

丁卯。日本兵陷旅順。日本兵踞大連灣十日。始向旅順。旅順船塢總辦龔照璵及諸將。不爲守禦計。惟艤

漁舟海曲。備逃遁。二十一日。日兵踞南關嶺。二十五日。椅子山。案子山。松樹山等礮臺相繼不守。旅順遂

陷。照璵及將諸雜亂軍中。或逃煙臺。或奔復州。照璵尋拏問。

庚午。聶士成復連山關。初。宋慶回援旅順。以聶士成守摩天嶺。屢卻日兵。至是。收復連山關。

壬申。太后命以瑾妃。珍妃。近來習尙浮華。屢有乞請。均降爲貴人。

十一月庚辰。命恭親王奕訢爲軍機大臣。

辛卯。命祿榮在總理各國事務衙門行走。

庚辰。日本兵陷析木城。辛巳。陷海城。

乙未。日本兵陷復州。

戊戌。命張蔭桓邵友濂往日本議和。先是十月中。蔭桓在天津。與李鴻章議和議事。旋遣稅務司德璀琳。賈鴻章與日本總理大臣伊藤博文書往日本。日本卻之。鴻章乃請派員會議。至是。派蔭桓友濂往。由美國公使爲介。並聘美員福世德助訂和約。

十二月甲辰。命劉坤一爲欽差大臣。關內外防勦各軍。均歸節制。尋又命宋慶吳大澂幫辦軍務。御史安維峻奏參李鴻章。詞連太監李連英。并謂皇太后遇事牽制。何以對祖宗天下。帝以其肆口妄言。恐開離間之端。命革職遣戍。

丙辰。日本兵陷蓋平。

癸亥。衛汝貴伏法。

丁卯。日本兵自山東落鳳岡登陸。陷榮城。逼威海。

庚午。命王文韶充幫辦北洋事務大臣。

辛巳。日本兵陷威海衛。日兵旣踞榮城。吾兵禦之橋頭楓嶺。皆敗。威海南北幫礮臺相繼陷。日兵又旁襲文登寧海。皆陷之。

清史綱要

卷十四

光緒二十一年乙未。正月乙酉。日本兵陷劉公島。海軍全隊被擄。自大東溝海戰後。海軍留旅順修葺。及旅順危。移駐威海。偶出巡弋。西不過登州。東不過成山。十一月杪。鎮遠誤觸礁受傷。管帶總兵林泰曾畏罪自殺。時日本海軍屢來威海口外窺伺。並礮擊登州府城。及其陸軍攻威海。又與之夾攻。威海南幫礮臺既陷。丁汝昌燬北幫各臺。至此陸地惟劉公島尙存。敵以南幫礮臺攻吾澳內諸艦。並以魚雷艇入口狙擊。定遠艦中雷擊沈。來遠威遠靖遠等亦相繼沈。吾魚雷艇十二艘出口遁。全數被擄。島內兵譁躁。旬生路。諸洋員亦請姑許乞降。總兵劉步蟾自殺。汝昌乃與劉公島守將總兵張文宣均仰藥死。營務處道員牛昶炳召諸將及洋員議。作降草。署以海軍提督印。懸白旗詣日本軍降。於是海軍艦隊全數被擄。日本以康濟練船載汝昌諸櫬還煙臺。而縱水陸將士居民西渡。

辛卯。命李鴻章爲頭等全權大臣。與日本商議和約。張蔭桓邵友濂於正月初六抵日本廣島。日本亦令

伊藤博文陸奧宗光爲全權大臣。會蔭桓等議約。及互校敕書。因有請旨之語。伊藤等謂委任之權殊不完全。拒絕會議。送蔭桓等還國。而告美使謂中國誠派有位望大員。畀以全權。仍可隨時開議。意蓋指鴻章也。至是。遂以鴻章爲全權大臣。仍以美員福世德從。而以王文韶署直隸總督。

己亥。吉林將軍恩澤奏伯都訥烏拉屬界教匪孟福山等。造言惑衆。推朱承修爲首。建立統兵元帥等名目。約期謀叛。經官軍勦平。

二月庚戌。日本兵陷營口。初。宋慶依克唐阿長順等屢攻海城不利。時朝廷以淮軍挫衄。欲倚用湘軍。魏光燾陳湜李光久等。皆令募軍北援。吳大澂以湖南巡撫。自請從軍。幫辦劉坤一軍。駐山海關。正月。出關抵田莊臺。所部皆逼海城而軍。二月初。屢次進攻。不利。初四日。敵兵自海城出犯。依克唐阿禦之不利。遂與長順以援遼陽爲名。率兵東去。牛莊勢益孤。敵兵來襲。光久光燾與戰皆敗。遂失守。大澂聞之。自田莊臺夜奔石山站。時宋慶戍營口。聞大澂走。亦棄營口。還田莊臺。乙卯。田莊臺亦不守。自此遼陽錦州聲援梗阻矣。

東邊軍克復寬甸門甸。初。朝廷以畿疆危逼。調岳士成入援。以陳湜代守摩天嶺。時鳳凰城敵兵亦少。故鮮戰事。新授東邊道張錫鑾統定邊軍。逼寬甸。屢戰破敵。遂復寬甸長甸及香爐溝。敵兵阻河爲守。鑿水以東無敵蹤矣。

己巳。日本兵陷澎湖。日本兵船攻澎湖媽祖宮。吾守礮臺兵擊卻之。旋由文良港登陸。守將知府朱上泮等走臺灣。遂失守。

庚午。李鴻章在日本馬關。爲日本人槍傷。鴻章抵日本。以馬關春帆樓爲會議所。日本仍以伊藤博文陸奧宗光爲全權大臣。既互勘敕書。請先停戰。日人要以大沽天津山海關爲質。消不諧。遂請暫緩停戰。先議和款。二十八日。鴻章自會所歸。途次爲小山豐太郎槍彈傷額。創甚。驚問播歐美。議甚沸。日人懼。乃允奉天直隸山東停戰。以二十五日爲限。凡訂約六款。

三月癸巳。李瀚章開缺。調譚鍾麟爲兩廣總督。以鹿傳霖爲四川總督。

甲午。李鴻章與日本全權大臣伊藤博文等在馬關議定和約十一款。另約三款。日本既允停戰。初七日。博文等以締和條款出示鴻章。限四日議覆。其最要者一、朝鮮自主。二、奉天南邊各地臺灣澎湖各島。均割隸日本。三、賠兵費庫平銀三百兆兩。其他尙有添開口岸七處。及要減子口半稅爲值百抽二。並將一切稅鈔豁除。及機器進口改造土貨等。十五日。鴻章覆文。允割奉天之安東寬甸鳳凰城巖岫及澎湖列島。賠庫平銀一萬萬兩。通商權利。一如各國成約。時鴻章創已愈。十六日。博文面交末次約稿。謂此次但允不允兩言而決。其稿視初次所擬。於割地內減去寬甸。而賠款減至二萬萬兩。要減子口稅及內地釐稅亦刪去。經數次會議辯論。日人堅不肯讓。僅減小節目數處。二十一日。遂定議。二十三日。互簽約稿。展

停戰期二十一日。約於煙臺互換。鴻章乃歸天津。方鴻章之未東渡也。朝命三品以上官議和戰。迨割地賠款議定。朝野憂忿。臺灣臣民爭尤力。中外封章電奏阻款議。凡百十上。朝意頗爲動。命王文韶劉坤一議決和戰。兩人覆奏頗依違。且奏海嘯成災。和議遂定。

四月。俄法德三國阻日本割吾遼東地。日本遂以遼東各地歸吾。而增索兵費三十萬兩。三國甚日本之攘吾土地也。俄尤怒其據遼東。遂聯合以公文致日本外部抗議。而俄艦及法德艦分泊長崎遼海以示威。日本畏之。遂允以遼東歸吾。時和約尙未批准互換。中國派伍廷芳聯芳爲換約使。十四日。與日使伊東已正治會於煙臺互換。又派李經方爲割臺灣使。與日使樺山資紀換約於日艦中。旣而日本索贖遼東費一萬萬兩。至九月。乃由三國公斷。以三千萬兩償之。十月始撤兵。

乙卯。宣示與日本定約先後辦理緣由。

賜賂成驤等進士及第出身有差。

五月壬申。臺灣官民推唐景崧爲總統。宣告自立。先是。日本釁起。以布政使唐景崧署臺灣巡撫。調提督楊岐珍總兵劉永福渡臺。景崧自任守臺北。以永福守臺南。及割臺之議起。臺人惶懼。主事邱逢甲首建自主議。登臺誓衆於新竹。出示告臺民。遂議立民主。開議院。製國旗。及和議旣定。朝命景崧以下率兵民內渡。時臺人議句各國保護。并議抵押與法國。皆不成。景崧令官弁以五月初四日爲斷。欲去者聽。留者

錄用。於是楊岐珍及道府各員均內渡。初一日。日本艦窺滬尾。初二日。景崧受臺灣總統印。文曰臺灣民主之章。國旗藍地黃虎文長方五幅。虎首內向。尾高首下。設內外部軍部等。初六日。日本兵由基隆北之澳底登陸。十二日。臺北城中兵勇互相殘殺。撫署火起。景崧微服出走。十五日。日本兵來據城。臺北亡。癸酉。允定安開去練兵差使。定安先以東省練兵無成效革職。至是。稱病請開去。暫留差使。允之。並命三省練兵事宜。卽由三省將軍畫分辦理。

戊戌。與法國續議商務專條附章成。

甘肅回民作亂。甘肅河湟等處。漢回雜處。積不相能。回民又有新舊教之分。上年冬。新舊教互鬪。繼乘東方有事。合而抗官。三月。撒拉回破積石關。圍循化城。至是。河州回閔伏英馬永琳相繼揭竿。陷漢民堡寨數十。攻狄道河州城。西寧回韓文秀劉四伏。大通回包良等。各擁衆數萬。四出焚掠。巴燕戎格碾伯各屬均響應。固原提督雷正綰河州鎮總兵湯彥和。旣與回約和。復襲之以弋利。敗於起臺堡。正綰亦被圍於河州。

閏五月甲辰。大學士福錕乞休。允之。

癸丑。命吳大澂開缺。大澂兵敗。詔還湖南巡撫本任。至是命開缺。命中外大臣保薦人材。

乙卯。日本公使林董覲見。

丁卯。命各省將軍督撫。就本省情形。將籌餉練兵恤商惠工各節。妥籌辦法。限一月內覆奏。六月甲戌。孫毓汶請開缺。允之。毓汶與徐用儀在軍機。以主持和議。爲輿論所攻。屢乞病假。至是。尤其開缺。

庚辰。福建古田縣民殺英國教士數人。命嚴拏首要。並諭地方官實力保護教堂。御史鍾德祥以受賊革職遣戍。

乙酉。命徐用儀退出軍機處。並毋庸在總理各國事務衙門行走。

命翁同龢李鴻章在總理各國事務衙門行走。

命錢應溥在軍機大臣上行走。

以麟書爲大學士。崑岡協辦大學士。

庚寅。命閩廣督撫派員赴南洋各島暨新舊金山。招徠僑商。承辦各省船械機器等局。

命喀什噶爾提督董福祥統甘軍赴甘肅。福祥先以祝嘏入京。東事起。統甘軍留防畿輔。至是。命還甘肅。勦辦回亂。

七月丁未。命李鴻章入閣辦事。調王文韶爲直隸總督。以崧蕃爲雲貴總督。

甲寅。楊昌濬雷正綰均下部議。革湯彥和職。時平番回亦變。河西四郡文報不能達於東路。大道亦陷。循化圍雖解。彥和又敗於河州。詔以總督楊昌濬措置乖方。正綰受回愚弄。下部議。均議革職。改爲留任。辛酉。江西巡撫德馨以貪婪荒縱革職。

八月。成都將軍恭壽等奏瞻對番官對堆奪吉等滋事。

己卯。以四川省城本年五月間匪徒打毀教堂。省外各處又疊出教案。革前四川總督劉秉璋職。永不敘用。時各省教案迭起。外人要求懲辦官吏。故有是譴。

丁亥。調魏光燾爲陝西巡撫。旋命帶兵赴甘肅勦辦回亂。

癸巳。調裕祿爲福州將軍。以依克唐阿爲盛京將軍。

九月。日本取臺南府城。初。劉永福以幫辦臺灣軍務。守臺南。臺北既陷。臺南僻在一隅。餉械已涸。不足守。於是鎮道以下及守中路之臺紳邱逢甲林朝棟等。相繼內渡。臺南土匪滋擾。紳士和率之旗後迎永福。並上總統印章。永福不受。仍稱幫辦。入府城議防守。五月以後。日本時以兵船窺安平等口。而陸軍先踞新竹。永福所部及團民拒戰。互有勝負。七月初。彰化失守。至是餉械皆竭。饑軍悉潰。土匪蜂起引敵。臺南府城遂陷。永福登德國商船內渡。臺南亡。癸卯。命吳廷芬在總理各國事務衙門行走。

十月辛未。命楊昌濬開缺回籍。以陶模署陝甘總督。昌濬先已革職。至是命回籍。而以新疆巡撫陶模署理。並命酌帶營旗入關。先清西路。先是甘回有循白彥虎故事。西竄新疆之議。陶模增兵哈密。並派總兵趙有正進駐肅州。提督牛允誠助守安西玉門。時關內回遣人出關煽動。九月。綏來縣回民托昌等謀變。省城回亦謀響應。均卽撲滅。旋署甘肅提督張永清兵敗於水泉堡。乃命趙有正進駐甘州。又命哈密肅州守將扼要守望。使甘回不得偷渡漠北。

甲申。侍郎汪鳴鑾長麟。以上年召對時屢次信口妄言。迹近離間。命均革職永不敘用。是時太后與帝日益猜忌。凡廷朝臣奏對抑揚其詞者。均蒙嚴譴。

丁亥。命胡燏棻督辦津蘆鐵路。

董福祥奏擊敗回匪。河州解圍。詔嘉獎。福祥行抵狄道。進至安定。知回衆均聚洮河兩岸。遂督兵渡河。轟破敵卡。又破三甲集堅卡。十五日。由狄道西山及康家崖兩路進。會於太子寺。回人望風奔潰。河州圍解。於是循化河州狄道三處肅清。斬閔伏英及撒拉回首馬古祿馬永琳等。福祥交部議敘。尋甘肅提督李培榮以援西寧失利革職。以福祥調補。任總統甘軍。

十一月癸丑。命劉坤一張之洞各回兩江湖廣總督本任。

十二月。以明年四月俄皇加冕。派李鴻章爲正使。往賀。

光緒二十二年丙申正月丁巳總理各國事務衙門奏設官書局命孫家鼐管理先是京師官紳設強學書局講求時務經御史楊崇伊奏請封禁族御史胡孚宸奏請將強學書局改歸官辦至是經總理各國事務衙門奏准並派員管理

二月辛未前臺灣巡撫一等男爵劉銘傳卒予諡壯肅

魏光燾解西寧圍斬韓文秀光燾提師抵寧先清東北關遂蕩平北川進攻哆巴并解大通縣之圍壬申設立郵政從總理各國事務衙門奏請也

癸酉駐藏大臣奎煥以行止不檢撤還以文海代之

辛巳翰林院侍讀學士文廷式革職永不敘用驅逐回籍先是廷式以編修大考一等第一超擢學士至是御史楊崇伊參其遇事生風廣集同類議論時政並有與太監文海結爲兄弟情事諭旨亦謂其召見時語多狂妄遂予嚴譴

己丑戶部衙門災

三月戊戌大學士額勒和布致仕

新疆官軍破回黨於北大通營先是正月趙有正攻甘州南四百餘里之俄博永安二城下之乘勝進攻北大通營失利及署總督陶模入關至甘州乃令潘效蘇等由扁都口進攻祁連山南諸堡北大通營者

大通縣西北境也。地險而瘠。回族踞之。屢擾驛道。破民堡。至是。回人棄城聚十大莊堡。無就撫意。效蘇等鏖戰陝甸。盡破各莊堡。

廿回竄青海。西寧回黨由水峽口竄青海。蒙古王公及新疆均告急。詔董福祥魏光燾分兵追勦。尋光燾因與福祥不合。詔還陝撫任。追勦青海之師。亦爲陶模奏罷。

四月戊子。以崑岡爲大學士。榮祿協辦大學士。

五月壬寅。帝生母醇親王福晉赫葉那拉氏薨。

丁巳。因山東曹單一帶刀匪肆擾。命江南山東督撫速卽勦除。

六月。鹿傳霖奏瞻對番官帶兵出巢。越界侵擾。命派員懾以兵威。妥籌進勦。瞻對土司上年與明正土司構兵。近又盤踞章谷土司官寨。不遵川督命令。並糾合朱窩土司及喇嘛寺之衆。抗拒官軍。旋經官軍將朱窩寨及瞻對新寨攻破。其酋仔仲忠扎霸逃歸老寨據守。

壬午。命福州將軍裕祿兼充船政大臣。

永定河堤工漫口。

七月。新疆官軍殲回衆於羅布淖爾。擒劉四伏。西寧回黨既竄青海。狂走不少留。五月。由柴達木犯玉門安西南路。官軍迎擊。大破之。其酋劉四伏以數千騎由色爾騰海向羅布淖爾。餓斃強半。餘衆均降。四伏

亦就擒於渚爾東南之和兒昂。

八日甲子。出使俄國大臣許景澄與華俄道勝銀行訂立東省鐵路公司合同十二條。初李鴻章使俄。與俄訂密約。俄得在東三省境內建築鐵路。並借膠州灣爲軍港。蓋爲索還遼東之報酬也。至是命景澄與訂合同。

戊辰。鹿傳霖奏辦理松潘番滋事一律肅清。予總兵夏毓秀等獎敘有差。

九月丙申。前大學士福錕卒。予諡文愼。

丙午。設立鐵路總公司。以盛宣懷爲督辦。

丁未。允大學士張之萬致仕。

督辦軍務處王大臣與俄國駐京使臣訂新約十二條成。

庚戌。命李鴻章在總理各國事務衙門行走。

十月丙寅。以甘肅回亂肅清。賞董福祥太子少保銜。並騎都尉世職。陶模補授陝甘總督。奎順魏光燾等獎敘有差。

鹿傳霖奏攻克上中下三瞻全境。一律歸順。瞻對土司在裏塘巴塘之旁。爲四川入藏要路。本爲四川轄境。同治初。其酋工布朗結作亂。經西藏助兵勦平。遂以賞給西藏達賴喇嘛。自瞻酋對堆奪吉滋事。傳霖

奏撤其番官。達賴不應。及用兵進討。有達賴派兵援贍之謠。尋駐藏幫辦大臣訥欽徇達賴請。奏易番官赴贍接任。詔從其請。傅霖以贍對既謀叛攻克。亟應收還其地。改土歸流。無須再派番官。奏請撤還。廷議恐達賴不肯甘心。不許。

庚辰。以羅豐祿充出使英國大臣。黃遵憲充出使德國大臣。伍廷芳充出使美國大臣。己丑。以徐桐爲大學士。李鴻藻協辦大學士。

十二月。派許景澄總辦黑龍江吉林交界鐵路公司事宜。

光緒二十三年丁酉。正月甲寅。中英續議緬甸條約十八款成。二十一年五月。與法國訂約。以前與英國所訂緬甸界約所得江洪界內之地與法。以爲索還遼東之報酬。英人聞之不悅。屢有責言。至是始訂約。不再索問。而改劃界線。將玉隆全地劃歸英國。并以那布喀相近三角地一段永租與英國。邊界益蹙。又添開梧州等口岸三處。

二月乙亥。命張蔭桓赴英國賀女皇卽位六十年慶典。

己卯。命崇禮許應駉在總理各國事務衙門行走。

三月甲辰。貝勒載澍忤皇太后旨。命革去貝勒。交宗人府重責八十板。於空室永遠圈禁。丙辰。命呂海寰充出使德國大臣。

五月己亥。鹿傳霖奏德爾格忒小土司昂翁降白仁青母子恣行不義。業經擒獲收禁。老土司頭目人等獻地歸誠。擬改流設官。允之。

甲辰。前大學士張之萬卒。予諡文達。

七月庚寅。協辦大學士李鴻藻卒。鴻藻曾授穆宗讀。因援歷代優崇師傅禮。予諡文正。

丙申。命廖壽恆仍在總理各國事務衙門行走。

癸卯。提督林秀全因召見謝恩時起立不跪。命革職。

八月壬申。命翁同龢以戶部尚書協辦大學士。

九月戊子。命鹿傳霖開缺。以李秉衡爲四川總督。傳霖先以堅持瞻對改流。與朝旨不合。繼又用兵三巖披桑。及將瞻對所併德爾格忒土司改流。將軍恭壽駐藏大臣文海皆奏稱其獨斷獨行。恐有後患。朝旨亦責其辦理不善。命將德爾格忒土司父子釋放。毋庸改流。而奪傳霖職。以恭壽署川督。尋又命將三瞻地方仍給達賴喇嘛。毋庸改土歸流。

庚寅。刑部尚書薛允升以玉田縣買參差徭一案。牽涉其姪薛濟。不知迴避。降調。

十月癸亥。山東曹州鉅野縣天主堂德國教士二人被殺。

乙亥。德國海軍佔吾膠州灣礮臺。德國與俄法同索還遼東地。獨未得利益。至是藉曹州教案。遽佔踞膠

洲灣礮臺。

十一月癸卯。因山東教案。解巡撫李秉衡任。以裕祿爲四川總督。

庚戌。從剛毅徐桐奏請。命戶部及各省將軍督撫籌餉練兵。

十二月丙寅。命董福祥添練甘軍。分紮大慶關平陽府一帶。從督辦軍務大臣奏請也。

戊寅。諭各省地方官實力保護教堂。

庚辰。諭各部院堂官務當常川進署辦事。

光緒二十四年戊戌正月庚寅。設經濟特科。先是、貴州學政嚴修奏請設專科。至是、由總理各國事務衙門會同禮部議。先行特科。次行歲舉。特科約以六事。曰內政、外交、理財、經武、格物、考工。由三品以上京官及督撫學政各舉所知。恣送總理衙門。會同禮部。奏請試以策論。名爲經濟特科。歲舉則每屆鄉試年分。由各省學政調取各學堂書院高等生。送鄉試分場專考。奏人允行。

戊戌。頒發昭信股票。詹事府右中允黃思永奏籌借華款。請造自強股票。命戶部速議。戶部議印造股票一百萬張。名曰昭信股票。以五釐行息。分二十年本利還訖。令京外王公將軍督撫及大小文武官員。均領票繳銀。以爲商民倡。奏入允行。

己酉。命開辦京師大學堂。

癸丑。命嗣後武科改試槍礮。

二月甲子。命廖壽恆在軍機大臣上學習行走。

戊辰。因山東曹州教案。與德國訂膠澳租界條約四款成。條約大意。膠澳租界以九十九年爲期。並得膠濟鐵路建築權。路旁百里內之鑛山。均許其開掘。

三月丙戌。開湖南岳州府福建三都澳兩處爲通商口岸。尋又開直隸秦皇島爲通商口岸。

丁亥。諭各省裁撤各局。又整頓保甲。嚴裁空糧。又勸辦常平社倉。皆從尙書剛毅奏請也。

己丑。與俄人訂旅順大連灣租借條約九款。德人既租膠澳。俄人援例租借旅順大連灣。以爲西伯利亞鐵路通過東三省之尾閘。以二十五年爲期。凡鐵路所經。許俄國派兵保護。朝廷均許之。

閏三月丙辰。大學士麟書卒。予諡文恪。

癸亥。命福州將軍增祺兼充船政大臣。

戊寅。德國親王亨利親見。

四月壬辰。恭親王奕訢卒。予諡曰忠。並命入祀賢良祠。並配饗太廟。

丁酉。許英人於廣東九龍地方關立租界。尋由李鴻章與英使訂立中英展拓香港界址專條。

甲辰。以榮祿爲大學士。剛毅協辦大學士。

命各省府廳州縣將現有之大小書院一律改爲兼習中學西學之學校。以省會爲高等學。郡城爲中等學。州縣爲小學。並命民間祠廟不在祀典者一律改爲學堂。

乙巳。命各省督撫保舉使才。

下詔定國是。宣示中外。是時帝決意變法。故有是詔。

丁未。賜夏同龢等三百四十八人進士及第出身有差。

戊申。翰林院侍讀學士徐致靖保薦工部主事康有爲等。卽召見。旋命有爲在總理各國事務衙門行走。己酉。命王文韶來京。以榮祿署直隸總督。

協辦大學士戶部尙翁同龢罷。時帝發憤變法。稍攬政權。同龢在毓慶宮授帝讀最久。又爲軍機大臣。亦鑒於世變。贊成變法。並薦康有爲才堪大用。爲太后所惡。遂命開缺回籍。

命二品以上大臣謝恩。陛見。並詣皇太后前謝恩。外官一體奏謝。

五月丁巳。以孫家鼐協辦大學士。

命王文韶爲戶部尙書。在軍機大臣上行走。並在總理各國事務衙門行走。實授榮祿直隸總督。命自下科爲始。鄉會試及生童歲科各試向用四書文者。改試策論。

乙丑。與英國訂立租借威海衛專條。自俄借旅順大連。英人亦索租威海。期限亦如俄與旅大。時威海日

兵已將退出。遂轉以予英。

丁卯。派孫家鼐管理大學堂事務。

賞舉人梁啟超六品銜。辦理譯書局事務。

壬申。御史文梯奏言官黨庇誣罔。牽涉御史宋伯魯楊深秀及主事康有爲等。帝斥其難保。不受人唆使。不勝御史之任。命回原衙門行走。

癸酉。命神機等營改練洋操。

乙亥。命裕祿在軍機大臣上行走。

丙子。以奎俊爲四川總督。

因四川川北廳廣西永安州湖北沙市均有教案。申諭各省地方官實力保護教堂。

六月癸未。從張之洞陳寶箴奏請。定鄉會試隨場去取之法。並推行於生童歲科考。又停止朝考。

己丑。命頒發張之洞所著勸學篇於各省。

癸巳。從李端棻奏請。命刪改各衙門則例。

甲子。申諭各省實力舉行保甲。

丁酉。命設鑛務鐵路總局於京師。派王文韶張蔭桓管理。

甲辰。申諭變法不得已之苦衷。命諸臣精白乃心。力除壅蔽。

命康有爲督辦上海官報。從孫家鼐奏請也。時有爲屢有陳奏。爲軍機大臣等所忌。故出之。

七月丙辰。命於京師設立農工商總局。派端方徐建寅吳懋鼎督理。

己未。諭擇於九月中奉皇太后至天津閱兵。

乙丑。命裁撤詹事府通政司光祿寺鴻臚寺太僕寺大理寺衙門。湖北廣東雲南三省巡撫並東河總督。其各省不辦運務之糧道。向無鹽場之鹽道。亦均裁撤。其餘京外應裁文武各缺。命大學士六部各省將軍督撫。分別詳議。以聞。

庚午。禮部尙書懷塔布許應驥侍郎瑛岫徐會灃溥頤曾廣漢。均以阻格主事王照條陳革職。王照以不畏強禦。賞給三品頂戴。以四品京堂候補。

辛未。命內閣候補侍讀楊銳。刑部候補主事劉光第。內閣候補中書林旭。江蘇候補知府譚嗣同。均賞加四品卿銜。在軍機章京上行走。時帝欲變法。而軍機大臣不能輔佐。又無權驟易。故特擢四人。使參預新政事宜。

癸酉。命祿裕在總理各國事務衙門行走。以昭信股票擾民。命卽停止。

命李鴻章敬信均毋庸在總理各國事務衙門行走。因忤德使意。

乙亥。置三四五品卿三四五六品學士各職。從徐致靖奏請也。

戊寅。諭以改行新法之意布告天下。時守舊諸臣謠謗紛紜。故復下此諭。命刊刻謄黃。切實開導。

己卯。命各省藩臬道府。凡有條陳。自行專摺具奏。州縣等官由督撫原封呈遞。士民上書。由本省道府隨時代奏。

八月壬午。命直隸按察使袁世凱開缺。以侍郎候補。專辦練兵事務。

丁亥。帝有疾。皇太后復訓政。自四月以來。京師謠言。皆謂帝病重。然仍日日召見臣工。未嘗有病。及革禮部六堂官。擢四京卿。守舊者愈側目。滿洲大臣及御史楊崇伊等。至天津與榮祿謀。請太后復訓政。甲申。崇伊等至頤和園。上封事於太后。至是。乃下詔稱帝病不能視事。太后復訓政。同日。下詔捕康有爲。有爲先已出京。梁啓超亦出走。

革御史宋伯魯職。永不敘用。

己丑。太后臨朝訓政。置帝於南海之瀛臺。

庚寅。侍郎張蔭桓、徐致靖、御史楊深秀、京卿楊銳、林旭、譚嗣同、劉光第。均下獄。

辛卯。以帝疾。命中外保薦精通醫理之人。先是。內廷徧布帝病重之謠。至是。又有徵醫之命。

命徐用儀在總理各國事務衙門行走。

命詹事府等衙門照常設立。毋庸裁併。又禁止士民上書言事。廢官報局。停止各省改設學校。

甲午。命榮祿在軍機大臣上行走。授裕祿直隸總督。北洋各軍仍歸榮祿節制。以裕祿爲幫辦。太后訓政。

卽召榮祿入京。而以袁世凱護理直督。至是。乃令留京。而仍縮北洋各軍。

殺楊深秀。楊銳。林旭。譚嗣同。劉光第及康有爲之弟康廣仁。深秀等旣下獄。刑部請派大臣會訊。太后命

毋庸訊鞫。卽行處斬。

乙未。命將張蔭桓發往新疆。嚴加管束。徐致靖永遠監禁。

停止九月至天津閱兵。

戊戌。命袁昶在總理各國事務衙門行走。

庚子。革尙書李端棻職。發往新疆。數月來與變法有關係諸臣。已誅逐殆盡。又下詔捕王照等。

以李盛鐸充出使日本大臣。

壬寅。革湖南巡撫陳寶箴職。永不敘用。寶箴在湘。銳意整頓。湘紳守舊者。頗多指摘。六月中。帝特詔褒美。

至是。乃以曾保康梁罷斥。

乙巳。命各項考試仍用四書文試帖經文策問。並停經濟特科。

命禁止報館。嚴擊主筆。

廢農工商總局。

丁未。禁止結會。

命宋慶所部毅軍。董福祥所部甘軍。聶士成所部武毅軍。袁世凱所部新建陸軍。及北洋各軍。均歸榮祿節制。

九月。先是。廣西土匪滋事。擾及梧州鬱林各屬。容縣興業陸川博白等縣均失守。至是督撫奏報一律肅清。

辛酉。邊寶泉卒。以許應駸爲閩浙總督。

戊辰。復設湖北廣東雲南三省巡撫。並河道總督缺。

己巳。命許景澄在總理各國事務衙門行走。

丙子。命胡燏棻在總理各國事務衙門行走。尋又因其辦理鐵路事務較繁。命毋庸行走。

庚辰。命李鴻章往山東。會同河東總督任道鎔。山東巡撫張汝梅。籌議山東黃河工程。

十月丙戌。命張翼督辦直隸全省及熱河鑛務。

辛丑。奪前協辦大學士軍機大臣翁同龢職。並交地方官嚴加管束。時榮祿剛毅等憾同龢不已。遂以甲

午日本之役主戰。主和及密保康有爲爲辭。奪職管束。並奪前湖南巡撫吳大澂職。同龢旋病卒於家。

甲辰。江西廣豐縣副貢生楊恭宸。以投書教堂潛謀不軌。伏法。賞舉發教士劉在鐸三品頂戴。

榮祿奏請分聶士成董福祥宋慶袁世凱所部爲武衛前後左右四軍。另募中軍萬人。許之。旋派喀什噶爾提督張俊爲武衛軍翼長。

乙巳。派胡燏棻督辦天津至鎮江鐵路。以張翼爲幫辦。

十一月庚戌。總理各國事務衙門奏分別鐵路緩急次第。蘆漢粵漢要幹及寧滬蘇浙浦信廣九等近幹要枝。均由總公司盛宣懷承辦。津鎮及山海關內外。責成胡燏棻辦理。太原至柳林。由山西商務局承辦。廣西龍州。由蘇元春承辦。此外已與各國定有成議。及近幹要路地不過百里。款不出百萬。不在停辦之列外。凡華洋各商請辦各枝路。此時概不准行。奏入。允之。

癸丑。命桂春在總理各國事務衙門行走。

甲寅。命趙舒翹聯元在總理各國事務衙門行走。

命啓秀在軍機大臣上行走。

庚午。命裕庚在總理各國事務衙門行走。

辛未。命各直省將軍督撫均兼總理各國事務衙門大臣。

十二月乙酉。新授湖北巡撫曾鈺奏請變通成例。命革職永不敘用。戊戌。開廣西南寧府爲通商口岸。從總理各國事務衙門奏請也。

劉坤一等奏皖北渦陽等處土匪倡亂。經官軍擊散。生擒劉疙疸等。

光緒二十五年己亥。正月壬戌。榮祿等奏請將認領昭信股票銀兩作爲撥效。允之。自慶親王奕劻以下及中外文武大小各官。均獎敘有差。仍諭各省紳商士民認繳之款。照原議按年計利。如期還本。

二月辛巳。以毓賢爲山東巡撫。

山東沂州民教啓衅。德人遣兵踞沂州。尋退出。

三月乙卯。命葉祖珪。薩鎮冰爲海軍統領。

壬申。調增祺爲盛京將軍。

乙亥。王文韶許景澄與俄使議立勘分旅順大連灣租界專條八款成。

四月己丑。命剛毅前往江南一帶查辦事件。時政府急欲籌款練兵。議整頓關稅釐金鹽課等項。以江南地大物博。特派剛毅前往認真辦理。尋江南查辦事畢。又命往廣東籌款。剛毅所至搜括。共得數百萬兩。

五月丁未。以虎神營訓練五年。著有成效。予端郡王載漪等議敘有差。

壬子。命吳廷芬在總理各國事務衙門行走。

甲寅。軍機大臣錢應溥以病免。

六月庚辰。命各直省將軍督撫實力整頓關稅釐金鹽課等項。將現在收數。無論爲公爲私。凡取諸商民者。一併和盤托出。一律澈底清查。裁去陋規中飽之數。酌量提歸公用。限三個月擬定奏報。並命將輪船招商局。電報局。及開平鑛務局。盈餘利息。酌提歸公。

八月壬午。太僕寺卿徐壽朋與朝鮮外部大臣在朝鮮都城訂立通商條約十五款成。

十月戊子。先是。法人助吾索還遼東。僅得滇邊隙地。及德佔膠澳。俄租旅大。遂因廣州附近有法國兵官爲游匪所戕。以兵艦入廣州灣。踞之。至是。命提督蘇元春與法國來使會議廣州灣租界約七條成。租約期限。一如俄之旅大。

丙申。命李鴻章爲商務大臣。前往通商各埠考察商務。

甲辰。命陶模來京陛見。以魏光燾署陝甘總督。

十一月戊申。命毓賢來京。以袁世凱署山東巡撫。

辛酉。命譚鍾麟來京。以李鴻章署兩廣總督。

壬戌。懸賞購拏康有爲梁啓超。

丙寅。命劉坤一來京陛見。以鹿傳霖署兩江總督。

戊辰。協辦大學士孫家鼐以病免。

己巳。以王文韶協辦大學士。

十一月丁酉。立端郡王載漪之子溥儀爲皇子。繼承穆宗毅皇帝爲子。時后黨諸臣。日慙。后廢立。載漪爲太后所信任。使掌虎神營。至是。遂立其子爲皇子。而命崇綺爲師傅。徐桐照料。是時廢立之舉。已喧傳中外。兩江總督劉坤一。致電信於榮祿。頗持異議。上海紳商。經元善等。亦電爭。遂不果。尋命逮捕元善。元善走澳門以免。

光緒二十六年庚子。正月甲辰。以帝三旬壽誕。加恩王公大臣有差。

乙巳。張之洞等奏湖北稅釐鹽課三項無可裁提。請每年由總督以下捐銀報效。奉旨嚴行申飭。

戊午。命南洋閩浙廣東督撫。懸賞十萬兩。緝拏康有爲梁啓超。如有購閱所發報章者。亦一體嚴拏懲辦。

二月庚辰。各國公使夫人覲見皇太后於儀鑾殿。

丙戌。調毓賢爲山西巡撫。實授袁世凱山東巡撫。

四月丁酉。譚鍾麟開缺。實授李鴻章兩廣總督。

五月壬寅。因近畿一帶拳匪滋事。命嚴拏首要。解散脅從。義和拳爲白蓮教遺孽。初起於山東之清平冠縣定陶等處。時毓賢爲山東巡撫。因沂州教案。由駐京各國公使訴諸政府。將其撤任。毓賢憾之。遂貽書朝

貴。謂匪皆義民。且有神技可用。今國勢日衰。由於民志未伸。若再殺拳民。無異自翦羽翼也。載漪剛毅等信之。因欲利用拳匪。排斥外人。地方官希旨。不敢言勦。匪勢益猖。及袁世凱代毓賢爲巡撫。一意主勦。其徒蔓延至直隸京津一帶。設壇建醮。誘惑鄉愚。其法以降神爲主。降神者。謂神附其體。卽精武藝。不畏槍礮。每有人入壇。有所謂大師兄者。爲之焚符誦咒。其宗旨以滅洋仇教爲名。凡洋人及教民。與爲洋人服役通洋語用洋貨者。分別等差。有十毛之目。一落其手。必殺無赦。遂借此舞刀跳躍。劫殺焚掠。又有紅燈照者。皆女子。與之相輔而行。時直隸總督派副將楊福同至涑水勦捕。被戕。匪又燬京津鐵路及車站。外人屢有責言。且將調兵入京。故有嚴拏首要之命。然諭旨仍以良莠錯出。及團民中多有游勇。會匪。漏迹其間。爲辭。蓋終不以團民爲作亂之匪徒也。旋又派剛毅趙舒翹至近畿一帶曉諭。二人覆奏稱已解散。而實已招集入京。於是兵匪相合。圍攻各國公使館。焚掠街市。虐殺官商。朝貴爭相信從。其禍一發不可遏矣。

甲寅。命載漪管理總理各國事務衙門。啓秀溥興那桐均在總理各國事務衙門大臣上行走。廖壽恆毋庸在總理各國事務衙門行走。

乙卯。甘軍戕日本使館書記官杉山彬於永定門外。日本兵將入京保護使館。杉山彬至車站迎候。途遇董福祥所部。遂被戕。

庚申。召巡閱長江水師大臣李秉衡來京。秉衡以教案罷職。命至奉天查辦事件。又命巡閱長江水師。至是。命帶兵入京。行至景州。所部陳澤霖助匪攻燬村落數處。

辛酉。各國聯軍踞大沽礮臺。時政府既助匪仇洋。京津鐵路已燬。英提督西摩爾統各國兵入京。至楊村。被阻折還。北京使館被圍。天津兵匪亦攻租界。各國兵遂奪踞大沽礮臺。

召各省兵入援。

壬戌。召李鴻章來京。以德壽兼署兩廣總督。

甲子。德國駐京公使克林德被戕。克林德將至總理衙門議事。行至東單牌樓。爲一滿兵所戕。

丁卯。下詔與各國宣戰。

命各省招集義和團助戰。

命莊親王載勛爲步軍統領。

戊辰。命載勛剛毅統率義和團。並派左右翼總兵英年載瀾會同辦理。

劉坤一張之洞與各國駐上海領事訂立東南保護約款九條。時有義和團南下及官兵進攻上海租界之謠。外國人於租界多方設備。劉坤一等恐東南再起兵燹。全局益形糜爛。遂不奉中央命令。派盛宣懷及上海道余聯沅與各國領事申明各不相犯。並訂立約章。互相保衛。沿江各省。賴此以安。

六月丙戌。天津失守。自五月中旬後。天津拳匪焚殺教堂教民。攻擊租界。直隸總督裕祿奉拳匪頭目及紅燈照爲上賓。使其禦洋兵。遂兵匪聯合。與租界洋兵相攻。直隸提督聶士成先以勦匪落堡。被嚴旨申飭。至是力戰陣亡。及天津城陷。裕祿退至楊村。

命李鴻章調補直隸總督。

七月甲辰。殺吏部侍郎許景澄。太常寺卿袁昶。昶屢疏請勦拳匪。景澄召對時。亦有不何聽信。妄言致禍。列強之怒之語。爲載漪剛毅等所惡。李秉衡亦奏參二人。擅改電諭。至是遂以大不敬正法。時又殺張蔭桓於戍所。

戊申。命榮祿派兵護送各國公使往天津。自德使被戕後。兵匪聯合。圍攻使館益急。荷奧兩使館及道勝銀行先後被燬。各國兵及教民堅守英日等使館。時李鴻章劉坤一及駐外各公使等屢請保護使館。諭旨亦命派兵保護。並饋蔬果食物。而兵匪仍環攻不已。至是命榮祿派兵護送出京。各國公使不應。癸丑。授李鴻章爲全權大臣。命電商各國。先行停戰。

福建浦城縣土匪滋事。陷浙江江山常山二縣。旋被官軍擊敗。

楊村失守。直隸總督裕祿死之。聯軍踞天津後。屢得北京使館乞援之信。遂大舉分路進攻。先據北倉。馬玉崑禦之楊村。敗退。裕祿受傷死於蔡村。

丙辰。殺尙書徐用儀、立山、內閣學士聯元。時聯軍已逼京師。而匪燄轉熾。凡所欲殺。朝廷無不從之。既殺用儀等。將盡殺不肯附和諸人。會聯軍入京。遂不果行。

丁巳。聯軍至通州。李秉衡死之。秉衡至京。命幫辦武衛軍。至是。所部夏辛酉張春發等軍潰。秉衡自殺。庚申。各國聯軍入京。太后挈帝出奔宣化。京師兵匪久攻使館及教堂未下。而聯軍已至。俄日兵由東直齊化二門先入。英兵亦由水門入使館。遂佔正陽永定兩門。是日黎明。太后挈帝出德勝門。隨行者。惟皇后大阿哥及載漪奕劻等數人。壬戌。至懷來縣。軍機大臣及其他王大臣始有至者。內寅。至宣化。前黑龍江將軍延茂、祭酒王懿榮、熙元、侍讀寶豐、崇壽、翰林院庶吉士壽富等。均於城破時死之。徐桐亦自殺。榮祿崇綺至保定。崇綺卽自殺。

下詔罪己。並宣布將巡幸太原。命部院堂司各官分班速赴行在。又命各督撫整頓邊防。力固疆圉。戊辰。下詔求直言。

庚午。准李鴻章便宜行事。將應辦事宜迅速辦理。

唐才常等謀起兵於湖北。事洩被誅。才常等結合江湖會黨。設自立會。散放富有稟議。起自立軍。未發。於漢口地方被官兵破獲。才常等二十餘人均死。同黨先起兵於安徽之大通湖北之新堤者。亦先後敗死。黨人之在湖南者。多爲巡撫俞廉三捕斬。

八月辛未。太后挈帝自宣化府啓鑾。

命鹿傳霖在軍機大臣上行走。以尙書候補傳霖由江蘇巡撫帶兵勤王甫至近畿。京師已陷。遂赴行在。時剛毅在聞喜病死。以傳霖代爲軍機大臣。

壬申。命奕劻回京。會同李鴻章商辦一切事宜。

命毓賢開缺。以錫良爲山西巡撫。毓賢誘各國教士至撫署。屠殺甚慘。錫良以湖南布政使勤王赴行在。遂代毓賢爲山西巡撫。

調陶模爲兩廣總督。以魏光燾爲陝甘總督。岑春煊爲陝西巡撫。春煊以甘肅布政使率兵勤王。未到京。太后已挈帝出奔。遂率所部扈從。至是授陝撫。

甲戌。太后挈帝至山西大同府。

添派劉坤一張之洞會同商辦和議。尋又派榮祿會同辦理。並准其便宜行事。旋因各國不願接待。榮祿遂赴西安行在。

俄兵佔齊齊哈爾。黑龍江將軍壽山死之初。六月中。海蘭泡俄兵欲假道齊齊哈爾至哈爾濱保護鐵路。將軍壽山不許。既俄兵又虐殺海蘭泡華商數千人。遂與愛琿副都統鳳翔開戰。二十九日。愛琿失守。七月十七日。俄兵佔北大嶺。鳳翔陣亡。八月初四。俄兵至齊齊哈爾。壽山自殺。

丙戌。太后挈帝至太原府駐蹕。

戊子。命於陝西省城酌備駐蹕之所。聯軍既入北京。德國派瓦德西爲統帥。旋俄國首創撤兵。李鴻章等奏陳各國之意。屢請太后回京。不允。至是。定議行幸西安。

閏八月辛丑。懲治縱容拳匪諸臣。莊親王載勛。怡親王溥靜。貝勒載濂。載澐。均革去爵職。端郡王載漪。撤去一切差使。交宗人府嚴議。載瀾。英年。交該衙門嚴議。剛毅。趙舒。翹。交都察院吏部議處。

優卹被戕德國公使克林德。日本書記官杉山彬。

壬寅。命各督撫保薦人材。

乙巳。俄兵佔營口及遼陽。旋入盛京。將軍增祺避至義州。尋命還盛京。時吉林亦爲俄佔。東三省全失。

丙午。聯軍佔山海關。

丁未。太后挈帝自太原啓鑾幸西安。

丙辰。聯軍佔北塘礮臺。

己未。授奕劻爲全權大臣。會同李鴻章妥商和議。劉坤一。張之洞會商辦理。

壬戌。聯軍至保定。殺布政使廷雍等。

乙丑。太后挈帝至潼關駐蹕。

壬申。太后挈帝至西安駐蹕。

庚寅。加重懲治縱庇拳匪諸臣。載漪革爵。與載勛溥靜載澧同交宗人府圈禁。載瀛革爵。載瀾英年降調。趙舒翹革職留任。毓賢革職發往極邊充當苦差。時外人以懲治肇禍諸臣爲太輕。奕劻等屢請加重處分。故復有此旨。

十月丙午。張之洞奏開武昌北門外爲商埠。允之。

庚戌。命董福祥革職留任。帶兵還甘肅。時外人堅索治福祥罪。朝廷因其帶兵。未敢加罪。僅命還甘肅原籍。

壬子。調崧蕃爲陝甘總督。魏光燾爲雲貴總督。

癸丑。以王文韶爲大學士。徐郟崇禮均協辦大學士。

癸亥。以山西陝西災區甚廣。開秦晉實官捐輸。

十一月甲戌。允奕劻李鴻章電奏和議大綱十二條。初。鴻章奉命自廣東北上。既至天津。閏月中。乃入京。時奕劻先已還京。遂與各國公使開議。各國堅請先懲罪魁。並請兩宮先行回京。奕劻等據以電奏。太后雖未允回京。而罪魁已允嚴懲。至是。乃開出大綱十二條。一。戕害德使一事。由中國派親王專使至德。代表皇帝慚悔之意。並於被害處樹立銘誌之碑。二。嚴懲肇禍諸人。其戕害陵虐各國人民之各城鎮。五年

內不得舉行文武各考試。三、戕害日本書記生事。中國必須用優榮之典。以謝日本政府。四、污瀆發掘各國人民墳墓之處。建立碣碑。五、軍火及專爲製造軍火之材料。不准運入中國。六、中國允賠補各國人及爲外國執事之中國人。身家財產所受公私各虧。七、各國常駐兵隊。護衛使館。八、京師至海邊。須留出往來暢行通道。大沽等礮臺一律削平。九、由各國駐兵留守通道。十、張貼永禁軍民人等仇視諸國之諭旨。十一、修改通商行船各約。十二、改變總理各國事務衙門。並各國駐使覲見皇帝禮節。末言以上各款。若非中國國家允從足適各國之意。難許有撤退京畿一帶駐紮兵隊之望。奏入照允。仍命設法磋商詳細節目。

庚辰。授楊儒爲全權大臣。與俄國商辦接收東三省事宜。自聯軍入京。俄國首倡撤兵。而一面佔踞東三省。又屢催訂約交還。由奕劻等電請派駐俄使臣楊儒在俄京商議。時盛京將軍增祺派周冕至旅順與俄擅立奉天交地暫約九條。奉旨責其荒謬。交部嚴議。俄人又藉口中俄有特別關係。欲另訂約章。種種要索。日本合英美力阻。遂從緩商辦。

十二月丁未。下詔變法。

庚戌。諭禁仇視外國官民。並嚴禁各省匪徒藉仇教爲名。糾衆立會。壬子。命張百熙充頭等專使。往英國唁英君之喪。並賀新君卽位。

壬戌。加懲肇禍諸臣。載漪載瀾均發往新疆永遠監禁。載勛賜自盡。毓賢正法。英年趙舒翹斬監候。董福祥革職。剛毅追奪原官。徐桐李秉衡革職撤銷卹典。

開復徐用儀立山許景澄聯元袁昶原官。尋又復張蔭桓原官。

癸亥。降諭宣示拳匪構亂朝廷一切委曲難言之苦衷。並命將五月二十四日以後七月二十日以前諭旨彙呈。將矯擅妄傳各旨提出消除。

光緒二十七年辛丑。正月己巳。歸綏道鄭文欽因戕害洋員周尼思。命正法。並革綏遠城將軍永德職。庚午。加重懲治肇禍諸臣。載漪載瀾定爲斬監候。加恩發往極邊新疆永遠監禁。英年趙舒翹賜令自盡。啓秀徐承煜正法。時啓秀徐承煜在京。爲聯軍拘禁。由奕劻等照會各國交還行刑。

二月癸亥。命劉光才一軍退紮山西境內。聯軍既佔北京。分兵近畿各屬。勦捕拳匪。南至正定。北至張家口。東至山海關。均在聯軍權力範圍以內。亦屢與錫良升允等軍衝突。光才駐紮井陘。聯軍擬由獲鹿進攻。由全權大臣請旨撤退。聯軍仍進攻娘子關。尋卽退去。

三月己巳。設立督辦政務處。派奕劻李鴻章榮祿崑岡王文韶鹿傳霖爲督辦政務大臣。劉坤一張之洞遙爲參預。

丁丑。降諭懲處各省不能實力保護教士教民之地方官。

四月甲辰。命瞿鴻禨在軍機大臣上學習行走。尋又命爲政務處大臣。

丙午。命銷燬各部署案卷。裁汰書吏。案卷已爲聯軍所焚

允各國所索償款四百五十兆兩。四釐息。

壬子。復開經濟特科。

命各省清釐例行文籍。仿照部章。刪繁就簡。各衙門書吏差役。分別裁汰。裁革。不准假以事權。

癸丑。授醇親王載灃爲頭等專使大臣。赴德國。

甲寅。命整頓翰林院。課編檢以上各官以政治之學。

丙辰。以和局已定。諭擇於七月十九日由河南直隸一帶回京。

五月癸酉。命那桐爲專使大臣。往日本。

癸未。以蔡鈞充出使日本大臣。

甲申。命出使大臣訪察游學生。咨送回華。聽候考試錄用。

六月丙申。命許台身充出使朝鮮大臣。廕昌充出使德國大臣。

癸卯。改總理各國事務衙門爲外務部。派奕劻爲總理。王文韶爲會辦大臣。瞿鴻禨爲尙書。並授爲會辦

大臣。徐壽朋聯芳爲左右侍郎。

七月甲子。諭改於八月二十四日啓蹕回京。

乙丑。命直省河運海運。自本年爲始。一律改徵折色。

丙命。命世鐸開去軍機大臣差使。

丙子。命各省綠營防勇限於本年內裁去十之二三。

丁丑。各國公約定議。命奕劻李鴻章卽行畫押。

己卯。命自明年爲始。鄉會試等均試策論。不准用八股文程式。

命停止武生童考試及武科鄉會試。

調羅豐祿爲出使俄國大臣。時楊儒與俄外部議約未成。因病請派員接替。故以豐祿代之。

戊子。全權大臣奕劻李鴻章與十一國駐京公使議訂和約十二款成。

壬辰。命各省籌建武備學堂。

命停止捐納實官。

癸巳。命各省將原有各營嚴行裁汰。精選若干營。分爲常備續備巡警等軍。

八月乙未。命各省所有書院。於省城改設大學堂。各府及直隸州改設中學堂。各州縣改設小學堂。並多設蒙養學堂。

戊戌。命各省選派學生出洋肄業。

壬子。派盛宣懷爲辦理商稅事務大臣。理辦通商行船各條約。及改定進口稅則一切事宜。

癸丑。特頒懿旨。責成中外臣工。將應行變通興革諸事。力任其難。破除積習。以期補救時艱。並將劉坤一、張之洞會奏整頓中法以行西法各條。隨時擇要舉辦。

丁巳。太后挈帝自西安啓鑾回京。

九月壬午。命王文韶、瞿鴻禨督辦關內外京榆鐵路。仍以張翼會辦。

己丑。李鴻章卒。贈太傅。晉封一等侯爵。入祀賢良祠。予諡文忠。尋命於京師建立專祠。予李經述襲爵。命文王韶署理全權大臣。袁世凱署理直隸總督。

十月甲午。太后挈帝至開封府。

丙申。以張德彝充出使英國大臣。

壬子。撤去溥儀大阿哥名號。

丙辰。太后挈帝自開封啓鑾。

戊戌。命明年會試展至癸卯年舉行。順天鄉試及會試。借河南貢院舉行。

丁巳。定學堂選舉鼓勵章程。凡由學堂畢業考取合格者。給予貢生舉人進士等名稱。

庚申。賞奕劻親王雙俸。榮祿王文韶劉坤一張之洞袁世凱等雙眼花翎宮銜有差。因議和及共保東南疆土有功也。

各國聯軍撤出京師。僅留保護使館兵。

十一月乙未。設外務部左右丞左右參議等缺。以瑞良等爲之。

庚寅。太后挈帝還京師。

壬辰。追贈珍妃貴妃位號。上年太后出奔時。命人將珍妃納入井中。至是。以隨扈不及。殉難宮中。宣布十二月癸巳。派張百熙爲管學大臣。

甲午。派王文韶充督辦路礦大臣。瞿鴻禨充會辦大臣。張翼幫同辦理。關內外鐵路改派袁世凱接收督辦。

壬寅。命袁世凱參預政務處。

乙巳。帝御乾清宮。各國使臣覲見。

甲寅。榮祿奏請開去各項重要差使。優詔不許。

授孫家鼐大學士。

乙卯。准滿漢通姻。

光緒二十八年壬寅。正月丁卯。派吳汝綸爲大學堂總教習。

癸酉。四川提督宋慶卒。晉封三等男。予諡忠勤。以馬玉崑總統武衛左軍。

丁丑。派呂海寰會同盛宣懷籌議商約事宜。

派張翼總辦路礦事宜。

戊寅。裁撤河東河道總督缺。

戊子。命將詹事府歸併翰林院。

二月癸巳。命各出使大臣查取各國通行律例。責成袁世凱劉坤一張之洞。慎選熟悉中西律例者。保送

來京。聽候簡派。開館編纂。

三月辛酉。奕劻王文韶與俄國駐京公使雷薩爾議訂交收東三省條約四款成。先是各國公約未定之際。俄人脅增祺及楊儒。議另訂交還東三省條約。要素甚苛。李鴻章將許之。劉坤一張之洞及東南士紳力爭。英日兩國亦以爲言。遂未畫押。至是公約既定。乃與訂約四款。其撤兵期限。畫押後六個月。先撤盛京西南段至遼河。再六個月。撤退盛京其餘各段。並吉林省。再六個月。撤退黑龍江省。

四月丙申。派沈家本伍廷芳。將一切現行律例。按照交涉情形。參酌各國法律。悉心考訂。修定呈覽。候旨頒行。

以善者爲步軍統領。

五月癸亥。實授袁世凱直隸總督。

丙戌。兩廣總督陶模因病乞休。允之。以德壽署兩廣總督。陶模受代後卽卒。予諡勤肅。

六月乙未。以胡維德充出使俄國大臣。

丁酉。以孫寶琦充出使法國大臣。

辛亥。命張之洞充督辦通商大臣。

七月己未。奎俊開缺。以岑春煊署四川總督。時四川資陽等土匪蠭起。焚燬教堂。奎俊不能制。故以春煊代之。尋春煊抵任。整頓吏治。嚴捕匪首。川亂悉平。

庚午。張百熙奏呈所議學堂章程。詔頒行各省。

丁丑。袁世凱奏各國聯軍交還天津。天津自聯軍佔踞後。設立都統衙門。治理地方。至是。世凱蒞任。照約接收。

甲申。命袁世凱督辦津鎮鐵路。先是。派許景澄張翼與德國德華銀行英國匯豐銀行訂立借款草合同。至是。因勘路已竣。改派世凱與議詳細合同。

八月辛卯。呂海寰盛宣懷與英使馬凱在上海續議通商行船條約十六款成。

戊戌。袁世凱奏將各項陋規一律酌改公費。命各省仿照辦理。
丁未。加貽穀理藩院尙書銜。命辦理山西邊外各蒙旗開墾事宜。

戊申。奕劻王文韶與俄使雷薩爾商定交還山海關鐵路條款七條成。

九月辛酉。命各省選擇學生。派往西洋各國講求專門學業。

癸亥。劉坤一卒。追封一等男爵。晉贈太傅。予諡忠誠。

以張之洞署兩江總督。端方署湖廣總督。

盛宣懷與華俄銀行訂立正太鐵路借款合同簽押。

貴州巡撫鄧華熙奏粵邊游匪攻陷興義縣城。

癸酉。命各督撫仿照袁世凱所定警務章程辦理巡警。

壬午。命袁世凱充督辦商務大臣。與張之洞會同辦理。以伍廷芳爲會辦大臣。並會議各國商約事宜。

十月丁亥。派汪大燮爲日本游學生總監督。

十一月戊午。命自明年會試爲始。凡授職修撰、編修、及改庶吉士、用部屬中書者。皆令入京師大學堂分

門肄業。

壬戌。調魏光燾爲兩江總督。以丁振鐸爲雲貴總督。

己巳。命袁世凱等收回電報局爲官辦。旋派袁世凱爲督辦大臣。吳重熹爲駐滬會辦大臣。十二月癸巳。派溥倫爲美國散魯伊斯城博覽會赴會正監督。

光緒二十九年癸卯。正月丁卯。命榮慶會同張百熙管理大學堂事宜。

三月壬戌。許應駸開缺。以錫良爲閩浙總督。

乙丑。命盛宣懷隨同袁世凱等會議商約事宜。

己巳。大學士榮祿卒。贈太傅。追封一等男爵。予諡文忠。

庚午。命緩行印花稅。

命奕劻在軍機大臣上行走。

丙子。調岑春煊署兩廣總督。以錫良署四川總督。李興銳署閩浙總督。德壽爲漕運總督。

庚辰。派奕劻瞿鴻禨會同戶部整頓財政。

命載振袁世凱伍廷芳先訂商律。俟商律編成。卽行開辦商務。

四月甲午。與葡萄牙增改條約九款成。命奕劻畫押。先是。光緒十三年春間。因議辦洋藥稅釐併徵。派稅務司登幹往葡國議立節略四款。其第二款載明允葡國永駐管理澳門。旋葡使來京。意在展拓澳界。經外務部駁阻。遂停議勘界。先增改稅則各條。至是約成。

己酉。雲南箇舊地方人民因阻撓外國人修造鐵路。官軍往捕。遂揭竿起事。推周呈祥爲首。陷臨安府石屏州。聚衆萬餘人。旋派按察使劉春霖等率兵勦平。

庚子。以崇禮爲大學士。敬信協辦大學士。

五月癸亥。命侍郎鐵良會同袁世凱辦理京旗練兵事宜。

戊辰。外務部奏張之洞盛宣懷等所定滬寧鐵路籌借英款訂立詳細合同。請准如所議辦理。允之。

壬午。賜王壽彭等三百十五人進士及第出身有差。

閏五月甲申。命馮子材會同岑春煊辦理廣西軍務。子材尋病卒。予諡忠毅。

丙申。革廣西巡撫王之春提督蘇元春職。廣西匪亂數年。始於沿邊游匪。繼蔓延內地。提督蘇元春邊防各營。與匪鉤聯。根株盤互。元春袒護養癰。及之春爲巡撫。不知整頓吏治。以清亂源。惟一意主撫。以圖早報肅清。至是。爲岑春煊參奏。均奪職。以柯逢時爲廣西巡撫。旋又以蘇元春縱兵殃民。缺額扣餉。拏交刑部治罪。

六月壬戌。予考取經濟特科一等袁嘉穀等九名。二等馮善徵等十八名。升敘有差。

七月乙酉。以效忠守正。賞湖北游學日本學生王璟芳舉人。

辛卯。命鄭孝胥以四品京堂督辦廣西邊防事務。

大學士崑岡因病乞休。允之。

戊戌。設立商部。以載振爲尙書。伍廷芳、陳璧爲侍郎。並裁撤路鑛總局。歸併商部。

八月己巳。商約大臣呂海寰等與美國來使康格等續議通商行船條約十七款成。又與日本來使日置益等議通商行船條約十三款成。

壬申。以敬信爲大學士。裕德協大辦學士。

九月丙申。命王文韶開去會辦外務部大臣。調那桐爲外務部尙書。會辦大臣。

命榮慶爲軍機大臣。並充政務處大臣。

丁酉。命那桐會同奕劻、瞿鴻禨辦理戶部財政處事務。

戊戌。命孫家鼐、張百熙充政務處大臣。

十一月壬午。因開平煤鑛與英人交涉貽誤。革前辦鑛務侍郎張翼職。責令設法收回。

己丑。設立練兵處。命奕劻等管理。以徐世昌充練兵處提調。劉永慶充軍政司正使。段祺瑞充軍令司正使。王士珍充軍學司正使。

丙午。頒布學堂章程。先是。命張之洞會同管學大臣。將學堂章程悉心釐訂。至是。議定進呈。命次第推行。
丁未。改管學大臣爲學務大臣。命孫家鼐充學務大臣。

十二月丙子。因日本與俄羅斯開戰。宣告局外中立。俄人在東三省既不遵約撤兵。本年反增兵重佔奉天等處。日本與交涉不諧。遂開戰。於是東三省爲日俄戰地。吾國僅保遼西。稱中立。頒行商律中之公司律。

光緒三十年甲辰。正月癸未。御史蔣式瑗因奏稱奕劻有存放匯豐銀行私款。命回原衙門行走。日本兵敗俄兵於鴨綠江。佔九連城鳳凰城。

四月。日本兵於奉天之大孤山上陸。佔金州。以困旅順。

五月癸卯。賜劉春霖等二百七十二人進士及第出身有差。

乙巳。裁撤粵海淮安兩關監督。由總督兼管。

六月。日本兵佔大石橋營口牛莊及析木城海城等處。

七月癸未。命鐵良往江蘇等省查勘財政武備事宜。

戊戌。調魏光燾爲閩浙總督。以李興銳署兩江總督。

八月。日本兵敗俄兵於遼陽城外。遂佔遼陽。又敗俄兵於沙河。

九月癸未。大學士敬信因病乞休。允之。

庚子。李興銳卒。以周馥署兩江總督。

壬寅。以唐紹儀爲議約全權大臣。先是十六年。中英訂立藏印條約八款。十九年。復將通商游牧交涉三款。議訂九條。並續款三條。嗣因藏人爭執。久未照行。上年。英員榮赫鵬帶兵入藏。本年六月。至拉薩。達賴喇嘛走庫倫。英人與番衆立約十款。朝廷以西藏爲吾屬地。力阻畫押。派唐紹儀由印入藏查辦。至是。命與英國所派全權大臣。將條約酌量改訂。

十月丁未。以裕德爲大學士。世續協辦大學士。

己酉。商約大臣呂海寰等與葡使白朗毅續定中葡商約二十款成。

十一月庚辰。裁雲南巡撫湖北撫巡兩缺。

辛巳。實授錫良四川總督。魏光燾閩浙總督。丁振鐸雲貴總督。

戊子。以俄國波羅的海艦隊東來。飭沿海各省戒嚴。

十二月壬戌。袁世凱奏請試辦直隸公債票。允之。

丙寅。改漕運總督爲江淮巡撫。先是。署兩江總督端方。奏修撰張謇條陳。請於徐州建立行省。御史周樹模亦請裁漕運總督。均下政務處議。至是。議覆。改漕運總督爲巡撫。仍駐清江。名爲江淮巡撫。江淮揚徐四府暨通海兩直隸州。全歸管理。仍歸兩江總督兼轄。奏入。允行。

俄國旅順守將乞降於日本。日本自與俄國開戰後。海陸軍圍攻旅順。苦戰經年未下。至是。乃以援絕出

降。

光緒三十一年乙巳。正月甲午。魏光燾開缺。以升允爲閩浙總督。

二月。日本兵敗俄兵。佔奉天省城。

三月。駐藏幫辦大臣鳳全爲巴塘番人所戕。先是。瞻對土司改流。秦寧寺喇嘛藉端煽亂。詔鳳全就近勦辦。及爲番人所戕。命提督馬維祺往勦。

丙子。派柯逢時管理八省土膏統捐事宜。先是。鐵良奏稱湖北湖南於宜昌設立總局。抽收土膏稅捐。繼又並江西安徽兩省合辦。較各省分辦之時。溢收甚鉅。兩廣蘇閩亦係雲貴川土行銷之地。若合八省爲一。收數必更可觀。事下財政處及戶部。至是。與各督撫商定。請將宜昌原設之局。改爲八省總局。而派逢時管理。

丁丑。調升允爲陝甘總督。崧蕃爲閩浙總督。

庚寅。裁撤江淮巡撫。改淮揚鎮總兵爲江北提督。江淮分省。江蘇京官爭言其治理不便。事下政務處。至是。奏請裁撤江淮巡撫。設江北提督。允之。以劉永慶爲江北提督。

癸巳。伍廷芳沈家本等奏請將律例內重刑凌遲梟首戮尸三項永遠刪除。凡死刑至斬決而止。允之。四月丙午。以趙爾巽爲盛京將軍。

俄國波羅的海艦隊爲日本海軍殲滅於日本海。

五月己亥。大學士崇禮因病乞休。允之。

庚子。王文韶開去軍機大臣差使。命徐世昌在軍機大臣上學習行走。並充政務處大臣。

辛丑。命鐵良徐世昌會辦練兵事宜。

六月乙巳。命張之洞督辦粵漢鐵路。

甲寅。考試出洋學生。賞金邦平等進士舉人出身有差。自是每歲試留學生以爲常。

丙辰。命載澤戴鴻慈徐世昌端方分赴東西洋各國。考求一切政治。

己未。以世續爲大學士。那柯協辦大學士。

癸亥。裁廣東巡撫缺。

七月乙酉。續派紹英爲出洋考察政治大臣。

丁酉。命鐵良在軍機大臣上學習行走。並充政務處大臣。

壬寅。因各省工商抵制美約。命各督撫認真勸諭。美國定禁止華工苛例。東南各省提倡不用美貨。以爲抵制。美使以爲言。故有是命。

甲辰。停止鄉會試及各省歲科考試。

戊辰。載澤等將出洋考察。至正陽門車站。遇炸彈。載澤紹英均受微傷。遂改期行。己巳。錫良等奏官軍勦平巴塘番匪。獲戕害鳳全之喇嘛阿澤隆本郎吉等斬之。予提督馬維騏道員趙爾豐等獎敘有差。

日本與俄羅斯議和於美國之朴子茅斯成。

外務部與各國使臣改訂修濟黃浦河道條款成。

八月。收還粵漢鐵路合同於美京畫押。

九月庚辰。設巡警部。以徐世昌爲尙書。毓朗趙秉鈞爲侍郎。

派袁世凱鐵良爲秋操閱兵大臣。至河間閱操。

辛卯。以廣西全省肅清。予岑春煊太子少保銜。李經羲丁槐等獎敘有差。春煊自二十九年五月至廣東。卽帶兵赴廣西潯柳督師。時廣西游土各匪四起句合。南泗鎮色柳慶思潯太平恩順等屬。無地不匪。春煊遴選文武。分路勦辦。八月還廣東。旋鎮太泗色思南各路。漸告平靖。先後擒斬匪首黃五肥等數十人。三十年五月。柳州兵變。柳慶土匪又同時蠭起。春煊遣龍濟光王芝祥陸榮廷等分路攻勦。擒斬萬餘人。至是始告肅清。

戊戌。命尙其亨李盛鐸會同載澤戴鴻慈端方前往各國考察政治。徐世昌紹英遇炸彈後不果行。故改

派尙李二人。

德人歸吾膠洲海關。

十月丁未。命奕劻。瞿鴻禨。袁世凱。爲全權大臣。與日本使臣小村壽太郎等開議滿洲條約。日本既與俄和。凡俄國在奉天南部權利。盡讓與日本。故小村來與吾國訂約。

辛酉。命政務處王大臣籌定立憲大綱。

乙丑。以陸徵祥充出使和蘭大臣。兼理海牙平和會事。

戊辰。諭各省嚴禁革命排滿之說。

設考察政治館。

十一月辛未。大學士裕德卒。予諡文愼。

己卯。設立學部。以榮慶爲尙書。熙瑛。嚴修爲侍郎。並以國子監歸併學部。

乙未。奕劻等與日使訂中日新約成。

十二月己酉。崧蕃卒。以端方爲閩浙總督。

辛亥。以那桐爲大學士。榮慶協辦大學士。

光緒三十二年丙午。正月乙酉。賞給軍機處王大臣等養廉銀。

甲午。徐邨休致。以瞿鴻禨協辦大學士。命善耆往蒙古查辦事件。

三月戊寅。從學部奏請。宣示教育宗旨。

癸未。命將綠營一律改爲巡警。從巡警部奏請也。

己丑。江西南昌縣法國教士王安之。邀知縣江召棠至天主堂議事。召棠咽喉被創。旋卒。人民聚衆毀法國教堂。戕王安之等。詔撤巡撫胡廷幹任。派梁敦彥偕法使館人員往查辦。尋以給撫卹賠償銀結案。四月己亥。裁撤各省學政。改設提學使司提學使。頒行破產律。

辛丑。唐紹儀與英使薩道義訂藏印正約成。又命張蔭棠由印赴藏查辦事件。

癸丑。派鐵良充督辦稅務大臣。唐紹儀爲會辦大臣。

七月戊申。宣示預備立憲。命先將官制分別議定。俟數年後規模粗具。再行宣布立憲實行期限。時載澤等考查各國政治回國。條陳仿行憲政。派載灃等公同閱看。決定先從官制等入手預備。故有是詔。己酉。調端方爲兩江總督。以周馥爲閩浙總督。

派載澤等編纂官制。並命端方等派員來京隨同參議。又派奕劻孫家鼐瞿鴻禨總司核定。

戊午。以雲春煊爲雲貴總督。調周馥爲兩廣總督。丁振鐸爲閩浙總督。八月。諭禁鴉片。定限十年以內。將洋土藥之害。一律革除淨盡。

以趙爾豐爲督辦川滇邊務大臣。

九月。陸軍會操於河南彰德府。派鐵良袁世凱爲閱兵大臣。

乙卯。宣示釐定官制。內閣軍機處外務部吏部學部均如舊。巡警部改爲民政部。戶部改爲度支部。以財政處稅務處併入。太常光祿鴻臚三寺併入禮部。兵部改爲陸軍部。以練兵處太僕寺併入。商部改爲農工商部。另設郵傳部。理藩院改爲理藩部。各部除外務部外。均設尙書一員。侍郎二員。不分滿漢。都察院改爲都御史一員。副都御史二員。改大理寺爲大理院。

命編訂直省官制。

以鹿傳霖爲吏部尙書。溥頤爲度支部尙書。溥良爲吏部尙書。鐵良爲陸軍部尙書。戴鴻慈爲法部尙書。張百熙爲郵傳部尙書。壽耆爲理藩部尙書。其民政部尙書徐世昌。學部尙書榮慶。農工商部尙書載振。均不更換。

命鹿傳霖榮慶徐世昌鐵良均開去軍機大臣。專管部務。

命奕劻瞿鴻禨仍爲軍機大臣。世續補授軍機大臣。林紹年在軍機大臣上學習行走。

改政務處爲會議政務處。

丁巳。日本歸吾營口。

十月戊寅。頒行禁煙章程十條。

江西萍鄉會黨起事。官軍勦平之。革命黨先舉事於湖南之瀏陽。萍鄉鑛工應之。旋爲官軍所敗。

袁世凱請開去各項兼差。以第三第五第六鎮陸軍歸陸軍部直轄。允之。

改軍機處章京爲實官。

十一月戊申。升孔子爲大祀。

裁廣東陸路提督缺。歸併水師提督兼轄。

十二年設京師內外城總廳。以榮勳朱啓鈴爲廳丞。

以鳳山總統一三五六四鎮新軍訓練。

光緒三十三年丁未。正月辛亥。調岑春煊爲四川總督。錫良爲雲貴總督。

壬子。丁振鐸開缺。以松壽爲閩浙總督。

二月己卯。張百熙卒。予諡文達。

三月己亥。改盛京將軍爲東三省總督。兼管三省將軍事務。奉天吉林黑龍江各設巡撫。以徐世昌爲東

三省總督。並授爲欽差大臣。唐紹儀爲奉天巡撫。朱家寶署吉林巡撫。段芝貴署黑龍江巡撫。庚子。以那桐兼署民政部尙書。

壬子。以岑春煊爲郵傳部尙書。趙爾巽爲四川總督。

命奕劻管理陸軍部事務。

丙辰。以程德全署理黑龍江巡撫。

丁巳。致仕大學士崑岡卒。予諡文達。

四月乙丑。御史趙啓霖以奏參疆臣夤緣親貴革職。初。奕劻之子貝子銜鎮國將軍尙書載振至東三省查事。還過天津。段芝貴購歌妓楊翠喜以獻。及芝貴署黑龍江巡撫。啓霖據以糾參。派載灃孫家鼐確查。至是。據稱查明楊翠喜實爲商人王益孫買作使女。遂以污讎親貴重臣名節。奪啓霖職。時芝貴已命毋庸署理巡撫。載振旋亦奏請開去各項差使。優詔許之。至六月。復啓霖職。

丁卯。以溥頤爲農工商部尙書。載澤爲度支部尙書。

丁丑。周馥開缺。以岑春煊爲兩廣總督。春煊甫任郵傳部。卽劾罷侍郎朱寶奎。奕劻等以爲不便。適廣東欽廉及饒平會黨起事。遂借此出之。春煊奏辭。不許。

以陳璧爲郵傳部尙書。

五月丁酉。命瞿鴻禨開缺回籍。鴻禨在軍機處。與奕劻不協。學士惲毓鼎參鴻禨暗通報館。授意言官陰結外援。分布黨羽。奏入。命孫家鼐鐵良查明具奏。又詔姑免深究。著開缺回籍。

戊戌。以呂海寰爲外務部尙書。善耆爲民政部尙書。

己亥。命載灃在軍機大臣上學習行走。鹿傳霖爲軍機大臣。陸潤庠爲吏部尙書。

奕劻請開去軍機大臣要差。溫諭慰留。

辛丑。大學士王詔文因病乞休。允之。

以張之洞協辦大學士。

致仕大學士崇禮卒。予諡文恪。

丁巳。改各省按察使爲提法使。增設巡警勸業道。裁撤分巡分守各道。分設審判廳。增易佐治員。命由東三省先行開辦。直隸江蘇兩省亦擇地先爲試辦。其餘各省。分年分地。請旨辦理。統限十五年一律通行。己未。安徽巡撫恩銘爲道員徐錫麟槍斃。錫麟及其黨陳伯平等。均爲官兵所殺。錫麟。浙江紹興人。與同志設光復會。共謀革命。至是在皖舉事不克。其黨秋瑾等在紹興謀起事。亦爲浙吏所殺。

六月辛酉。設禮學館。

壬戌。命嗣後各衙門引見人員。暫歸內閣驗放。

設軍諮府。以馮國璋爲正使。

癸酉。以張之洞爲大學士。仍留湖廣總督任。以鹿傳霖協辦大學士。

七月辛卯。命內外各衙門妥議化除滿漢畛域。

以林紹年爲河南巡撫。

癸巳。岑春煊開缺。以張人駿爲兩廣總督。春煊至滬。稱病請假。至是。將赴任。特旨命開缺。

致仕大學士敬信卒。予諡文恪。

甲午。改考察政治館爲憲政編查館。歸併會議政務處於內閣。

壬寅。派楊士琦往南洋各埠考察華僑。

丙辰。以袁世凱爲外務部尙書。呂海寰爲會辦稅務大臣。

以張之洞袁世凱爲軍機大臣。

調趙爾巽爲湖廣總督。陳夔龍爲四川總督。以楊士驤署直隸總督。

八月辛酉。命汪大燮于式枚達壽分赴英德日本國考察憲政。

辛未。命提督夏辛酉率所部往長江一帶扼要屯紮。

命各省籌畫駐防旗丁生計。

壬申。派溥倫孫家鼐爲資政院總裁。

九月辛卯。命禮部及修訂法律大臣議定滿漢通行禮制刑律。

癸巳。派沈家本俞廉三英瑞充修訂法律大臣。

辛丑。命中外大臣薦舉人才。

命各省速設諮議局。

壬寅。命外務部派員與英人商訂蘇杭甬借款造路章程。

甲辰。命各省設立調查局。各部院設立統計處。

十月乙丑。命孫家鼐等輪班進講經史及國朝掌故。

十一月。廣西鎮南關右輔山礮臺失守。孫文黃興等由越南進攻鎮南關。奪礮臺三座。旋爲官軍擊退。孫文。廣東香山人。始入興中會。潛謀革命。乙未十月。謀起事於廣州。事洩。遁海外。會員陸皓東等死之。旋至倫敦。爲駐英公使龔照瑗所捕。因英政府干涉。乃得釋放。黃興。湖南長沙人。與陳天華宋教仁等創華興會。庚子十月。謀舉事於長沙。事洩。走日本。尋孫文至日本。乃與黃興等合創同盟會。密購軍火。糾合會黨。思於閩廣雲南起事。至是。攻鎮南關。以軍火不繼而敗。復設廣東水陸兩提督缺。

諭禁學生干預政治。

諭禁京師開會演說等事。

十二月丁卯。命提督姜桂題統兵馳赴浙江。辦理勦撫梟匪事宜。時蘇浙兩省紳民力爭鐵路商辦。適蘇浙交界有梟匪滋擾。朝命桂題率兵南下。以資鎮懾。旋報梟匪解散。姜軍不果行。

甲戌。命景星。俞廉三。丁振鐸。曹鴻勳。陸元鼎。協理開辦資政院事務。旋又命寶熙。沈雲沛。爲幫辦。

乙亥。派呂海寰充督辦津浦鐵路大臣。那桐充督辦稅務大臣。

辛巳。派江蘇布政使瑞澂督辦蘇松太杭嘉湖緝捕清鄉事宜。

光緒三十四年戊申正月。廣東緝獲日本輪船二。辰九。私運軍火。日人抗議。旋以賠款服禮結案。

二月庚申。調趙爾巽爲四川總督。陳夔龍爲湖廣總督。

賞趙爾巽尙書銜。作爲駐藏辦事大臣。仍兼邊務大臣。

外務部郵傳部奏請與英國公司議訂滬杭甬鐵路合同二十四條。簽押允之。

三月壬辰。派溥偉。鹿傳霖。景星。丁振鐸。充辦理禁煙大臣。

四月丙辰。綏遠城將軍貽穀。以放墾蒙地。浮收漁利。濫殺台吉。丹丕爾一家五命。逮問。

甲子。頒行違警律。

雲南河口南溪等處失守。革命黨在雲南河口邊界起事。遂佔礮臺。黃興自越南海防至河口。分兵攻蠻耗開化蒙自等處。旋爲官軍所敗。所失各地均收復。

五月。加恩咸豐同治以來功臣子孫有差。

六月丙子。因美國減收賠款。派唐紹儀充專使。前往致謝。

戊寅。頒行諮議局章程及議員選舉章程。

七月庚子。查禁政聞社。

八月甲寅。奕劻等奏進憲法大綱。暨議院法選舉法要領。及議院未開以前逐年應行籌備事宜。命刊刻謄黃。分發在京各衙門。在外各督撫府尹司道。懸掛堂上。責成依限舉辦。每屆六個月。將籌辦成績。臚列奏聞。

癸酉。馬玉崑卒。以姜桂題接充武衛左軍總統。

己卯。因江南湖北陸軍在安徽太湖地方秋操。命蔭昌端方爲閱兵大臣。

九月。派毓朗梁敦彥往廈門勞問美國海軍。

丙申。郵傳部借匯豐匯理兩銀行英金五百萬鎊。爲贖京漢鐵路之用。命郵傳部堂官畫押。

壬寅。達賴喇嘛朝來。達賴避英兵至庫倫。還至西寧。至是來朝。

十月壬戌。加封達賴喇嘛爲誠順贊化西天大善自在佛。

壬申。授醇親王載灃爲攝政王。

命載灃之子溥儀在宮內教養。並在上書房讀書。

癸酉。西刻。帝崩。遺詔以載灃之子溥儀入承大統。爲嗣皇帝。太后命以溥儀承繼穆宗爲嗣。兼承大行皇帝之祧。

以攝政王爲監國。

尊皇太后爲太皇太后。兼祧母后爲皇太后。

甲戌。未刻。太皇太后葉赫那拉氏崩。諡曰孝欽顯皇后。

戊寅。安徽馬礮營兵變。駐安徽馬礮營隊官熊成基乘秋操起事。城中嚴守。不得入。又爲兵艦所攻。遂率衆向西北桐城樅陽等處退走。衆漸潰散。成基後於哈爾濱被捕。死於吉林。

十一月辛卯。嗣皇帝卽位。以明年爲宣統元年。

丁酉。上大行皇帝尊諡曰同天崇運大中至正經文緯武仁孝睿智端儉寬勤景皇帝。廟號德宗。陵曰崇陵。

壬寅。頒行監國攝政王禮節。

丙午。設立變通旗制處。派溥倫載澤等專司其事。

丁未。上皇太后徽號曰隆裕皇太后。

戊申。命奕劻以親王世襲罔替。並加恩王公大臣等有差。

定諭旨由軍機大臣署名之制。

十月甲寅。命載濤毓朗鐵良充專司訓練禁衛軍大臣。時另編禁衛軍。由攝政親統。而派載濤等司訓練。

庚申。致仕大學士王文韶卒。贈太保。予諡文勤。

辛酉。收還京漢鐵路。

頒布調查戶口章程。

壬戌。命袁世凱開缺回籍養病。

命那桐在軍機大臣上學習行走。

癸亥。以梁敦彥署理外務部尚書。

辛未。頒布清理財政章程。

戊寅。頒布城鎮鄉地方自治章程。

宣統元年己酉。正月丁酉。郵傳部尚書陳璧以用款糜費調員冒濫革職。

庚子。以徐世昌爲郵傳部尙書。錫良爲東三省總督。李經羲爲雲貴總督。

庚戌。派善耆載澤鐵良薩鎮冰籌備海軍。鐵良開去訓練禁衛軍差使。

二月乙丑。降諭宣示朝廷一定實行預備立憲。

甲戌。中諭禁煙辦法。

庚辰。頒行清理財政處各項章程。

閏二月甲申。定嗣後丁憂人員。無論滿漢。一律離任守制。

三月丙辰。各國派送德宗景皇帝梓宮專使覲見。

辛酉。德宗景皇帝梓宮奉移山陵。

己巳。予立山徐用儀許景澄聯元袁昶諡。

四月庚辰。命載振往日本。戴鴻慈往俄國。答謝派遣專使來送梓宮。

甲申。命各省財政統歸藩司。或度支司綜核。其餘一切局所。予限一年。次第裁撤。

五月甲寅。升允以奏阻立憲開缺。以長庚爲陝甘總督。

己未。楊士驤卒。以端方調補直隸總督。未到任前。以那桐署理。

調張人駿爲兩江總督。以袁樹勛署兩廣總督。

戊辰。開復前協辦大學士翁同龢原官。

丙子。諭以欽遵遺訓。皇帝自爲海陸軍大元帥。未親政以前。暫由攝政王代理。並先行專設軍諮處。以毓朗管理。尋又添派載濤管理。

命載洵薩鎮冰充籌辦海軍大臣。

六月甲申。奕劻請開去管理陸軍部事務差使。允之。

甲午。呂海寰以失察津浦路局員李德順李蓮英姪營私。開去督辦津浦鐵路大臣差使。以徐世昌代之。並派

沈雲沛幫辦。

丙午。以薩鎮冰爲海軍提督。

七月乙卯。頒行資政院章程。

丙辰。派張人駿爲南洋勸業會會長。

遣載洵薩鎮冰巡視沿江沿海各省武備。旋又至歐洲各國考察海軍。

丁卯。與日本訂立東三省交涉五案條款成。日本因安奉鐵路改築事。自由行動。交涉幾至決裂。至是。并

其他諸案及吉長借款契約。訂立條款完案。

八月己亥。大學士張之洞卒。贈太保。予諡文襄。

命戴鴻慈在軍機大臣上學習行走。以廷杰爲法部尙書。

庚子。以溥良爲察哈爾都統。葛寶華爲禮部尙書。

丙午。以九月初一日各省諮議局開議。降諭詰誠議員及各督撫。

九月丙寅。以鹿傳霖爲大學士。陸潤庠協辦大學士。

十月丁亥。直隸總督端方以恣意任性不知大體革職。端方因恭送梓宮。令人在隆裕皇太后行宮外攝影。爲人參奏。下部議革職。

調陳夔龍爲直隸總督。以瑞澂爲湖廣總督。

甲午。大學士孫家鼐卒。贈太傅。予諡文正。

十一月壬子。以玩誤要政。革甘肅布政使毛慶蕃職。

乙丑。以載澤爲督辦鹽政大臣。

丙寅。以陸潤庠爲大學士。戴鴻慈協辦大學士。李殿林爲吏部尙書。

十二月己卯。諭誠建言諸臣。不得懷挾私見。及毛舉細故。不知大體。

壬午。賞給游學專門詹天佑嚴復等進士舉人有差。

乙未。直隸各省諮議局議員孫洪伊等請速開國會。諭俟將來九年預備業已完全。國民教育普及。屆時

必毅然降旨。定期召集議院。

頒行禁煙條例。

壬寅。頒行府廳州縣地方自治章程。

癸卯。頒行法院編制法。

宣統二年庚戌。正月戊申。廣東新軍。因與巡警交闕起釁。革命黨乘機起事。爲防軍擊斃數百人。餘衆潰散。

辛酉。革阿旺羅布藏吐布丹甲錯濟寨汪曲卻勒朗結達賴喇嘛名號。時川兵至西藏拉薩。達賴喇嘛遁入印度。故黜其封號。

御史江春霖以奏參奕劻。斥爲莠言亂政。命回原衙門行走。

癸亥。戴鴻慈卒。予諡文誠。以徐世昌協辦大學士。

命吳郁生在軍機大臣上學習行走。

甲戌。定嗣後內文武滿漢諸臣陳奏事件。一律稱臣。

二月辛巳。鐵良因病乞休。允之。以廕昌爲陸軍部尙書。

山西交城文水兩縣人民因禁煙暴動。爲官兵勦平。

丁酉。汪兆銘等謀刺攝政王。事洩。被獲。命永遠監禁。

三月戊申。湖南省城饑民暴動。焚毀巡撫衙門及教堂學堂。

癸亥。裁奉天巡撫缺。

四月庚辰。頒行現行刑律。

甲申。以督辦鹽政大臣與各督撫互爭權限。均傳旨申飭。

己丑。頒行幣制則例。中國國幣單位。定名曰圓。暫就銀爲本位。以一圓爲主幣。重庫平七錢二分。另以五角二角五分一角三種銀幣。及五分鎊幣。二分一分五釐一釐四種銅幣。爲輔幣。圓角分釐。各以十進。永爲定價。

五月癸亥。諮議局議員孫洪伊等並各省旗籍各代表。請速開國會。諭仍俟九年籌備完全。再行降旨定期召集議院。

山東萊陽海陽縣人民因抵抗苛稅暴動。爲官兵殺傷數百人。

六月庚寅。命籌辦海軍事務大臣載洵充參預政務大臣。載洵考察歐洲各國海軍。於上年冬還京。是月。又往日本美國考察。

壬辰。梁敦彥因病乞休。允之。以鄒嘉來爲外務部尙書。

丁酉。諭飭各督撫慎選牧令。

戊戌。諭飭各部院堂官各省督撫。嚴治貪官污吏。並飭貴戚及內外大臣。敦品勵行。整躬率屬。

七月甲寅。命世續開去軍機大臣。吳郁生毋庸在軍機大臣上學習行走。以毓朗徐世昌爲軍機大臣。

以唐紹怡署郵傳部尙書。

庚申。革開缺江西提學使浙路總理湯壽潛職。不准干預路事。壽潛電軍機處。詆郵傳部侍郎盛宣懷。政府以爲措詞荒謬。予嚴譴。

甲子。大學士鹿傳霖卒。贈太保。予諡文端。

乙丑。設各省交涉使。

八月乙亥。以鐵良爲江寧將軍。

癸未。命沈家本充資政院副總裁。

己丑。命蔭昌兼充訓練近畿各鎮大臣。以鳳山爲荊州將軍。

辛卯。召集資政院議員。

甲午。命近畿陸軍均歸陸軍部直接管轄。裁撤近畿督練公所。

改四川鹽茶道爲鹽運使。並設奉天鹽運使。

乙未。以吉林等省清除種煙未淨。該督撫均交部議處。

丙申。以徐世昌爲大學士。李殿林協辦大學士。

戊戌。以營私岡利居心狡詐。革江海關道蔡乃煌職。

九月辛丑。資政院開院。監國攝政王臨院宣布訓詞。

甲辰。四川定鄉兵變。竄陷雲南中甸。旋被官軍勦平。

丙寅。袁樹助因病乞休。允之。以張鳴岐署兩廣總督。

十月癸酉。因各省督撫及資政院奏請欽頒憲法。組織內閣。速開國會。命縮改於宣統五年實行開設議院。並先將官制釐訂。預卽組織內閣。編訂憲法。並命各省代表卽日散歸。

甲戌。派溥倫載澤充纂擬憲法大臣。

己卯。以程允和爲長江水師提督。並命雲南提督張勳接統駐紮江南浦口各營。

十一月癸卯。改籌辦海軍處爲海軍部。以爲載洵海軍大臣。譚學衡爲副大臣。

裁撤陸軍部尙書侍郎等缺。設陸軍大臣副大臣各一員。以廕昌爲陸軍大臣。壽勳爲副大臣。

乙巳。派薩鎮冰統制巡洋長江艦隊。

丁巳。奕劻奏請開去軍機大臣要差。不許。同日資政院奏劾軍機大臣。命毋庸議。

癸亥。命民政部步軍統領衙門將東三省要求速開國會代表。送回原籍。並命各督撫開導彈壓。如有違抗。查拏嚴辦。

乙丑。奕劻奏懇開去軍機大臣等差。溫諭慰留。

十二月丙子。唐紹怡因病乞休。允之。以盛宣懷爲郵傳部尙書。

雲南大姚縣人民暴動。縣城失守。旋爲官軍勦平。

辛巳。資政院閉會。

癸未。派錫良陳夔龍張人駿瑞澂李經羲參訂外省官制。

乙未。頒布新刑律暨暫行章程。

派載振爲賀英君加冕專使。

戊戌。頒布宣統三年預算案。並命如實有窒礙難行之處。准由京外各衙門徑行具奏。候旨辦理。

廷杰卒。以紹昌爲法部尙書。

宣統三年辛亥。正月乙巳。因英兵佔踞片馬。命駐英大臣請英政府撤兵。中英滇緬界務。久未解決。上年

秋間。英派兵駐片馬。雲貴總督及雲南紳民屢請力爭。外務部命駐英使臣劉玉麟速與英政府交涉。

辛酉。因東三省鼠疫流行。命設法消弭。

乙丑。申諭各省停止刑訊。

二月乙亥。四川德格春科高日三十司改流。設邊北道登科府等官。並改巴塘打箭鑪爲巴安康定二府。設康安道。

丙戌。裁撤駐藏幫辦大臣。改設左右參贊。

辛卯。以溥倫爲農工商部尙書。溥頤爲熱河都統。

以世續充資政院總裁。李家駒充副總裁。世續奏辭。不許。

以劉若曾充修訂法律大臣。

癸巳。郵傳部尙書盛宣懷奏借日本正金銀行款一千萬元。訂立合同。

三月癸卯。頒全國軍隊訓練六條。

戊申。署廣州將軍孚琦被刺。孚琦至城外觀飛艇。爲溫生才槍斃。

甲寅。實授張鳴岐兩廣總督。

乙卯。度支部尙書載澤奏借英美德法四國銀行款一千萬鎊合同簽押。

庚申。錫良因病乞休。允之。調趙爾巽爲東三省總督。

辛酉。以趙爾豐署四川總督。王人文充督辦川滇邊務大臣。

丁卯。黃興等起事於廣州。燬總督衙門。被官軍擊退。死者七十二人。興走還香港。

四月癸酉。江蘇諮議局與兩江總督張人駿爭預算案。全體議員辭職。

甲戌。宣布因改定幣制振興實業。借英美德法四國及日本銀行款。並命該管衙門竭力慎節。不得移作別用。

戊寅。頒布內閣官制。設立內閣。以奕劻爲總理大臣。那桐徐世昌爲協理大臣。梁敦彥爲外務大臣。善者爲民政大臣。載澤爲度支大臣。唐景崇爲學務大臣。蔭昌爲陸軍大臣。載洵爲海軍大臣。紹昌爲司法大臣。溥倫爲農工商大臣。盛宣懷爲郵傳大臣。壽耆爲理藩大臣。均爲國務大臣。

裁撤內閣軍機處會議政務處。舊設內閣大學士協辦大學士。仍序次於翰林院。

設立弼德院。以陸潤庠爲院長。榮慶爲副院長。

設立軍諮府。以載濤毓朗爲軍諮大臣。

添派趙爾巽會同商訂外省官制。

己卯。因外務部與英使續訂禁煙條件。飭各省督撫迅將禁種禁吸禁運各事認真整頓。

宣示鐵路政策。幹路均歸國有。枝路准商民量力酌行。從前批准鐵路各案。一律取銷。如有抵抗。卽照違

制論。

庚辰。召集資政院第二次常會。

丁亥。資政院奏請開臨時會。議決借款預算兩事。不許。

戊子。以端方充督辦粵漢川漢鐵路大臣。

以本年秋季調集禁衛軍及近畿各鎮陸軍在永平府大操。派馮國璋充東軍總統官。舒清阿克西軍總統官。

壬辰。命停止四川湖南兩省鐵路租股。旋又允湖南京官奏請。停止因路抽收之米鹽捐及房捐。

五月辛丑。湖南巡撫楊文鼎代諮議局奏稱湘路力能自辦。不甘借債。奉旨嚴行申飭。

癸卯。署四川總督王人文代諮議局奏稱鐵路改爲國有。請飭暫緩接收。奉旨嚴行申飭。

戊午。宣布川粵漢鐵路收回詳細辦法。

甲子。頒布內閣屬官制暨內閣法制院官制。裁撤憲政編查館吏部等衙門。

六月丁卯。改訂資政院院章。旋即改定頒行。

丙子。都察院代奏直省諮議局議員請另行組織內閣。不許。時人民以皇族組織內閣。不合君主立憲公例。由諮議局議員呈請都察院代奏。奉旨以黜陟百司。係君上大權。議員不得干預。不許。

辛巳。皇太后因皇帝七月內在毓慶宮入學讀書。派陸潤庠陳寶琛授讀。並派伊克坦教習國語清文。以榮慶充弼德院院長。鄒嘉來充副院長。

辛卯。以禮部改設典禮院。以李殿林爲掌院學士。

閏六月己酉。頒行廣東禁賭條例。

壬子。因永平秋操。派載濤代臨。總監兩軍。

癸丑。命溥倫載澤會同宗人府纂擬皇室大典。

丁巳。調鳳山爲廣州將軍。以壽耆爲荊州將軍。

調善耆爲理藩大臣。以桂春署民政大臣。

廣東水師提督李準被刺受傷。傳旨慰問。

辛酉。命裁各省府治首縣。設立地方審判廳。

七月乙酉。命趙爾豐勦辦四川爭路人民。本月初。四川鐵路公司股東開保路大會。決議罷市。學堂亦停課。商民供德宗牌位舉哀。將軍玉崑總督趙爾豐等。聯名奏請川路暫歸商辦。政府不允。端方奏劾爾豐庸懦無能。朝旨命端方自湖北帶兵入川查辦。十五日。川人舉代表詣督署求阻端方兵。爾豐允爲代奏。旣而知朝意不欲轉圜。遂誘保路會會長鄧孝可、股東會會長顏楷、張瀾、及諮議局議長蒲殿俊、羅綸等。

入署拘禁。人民相率至督署哀求釋放。統領田徵葵命官兵開槍擊斃多人。及電奏至京。朝廷命爾豐嚴飭新舊各軍。相機勦辦。時近省各縣民團多爲官兵焚殺。死者甚衆。

戊子。命岑春煊前往四川。會同趙爾豐辦理勦撫事宜。春煊至武昌。與瑞澂議不合。稱病乞歸。會趙爾豐奏勦辦得手。朝旨許春煊還上海。

己丑。攝政王校閱禁衛軍。

八月丙申。稅務總司英人赫德卒。贈太子太保銜。

壬寅。奕劻奏請開去差缺。溫諭慰留。

庚戌。改鹽政處爲鹽政院。以載澤兼任鹽政院大臣。

癸丑。以接收湖北境內粵漢川漢鐵路。辦理迅速。瑞澂等傳旨嘉獎。

武昌民軍起。推第二十一混成協協統黎元洪爲都督。瑞澂遁。武昌漢陽及漢口鎮俱爲民軍所佔領。初。革命黨定期十八夜起事。先爲總督瑞澂統制張彪等偵知。捕獲數十人。十八夜。斬劉汝夔楊宏勝彭楚藩三人於督署前。電奏到京。朝旨嘉獎。十九夜。工程營起事。先奪楚望台軍械局。輜重營縱火攻督署。瑞澂倉皇登楚豫兵輪。張彪亦棄營遁。民軍遂佔武昌。分兵下漢陽漢口及兵工廠。推黎元洪爲都督。二十一日。朝命廢昌督兵兩鎮前往湖北。薩鎮冰督兵艦程允和督長江水師赴援。革瑞澂張彪職。仍令瑞澂

署總督。帶罪圖功。並停止秋操。又命各省緩裁綠營巡防隊。

丁巳。以袁世凱爲湖廣總督。岑春煊爲四川總督。均督辦勦撫事宜。

戊午。撤去王文川滇邊務大臣。以趙爾豐代之。又以端方署四川總督。

九月乙丑。資政院開院。派世鐸代臨。行開院禮。

湖南長沙民軍起。推焦昱爲都督。陳作新爲副都督。防營統領總兵黃忠浩死之。

丙寅。江西九江民軍起。推標統馬毓寶爲都督。

丁卯。陝西西安民軍起。推張鳳翽爲都督。

戊辰。廣州將軍鳳山被刺。鳳山到粵。甫登岸。至大南門外。爲炸彈轟斃。

己巳。以違法行私貽誤大局。革郵傳大臣盛宣懷職。以唐紹怡代之。

命趙爾豐釋放因爭路被捕士紳。並將王文趙爾豐交內閣議處。道員田徵葵等革職。遣戍有差。

貴州貴陽民軍起。推楊柏舟爲都督。

庚午。授袁世凱欽差大臣。節制各軍。以馮國璋總統第一軍。段祺瑞總統第二軍。召廕昌回京。

辛未。湖北民軍退出漢口。

壬申。山西太原民軍起。推協統閻錫山爲都督。巡撫陸鍾琦闔家死之。

瑞澂潛逃至上海。命張人駿派員拏解來京治罪。

癸酉。下詔罪己。

資政院奏請取消內閣暫行章程。不以親貴充國務大臣。允之。並允將憲法交資政院協贊。諭開黨禁。

雲南省城民軍起。推蔡鐸爲都督。統制鍾麟同布政使世增死之。

世續因病請開資政院總裁缺。允之。以李家駒爲資政院總裁。達壽爲副總裁。

以趙秉鈞署民政大臣。命桂春回倉場侍郎本任。

甲戌。江西南昌民軍起。推協統吳介璋爲都督。巡撫馮汝駉死之。

乙亥。以袁世凱爲內閣總理大臣。時奕劻載澤鄒嘉來等均自請罷斥。允之。命袁世凱組織內閣。以魏光燾爲湖廣總督。士王珍先行署理。

載濤罷。以廕昌爲軍諮大臣。

以奕劻爲弼德院院長。

長沙兵變。殺焦昱陳作新。推譚延闓爲都督。

丁丑。頒布憲法信條。擇期宣示太廟。先是。第二十鎮由奉天調赴前敵。至灤州。統制張紹曾與混成協統

藍天蔚等。電奏要求實行立憲。並憲法由議院制定。奏入。政府大驚。即命資政院起草憲法。是日。先行擬定憲法內重大信條十九條入奏。即命頒布。刊刻謄黃。宣示天下。

戊寅。命統兵大員。剴切布告。宣布朝廷德意。妥速安撫。俾皆曉然於朝廷實心與民更始。不忍再以兵力從事。又命各省統兵大員申明紀律。

庚辰。賞張紹曾侍郎銜。授爲宣撫大臣。赴長江一帶。宣布朝廷德意。

己卯。浙江杭州民軍起。推湯壽潛爲都督。

江蘇蘇州民軍起。推巡撫程德全爲都督。時江蘇之上海。亦先二日爲民軍佔領。推陳其美爲都督。

庚辰。署山西巡撫吳祿貞在石家莊被刺。祿貞任第六鎮統制。先與張紹曾等要求實行立憲。旋命署山

西巡撫。是夜在石家莊被刺。

釋汪兆銘等。

辛巳。廣西桂林民軍起。推巡撫沈秉堃爲都督。

壬午。安徽安慶民軍起。推巡撫朱家寶爲都督。

癸未。廣東廣州民軍起。推湖漢民爲都督。

福建福州民軍起。推統制孫道仁爲都督。總督松壽將軍樸壽死之。

任命袁世凱爲內閣總理大臣。資政院遵照憲法信條。選舉袁世凱爲總理大臣。故重行任命。海軍各艦歸附民軍。

甲申。以世續爲總管內務府大臣。

乙酉。毓朗罷。以徐世昌爲軍諮大臣。旋又命充訓練禁衛軍大臣。

山東省城紳士奏請獨立。推巡撫孫寶琦爲都督。

蘇浙滬民軍會攻南京。推徐紹楨爲聯軍總司令。時南京民軍謀起事。爲兩江總督張人駿南江提督張勳所持。第九鎮與防軍開戰。挫於秣陵關。統制徐紹楨退至鎮江。蘇浙滬各派兵會之。

桂林兵變。改舉陸榮廷爲都督。

奉天省城設保安會。奉天紳民謀獨立。因軍界不贊成。乃改設保安會。推總督趙爾巽爲正會長。旋吉林黑龍江兩省亦設保安會。各推巡撫爲會長。

丙戌。江西改舉彭程萬爲都督。

丁亥。命近畿各鎮及各路軍隊。並姜桂題所部。均歸袁世凱節制調遣。

戊子。派張謇等爲各省宣慰使。

命每省選派代表三五人來京。公共會議。以定國是。

王士珍因病請開去署任。允之。以段芝貴護理湖廣總督。己丑。安慶兵變。朱家寶出走。

庚寅。袁世凱組織內閣成。世凱既奉任命。屢辭不許。是日。入閣辦事。薦舉梁敦彥爲外務大臣。趙秉鈞爲民政大臣。嚴修爲度支大臣。唐景崇爲學務大臣。王士珍爲陸軍大臣。薩鎮冰爲海軍大臣。沈家本爲司法大臣。張謇爲農工商大臣。楊士琦署郵傳大臣。達壽爲理藩大臣。並以胡維德等爲各部次官。辛卯。以段祺瑞署理湖廣總督。

以升允署理陝西巡撫。督辦陝西軍務。

十月辛丑。四川成都民軍起。推蒲殿俊爲都督。

官軍復克漢陽。時官軍與民軍壘有戰爭。至是。漢陽復爲官軍所得。民軍退守武昌。壬寅。以克復漢陽功。賞馮國璋二等男爵。

端方至資州。爲軍士所殺。端方入川。聞湖北民軍起。謀北走陝西。所帶湖北軍士斬其首還鄂。癸卯。各省民軍政府舉伍廷芳爲外交總長。

甲辰。各省民軍政府公推鄂軍政府爲中央軍政府。

山東取銷獨立。袁世凱派張廣建吳炳湘至濟南。命署布政使及巡警道。聯合陸軍統制吳鼎元等。取銷

獨立。旋以廣建代孫寶琦爲巡撫。

乙巳。外蒙古庫倫宣告獨立。遂辦事大臣三多。

丙午。民軍攻取南京。張人駿等出走。

丁未。民軍推程德全改任江蘇都督。移駐南京。

河南巡撫寶棻開缺。以齊耀琳代之。以倪嗣沖爲河南布政使。幫辦軍務。尋又命兼署安徽布政使。

武漢南北兩軍議和。停戰三日。嗣又展期三日。

庚戌。監國攝政王載灃以醇親王退歸藩邸。

以世續徐世昌爲太保。

辛亥。命臣民自由剪髮。

壬子。袁世凱委任唐紹怡爲全權代表。與民軍議和。

以馮國璋爲察哈爾都統。

江西改舉馬毓寶爲都督。

四川成都兵變。改舉尹昌衡爲都督。

癸丑。以馮國璋充禁衛軍總統官。

以良弼爲軍諮使。

壬戌。唐紹怡與民軍議和代表伍廷芳等會議於上海英租界之市政廳。時又展停戰期十五日。嗣又展期七日。

山西巡撫張錫鑾帶兵至太原。時民軍山西都督閻錫山因兵單退駐平陽府。

十一月丙寅。四川成都民軍殺前川督趙爾豐。

安徽舉孫毓筠爲都督。

戊辰。廣東舉副都督陳炯明代理都督。時孫文歸國過香港。胡漢民從之至上海。

壬申。命開臨時國會。公決政體。時南北議和代表。因所主張政體不同情形。電達內閣。故降諭召集臨時國會。付之公決。而命內閣迅將選舉法妥議施行。

癸酉。各省民軍代表選舉孫文爲臨時大總統。時孫文甫自海外回國。十七省代表在南京投票公舉之。

丙子。中華民國臨時大總統孫文在南京就任。改用陽曆。以是日爲民國元年元旦。

江蘇舉莊蘊寬代理都督。時程德全因病不能視事。故舉蘊寬代理。移駐蘇州。

丁丑。袁世凱撤銷唐紹怡議和代表。紹怡與伍廷芳等在上海議定國民會議召集方法。電達北京。袁世凱不允承認。唐辭職。允之。世凱致伍廷芳電。謂嗣後應商事件。直接電商。

戊寅。民國各省代表選舉黎元洪爲副總統。

民國臨時政府成立。黃興爲陸軍總長。黃鍾瑛爲海軍總長。伍廷芳爲司法總長。陳錦濤爲財政總長。王寵惠爲外交總長。程德全爲內務總長。蔡元培爲教育總長。張謇爲實業總長。湯壽潛爲交通總長。

壬午。伊犁民軍起。推前任將軍廣福爲都督。將軍志銳死之。

辛卯。袁世凱途遇炸彈。未傷。

十二月辛丑。錫封袁世凱一等侯爵。世凱固辭不受。

李家駒開缺。以許鼎霖充資政院總裁。

己酉。陳夔龍賞假。以張鎮芳署理直隸總督。

丁未。軍諮使良弼被刺。良弼爲民黨彭家珍炸折一足。越二日死。

授袁世凱全權。與民軍商酌遜位條件。時段祺瑞等。電請速定共和國體。隆裕皇太后諭。朝廷何忍以一姓之尊榮。貽萬民以實禍。惟是宗廟陵寢。以及皇室之優禮。皇族之安全。八旗之生計。蒙古回藏之待遇。均應預爲籌畫。故授世凱全權。與民軍研究一切辦法。

戊午。隆裕皇太后下詔。率皇帝將統治權公諸全國。清亡。袁世凱與民國議和代表議定優待皇室八條。待遇皇族四條。待遇滿蒙回藏七條。隆裕皇太后屢召皇室會議。至是。決定下詔辭位。清自順治元年至

宣統三年。凡二百六十八年。

清史綱要勘誤表

頁數	行數	誤	正	頁數	行數	誤	正
一九	六	騰蛟	騰「蛟」	三七	三	順治	順「治」
八六	二	之昭	「以」昭	八七	一	王郡	「郡王」
八八	七	到部	「刑」部	九八	二	遺兵	「遣」兵
九八	一一	構蓬舍	「構」蓬舍	二一五	一〇	曾同	「會」同
二二〇	四	總管	總「督」	二七〇	二	博恆	「博」恆
三一三	一二	遣官	「遣」官	三五一	一二	辦辦	「協」辦
四二七	一一	出車	出「身」	四三八	一〇	左棠宗	左「宗棠」
四四〇	一二	命辦理	「命」辦理	四四五	一四	同文語	同文「館」
四五二	九	一貝勒	一「等」貝勒	四五二	九	官文	「文官」
四五七	二	太常事卿	太常「寺」卿	四七六	二	在典刑	「正」典刑

四七六	二	刺聽	「刺」聽	四九五	一一	有羞	有「羞」
五四二	一一	事詹府	「詹事」府	五五三	一三	義和拳	義和「團」
五五七	二	人京	「入」京	六〇四	一〇	士王珍	「王士」珍
六〇五	一三	湖漢民	「湖」漢民	六〇六	六	南江	「江南」
六〇六	九	保會安	保「安會」				

